

甌北詩鈔

趙翼著

甌北詩鈔

世界書局印行

# 汪序

余主庚午京闈。得一五經卷。才氣超軼。兼數人之長。二場所擬詔語。復極典雅。心知爲才士。亟取入解額。及榜發。則陽湖趙晉雲掾也。謁見時。布衣徒步。英氣逼人。目光爛爛如巖下電。叩其所學。自秦漢以來。詩古文源流。已皆窺涉津奧。遂延課兩兒子。余筆墨填委時。間亦屬具草。初猶遲跣。才不就繩檢。繼乃益肆力於古。嘗見其闈前人集。一過輒不復省視。然其中真氣息。真境地。已無不洞燭底蘊。間出一語評騭。輒如鐵鑄。覆按之。卒無以易也。以是所見愈擴。每數日。輒獲一進境。昔人所云。三日刮目。殆無以過之。已而官中書舍人。入直樞要。詔命奏劄。援筆立就。無不中窾會。余深倚其仗助。然君不自以爲能。退直之下。益沉思旁訊。以古作者自期。嘗一月中。作古文三十餘篇。篤各仿一家。示余。余爲指其派系所自。君輒以爲不謬。每相視而笑。計自庚午冬。客余邸。至今七八年。其所進。有他人數十年功力所不能及者。余所閱天下士多矣。若其心悟神解。舍筏登岸。則未有如君之捷且易者也。茲哀輯其數年所作詩。爲甌北初集。乞余弁其簡首。昔歐陽公一見蘇子瞻。卽許以出一頭地。度其時坡公所挾。不過如今所傳初發嘉州諸什。非有後來奇恣橫絕之觀。然已傾倒若是。蓋珠光劍氣。一見自有不能掩者。君以數年。卽足勝人數十年功力。英年荏發。來日方長。勿輟其勤。勿滿其志。吾安能測其所至哉。余孱劣。豈敢以廩陵自命。而君之取益多師。累進益上。則正未可限。他日才益老。學益厚。萬斛之泉。不擇地湧出。行將卓然成不朽業。如陳後山所云。一代蘇長公。四海名不已者。此集簡持其初發嘉州時也。乾隆二十二年丁丑二月通家生休甯汪由敦撰。

# 蔣序

吾友趙甌北觀察。自黔中解官歸。閑居奉母。以其暇寫輯平生所爲詩。約二千首。將付梓。郵寄示余。屬爲其序。嗚

呼。君可傳者不止此。而天下後世。苟資其言。尙論。舍是亦無以相見。君少負逸才。年二十餘。以諸生入京師。聲籍甚。旋舉京兆。官中書舍人。入直樞要。進奏文字。多出君手。每歲秋。扈從出塞。戎帳中無几案。君伏地起草。頃刻千百言。不加點。辛巳。以第三人及第。入翰林。名益爆。巧詩文者。戶履恆滿。君濡墨伸紙。無不滿其意而去。如李衛公。行雨。手中心一滴。平地一尺。又如左元放。斗酒束脯。萬人皆得周足。而器中酒脯自如。世咸以此服君。然君瘠而木強。雖以才爲諸鉅公所欽慕。而杜門一編。條然自遠。其於榮利泊如也。既而出守鎮安。調廣州。擢貴西道。所至絕苞苴。勤撫字。能不負所學。中間嘗奉命赴滇。在征南幕下。參軍事。短衣匹馬。出入蠻烟瘴雨中。帷幄借籌。多所贊畫。事竣回任。口不言勞。及以讞獄事。聖史議。天子稔君才。特命引見。而君以太恭人。春秋高。乞假歸里。修潔白之養。今且五六年。不汲汲於仕進。統君生平出處。蓋庶幾不愧爲完人。此豈僅僅以詩文自表見者哉。然君詩則自出都後。且益工。蓋天才踔厲。其所固然。而又得江山戎馬之助。以發抒其奇。當夫乘軺問俗。停鞭覽古。與酣落筆。百怪奔集。故雄麗奇恣。不可逼視。雖欲不傳。不可得也。余與君相識。在甲戌會試風簷中。已而同官中書。先後入詞館。九衢人海。車馬喧闐。吾兩人時復破屋一燈。殘更相對。都無通塞升沉之想。今握別十餘年。而大集之序。不以他屬。而以屬余。蓋以酸鹹之嗜。兩人有同味焉。關河迢阻。良晤爲難。何日更得剪韭細論。開口而一笑也。昔乾隆四十二年丁酉二月同年弟鉛山蔣士銓拜撰。

## 袁序

晉溫嶠恥居第二流。而耘菘觀察。獨自居第三人。意謂探花辛巳。而於詩則推伏余與蔣心餘二人故也。夫以耘菘之才之高。而謙抑若是。疑是譎語不足信。今年以甌北集來索序。擷之。祇心餘數行。而他賢不與焉。然後知耘菘于余。果有偏嗜耶。抑其詩別有獨詣之境。己不能言。他人不能言。必假余與心餘代爲之言耶。嘻。余與心餘之詩之所以然。俱不能自言也。又烏能言耘菘哉。然去春過南昌。心餘病。握余手。誦詩序。一如耘菘。擷卷首一序。

并無。然後知此二人者。交滿海內。而孤脫隻視。惟余是好。然則余雖衰。殆不許其嘿嘿然。竟以不言已也。今夫越女之論劍術。曰妾非受於人也。而忽自有之。夫自有之者。非人與之。天與之也。天之所與。豈獨越女哉。以射與奕。奕與秋。聰與師曠。巧與公輸。勇與賈育。筆與西施。宋朝之數人者。俱不能自言其所以異於衆也。而衆之人。方且彎弓鬪棋。審音習斤。學手搏。施朱粉。第日夜追之。終不克有此數人於萬一者。何也。耘菘之於詩。目之所寓。即書矣。心之所之。即錄矣。筆舌之所到。即奮矣。稗史方言。龜經風序之所載。即闕入矣。李衛尉之營陣。隨虞可置也。熊宜僚之丸。信手可弄也。而忽正忽奇。忽莊忽俳。忽沉摯。忽縱逸。忽即虛而逞臆。忽數典而鬪靡。讀者游心駭目。碌碌然。不可見町畦。或且規唐摹宋。千力萬氣。以與之。卒之騁驥追日。未暮而日已在其前。所以然者。又何也。嗚呼。此皆羿與秋。師曠。公輸。賈育。西施。宋朝之所不能言。而唯越女能言之者也。余之爲耘菘言者。亦止此而已矣。或謂耘菘從征滇徼。官海南黔中。得江山助。故能以詩至。余謂不然。世之行萬里。歷險艱者。或十倍焉。而無加於詩。如故也。或惜耘菘詩雖工。不合唐格。余尤謂不然。夫詩甯有定格哉。國風之格。不同乎雅頌。臯禹之歌。不同乎三百篇。漢魏六朝之詩。不同乎三唐。談格者將奚從。嘗平楊誠齋之言曰。格調是空閒架。鈍根人最易藉口。周樛園之言曰。吾非不能爲何李格調。以悅世也。但多一分格調者。必損一分性情。故不爲也。玩此二公之言。益信耘菘之所以長處。余不能言。耘菘之所以短處。余轉能言之。此即耘菘之所以謝卻他人。而必亟亟焉以詩序見。歸之本意也。乾隆五十年乙巳夏五隨園老人袁枚序。

## 王序

曩庚辰。與耘菘訂交。塞山行轡中。握手談藝。甚盛。明年。耘菘第三人及第。領史職。公私事冗。不得恆會合。比予奉諱南歸。別已二紀矣。耘菘則從詞垣。特簡爲廣西鎮安郡守。會大軍征緬甸。又奉命從大將軍果毅阿公出邊。及回任。調守廣東之廣州府。又擢貴州貴西道觀察。歸田以來。編刻所爲詩。約二千篇。寄予序之。予維誦一周。其在

朝之作。所交之友。皆吾友。所歷之境。皆吾境。予語所不能道者。耘菘若代吾道之。老病局縮鄉里。顧瞻玉堂。如在天上。今乃舊遊歷歷。影現心目。省憶生平。欣然以喜。其出塞之作。境奇。詩益奇。皆人耳所未聞。目所未覩。恍挾我之尻輪神馬。而翔翔乎萬里之外。快矣哉。鄙吝爲之頓消。而神智爲之頓擴也。吁。詩之道大矣。非才與境相遭。則無以發之。耘菘之才。俊而雄。明秀而沉厚。所得於天者高。又佐以學問。故言之短長。與聲之高下。皆宜。略言之。不見其促。繁言之。不見其碎。淺言之。不見其輕浮。深言之。不見其鬱悶。當其得意。如關河放溜。瞬息無聲。又如太阿出匣。寒銑百道。茲非其才爲之與。而不知其妙緒獨抽。排粗入細。正多賦旨妍思。溢乎文句之外。而未嘗徒以馳騁爲能事也。且耘菘之境。則又異甚。夫在廊廟臺閣。則有應奉經進。頌禱密勿之詩。在軍旅封圻。則有贈酬告諭。紀述揚厲之詩。在山林田野。則有言情咏物。閑適光景之詩。茲數境者。人鮮克兼之。若耘菘既兼之矣。承恩僊渥。敷歷中外。出處兩得。有境以助其才。有才以寫其境。而耘菘之詩出焉。能不爲近時一大宗哉。予胸臆結約。固無奇也。投老一壑。泥水自蔽。日以頽惰爲之。曳屣卻走。退舍避之矣。若夫水邊林下。扶杖逍遙。與耕夫漁父。歌咏太平。此予近年所得也。而今此境。則又爲耘菘所兼。予又何能測耘菘之所至耶。乾隆乙巳長夏。同學弟王鳴盛西莊氏拜讓。

## 錢序

昔嚴滄浪之論詩。謂詩有別材。非關乎學。詩有別趣。匪關乎理。而秀水朱氏譏之云。詩篇雖小技。其原本經史。必也萬卷儲。始足供驅使。二家之論。幾於柄鑿不相入。予謂皆知其一。而未知其二者也。滄浪比詩於稗。估估於流。派較其異同。詩家門戶之爭。實啓於此。究其所謂別材別趣者。只是依牆傍壁。初非真性情所寓。而轉蹈於空疎不學之習。一篇一聯。時復斐然。及取其全集讀之。則索然盡矣。秀水謂詩必原本經史。固合於子雲讀書萬卷。下筆有神之旨。然使無真材真趣。以驅使之。則藻采雖繅。臭味不屬。又何以解祭魚點鬼。疥駭罷掉書袋之誚乎。夫

惟有絕人之才。有過人之趣。有兼人之學。乃能奄有古人之長。而不襲古人之貌。然後可以卓然自成爲一大家。今於耘菘先生見之矣。耘菘天才超特。於書無所不窺。而尤好吟詠。蚤年登薇垣。直樞禁。游翰苑。應制廣和。頃刻數千言。當守已有才子之目。及平出守邊郡。從軍漢徵。觀察黔西。簿書填委。目不暇給。而所作益奇。而工。歸田十數年。模山範水。感舊懷人之詞。又日出而未有艾也。最耘菘所涉之境。凡三變。而每涉一境。卽有一境之詩。以副之。如化工之賦草木。千名萬狀。雖寒暑異候。南北殊方。枝葉無一相肖。要無一枝一葉。不相相然。含生趣者。此所以非漢魏。非齊梁。非唐。非宋。而獨成爲耘菘之詩也。或者以耘菘老於文學。在宋朝。循資平進。卽可升秩槐棘。且在方面。有循良聲。不久當膺開府之寄。乃退而以詩自名。疑若未展所抱者。予謂古人論三不朽。以立言居立功之次。然功之立。必憑藉乎外來之富貴。無所藉而自立者。德之外。唯言耳。姚宋郭李諸公。非身都將相。則一田舍翁耳。吾未見言之次於功也。書有一卷傳。亦抵公卿貴。耘菘嘗自道之矣。知難而退。從吾所好。耘菘蓋自信其材。其趣其學之足傳。而不欲兼取。以托於老氏之知止焉耳。試質之耘菘。其以吾言爲然乎否。乾隆庚戌四月既望。同年弟嘉定錢大昕序。

## 公羽序

語有之。心之精微。口不能言也。豈以時易過而境不留耶。吾嘗疑之矣。白傳之於元相也。格調既合。工力亦相埒。而其言曰。伐石者觀剡迹。發矢者聽弦聲。兩公之心力。必有專至微妙。而不易以告人者矣。歲己卯庚辰間。予與耘菘先生。鄰居寄園舊址。日夕過從。譚藝。癸未春。同校藝禮闈。夜聞君吟嘯聲。與諸桐嶼聯句。至百韻。達旦相示。才氣橫溢。辟易萬夫。比出闈數日。耳側猶作砉訇砉儻聲。欲出一二語以舉似之。而竟未得聞。後八年。予視粵東學政。而耘菘守廣州。辛卯秋。遷貴州兵備道。將受代。未行。一日。獨與畫師吳水雲。買小舟。探羅浮華首。冲虛諸勝。予時試諸郡舉。日坐使廨藥洲上。想君詩思。踟躕在海天雲石間。亦欲於贈行時。題記數語。又未得遂也。今耘菘

之詩。哀然成帙。既登於梓者。二十七卷。郵寄示予。且屬以一言。君方掌教邗江之上。而予於二千里外。披誦前後諸什。坐臥不能去。宜有以發揮集中之所得矣。然旬日以來。把卷馳騁。如見先生雙眸射人。搖袂撚髭於烟月之間。而其詩境。肆元奇宕。音在空外。昔人評魯公書。力透紙背。與褚河南書。用筆高出紙上寸許者。其理正同。吾安得執一解以印定之。所謂欲着言詮。輒落邊際。視往日之匆匆未暇舉似者。又不同也。它日晤耘菘。對案伸紙。必有所以相質者矣。乾隆歲次乙巳秋九月既望。同學弟大興翁方綱拜書。

## 吳序

成詩易。成家難。成名家易。大家難。一篇一聯一語之傳。流播人口。有發篋而視之者。澌然盡矣。小集中集總集之傳。抄撮人手。有奪幟而樹之者。退然沮矣。有如海之才。而又深之以學。讀萬卷。行萬里。耳目睹記之所及。心思智計議論之所發。皇推倒開拓。惟我所向。一編既出。使人不名我以家而不得。亟名我以家而不得。而家於是乎成。成於是乎大。陽湖趙君耘菘。爲予館閣前輩。壇坫所至。辟易萬夫。聞閣以來。兩更歲甲。其間江山之涉歷。風土之揚擁。士馬芻糧之譏議。與夫量移遷擢。諗養歸棲之迹。一一發之於詩。因合向所爲詩曰。顧北集者。刻成示予。而徵序至再。予以君有老年不向人求序之句也。又以松泉少師序之二十九年以前。心餘編脩序之九年之前。既傾倒推挹。而無可以贅說也。姑以其名集之義測之。或曰。交趾。周駱越。秦時曰西甌。或曰。今珠厓儋耳。古謂之甌人。君以領郡兩粵間。勞心撫字。不忍忘其地。或曰。古卜相故事。書姓名。覆之金甌而探之。君早直機庭。爛內制。既入翰林。天子檢其名姓。俾守鎮安。贊定邊將軍。永昌幕府。調廣州。擢貴西道。故雖以疾告。而不敢忘其用。或曰。唯否否。君智計如鷗夷。談吐如滑稽。其以名集。猶之缶鳴甌。甌洞。而甌北則猶之硯北也。甌之材。徵諸土。候諸火。其以爲深盃者。從方言。陳魏宋楚之間。謂之甌。自關而西。謂之甌。其大者謂之甌也。其以爲小盃者。從方言。滄甌謂之盃。其小者謂之升甌也。甌於缶爲大。而許叔重專以容升之甌當之。猶爾雅甌甌謂之甌。注甌甌小甌。長沙



謂之甌。不知甌甌固培塿之轉。而甌從區。區實四豆。豆實四升。不得概以謂小。若甌若壘若瓶。雖屬缶。而亦冶金爲之。在埴之上。惟陶者之所甄。在鏐之金。惟冶者之所鑄。君之爲詩。各隨乎濃淡奇正短長高下之宜。而有以極其致。屈步之蟲。漫畫之鳥。予方內愧。而不敢以報焉。然予不能有大家之才之學。而心易夫名家。讀近時諸家詩。如君者。不一二數矣。茗香酒熟。手是編而細論之。君其不以予爲甌脫而棄之也夫。乾隆乙巳六月二十一日。館侍南匯吳省欽撰。

## 祝序

房師趙耘菘先生。刻向者所爲詩二十四卷成。名曰甌北集。於己亥春郵示。越三年。又益以近藁三卷。命德麟事校讐之役。竊惟先生生平所歷。當其直樞要。遊翰林。致身清華。廣賜盛際。以及諛養歸棧。絮膳之暇。歌咏太平。其詩之工且多。宜也。若夫出守兩粵。備兵黔中。從軍滇徼。簿書填委。戎馬倥傯。而亦不廢詩。若寢饋之於人。有一日不可離者。嗚呼。可謂好之篤。爲之專矣。既三復卒業。客有過余而論先生之詩。余告之曰。先生之詩。茂矣美矣。廣矣大矣。夫其鏐鏐訓典。翔集子史。原本山川。極命草木。先生之閱也。毛嬙西施。去之鉛黛。名葩異萼。助之月露。先生之麗也。論世知人。雕繪萬象。依經立義。折服五鹿。先生之辨也。司契因心。鍊剛繞指。彎弓不發。惜墨如金。先生之謹也。其志廉以潔。其辭安以舒。其風骨藻耀而高翔。其神采綺交而脈注。今之作者。蓋莫之或及也。客曰。今之作者何如。余曰。方今矢詩遂歌。雅材輩出。人人握靈蛇之珠。家家抱荆山之璞。然其弊有二。一在好奇。一在鬪靡。好奇者。索隱行怪。往蹇來連。妃豨膠吻。腐鼠嚇雞。則失之愚也。鬪靡者。釘言餽韻。假寵乞靈。樹蘭不芳。刻木無氣。則失之僞也。先生之詩。有一於是哉。客曰。子得毋獻諛師門乎。夫連城之璧。或指微瑕。千里之駒。亦聞蹶足。甌北之詩。傳則必傳矣。而亦不無可議者。子何揚榘之甚也。余請其說。客曰。甌北之詩好見才。余曰。韶蕩之樂。不以孤籟成均。富貴之花。不以單跗耀采。先生非好爲馳騁也。博平文而已。客曰。甌北之詩好論駁。余曰。孟子之言。盡信

書不如無書。莊生之論。以指喻。不若非指。先生非好爲攻擊也。主乎理而已。客曰。甌北之詩好詼笑。余曰。左氏作傳。不盡莊言。東方載牘。善於諧謔。先生非好爲嘲弄也。涉乎趣而已。客曰。是則然矣。然甌北之詩。雖沿溯乎漢魏六朝三唐。而其得力。則似專在宋人焉。余曰。若子之言。是真非能知先生者。夫詩本性情。不尙流派。學宋人詩者。大率多纖縟滑利之習。麤厲噍殺之音。其於三百篇溫柔敦厚之旨。或遠焉。今先生之詩。具在。子試取而讀之。館閣諸什。非卷阿之矢音乎。軍旅諸什。非新田之起興乎。貴西諸什。非四牡之懷歸乎。歸田諸什。非衡門之樂饑乎。至於風雨以思君子。伐木以求友聲。鶴和以納規誨。原本三百篇。出其和平大雅。於羣音繁會之日。不斤斤求合古人。而自無不合。且有超古人之意表者。何必漢魏六朝三唐。又何必不漢魏六朝三唐也。客始不能對。逡巡辟席曰。微子之言。無以開鄙人之惑。某雖不敏。願終身而事之。客既退。敬書所論列者。跋於先生集之後。乾隆乙巳秋八月既望。受業祝德麟謹序。

## 李序

雲崧先生。既刻其甌北集三十三卷成。海內爭先快睹。既不脛而走矣。門下承學士。復請先生之詩之論。定於當世者。并剖劘之。以標向往指示之準。先生重違多士意。哀集編次。得全集十之五。而分體錄之。並命保泰繫以言。保泰學殖淺陋。不足知先生之深。而一時巨公長者。揚拔先生之詩。并諸集端者。推挹先生之才。學甚備。保泰何足爲先生言。然先生先後主安定講席數年。保泰得晨夕過從。從容談藝。與聞揚扞之旨。因以窺先生之用心。不直進古人不止也。今夫大輅之不復爲椎輪也。膏梁酒醴之不復茹毛飲血也。上棟下宇之不復穴處也。夫人知之矣。天地之運。積而不窮。風氣之新。推而日出。試以三百篇律漢魏。則漢魏異矣。又以漢魏六朝律唐宋作者。則唐宋又異矣。日月終古。光景常新。新一言。亦文章氣運之不得不然者也。優孟之似叔敖。虎賁之似中郎。叔敖中郎。卒不可得。使天下相率而爲優孟虎賁之續。豈待五尺童子而後識其非哉。歷觀前代詩。其卓然能名一

家者。莫不各有精神貫注。而面目各不相襲。先生總括源流。默識神理。大指在自出新意。不斤斤於格調。正如李伯時畫馬。所謂天閑萬廐。皆吾師也。而實無一字蹈襲。嘗有論詩三言。曰。句中有意。句外有氣。句後有味。亦可知先生詩之所自矣。分體成集。屢見前代王李諸家。類各爲體。體自爲卷。如牆而進。層見疊出。不回易於耳目之前。而其中得失醇疵。毫不能揜。則又有因難見巧者。集中七律尤多。是編持擇特嚴。心之精微。口不能言也。讀者合甌北全集觀之。知先生精心孤詣。直躡古作者堂奧。白太傅老嫗能解。蘇長公嬉笑怒罵。當別得之。牝牡驪黃外。而於世之譽先生。與議先生者。均無與也。然非真能讀先生詩者。又鮮不以爲賁諛也夫。乾隆五十六年。歲次辛亥。四月望後三日。寶山後學李保泰拜跋。

## 張跋

己卯歲。別雲崧先生於都門。忽忽三十餘年。今來相晤揚州。得盡讀先生所刻甌北詩集三十三卷。奇思壯采。驚心動魄。無一意不創。無一語不新。信古來未闢之詩境也。而先生以卷帙繁多。屬余料簡。余惟先生詩。引入入勝。讀者方恐其不多。奚事過爲刪節。惟斯集乃隨年編次。古今體。散布於卷帙中。長篇短章。參差錯出。尙難使各體精神。一一顯露。不如分體刻之。則一體有一體之工力。承學之士。得易識指歸。且交遊中。如袁簡齋明府。祝芷堂侍御。李喬生郡博。皆於斯集有深嗜。加以評點。語極精當。應并刻之。以誌一時詩文交契之雅。兼令讀者益醒眉目也。先生欣然諾之。遂命余與校訂之役。刪存舊刻十之五六。分體重編。名曰甌北詩鈔。并載諸君子評語。而鄙見謬商之處。亦附一二焉。刻既成。謹誌其顛末。鉛山張舟廉船謹跋。

## 趙序

夫奕秋對局。懸泪聽於吹笙。隸首握竿。戒紛心於擬鶴。欲求舉世之賞。必有顛門之詣。然崇巖孕靈。良珠不因而

託體陽風扇和。瓏葩詎從而舒色。冰水送化質殊凝釋。鐘鼓既考。感分憂怒。禮鹽八簋。雖饜五味之用。元黃布采。各成三就之功。彼能傳之無疑。皆得性之所近。詩歌之道。不其然與。吾族雲松先生。天生異才。少有奇氣。成都難一壠之業。厥次足三冬之用。租船詠史。室囊貯詩。馬卿遊梁。著子虛而始顯。蕭生射策。得甲科而斯稱。迴翔西掖。之邃。出入東觀之秘。紅藥翻倒。香芸在書。分其餘裝。足了十人。出其新弓。盡傾一座。中禁亦聞詞藻。當宁旋試吏才。叱馭天關。紆紘地軸。一麾出守。方興謠於袴襦。六月行師。快從戎於書劍。上公虛席。賓佐盍簪。彌正平之筆札。實獲我心。劉穆之之視聽。不疲肆應。墨常浮于盾鼻。句已滿乎弓衣。彬彬乎。有折衝之風焉。經緯之略焉。露版載宣。薦牘交上。過貪泉而便酌。約繹淨而終到。不爲郢都之鷹。惟隨閣道之鶴。七十二峯之寺。幾遍紗籠。九十九溪之水。遂臨繡服。蓋仕至大察。官不爲不高。績考六載。時不爲不久也。俄以鞠獄舊讞。微呈吏議。天子眷念。錫勳。方切需用。而先生念太夫人春秋高。遽請歸養。年裁四十六兩。陵華彌絜。逕鞠無怠。侍奉之暇。怡情枕藉。著有餘叢。攻一書。頗極蒐討之富。然雖隨方以滲漉。而尤究意于比興。第其詩集。都爲若干卷。先付剞劂焉。冥心狀物。精義入神。濟瀾倒海。四瀆不能息肩。奴僕命騷。六經皆我注脚。雖將兵。忽新壁壘。士行取材。無遺竹木。碎金必更鼓鞀。積玉遂以成山。得諸助者既優。入於古也獨至。昔樂大揚馨於唐室。務觀奮迹於朱朝。先生揮灑其間。始堪鼎足乎。後進之士。翕然旋風。有目咸賞。不脛而走。書之萬本。免類以何辭。傳之四方。入維林而增價。可謂斯道之龍鬣。別集之冠冕矣。或曰。世人論詩。多宗初盛。先生不卑宋格。自名一字。靡得乎中。將非其至。不知子質。施文。繇乎運會。楚謠漢同。發乎胸臆。襲中郎之貌。猶然虎背。畫畫臺之人。詎規麟閣。豈許身稷。遂誇草堂。復生。託意神仙。便謂長庚不死哉。或曰。儒者不朽。首期立功。先生身出樞要。久膺奇遇。使其敷歷。當致節旄。而迺歸仕。歸田坐消耆艾。篇章雖贍。居諳可惜。是不然。令名壽考。古有難兼。山林鼎鑪。事非一致。沈仲遠之知命。恨其泰。王叔明之宦情。思之爛熟。讀十年之書。富于陶頓。傳一卷之文。榮于台僕。孰得孰失。夫人辨之也。懷玉。辭綆。力辭廷。鄭莊少喜交游。及攀大父之行。息明樂數晨夕。垂接比鄰之近。語君臣之際。書慙負腹。共醜鹹之好。漏時

在手謂堪適道。綴評定文。所歷護託。遂逾歲月。千穰義說。自有名山之藏。一辭贊寫。緣爲青雲之附。云爾。後孫懷玉拜序。

### 題辭

謁趙雲祿觀察歸復展讀甄北集爲長歌奉簡

張雲致仲雅

讀詩未與公相見。但識性情不識面。見公復讀公詩。面目性情纔一片。今人不敢薄古人。真可愛。古今何必分兩界。公身本與今人居。公詩早入古人派。有時飄而雄。直上闔闔排大風。搏桑日紅九州曉。千門萬戶開漢宮。內有鼓鐘隱隱。羽葆童童。望之不可見。疑在五色雲氣虛無中。有時奇而險。摩厲以須刃。將斬語如齋。請未易測。勢比岳軍那許撼。大眼睛高鑿鑿。沈光肉輕透空閃。臨崖能垂二分止。殺賊全憑一身膽。紛紛餘子舌盡擗。空令有口開不敢。先生笑把降卒驅。四十萬人歸入坎。有時奧而博。百室廿一史。一一悉騰躍。綿被龍孝標。寸莖疏沈約。牟陽地惟崔躋知。長頸事疑劉杳作。呂蒙讀易嘆相語。崔浩爭義鬼爲愕。戴憑五十層屋重。長謙八千紙非略。豈徒割錦界邱壘。定教開口唾鄭灼。以公較之更綽綽。恨無西崑箋。敢將論衡擲。讀之往往如異書。疑入鄉壤之洞穴。祿閣數其大者已難朽。其餘衆家之長無不有。開卷不知誰好醜。但見少陵聖。青蓮仙。長吉鬼。玉川怪。都來行間絡繹而奔走。讀詩我惟有一口。作詩公如有十手。不然何以使我披之不及。覽之不盡。只向空中亂點首。玉堂仙人剖符竹。更抗顏行換均服。壯士帳中頭作枕。參軍營前血書臆。酒杯熱散鬼門雲。臥甌冷藉尸陷肉。虎牙兵代錦囊奴。羊皮紙寫繞歌曲。蠻姬織句馬前看。戰鯁聽詩山下哭。公詩萬怪已惶惑。奇境又復叛其局。我讀公詩不敢熟。只恐常在胸臆間。定有戈矛森森穿我腹。天生人物自有數。袁蔣同時名共著。不能相越但楷拄。騎園老人幸早作前輩。故得先公占聲譽。西江太史知鼎分。掉頭竟爾修文去。我曾見袁未見蔣。如斯之人豈輕遇。吁

嗟乎。如斯之人。豈輕遇。自合同將五體投。屏圖絲繡黃金鑄。不知何物狂書生。長揖向公母乃倨。桐鄉程孝廉拱  
奕蔣圖。謂公及簡齋心餘  
爾太史也。事見集中。  
字畫拜袁揖趙

拱字少時喜讀簡齋雲崧心餘三先生詩。嘗欲繪三人真。張之座右。未果也。他日讀甌北集。見有古詩一首。題曰得子才書。述拱字曾手繪拜袁揖趙奕蔣圖。此不知何人所傳。果若此。亦佳話也。行當作一圖以竄其事。先次韻奉答。

程拱字春廬

通人之喙亦浪置。叔子不知銅雀妓。庸人之耳或有徵。楊億也知金馬士。千竿究不敵一狐。賢者夷然有深思。伏波牀下非所私。中郎帳中自有秘。拜袁揖趙奕蔣圖。錯傳何必非初意。攝具會聞延不疑。屠刀豈礙驕無忌。能容揖客有幾人。詎謂應輸一頭地。先生句法開一代。天生二豪結詩契。長濤落紙奔海若。飛霆走筆驚山魅。袁絲序齒本兄行。蔣詡論交亦肩次。譬如海上三神山。望者奚能定軒輊。豈惟長揖不自量。正恐下拜何容易。謬語竟作佳話傳。後生忽漫前賢繼。一錢不值程不識。又手何來吁可異。先生付之一笑粲。更復引我升堂臂。隔江二老詩筒中。早聞傳此一段事。舊圖他時手待補。長歌此日聲先倚。帳前輟洗進儒冠。遂使高陽有生氣。壁間政容起歡息。始覺細柳非兒戲。能令一揖重泰山。古來信有知己淚。藏園化去隨園老。圖與先生千載寄。定知供養纏花鬢。呼作玉皇香案吏。

# 甌北詩鈔

## 五言古一

### 古詩十九首

人日住在天。但知住在地。天者積氣成。離地便是氣。氣在斯天在。豈有高低異。試觀露生草。蓬勃暢生意。有屋以隔之。不毛便如雜。乃知地與天。相距不寸計。人生足以上。卽天所涵被。譬如魚在水。何處非水味。世惟視天遠。所以肆無忌。

五色石補天。幻語滋世惑。豈知語非幻。理可推而得。五金在石中。緣古人莫識。女媧辨物性。煉之以火德。其色恰有五。青黃赤白黑。制器旣必需。生財亦不測。用濟天缺陷。功在彌縫隙。是謂石補天。非天有破裂。

名山有瀑布。噴出萬仞巖。若謂水就下。其源應自天。及探所從來。仍自地底旋。乃知氣所鼓。潤下亦上緣。君看咳嗽處。津涎升丹田。最高莫如首。亦有血似泉。樹根入土深。液仍滿枝顛。

五行性各殊。惟火最英烈。遇剛必柔之。汁金而灰石。又使柔者剛。淖泥炙成甕。所秉只陽明。陶鑄見神力。古來豪傑流。誰不本此德。不爾當艱鉅。何以有豎立。奈何世風趨。脂韋日成習。徒誇圓而神。已愧生也直。所以有志士。耿耿一腔熱。與爲劉棉彈。甯作石爆裂。

蟲爲人所生。生卽向人食。人亦天之蟲。日與天相賊。豈惟口體資。幾竭造化力。黃金鍊汞成。白玉剖璞得。直使天所儲。無處可藏匿。問天亦何爲。生此衆蠢賸。由來化者機。亭毒固不息。兒生母已乳。蠶生桑已葉。生之斯養之。未嘗有德色。是知上益下。本屬自然則。所以慈父多。孝子十不一。

維人與萬物。同生天地內。弱肉強之食。不知始何代。魚鼈入水求。雉兔入山採。戕彼百族命。供我一尺喙。佛氏嚴

戒殺。此心固難昧。乃自洪荒來。相沿竟不廢。五雞二母處。王政所特載。膾細孔不厭。庖遠孟善對。將無物養人。本天意所在。於物何太忍。於人何過愛。此理不可問。思之動深慨。雖慚犧用麩。聊減羊踏菜。庶幾節嗜慾。略少我心痲。

惠迪從逆凶。此以常理訓。若在塵劫時。未可一概論。試思一代興。殺人若屠豕。翻藉誅戮慘。肇啓昇平運。接以陰隲理。顛倒安可問。由來天地間。惟氣所摧振。當氣有衰旺。何論理逆順。李堂偃月深。秦閣格天峻。悉保祿位終。世謂報施素。豈知得氣厚。天亦難下刃。吾言偶到此。毋乃近乎忿。君子守其常。終當安素分。

生人與死鬼。同此世界內。人以夜爲暗。鬼以晝爲晦。各自路一條。並行不相礙。奈何世人愚。心自生魑魅。目所不見處。輒疑有鬼在。人不識鬼狀。鬼豈睹人態。有客來詰余。斯言毋乃憤。人若不畏鬼。益將肆狂悖。吾意豈不然。正爲此等輩。明明白白中。頭上有天戴。戴天不畏天。但畏鬼加害。此意則已疎。舍明求諸昧。人自有人道。俯仰見覆載。

謂性有可移。橘過淮則枳。謂性有不變。鷹縛繚亦喜。聖言性相近。其說渾渾爾。孟氏救世深。特標性善旨。眼白識王敦。面青識盧杞。一見定其人。終身弗改徙。藉非有性惡。何以驗若此。後儒強爲詮。分別氣與理。既名之曰性。理早落氣裏。舍氣而言理。又一重障矣。

古人用錢幣。銀錠宋始行。古人衣絲枲。棉布元始成。其物古已有。時至始見榮。何況人爲者。後出技益精。硝磺製火藥。世乃無利兵。玻璃琢眼鏡。世乃有老明。此又昔所無。今且遍八瀛。由來利用物。亦隨時會呈。當其機未啓。雖聖難預迎。及夫爲用廣。聖亦不能更。

先聖治天下。因俗制典禮。其有未盡善。原弗禁改毀。卽如祭用尸。雖云求諸似。祖父拜兒孫。究未協於理。井田各百畝。養民意本美。安能禁人間。一父只一子。俗儒識拘墟。硜硜守故紙。或言古制非。攻者輒譏起。豈知窮變通。聖人固云爾。爲語魯兩生。勿膠成見鄙。



儒者好闢佛。斥爲異端異。豈知佛與儒。各有其極至。東方主生長。其聖亦生意。立教因人情。食色咸得遂。但隨事設防。發情止禮義。西方主肅殺。其聖亦殺氣。立教絕人欲。斬斷一切累。淫殺貪嗔癡。件件須屏棄。儒如枝葉萌。佛如鋒刃厲。要之掃慾障。亦是學問事。所以相頡頏。二千年不墜。

仙者長不死。元會爲冬春。安期羨門輩。宜其至今存。何以五代來。但聞呂洞賓。從前度世者。無復示現因。豈非佞喬流。世遠亦就湮。多活數百年。終歸墮劫塵。惟有古賢傑。身去留其神。或文采映發。或英烈炳麟。照耀人耳目。千載猶鮮新。與天地同朽。此乃真仙人。

六朝前祠廟。多祀城陽王。蔣侯加帝稱。享之如明堂。其次項羽神。卞山赫蒸嘗。後來時代改。氣燄皆消亡。乃有關壯繆。威靈久始彰。雕績崇像設。面赤長髯蒼。婦孺盡膜拜。血食徧八荒。惟公秉忠義。固與日月光。然古烈丈夫。屈指難具詳。彼皆就湮沒。此獨垂無疆。鬼神亦聽運。何況人行藏。

世傳房次律。前身永禪師。樂全未了經。再生寫成之。其說主輪迴。其理或不欺。人乘生氣生。氣散則滅。豈別有不散。流轉爲生機。譬如花落後。明年開故枝。寧必舊花魂。來作新花姿。佛家論往生。懲勸固有資。細推陰陽故。幽渺終可疑。所以季路問。聖亦言不知。

春花覺太多。秋花嫌太少。何不分春華。來綴秋光老。天意豈肯然。狗人以爲好。乃知命一賦。天事則已了。奈何世人愚。向天頻聒擾。不平既呼冤。有得又嫌少。天亦厭喧囂。高坐蒼蒼表。

人生有定命。趨避安所施。設如命應刑。誰能逃誅夷。要其所以死。則視人自爲。或殉忠義亡。鼎鑊甘如飴。或以敗檢戮。人猶唾其屍。同此一頸穴。好醜迥不齊。死而以姦慝。豈亦命制之。願與當塗子。反覆味此辭。

偶遇佳山水。謂如畫圖裏。及觀好畫圖。謂如真山水。都將眼前景。落在形似。乃知人心幻。當境總不美。彼山覺此高。到此又慕彼。過去轉餘戀。未來輒預擬。可惜百年中。但爲兩境使。我讀淨名經。淨土卽心是。與其尻爲輪。毋寧良其趾。

百年苦易滿。童耄去其半。中有數十年。夜復分我旦。而此旦且中。遂爲賢愚判。古人身在世。同此迅掣電。乃其所  
豎立。千載炳穹漢。後人來視今。又作古人看。既將爲古人。何者可不爛。撫躬自循省。能勿背淚汗。樂。一經讀  
家說理。便有頓巾氣。甄北此等詩。穿天心。入月窟。說  
理愈精。英光愈覺迸露。眞足爲天壤間另開一生命。校。

讀史二十一首

范蠡既霸越。一舸笠澤中。手挾西施去。同泛烟濛濛。人謂謀身智。吾謂謀國忠。惟恐浣紗人。來入越王宮。荒蕪再  
釀亂。覆轍蹈甬東。所以絕禍水。脂粉一掃空。賢士既致君。更慮鮮克終。徒以遠害論。猶未測其衷。

秦皇築長城。萬里恢邊牆。西起臨洮郡。東至遼海旁。隋帝發兵夫。開渠自汴梁。通淮達揚子。由江達餘杭。當其與  
大役。天下皆瘠瘡。以之召禍亂。不旋踵滅亡。豈知易代後。功及萬世長。周防鞏區夏。利涉通舟航。作者雖大愚。貽  
休實無疆。如何千載下。徒知晉驕荒。

坑儒焚詩書。陰謀起李斯。心知古神聖。道高不可幾。欲盡滅其跡。自作萬代師。其志則已雄。其計良亦癡。後來章  
蔡輩。嚴禁蘇黃詩。事小雖不侔。妒心同此私。生不許宦達。死不許名垂。誰料坡谷集。至今薄海知。

徐福既入海。一去不復還。或言歸懼誅。逗遛山島間。豈知乃大猾。祖龍墮其奸。巧挾萬乘勢。挑盡諸嬋娟。三千童  
男女。齊上蓬萊船。得地可自王。身爲虬髯先。否則恣歌舞。溫柔鄉老焉。羲之以樂死。勝於古喬佺。舉手謝秦皇。福  
已真登仙。

項羽殺義帝。爲漢藉口資。縞素豈本懷。興兵乃有辭。明祖初起事。實奉韓林兒。紀年用龍鳳。載在世德碑。後將自  
稱帝。亦浮以鴟夷。同此冒不韙。竟少問罪師。豈賢幸不幸。遲早蓋有期。一在敵方樹。適足招義旗。一在敵既殄。惟  
我所欲爲。所以慕容語。名理最可思。取果於自落。笑於生摘時。

漢武擅雄略。隻手運九垓。汲黯董仲舒。雖賢不鼎台。所用衛霍輩。不過奴僕才。驅之即成功。地拓寇敵擢。乃知主  
英斷。但需羣策材。朝有名臣見。已是衰運來。

康成居北海。黃巾拜其門。遂公居廬山。問答到盧循。固由素行高。能使劇盜馴。亦見當時風。法網滌纖鱗。弗以形跡疑。共推德服人。使其竭黠吏。早以通賊論。管汝儒與釋。且試吏威伸。

袁世尙名義。作事多矯激。郭巨貧養母。懼兒分母食。何妨委路旁。而必活埋亟。伯道避賊奔。棄子存兄息。何妨聽其走。或死或逃匿。而乃縛之樹。必使戕於賊。事太不近情。先絕棄葬德。獲金豈冥報。乏嗣實陰殛。君子依乎中。孝友有定則。

武侯事先主。身任帷幄籌。草草隆中對。後來語皆酬。如何一着棋。忘卻援荊州。有明于忠肅。再造功誠優。景泰六年。軍國皆其謀。如何易太子。不聞諫疏留。千古兩偉人。駭烈無與侔。千古兩疑竇。未免滋瑕尤。當時或有故事。往難推求。九原不可作。望古長悠悠。

孔明初出師。討賊氣甚壯。不效治臣罪。似供軍令狀。及敗街亭歸。始知事難量。利鈍非逆睹。不敢必掃蕩。以彼十倍才。闕屣彌退讓。奈何白面徒。妄起功名望。手執鐵如意。輒比諸葛亮。

長統樂志論。潛岳開居賦。抗懷托高尚。千載令人慕。吾觀仲公理。州郡辟不赴。及參曹瞞軍。乃罄腹心布。濯水追涼風。此樂竟弗御。安仁本輕躁。矯語甘淡素。望塵拜賈謐。抑何工諂附。徒誇御板輿。終貽老親懼。乃知曠達言。大抵十九竊。一朝見可欲。鮮不失故步。徒以言取人。動爲古人誤。

晉初取建業。宋初取錢塘。奪地以自廣。毋乃心不良。豈知易世後。失國投無方。翻藉茲一隅。偏安立朝堂。使當國國日忠厚存。鄰疆至此轉無家。何以延垂亡。乃知報施理。天咫亦渺茫。毋怪攘竊徒。一意恃力強。

古蹟愛龍鶴。崔相喜鬪牛。梅以林逋高。蘭以屈子幽。興會偶然值。不覺神與游。其人本不朽。其事遂千秋。如何好名者。徒欲托物留。栽成數竿竹。自比王子猷。種就幾叢菊。又謂淵明儔。韻事遞相續。高人遍九州。效顰良可笑。拾唾亦足羞。卒之誰振拔。同歸貉一邱。人生可傳處。豈在假風流。

李密勸元感。勿頓兵洛陽。及其自起事。亦戀洛口倉。東之匡復日。既斬五六郎。將遂夷諸武。何又善刀藏。後皆以

此敗。失勢身落阱。將毋旁觀清。當局昧所警。是以應變才。決機在俄頃。英雄謀貴斷。菩薩進須猛。斬草必除根。繫狗當繫頸。

有唐裴行儉。論士先器識。謂四傑雖才。浮薄宜擯抑。乃其所賞拔。亦未見英特。薦一蘇摸稜。庸庸但伴食。而所擯抑中。駱丞起吏職。草檄斥武墨。發憤佐討賊。舉事雖不成。慷慨見骨力。糜身赴忠義。此豈浮薄列。是知鑒早繆。目已迷白黑。不辨品邪正。但卜遇通塞。斯亦肉眼耳。真士何由得。

杜陵廈萬間。白傳裘萬丈。後人讀其詩。肅然起敬仰。謂雖一身窮。不忘天下想。吾觀拾遺老。身世困搶攘。固無藉手處。爲民善教養。香山歷官多。所至文酒賞。未聞康濟略。政績著天壤。區區浚六井。小惠亦未廣。詩人好大言。考行或多爽。士須儲實用。乃爲世所仗。不可無此志。隔膜視痛癢。不可徒此言。虛名竊標榜。

歐九不讀書。乃修唐表志。子京遊於文。偏任作傳記。巨手如二公。獨嫌易位置。何況羣材紛。各欲及鋒試。及其應世用。動輒違所肄。鳧頭續鵠頸。牛鼻穿馬轡。用必當其才。古來無此事。

荆公變祖法。志豈在榮利。蓋本豪傑流。欲創富強治。高可追申商。蘇綽乃其次。及思法必行。勢須使指臂。羣小遂競進。流毒不可制。推原其本懷。固與權奸異。始知功名心。亦足禍人世。

伯時擅丹青。神到秋毫顛。宣和愛遺筆。幅值數百千。甚或持獻者。布衣輒得官。使其作畫時。矜重索價懸。豈特轆材聚。輦金當如山。龍眠乃長嘯。供養資雲烟。惟得數君子。詩文十餘篇。由來藝事妙。正以人品傳。設令有市心。畫已不值錢。

放翁一代才。落筆見瑰異。從軍陝蜀間。不忘恢復志。如何一着錯。輕作南園記。後村劉潛夫。學殖最淵懿。彈劾史嵩之。鯁直無所避。晚爲賈相出。亦遂滋物議。二公著述材。身擅不朽事。豈藉權貴力。推挽助聲氣。然此事後觀。當時見則未。不覺一念移。遂爲終身累。始知勢要場。自守長不易。內重外乃輕。此際須道義。

有明李何學。詩唐文必漢。中抹千餘年。不許世人看。毋怪羣起攻。加以妄庸訕。宋儒探六經。心源契一貫。亦掃千

餘年。註疏悉屏竄。書疑古文僞。詩斥小序亂。理雖可默通。事豈可懸斷。竹垞西河生。所以又翻案。吾言則已贅。一編聊自玩。古文家多論古以抒己見。顧此乃侈其法於韻語。便覺斬新。然立論精確。自是不磨。枚。

### 閉居讀書作六首

閉門謝時人。日與古人戰。戰退一輩輩。自詫力未倦。突然逢大敵。長槍大羽箭。不覺豎降旗。焉敢張空拳。古來傳世人。出手爆雷電。譬如關張流。神勇本獨擅。吾曹才力弱。漫詡當八面。惟應整一軍。軍實自討練。雖難堅必摧。庶幾奔可殿。

索居苦無友。惟與古人親。彼皆絕代才。形去留其神。終日儼相對。寧不勝今人。所悲時世隔。弗得話夕晨。倘有返魂香。盡活已朽身。來聚一堂上。尊酒共細論。奇賞疑復析。此樂豈有倫。惜哉不可見。我生長不辰。思彼彼不知。更爲彼沾巾。

才士矜聰明。動稱過古人。古人去渺矣。豈今可等倫。試觀六籍垂。解者何紛紛。一字千萬言。猶未得其真。當時無註腳。卽以詔愚民。家喻而戶曉。毋煩訓諄諄。可知古鈍資。已勝今慧因。如何偶一得。輒誇叔獲新。

梅花最高格。羣仰絕世姿。離騷擷衆芳。無一語及之。西蜀多海棠。豔色天下奇。堪笑浣花老。亦弗留一詩。乃知卓犖人。胸次故不羈。吟咏出與會。萬物供驅馳。與會偶不屬。目固弗見眉。豈比雕繪家。掇拾靡有遺。

人面僅一尺。竟無一相肖。人心亦如面。意匠曷獨造。同閱一卷書。各自領其奧。同作一題文。各自擅其妙。問此胡爲然。各有天在窾。乃知人巧處。亦天工所到。所以才智人。不肯自棄暴。力欲爭上游。性靈乃其要。後人觀古書。每隨己境地。譬如廣場中。環看高臺戲。矮人在平地。舉頭仰而企。危樓有憑檻。劉楨方平視。做戲非有殊。看戲乃各異。矮人看戲歸。自謂見仔細。樓上人聞之。不覺笑歎鼻。

### 雜題八首

天圓地亦圓。物皆圓爲模。竹木花幹果。人獸毛髮鬚。無不以圓成。稜角一概無。方乃人所爲。制器崇廉隅。聖人馭

天下亦以範衆殊。一之以禮法。齊之以刑誅。欲使界畫定。羣就繩墨處。終然圓化流。難盡方幅拘。是以檢閑立。但期大不踰。禁雖嚴。倘短治亦尙破觚。

草木日夜長。年深且千霄。人若同此例。可並喬木喬。胡爲七尺軀。不復能增高。造物有深意。維人最雄梟。若縱使昂藏。俾作長狄僑。將何所不至。騎危俯麗譙。是以限成格。不得踰曹交。予齒則去角。同此一鈞陶。

天地有至文。花鳥與山水。當其生機妙。巧畫弗能擬。亦必有解人。乃不虛此笑。譬如得佳句。孤吟空自喜。不逢賞音讀。湮沒成故紙。化工日眼前。觸處無非是。可憐蚩蚩氓。熟視不覩此。其有才智流。又爲名利使。倘無我輩在。蕭閒味其旨。大塊亦寂寞。歎世無知己。

每夕見明月。我已與熟識。問月可識我。月謂不記憶。茫茫此世界。衆生奚啻億。除是大英豪。或稍爲目拭。有如公等輩。未見露奇特。若欲一一認。安得許眼力。神龍行空中。螻蟻對之揖。禮數雖則多。未必遂鑒及。

混沌初開時。但以葉蔽身。迨夫有蠶績。已闢幾千春。此幾千春內。豈無冰雪晨。不知衆裸蟲。以何支冬旬。得非少遮護。便長衫毛新。否則如面露。凍慣亦不紉。吾偶想到此。不覺眉爲翠。旁有客大笑。擔憂代古人。

螃蟹外有殼。鮑魚內多刺。殼如城郭堅。刺如戈矛利。防護非不周。終焉入刀匕。乃知人最毒。戕物供嗜味。設有朱壑流。將人刳屠肆。噉醉如糟脍。脂乾作糗糒。此豈不痛心。何弗觀易地。吾已見及此。戒殺愧猶未。蟹鮑孰去留。亟付門生議。

天旣欲平治。當盡生善人。乃人有生後。權不操鴻鈞。各逞所欲爲。縱慾喪其真。迨乎流毒甚。天亦鬱怒頻。兵疫以殺之。夫豈天不仁。其如被殺者。又多蚩蚩民。機智能自衛。輒作漏網鱗。天亦無如何。一笑付劫塵。

造物一世人。其事則已畢。善惡當誅賞。世自有法律。其奈刀筆吏。用法輕重失。因之不平者。又望冥報密。閻羅闔之笑。此事非我責。青天白日中。枉直不辨析。鄴郡黑暗地。豈能代窮詰。陰陽兩相誣。懸案遂難結。所以千古案。總無昭報日。奇思警語。是非仍不離於聖人。是天地間有數文字。德麟。

偶得十一首

古制謁長者。脫履始造請。見君更不韞。左氏傳可證。蕭何履上殿。殊禮出特命。迨乎唐以來。朝韞始漸盛。及其習用慣。遂乃著爲令。設使跣入朝。翻成大不敬。泥古有難通。卽事朗可鏡。所以周官書。或貽後世病。

高人偶托跡。遂佔厥地名。李白一采石。右軍一蘭亭。千載竟專屬。後人莫能爭。由來古人傳。自有真精英。才分稍不逮。焉得相抗衡。荆公奪謝墩。墩終未號荆。何況桑民懌。赴官柳州城。自詭此一去。將掩子厚聲。至竟羅池廟。何曾祀師生。

選墨貴黑光。品茶尙白色。欲黑嫌漆白。欲白嫌雪黑。物理固有然。人情亦安極。右軍蘭亭書。古今奉軌則。當時隸糜丸。豈自奚超得。盧仝七碗餘。清風生羽翼。當時建州製。未有龍團式。凡物取足用。求精轉滋惑。陋彼蔡君謨。嗜茶矜創闢。吾嘉李格非。著論破墨癖。

吳僧得方竹。圓之作珍玩。蠢俗殺風景。毋怪衛公嘆。何哉王介甫。好醜亦不判。方啜龍團茶。淬以消風散。世間可惜事。僕指豈勝按。美女嫁醜夫。名花對癡漢。佳文覆醬瓿。良琴入烟爨。抵鶻用玉璞。射鳥用金彈。

古人戒厚葬。恐賈發邱害。張耆與晏殊。同葬陽翟界。有盜宅其間。摸金肆無賴。初掘張家墳。漆室富珠貝。滿臺喜過望。奮土爲掩蓋。繼穴晏相塚。僅一木胎帶。欲怒憤不償。棄屍雜塵壙。厚葬軀乃全。薄葬骨翻碎。由來禍患生。每出所慮外。

山僧例趨勢。向我發嘆嗟。苦道酬應冗。身不脫袈裟。方叅達官署。又迎貴客車。廚催香積飯。爐選頭綱茶。其詞若有憾。其意實自誇。一笑語山僧。毋乃路已筵。爾旣厭煩囂。何不出了家。

才士多好色。風懷托所寄。少年貧世客。綺綦且拋棄。及夫仕宦成。粉黛力可致。清晨自覽鏡。冉冉老已至。乃知薄劣姿。此樂難安冀。金釵十二行。本非書生事。奈何服硫黃。拚以性命試。

文人逞才氣。往往好論兵。及夫事權屬。鮮見成功名。古來稱儒將。惟有一孔明。寥寥千載後。虞雍王文成。此外白

面徒漫詡韜略精。河橋二十萬。惜哉陸士衡。深源令僕材。聲名喪北征。房瑄陳濤斜。車戰旋摧崩。忠如張魏國。五路敗富平。由來非所習。奴織婢學耕。如何紙上談。輒欲見施行。君看雲臺上。何曾有書生。

水不言而濕。火不言而燥。猛虎在深山。黎藿莫敢蹈。乃知品有真。毋煩自表暴。祖思來問佞。毋乃己所召。暮夜能御金。何如金不到。

袞袞趨勢徒。乞憐權貴側。上壽千黃金。修贊雙白璧。猶恐未得當。屏息伺顏色。一笑非常榮。偶怫終夜感。使其將此心。事親供子職。但須十一二。大孝已莫及。何爲舍所生。去狗勢炎赫。所得能幾何。奴顏婢其膝。

何處夫已氏。作吏印懸肘。望門計民貲。掩取魚入筍。嗚呼百金產。中人豈易有。饑腸忍吼牛。勞筋羨眠狗。銖銖積數世。方期保敝帚。一朝威擢之。空空剩兩手。竭彼祖父力。貽我子孫守。天道果有知。此物可能久。諸作多顯世名言。筆極蒼辣。

昆吾之刀。切玉如泥。舟。

## 五言古一

### 遊惠山

曉綠梁溪行。波滑一枝櫓。忽聞溪流聲。知是夜來雨。舍舟入林麓。霽色澹天宇。空翠霏濛濛。孤煙起縷縷。葉落風自掃。山缺雲或補。言尋漪瀾堂。寒碧見太古。卻訝尺許深。汲綆萬人取。始信一眼泉。中涵滿腹乳。臨流澄水觀。眉髮明可數。翻嫌塵網身。到此成僮楚。日斜歸路促。勝遊歎莽魯。回首蒼山巔。新月上高樹。

### 赴天津

西笑到長安。求官擬唾手。豈知一青衿。易地成棄帚。南庠試北闈。令甲所不受。聞有牢盆籍。遊客借已久。爰乘薄笨車。路指丁沽口。將爲假途行。先防扞關守。詰者嚴誰何。未敢告以某。譬如投秦客。變易姓名走。孟嘗出函谷。夜半作吠狗。曹公誑追兵。黃馬者在後。居然春絮飄。着地又生柳。雖貪奮飛便。終愧詭遇醜。古人重始進。出處戒其



苟聘書卻公卿。後文畏朋友。伊余獨何爲。情類雜求牡。盜泉不暇擇。渴來飲一斗。旅枕夢醒時。何地謝泥垢。一笑聊解嘲。北例得八九。徐凝江右士。赴杭覓舉首。名臣苑履霜。亦以朱說取。士窮則躁進。此事古來有。要當期大節。微膏豈足垢。

### 園居四首

少小愛林泉。願深力未遂。必待買山錢。始慰棲巖志。自顧此腐儒。其間恐猶未。榻來尙書塢。一龜得高寄。平池涵碧虛。層巒聳蒼翠。主人方勤勞。僕直承明地。晨出暮始歸。弗暇享清閨。一笑落吾手。客乃居主位。蠶績蟹有匡。古原有此事。

人在積氣內。如魚在水中。一呼一吸間。息息相流通。所以居此身。須遠垢穢蒙。大街車馬地。路塵如飄蓬。獨茲境最清。豁然隔霧縈。漉漉黃陰陰。飛翠朝濛濛。涵煦於其內。心神爲之融。始悟學道人。必住空山空。

微雨過林端。茫茫出新碧。端居靜無事。即景偶尋繹。窗前無數花。一時齊副坼。同是一氣發。胡爲異紅白。蚊蟲本化生。非有卵與核。胡爲年年化。形質不改易。燕蝠同其類。何乃殊旦夕。雀蛤判其族。又何互體魄。芸生信蕃變。物理渺難格。但覺化工妙。觸處皆奇迹。

今我所居堂。昔之藏嬌院。有客戲語余。惜哉今不見。笑謂客何愚。代序去苦箭。使其爵在時。紅顏亦已變。幡然春夢遠。君將睡其面。否則彈娟姿。慣侍簾窗裏。見此窮措大。亦豈有餘戀。不如即目前。行樂隨所便。名花與異書。十倍笑人艷。此在汪文盛澄澗園所作。靜中故多悟境。但素。

### 扈從木蘭雜詩

峨峨南天門。巖巖古北口。一髮通番落。罔辭互環紐。當其扼隘處。兩馬不容偶。胡爲明中葉。往往敵騎蹂。瓦刺僅餘孽。朵顏亦小醜。箠策時一鳴。空壁輒反走。當時諸將帥。守關者誰某。我朝溥德威。地盡九垓九。保塞諸蕃戎。弭帖如畜狗。方供使臂指。甯煩顧腋肘。在德不在險。古語良不朽。

安營無常所。一夕輒一徙。堪笑擇地者。盡力爭尺咫。似欲作世業。永以貽孫子。輜重未及來。爭先佔基址。立幟標四陲。務欲恢疆紀。忽有後來人。闌入欲棲止。驚如寇入邊。憤如師摩壘。奮身起相抗。攘臂誓相死。同壤爲仇讎。必逐然後已。日暮就帳宿。臥席暖方始。又欲爭前途。棄之若敝屣。安肯爲少留。連夜拔帳起。隨營有行市。居奇者何人。車駝捆載來。物以罕見珍。一日長一價。炊餅如錢輪。酒瓶屢如木。葉把須論緡。就中只牛肉。價值差平均。日無轉輪費。驅而殺其身。嗟我雖老饕。覩此忍入脣。藜羹脫粟飯。聊以度夕晨。僮僕竊訕笑。聞之不敢嗔。

巖巖達巴漢。

蒙古語

其高不可計。百折到其巔。自辰巳及未。萬馬氣一喘。彌天作雲沸。捫星仰歇息。迴立蒼霄際。

卻望四山齊。翻如在平地。平地所來處。窪作溝渠細。步移輒換形。境變乃易位。適從山下觀。山凸而上銳。今來山上觀。地凹忽下降。一凹一凸間。生我顛倒智。

贈張吟薌秀才

閒居苦岑寂。兀坐想好友。宦冷旣寡交。地僻更罕偶。昨來蔣吉士。心餘笑我目封蒜。去此不數武。有客屹材藝。我聞喜欲狂。徑造一握手。遂索行卷歸。果然才富有。兩冊花間詞。奪席屯田柳。清音獨繭絲。豔態百花酒。幽芬噴露蘭。脆味嚼雪藕。有時鐵撥絃。迸落鮫珠剖。忽吹煙竹笛。老蛟變爲叟。讀之惟恐盡。長吟欲其久。每到得意時。浮白輒一斗。嗚呼書生眼。動輒慕不朽。滔滔世運嬗。如波日東走。何限魁杰流。滅沒濡其首。序點甫揚鱗。十已去八九。君也殆庶幾。生才定非苟。緊余懶廢學。胸膈俗氛糾。譬若白頭嫗。自願傷老醜。一朝見麗人。歎羨不容口。又如道予畫。不能自運拇。忽觀舞劍勢。其氣乃抖擻。寓齋喜咫尺。相距不盈畝。自今數晨夕。與君作吟耦。

題許松堂亡姬小像

欲以美人傳。必甘少年死。倘或過少年。其人已不美。西施壽百年。寧復吳王憐。徐娘自知老。專恃多情牽。武墜佔六郎。亦丹以威權。不然蓮花面。肯伴此嫗眠。乃知絕世姿。不貴長命延。何哉君癡絕。痛此嬋娟質。畫出臨歿貌。問

年纔十七，歎其不久存。滴盡愛河血，君方爲姬悲。吾且爲姬喜，留此初開華。賺得君淚泚，試從此別後。預想頭白容，知君惋惜情。不復如此濃。生神溢。紙。枚。

同北墅漱田觀西洋樂器

郊園散直歸，訪奇番人宅。中有虬鬚叟，欽天監正劉松齡等，皆西岸人。出門敬逕客。來從大西洋，官授羲和職。年深習漢語，

無煩舌人譯。引登天主堂，有象繪素壁。靚苦姑射仙，科頭不冠幘。云是彼周孔，崇奉自古昔。再遊觀星臺，爽塏上勿壘。玻璃千里鏡，高指遙天碧。日中可見斗，象緯測晨夕。斯須請奏樂，虛室靜生白。初從樓下聽，繁響出空隙。噌吰無射鐘，嘹唳狴賓鐵。淵淵鼓悲壯，坎坎缶清激。鐔于丁且寧，磬折拊復擊。瑟希有餘鏗，琴澹忽作霹。紫玉鳳唳簫，煙竹龍吟笛。連桐控榻底，頻櫟鉏錡脊。鞞耳柄獨搖，笙舌炭先炙。吸噓竿調簧，節簇笳赴拍。篋疑老嫗吹，筑豈漸離擲。琵琶鐵撥彈，篆琴銀甲畫。寒泉澁篋篔，薄雪飛筆策。孤倡輒羣和，將喧轉稍寂。萬籟繁會中，縷縷仍貫脈。方疑宮懸備，定有樂工百。豈知登樓觀，一老坐攬擘。一音一鉛管，藏機捩關闕。一管一銅絲，引線通骨格。其下請風臺，呼吸類潮汐。絲從囊罽縮，風向管孔迫。衆竅乃發響，力透腠理妻。清濁列若眉，大小鳴以臆。韻仍判宮商，器弗假匏革。雖難繼韶讌，亦頗諧皦繹。奇哉創物智，乃出自蠻貊。緬維華夏初，神聖幾更易。鸞鷲擊律呂，柷黍度尺寸。嶼谷截綠筠，泗濱採浮石。元聲始審定，萬古仰叔獲。迢迢裨海外，何由來取則。伶倫與后夔，姓名且未識。音豈師曠傳，譜非制氏得。始知天地大，到處有開闢。域中多壘拘，儒外有物格。流連日將暮，蓮漏報酉刻。自鳴。歸將寫其聲。畫肚記枕席。

暑夜戲筆

暑夕愛孤眠，我眠豈真孤。六尺黃琉璃，鋪之皂羅幘。引睡有黃嬾，伴寢有青奴。左抱而右擁，長夜爲歡娛。閨人不相妬，翻送斗酒需。貧官享此福，毋乃太侈乎。書名黃嬾，竹。名青奴。

初用眼鏡

少年恃目力。一覽數行下。能從百步外。遠讀屏滿架。因之不自惜。選用弗使暇。螢火貯囊照。鄰燈鑿壁借。倦勿交睫眠。怒或裂眦咤。豈知過則傷。索債乃不赦。年來理鉛槧。忽驚眩眩乍。恭逢廷試期。方覩一戰霸。生平見敵勇。坐是臨陣怕。真同霧看花。幾俾畫作夜。何來兩圓璧。功賽補天罅。長繩繫雙日。橫橋向鼻跨。瑩比壺映冰。朗勝炬燃樺。平添膜一層。翻使障翳化。涼月淨無塵。澄潭湛不瀉。驢神失所居。賃此得宅舍。空中花不存。鏡裏影逾姪。遂覺蟲懸輪。可以命中射。奇哉洵巧製。豈復金篋藉。相傳宣德年。來自番舶駕。內府賜老臣。貴值兼金價。初本嵌玻璃。薄若紙新研。中土遞徵造。水晶亦流亞。始識創物智。不盡出華夏。緊余愧結習。把卷頗嗜炙。已知老漸侵。幸有光可貰。抱茲千年冰。如刀難離糲。收宜近筆牀。挂豈雜弓弮。留伴炳燭餘。觀書味噉蔗。

後園居詩

昔年園居詩。乃在尙書塢。月榭間風亭。石林蟠水府。今年園居詩。蕭然一環堵。地僅可斂量。屋每牽蘿補。若以較疇昔。會何足比數。顧獨少外營。意界轉栩栩。種樹鬱成林。蒔花疏爲圃。花如莞而笑。樹若翩以舞。老我於其間。一窩自仰俯。門外人海喧。門內洞天古。

頻年苦貧乏。今歲尤艱難。內子前致辭。明日無朝餐。一笑謝之去。勿得來相干。吾方吟小詩。一字尙未安。待吾詩成後。料理齏鹽酸。君看長安道。豈有餓死官。趣極。

有客忽叩門。來送潤筆需。乞我作墓誌。要我工爲諫。言政必翼黃。言學必程朱。吾聊以爲戲。如其意所須。補綴成一篇。居然君子徒。核諸其素行。十鈞無一銖。此文尙傳後。誰復知賢愚。或且引爲據。竟入史冊摹。乃知青史上。大半亦屬誣。千古陳案。一語難盡。保泰。

公卿視寒士。卑卑不足算。豈知漏一盡。氣燄隨煙散。翻藉寒士力。姓名見毫翰。使其早知此。敢以勢位慢。士也而早知。亦可自傲岸。胡爲交失之。各就月睫看。此則工囁嚅。彼則雄顧盼。堪笑一雲泥。誤此兩疑漢。文章千古事。誰可以勢爭。何哉諸巨公。好以古學鳴。未便鳳樓造。先長牛耳盟。自命韓歐家。奉奉燕許名。譽之稍

不滿，艷然輒怒生。先生付一笑，擿墮任冥行。古來著述事，豈盡歸公卿。杜門少還往，或憐我索居。我豈真索居，家有插架書。其中列古人，何止十萬餘。呼之而卽至，不煩催小胥。堪笑今之人，未必古人如。偏覺見面難，自高其門閭。一刺投已入，勞我久駐車。此土木偶耳，曷怪與汝疎。

### 湘江舟行

順風兼順水，一日數百里。風逆水復逆，進寸慮退尺。風水兩俱順，良可快躁進。我意殊不然，過順生悔吝。惟願得其一，以偏收全功。有風不必水，有水不必風。於力旣易補，於理亦甚公。君看得意人，雙挾風水駛。張帆飽若弓，捩柁疾於矢。前有山彎彎，下有石齒齒。乘勢不及收，一觸或破毀。

泝流過祁陽，山緊江漸窄。水刷山根露，峯巒森角髻。時復作嵌空，倒瞰奔流碧。舟行過其下，壓頂慮崩折。邪許同一聲，響答出空隙。衆篙所叢刺，石有千孔迹。沿隄默流覽，奇景多叵獲。非特狀譎詭，更有質變易。石或爛如土，土或堅如石。

### 落皮樹

木以根聚氣，以皮通津沫。試與斷其皮，本實卽摧撥。枝折皮未斷，垂死又能活。所以述律后，設譬借高樾。云何落皮樹，孤露一株突。支離狀堪笑，裸而不披褐。戰士搏赤身，僵屍立白骨。可憐窮黔婁，并無袂蒙頰。潑寒胡作戲，臂租朔風颭。安有枿枿連，但見節目闕。尙書孫臏字，過者定氣奪。婆娑枯樹影，使我歎天闊。豈知察其顛，生意方潑潑。凌霄抽條枝，滄露透槎枿。密葉綠於染，繁陰濃可芟。咄哉皮不存，滋液憑何拔。下比髣髴無膚，上異頭寡髮。得非驚精香，潛結蒼根馘。或乃聲風木，汗自榦中發。要知氣內充，固不在膚末。化工誠太奇，物理未易括。聊補草木記，異聞竇採掇。

### 赴滇從軍作

古來戎馬間，軀命長草草。一身旣從軍，生死那得保。此意黯自憐，未敢向人道。作氣自振厲，命酒豁懷抱。山妻則

已知顧弗忍深考。問出一語商。似預籌未了。亂之以他詞。中心各如擗。臨別復何言。得歸不必早。實我膝下兒。奉

我堂上老。詩到真處。白描勝於着色。故。

魏尾關

點蒼千仞高。洱海萬頃沛。山川負雄傑。天末闢都會。緬惟天寶年。南詔早自大。一火并五部。狡毒過屠儉。築茲龍尾關。扼險控要害。域中封嶽五。直欲抗嵩泰。南摧交趾城。北渡嘉陵瀨。可憐鮮于師。萬骨委蒿艾。遂割天一角。永佔西方兌。後雖篡竊頻。中土固莫奈。爲唐交綏餘。在宋畫斧外。元時稍內附。亦僅貢篚貝。迨夫勝國初。始入版圖繪。傳聞兩將軍。藍玉。沐英。於此戰功最。叩關造攻具。殺氣振煙霧。偏師繞背出。拔趙立漢旆。士氣競譁呼。蠻衆乃狼狽。爰擒狄雙如。政流剗鬣蓄。至今勦伐炳。人口尙炙膾。由來風氣開。遐荒入函蓋。當時摧陷力。實亦武臣賴。我來值軍興。輸輓動倉廩。鼓鼙思封疆。關河撫襟帶。會有名將材。一戰靖塵壒。

連日無蔬菜至平夏買得蘿蔔大喜過望而紀以詩

平生負傲兀。特有藜藿腹。咬得菜根斷。頗以鄙食肉。揭來從軍行。不暇具旨蓄。旅橐裏鹽豉。臘豚脯黃犢。筠籠裝易腐。土釜煮詎熟。噬乾齧鱗勞。齒肥胸胃贖。用佐脫粟飯。有若喉貫鏃。可憐老饕窮。何處得新藪。每行林壑間。輒思鬪黃獨。漫呼山蕪蕪。翻爨盤首楮。今朝獨何幸。師傍田家宿。食指忽然動。籬落見蘆菔。不禁朵兩頤。亟問地主孰。敢期盈把送。但冀得錢鸞。於焉長鑿劂。爰以濁水漉。滑突百十枚。帳前滾碌碌。不暇揭蠶和。遑更作鮓畜。入我菜園腸。適遇其故族。豈惟調榮衛。兼使爽心目。灌頂醍醐漿。活命蕪蕪粥。珍戒僕暗偷。慳防客不速。還愁明日盡。羸馬壓兩麓。此物搗成丸。可以療癩毒。我無十裂餅。奚用火攻逐。鬚髮欲早白。可兼地黃服。我無作相望。豈藉裝老秃。祇以斷蔬久。饒過涎流麵。好待秦凱歸。高宴夜列燭。豪調盤格奇。食單開滿幅。

邊外諸土司地每清晨必起黑霧咫尺不可辨辰刻方散

五更披張起。星斗方磊落。少焉日欲紅。霧起周六幕。濃於煙冥冥。重過雲漠漠。陰曖糊兩眼。難刮金篋膜。對面不

見人。燕影但約格。我疑彼魑魅，彼訝我魂魄。心誓出一呼，聞聲乃相諾。真同罽穴行，豈輸漆室作。何哉天地間，唐莊宗 滄氣此方各。營繕皆物志，瘴霧益最虐。醉飽可不死，飢虛立中惡。我行不孽食，直以枵腹搏。從軍命已拚，甯復哀浪泊。惟聞古用兵，六時必參酌。建德擊世雄，乘此升樓躍。實建德擊世雄。乘大霧。首勝其柵。 亞子破夾城，亦藉功掃擇。唐莊宗破 三垂岡。破後夾城。由來出不意，可以奮摧廓。緊茲蠻徼地，氛霾日布瀆。無煩公超術，如奉祖和約。潛軍行其間，諱者莫能度。前事應可師，利用暗中摸。冒雨突厥盟，乘雪元濟縛。明當斫陣去，會磔蚩尤讎。

錢充齋觀察遠餉永昌粿作餅大嚼詩以誌惠

久客生計窮，晨起惟啖粥。山行想酒樹，野處訪糖木。嘉惠荷故人，玉屑餽滿簾。貧兒詫驟富，動色到僮僕。於焉商食單，享此非分福。冷淘帶掃旋，水引糞擲漲。鱗鱗乏脂豨，鱷鱷少棧廩。餽饈法不嫻，餽餽料未蓄。繫惟作餅事，力省成易速。鴟夷澗瀾臭，鴉嘴鋤野藪。先揉銀泥爛，次納金蕪醜。援抄彌罅縫，按摑擴邊幅。周輪做鏡圓，空中肖壁複。火不武而支，功與飽又覆。過饑焦有療，得氣飽如毳。斯須動頤朵，雪膚瑩滿盞。饞口欣過屠，亟趁出鐵爨。甯顧齒牙倦，本無書畫蹟。一笑戎馬間，將軍不負腹。卻憶豪富家，茲事鬪鼎餽。束皙賦猶陋，吳均說未錄。佳名巨勝殊，雅興曼陀獨。搗蜜雕駝蹄，拌槐蒸兔目。肘求赤髓宰，泔選舐背膺。膏環圓無端，蠟條直不曲。仿古紅綾包，翻新綠花穠。裹餒粗如柱，張皮大於屋。百和工雜糅，千層互連屬。製作十字勾，釘就五色郁。酥有見風消，薄可映字讀。視我腐儒餐，奚啻飯脫粟。顧當飢渴中，所願良易足。中流遇一壺，直抵舟萬斛。殷勤謝珍貺，敬誌古誼篤。已增十日糧，況勞千里轂。從軍王仲宣，累人閔仲叔。飢驅彭澤詩，乞米平原腹。生平骯髒氣，不覺滋愧慙。所悲茹淡久，欲語垂再瀆。督餞惟恃秦，隴得又望蜀。何當更拜嘉，庖人日繼肉。力量舟。

安甯州湯池

安甯湯池名，入滇耳久屬。去年匆匆過，爲赴師期速。今來是歸途，可弗留一宿。紆道得其處，平岡隱迴複。門前有清溪，溪上有喬木。呼童扣門入，楚楚數間屋。內外判兩池，泉脈暗滲漉。解衣得磅礴，洗我塵十斛。熱未至炙手，深

恰纔及腹。性靈抱中和。元氣葆溫煖。幾疑平池底。火輪轉其軸。風囊鼓洪鈞。暖律吹黍谷。烘此一勺源。長護春意伏。吾聞炭與磺。皆能燂水熟。硫磺泉多臭。石炭泉每濁。此特涵清冷。兼復帶芬馥。知爲砂牀凝。其品擅所獨。惜哉落天南。寂寞銅荒服。不得比華清。一浸妃子肉。徒令如我輩。來此澡垢黷。洗非高人耳。濯是僉父足。七尺形穢驅。毋乃增水辱。繁余聊取快。一爽豁心目。憶自入滇來。塵勞日馳逐。風埃面薰炙。蟻蝨體孳育。忽得臨清流。此念敢素蓄。永昌珍珠泉。昨已曾手掬。安寧硃砂泉。今更得身浴。滇南兩奇品。吾已兼其福。所得良過分。敢復歎勞碌。

署齋偶得

閨媛或有私。時猶恐人知。媚女卽政行。見客仍笑嬉。由來出身異。意趣自各歧。與聘卻扇妓。甯買破瓜姬。所以劉士安。轉運兼度支。筦庫必用土。不使吏爲之。

城市犬能吠。專吠藍縷人。鄉村犬亦吠。反吠衣履新。由其所見陋。生不識冠巾。毋怪狗苟徒。讎正羣狺狺。彼其心目中。好醜本不分。自非同氣類。相遇必怒瞋。亦復何足責。彼固非人身。

夕陽在西下。紅乃映海東。震雷鼓一鳴。百里聞隆隆。由來聲與光。所屆遠莫窮。奈何齷齪流。目睫謀徒工。死爲無名鬼。生爲無是公。君子務其大。意氣高於虹。三詩眼光燭天。一枚。

華峒

仇池小有天。遠落武都氏。桃花秦人洞。深藏武陵溪。乃知好林壑。多在蠻獠黎。水經括地志。或有不及稽。迢迢歸順州。天末接交趾。從古無人到。爲僻處邊鄙。豈知百里內。處處佳山水。就中推華峒。尤擅清景妍。有山必有田。有田必有泉。畝歲收二鍾。不識旱潦年。茅屋四五邨。枕麓臨淪漣。依依榆柳樹。綠陰連陌阡。染衣刈藍草。織布種木棉。拾樵可供爨。把釣時獲鮮。五雞二母甌。賽神留客便。所買只鹽豉。餘者不用錢。人各長子孫。朝耕暮歸眠。其俗總瀟灑。一概無愚賢。混沌所未鑿。留此太古天。繁我倦遊人。忽睹茲風味。不覺意也消。曷禁心平醉。昔宋士大夫。每家宦遊地。清潁築室謀。陽羨買田計。故鄉雖難忘。佳境良不易。他年擬抽簪。卜築於此寄。同爲一齊民。莫呼舊



長吏。

人面竹

炎荒物產奇。篠蕩出異態。近根節愈促。節節面具戴。五官雖未備。團團具梗概。歐陽詢嶺長孫無忌詩。所豐上開廣額。銳下剩短喙。無鬚頤頤間。有骨額輔內。得風未能笑。滴雨或當顛。澹白恰傅粉。嫩綠豈點黛。幸無湘淚斑。灑作疤痣類。密如並頭侶。森若駢首隊。鴈行排一一。魚貫聯輩輩。周圍俱外向。何處相君背。客攜一株贈。摩挲殊可愛。不中笛管吹。肯截鼓槌擷。量材剛爲杖。圓潔印竹賽。魁顏十八盤。數與應真配。詎敢以墨黥。烙漆用火績。幻出衆羅漢。眉目端正。在與我相周旋。輪交久可耐。乃知庶彙蕃。見聞有不逮。虞衡志旣遺。草木狀未載。老夫喜駢麗。摘字爲尋對。閩中佛手柑。吳下鬼目菜。

海珠寺

江水從西來。海潮自東至。一柱當中流。厥惟海珠寺。石根插飛濤。碇此百弓地。能隨水長落。又似憑虛繫。蒼茫煙波內。一朵浪花沸。上有水晶宮。凌空擅清閼。層樓入穹漢。千里目可寄。高榕森綠陰。遠縮雲霧翠。其外樓櫓周。礙眼若鱗次。鎖鑰壯都會。亦以寓警備。人物蛟墟形。臺殿蜃市氣。地真浮玉如。名叶照乘譬。大水環之流。恰作圓折勢。千艘往來繞。亦似躡龍戲。我來一登臨。爽明豁心意。向疑珠宮名。齊諧但誌異。豈知今日遊。真入圓光麗。其中况迴複。層折歷階砌。笑比九曲穿。身乃化爲蟻。

羅浮紀遊

生平慕羅浮。嶺嶠苦難到。一官得廣州。謂可領其奧。終歲守簿領。依然限登眺。今年幸遷官。候代未就道。及此不一遊。恐貽終身懊。座客况二士。雅興有同調。休文蔚詞華。道子擅墨妙。酒間贊予決。遂鼓中流櫂。一葦凌茫然。清風已盈抱。

花手一小菴。是爲初禪地。丈室雖精嚴。平墟少幽邃。迤邐入山麓。引人漸深致。一磴一紆迴。萬松萬蒼翠。磴道轉

欲窮松陰接猶鷲。肅然華首臺。山僧拱而企。入門得瀟灑。庭齋潔無滓。鐘魚勤課誦。經卷妥位置。其後合掌巖。徑以曲逾闕。飛泉百丈瀉。奇石兩崖閉。何許好溪山。爰爲僧占寄。

飛雲五千仞。

飛雲峯。爲羅浮極高處。

雲羅

雲聚族而衆。我行入迷茫。目力不得縱。蓬蓬觸石出。鬱勃誰能控。一東又一西。如迎

復如送。有時兩相薄。便欲作陣鬪。天風來撼之。吾身與俱動。回看諸峯頭。滅沒若浮甕。咄哉信奇觀。盛氣涵洞洞。

終歲頂自封。昏如不醒夢。君看曦輪光。欲漏苦無縫。卻問山下人。赤日灸背痛。

遙望北山巔。

有人瘦而坐。是日宿冲虛觀所見。

疑是神仙流。經謫偶此墮。詢之道童云。觀中推上座。黃白曾不談。吐納亦

不課。往往探藥去。能耐十日餓。我聞益驚詫。謂得箇中箇。策馬急就之。與語問所做。未解爲鳥伸。但誇伴虎臥。斯

言則已淺。非有方術大。特一樸野人。好靜息勞瘁。凡事須目察。真僞乃不錯。假使遇此老。不爲親勘破。應貽平生

恨。謂異人蹉過。二字見楊誠齋詩。

茲山在中原。未必首屈指。獨其靈秀殊。發現雲與水。四百三十峯。峯峯有雲起。七十有二溪。溪溪有水瀾。我行半

天下。名山閱萬里。若論雲水多。未見有及此。緣知茲山靈。清淑孕其裏。我生到何幸。惜哉日無幾。候吏催下山。控

我馬行駛。明日梅花邨。回首空倚徙。路循溪水清。山隔暮雲紫。

### 哭鐵騾

騾爲余從軍時。晨夕所騎。雖有副馬。不用也。上下岡坂。曾無一失。色純黑。軍中呼爲鐵騾。事訖。歸鎮安。移廣州。皆從。今將赴黔。水程遠。不能載往。爰贈番禺張令。甫去一夕死。詩以哭之。

作吏未惠民。遑敢說愛物。何哉一騾死。翻爲淚痕盜。憶昨從滇軍。市駿備馳突。汝忽應募來。黑光潤如漆。昂藏五尺高。氣壓馬萬匹。試之知其良。不煩駕馭術。我慕驄馬工。汝步何俊逸。我羨駃騠駛。汝走何迅疾。但口不能言。意向早洞悉。雄姿况瘦勁。色鐵骨亦鐵。出門二十里。毛竅汗未濕。按轡方緩行。從騎奔始及。巨礮轟一聲。驪黃盡股慄。屹立獨不動。四蹄儼卓筆。爰作我的盧。不許僮僕叱。相倚互爲命。汝足卽我膝。下鞍與汝兩。上鞍與汝一。滇南

多巉巖。登頓弗自恤。深恐汝力盡。勒銜每暫歇。鼻息喘向天。沸成雲濤勃。憫勞摩汝頸。汝亦若就暱。但有依依情。絕無悻悻色。此段可憐意。至今取難沒。兩年無刻停。萬里未一蹶。事訖歸官衙。策勳償以佚。相隨粵西東。日餽膏芻苢。無何又移官。難共載水驛。忍換名姬姿。肯賣市僧直。爲擇同官贈。吾願庶粗畢。胡爲甫出閤。一夕遽告卒。嗟豈前生債。只許供我役。否則義烈心。離主甘就歿。所悲艱難際。用汝力幾竭。及夫身就閒。棄擲命不活。追維子方語。此事痛至骨。沉刻處。筆力透紙背。德麟。

### 舟發潯陽

潯溪五溪源。淺碧俯見底。客行陸程盡。水程自茲始。小舟麻陽來。高僅尺有咫。欠伸輒打頭。跌坐不得起。生平負傲兀。罰受折腰恥。妻孥有怨言。僮僕竊愁視。倦客顧弗聞。但覺舟行駛。步步是歸程。程程是下水。

溪河本非河。其始蓋山麓。爲水所衝蕩。泥去石骨露。石多遂成灘。節節駭機伏。急流方奔騰。一東起怒瀑。狹或尺二三。高或丈五六。可憐上灘者。力盡一篙竹。波吒命欲拚。邪許聲似哭。苦恨天設險。舫此扼隘酷。嗟哉一何愚。不見睫者目。危灘雖多阻。迅水實藉蓄。設無此隔閼。留水作河湫。將愁一瀉盡。又歎舟行陸。

上灘遲如牛。下灘疾於鳥。上灘恨灘多。下灘恨灘少。逆風極棹牢。順風駕帆嫻。逆風恨風大。順風恨風小。人情例貪得。孰肯平心較。試與下灘人。回看灘水倒。嗟彼上灘者。求魚緣木杪。試與順風人。回看風力矯。嗟彼阻風者。待兔守株老。凡事作此觀。百念可以了。香山所不能到。舟。

### 小孤山

孤峯插崩瀉。日與雷霆鬥。四旁嶄無附。矗空一柱秀。自非千丈根。安能植不仆。級級勢累巒。太古誰所斲。風雪久剝蝕。石色積鐵透。草木根其罅。一一堅且瘦。虬松乃十圍。焉知幾千壽。中藏仙姝宮。繫翠闔戶牖。妝成嬋娟姿。不作老嫗皺。居然大琳宇。香火日奔湊。小孤本非姑。何年字訛謬。屈使作女身。頗遂著靈佑。乃知人心幻。事多憑虛構。及夫意造成。鬼神亦俯就。我來暫停舟。正值寒雨驟。也疑行雲歸。濛濛濕巖岫。樸老入舟。

卽事

出門廿五年。故鄉如異域。中間偶一歸。曾未突黔墨。今來循里社。門巷多改易。舊時同輩人。見面了不識。別後所生者。翻可以意測。昔見某少時。顏狀宛可憶。肖者必其子。十果八九得。卽事一慙然。感此日易昃。觀河性空在。老慨波斯匿。安得辟穀方。長保鬢邊黑。

漁塘卽事

腐儒昧生計。貧薄天所與。囊餘幾文錢。便思作豪舉。百千買廢壤。蒼然在平楚。曲池五百弓。周圍作疆圉。中有廿畝地。幽僻似蘭堵。於焉結茅屋。綠陰就老楮。種竹竹能笑。蒔花花欲語。便作佚老堂。此福天已許。平泉醒酒石。旋落監軍手。午橋綠野堂。後爲張相有。堪笑甌北生。辛勤種花柳。似立不拔基。欲以傳永久。將毋愚公愚。貽笑河曲叟。勸君且勿笑。意固各有取。達人遊秉燭。智士歌擊缶。行樂貴目前。亦遑恤其後。君看百年內。何物能世守。

昔官西南陲。到處衆山繞。蔽遮礙曠望。恨不盡剷了。今歸江南村。又苦乏煙島。欲營十丈岡。計費百金造。迴思黔粵境。巖岫知多少。倘割一角來。已足雄江表。妾得煩神鞭。驅石落吾沼。一笑姑妄言。人情例顛倒。有山嫌山多。無山覺山好。何如卽眼前。俯仰豁懷抱。奚必占邱壑。方可以娛老。

成都葛武侯。曾植八百桑。畏吾廉孟子。亦築萬柳堂。我生二公後。何一可較長。乃於老圃中。也復羅青蒼。種桑四百株。栽柳三千椿。物是人則非。毋乃不自量。伊余豈慕古。妄冀附末光。維桑可禦寒。維柳可納涼。寒燠各有資。此亦經濟方。濟物則已矣。聊保身其康。

春從何處來。頃刻動土脈。勾者忽已萌。甲者忽已拆。一夜一玫瑰。昨寸今則尺。生機怒長處。速於馬馳驛。或葉而尖圓。或花而紅白。雕鏤誰施功。渲染誰著色。乃知化工妙。一氣所旁魄。卻憶數十年。枉爲塵事役。日在天地內。不識造化迹。今始得靜觀。一一矜劖獲。人老俗緣謝。心閒物理格。茅齋小牕羽。晏坐將讀易。

幽尋

幽尋不知疲。意行度遙陌。昔游所未經。數折地愈僻。忽至野水岸。路斷行跡絕。欲問空無人。一鷺草邊白。

編詩

聞居靜無事。編閱生平詩。常苦少作多。老去漸見疵。割愛心不忍。改爲力已疲。其有得意處。時復一哦之。搬薑鼠何味。食蓼蟲偏怡。或誤吞釣餌。或走觸甕醯。贏得妻孥輩。私相笑其癡。歐陽昔作文。喜共師魯披。伸紙一疾讀。其樂不可支。坡云七分讀。劣句生妍姿。我今無此友。將欲索解誰。名山傳其人。斯語亦自欺。人亦未必讀。讀亦吾弗知。不如還自賞。我我相娛嬉。昔我卽伯牙。今我卽鍾期。本從性情出。仍來養心脾。魂尋舊遊夢。緒引不斷絲。生平辛苦報。消受惟此時。真詩人之言。先

偶書

文人致青雲。初以文爲媒。才名日暴著。積漸登三臺。及夫官旣崇。又須談幹濟。幹濟乃空談。何能立一事。其文亦遂墮。久作敝屣棄。一朝夜漏盡。論定始可憐。欲入文苑內。旣無文可傳。編之列傳中。數演不成篇。所以明眼人。見幾斷於內。不能立勳業。及早奉身退。書有一卷傳。亦抵公卿貴。

戲咏蛛網

蜘蛛爾本微。偏具善知識。結網挂簷端。憑虛求口食。初若營大廈。向背審南北。爬沙去復來。攀緣降又陟。扼要在立網。如柱必早植。意取佔地高。法貴引繩直。潛抽乙乙絲。泄自尾尾黑。於焉定間架。次第功乃卽。經先緯斯後。外闌內漸窄。界畫羅盤痕。圓規渾儀式。入扣撰迴文。先天圖太極。宛宛旋螺紋。團團磨牛迹。循環無斷緒。疎密有定則。勻豈粉線闌。巧賽錦機織。蝦簾出鬼工。鮫綃絕人力。當空不成翳。映日轉無色。用以掩不虞。誘物入微罍。我思寥廓天。千步幃難幕。區區設罽羅。包絡能幾尺。細僅明鏡懸。大亦車輪仄。奚管三面開。安冀一目得。吞舟會當漏。冥飛詎可弋。庸知艾而張。終資飽胸臆。味者入吾網。失足落荜棘。義通釣不綱。術用攘非奪。譬彼信天翁。取給同

場畫。或黏蠓蟻軀。或寄蝶蜂翼。觸籬毳躑躅。鑽紙蠅富塞。鷹講難遠颺。馬枚早被勒。老蛛顧之喜。朵頤觀其亟。危機汝自投。弱肉我何惻。爰果腹彭亨。不向牆隙匿。傲然據中央。端坐快偃息。咄哉造化奇。生理信難測。一物賦一技。俾各食其力。鵠有隱巢木。鶴有長水石。燕能忌戍己。鼯能辨時刻。避風者鷄鷓。禁水者鱗泐。鳩鳥爪禹步。穴蛇出就罅。啄木嘴畫符。樹蠹起受効。由來謀生智。固卽性之德。獨怪蛛也靈。編裘殊太賈。滿腹蘊經綸。不以供綸袪。曷弗罄緒餘。致用到服飾。衣被堪及人。黼黻更華國。老蛛掉頭謝。此事非我職。不見吐絲蠶。佻人翻自賊。聊復私一手。寧須羨九罭。甘在翹肖中。爲楊不爲墨。如此小題。而刻畫鋪張。一至於此。每讀必嘆曰。奇才奇才。枚。

放言

一物有不知。儒者引爲恥。豈知物難格。萬彙紛莫紀。試廣支諾臯。一一數僕指。駝卵旣發祥。龍鬣乃徵否。石沉有浮磬。木浮有沉水。蠶孕寒冰中。龜活烈火裏。羊或種肉生。人或飛頭起。豬或牙有佛。魚或身作妓。蛇何爲兩頭。狐何用九尾。蟹奴寄殼居。水母借目視。按旬蛔口移。應候象膽徙。犀角軟貼胸。鼠皮堅種齒。鷹從嘴出糞。兔向口吐子。木偶鬚忽生。泥馬汗自泚。狸能雄能雌。魍不人不鬼。綠蓑化兒啼。枸杞作犬吠。蕉爲女善媚。楓變叟不死。桃椰腹多麪。椰實汁成醴。樹理字如刻。石紋畫如綺。冶葛性殺人。山牛食之笑。巴豆毒戕命。飼驢大如豕。長狄身九畝。儻儻三尺止。靈椿壽八千。朝菌及夕萎。餘骸同穴棲。飛走通精髓。雀蛤隨時化。水陸互軀體。齊諧難盡誣。燕說豈徒詭。陋儒論理氣。釋經守故紙。謂氣從理出。此究是何理。乃知理之外。氣尚無窮已。茫茫化者機。未可測以咫。一

癸黃月山

士之困不遇。未有若此翁。讀書七十年。苦如食蓼蟲。搥筆爲詩文。煨煉期必工。出無千金幣。居無一畝宮。弱冠早授徒。生計落此中。一日罷館穀。便愁粥不供。晚更雙耳聾。難復求童蒙。肝誰餽閱頁。鄉莫置鄭公。何哉天才之。而獨遺之窮。所以酒闌語。時見氣吐虹。

翁有詩數冊。欲刻苦無資。期我刻集日。并爲料理之。酒間已心許。力乏仍需時。遂令翁生前。不及卷帙披。聞翁歿。猶視母乃意在斯。斯事吾諾實。幽明當弗欺。所悲不朽事。悠然未有期。翁詩恐不傳。欲附吾集垂。吾集傳不傳。亦尙未可知。安得歐陽公。來序宛陵詩。

秋園預製斂具詩以調之

九十始日修。聞諸小戴禮。其絞衾給冒。猶必待既死。胡爲君六十。先料理及此。家有黔婁妻。身非若敖鬼。豈聞封遮須。含笑治行李。君言生有涯。期至須蛻委。未卯求時夜。終勝渴掘水。卓哉所見高。勘透夢泡理。慧業示飾中。俗緣喻脫屣。笑彼夜行人。漏盡不知止。

自我歸田來。抽帆幸到岸。君已臥林下。家事悉禁斷。相顧輒然笑。兩個都散漢。從此蛻蛻交。蹤跡不可判。遊爲同隊魚。飛作一繩雁。忽然君戒行。毋乃太荒幻。無病何必呻。當饗豈須歎。吾尙貧吾生。期君作老伴。君勿遽爲此。使我驚背汗。

衰年惡聞死。祝延亦恆情。君獨無忌諱。斂具手自營。譬如行腳僧。晨起打包輕。掉頭忽欲去。飄然可遐征。又如險項吏。日日辦嚴程。搏擊尙不勝。便作掛冠行。闔羅顧而駭。乃有此狂生。不受腐鼠嚇。其鋒殆難撓。笑謂鬼判官。二毛且勿擒。此信物一角。將挫吾威名。不如姑舍是。聽其老成精。生觀橫

五言古二

齒痛

少讀昌黎詩。笑渠作牛飼。我時齒力堅。足供老饕恣。雖輸編貝工。幾可嚼鐵碎。連砂爛脫粟。帶骨決大齋。舞陽生麋肩。直欲一齧試。豈期近年來。微罅生櫛比。每飯費剔搔。疑有蟹奴寄。忽復浮陽蒸。旋起腫肉膩。一團無根火。鑿灼滿口熾。含痛魚銜鉤。負傷虎帶刺。舖糜但軟飽。就枕鮮美睡。經旬委頓餘。一個忽委地。翻因剝膚灾。快此澈屣

棄其餘皆動搖。告別將以次。曾聞袁子才。留齒善持議。謂齒在其身。差不失位置。笑或粲然露。食必肥者致。不如輔車依。勿遽悻悻避。我欲援例請。齒也早自計。百物甫入口。惟齒職勞動。及夫得味時。又屬唇舌事。我則任其勤。彼則收其利。譬如老邊將。轉戰心力瘁。安坐享太平。廟堂有高位。斯理誰能平。固難禁其對。姑弗誘甘言。且與講大義。附我數十年。亦有賓主誼。懼汝剛則折。啓口每加意。梭恐鄰女投。弗敢與之戲。拳恐武夫毆。未嘗觸其忌。柱齠既謹言。穿齦亦表志。非象曷賄焚。挑鼠豈訟累。拾有牙慧誇。寒未昏亡至。相處尙不惡。中路忍乖異。辟穀旣乏方。覓乳又滋費。坐視飯顆瘦。甯弗少留憇。齒也始驟然。君言甚情摯。已落難復存。椽之慮仍墜。吾將再生兒。供君養頤嗜。善於語言。極才人之能事。鄙人齒痛一首。差可附後塵。故。

刪改舊詩作

食筍愛其嫩。食蔗愛其老。愛嫩則棄根。愛老則棄杪。非人情不常。物固難兩好。何況詩文境。所歷有遲早。少時擅藻麗。疵類苦不少。老去漸剷除。又覺才艷槁。安得美並存。病處又俱掃。晚作蔗根肥。少作筍尖小。少日所得意。老去覺卑陋。奮筆擬刪之。謂今學始就。焉知今得意。不又他日效。詩文無盡境。新者輒成舊。漫勒鐵函藏。行復齮齶覆。笑同古煉師。燒丹窮昏晝。一火又一火。層層去粗垢。及夫燒將成。所存僅如豆。未知此豆許。果否得長壽。

書懷

少賤苦窮餓。求官藉饘粥。及夫仕宦成。又想林下福。此意殊不良。未可對幽獨。其如才分劣。自審久已熟。同乎俗吏爲。吾意旣不欲。異乎俗吏爲。吾力又不足。是以拙然止。中歲返初服。敢援老氏戒。謂知足不辱。庶附風人義。坎歌伐輻。

旣要作好官。又要作好詩。勢必難兩遂。去官攻文詞。僮僕怨其癡。親友笑其癡。且勿怨與笑。吾自有主持。一枝生花筆。滿懷鏤雪思。以此溷塵事。甯不枉用之。何如擁萬卷。日與古人期。好官自有人。豈必某在斯。



書所見

孔教所到處。無不有佛教。佛教所到處。孔教或不到。四裔榛區。詎有孔子廟。如來觀世音。乃皆莊嚴妙。何哉正學炳。反輪異端爆。豈非福利說。易爲愚民告。要其俗雖殊。固不外吾道。君仁而臣忠。父慈而子孝。孔書縱不至。光遠則已耀。

世儒好周佛。多欲窮其精。我但言其粗。了然自易明。其教嚴戒殺。物命固長成。卻絕男女欲。不許人類生。將使大千界。人滅物滿盈。此豈造化理。流毒逾秦坑。試起廣長舌。將以何說爭。比昌黎立論。愈精愈精。乃知名理固不在聲言也。保泰。

午睡

少小讀魯論。晝寢懲昏頹。每當午欲睡。解以苦茗杯。豈知老而衰。漸與睡爲媒。飯罷輒交睫。兩目撐不開。初猶悉力拒。繼乃應候來。中有一片甜。其味美於回。早知有此樂。何嫌朽木材。竊疑孔聖人。先生欺余哉。

游孝女測字養親詩

名文園。年十七。以測字養親。

測字古未聞。相傳始唐末。玉馬崔道士。北千止剽奪。宣和謝潤夫。聲名徹禁闕。御書朝字來。知十月十日。問官得請字。謂未全言責。問孕得也字。謂胸有蛇疾。迨乎南渡後。專家益輩出。士如畫爲王。杭移點成木。權相書退字。日與人甚密。知其糾結深。至老不罷黜。權閣書四字。國內大人一。其如四無依。懸縊兆可必。斯皆擅絕技。巧中百不失。至今江湖間。往往習其術。大抵游食徒。星卜同一律。何哉游氏女。亦復矜弄筆。設案闌闌中。風吹面如漆。波磔或拆離。偏旁或配匹。卜者信手拈。輒爲判凶吉。問女年幾何。何不處在室。有嫗坐其旁。一一爲縷述。幼小讀詩書。今年十有七。親老鮮兄弟。藉此養衰疾。街頭字一個。堂上米一溢。嗟哉女何賢。會閱出巾櫛。豈惟風慧深。托業良可卹。揚州銷金窩。動擲千萬錢。廚有臭酒肉。途有墜鈿焉。何不涓滴分。憫此婢嫗質。免使傍路塵。含羞對蠶聒。我欲竟此語。或已笑迂闊。原原本本。無一字苟作。保泰。

老境

蘓北詩鈔

五言古三

二七

天生人官骸。一器具一用。惟此眉髮鬢。無知覺運動。既一無所能。偏能將老送。時時來嚇人。勾引冰霜凍。又居最高處。黑白見者衆。此豈不可憎。化工何必種。我欲盡髡之。拚得一夕痛。無奈纔掃除。重生又如葑。

少聞柳下惠。能坐懷不亂。私心竊疑之。謂孰在旁看。柳下自言耶。真僞未可判。女出告人耶。亦難作定案。安知非欺人。外托秉燭旦。今我老境來。始信語非謾。從前好風懷。久作春冰渙。即令伴橫陳。味已嚼蠟換。然則易事耳。何妨夕見粲。以我蒲柳衰。證彼葛藤斷。老夫與古賢。可同號鐵漢。快論。獨闕千古。并。

故人

故人多賸任。快若凌風柯。建牙乘朱轡。曳履躡青瑤。門列榮戟森。家擁金玉瑳。偶念及腐儒。知其掩關坐。或憐范叔寒。遙贈綈袍裹。或笑杜甫癩。作詩嘲飯顆。豈知此老頑。解衣磅礴裸。心方古人期。願肯諸公駁。生前不如他。死後不如我。

子才過訪草堂見示近年游天台鴈蕩黃山匡廬羅浮詩流連竟夕喜賦

薄暮君忽至。令我喜欲顛。與君兩年來。書問月幾箋。終不如見面。快此所歡宣。何期有今夕。把酒荆燈前。當年驚蛺蝶。逸態猶翩翩。髭鬚雖已白。狂過惡少年。醉後起談鋒。巖雷日炯然。妻孥亦驚咤。私闢門隙邊。不知是才子。但疑老神仙。

趙州年八十。打包始行腳。君亦近七旬。忽思訪名嶽。攜囊黃海深。看爐台洞灼。旋支廬阜筇。復躡羅浮屐。攀崖臂爲猿。穿松身化鶴。顛趾倘不慮。蓋粉付一落。求榮求利耶。爲此豈羨樂。及歸倒錦囊。奇句森歡薄。青山千萬石。生面一朝擴。始知此老黠。重輕早自度。好詩拚命換。雖礙固未錯。

文人例相輕。反脣互瑕尤。楊秘王後居。邢笑任集偷。嘲杜飯顆山。壓李黃鶴樓。豈知皆小見。氣矜羣兒咻。茫茫太宇宙。聽人各千秋。蓋棺論自定。睽睽有萬眸。劣難論如膝。優難禁出頭。所以君與我。彌覺意氣投。尹邢不避面。翻欲同羅幃。君才馭駘輪。我力鼓浪舟。一代詩人內。要與今曹劉。

仙霞嶺

城逼不甘卑。突起聳天半。四山積鐵黑。陡削千尺岸。何年遙往來。線路入穹漢。闔越此扁鑰。界畫天所判。初從井底升。盤旋劣容駘。馬蹄石迸火。人額笠雨汗。曲磴萬級梯。喬松百尋繳。漸躡罡風顛。羣喘作雲煥。屹然見雄堞。鎖兩崖斷。扼隘成絕險。石角露精悍。信哉形勝。一夫劍可拔。古來割據幾。往往藉掇扞。寶應及審知。乘時劃疆畔。翻疑天設險。徒爲人長亂。不知鴻濛初。剖此危仄。我來值承平。途已列闌閑。緬惟國初時。遺孽尙潛竄。開門有降將。省折槍半段。國初叛閩。鄭芝龍早有降意。仙霞關不留一兵。故大兵得長驅入。強藩繼鷓鴣。欲取浙潮盟。老瞿當道臥。終擢賊牙鉞。取逆之變。李武定兵。賊徐敗退。事往父老稀。時清風景換。重開念勇夫。俯仰一揮翰。

寓齋獨坐作

舉世鶩榮利。退士獨掩關。懷古手一編。蕭然冷生活。人謂此老癡。此老實最黠。衆所競趨處。一罅萬夫奪。惟茲文字緣。無人問阡陌。恣我磅礴遊。天馬驟空闊。人奪我所取。正是巧貪得。待彼榮利盡。所就已莫及。送者自崖返。回視但塵沒。

士有名世才。出手爆雷電。遠夷爭購詩。遠宮求識面。必待史策傳。其傳已有限。嗟我生也晚。不及見古人。但登古人遠。可望不可親。盡力相追從。猶疑隔一塵。千人萬人中。有我七尺身。千年萬年中。有我數十春。白首自照鏡。孱然暗傷神。

山行雜詩

我歸江南道。應出仙霞關。時當兵凱旋。喧哄滿市闌。乃遵海而北。路入千萬山。出郭首北嶺。陡入霄漢間。遙望疑無路。猿猴亦難攀。豈知所必經。一線縈榛菅。昇輿數十人。作力投腳彎。我成百足蟲。蜿蜒上青孱。自笑老何苦。白首歷此艱。

有司僱輿夫。送我遞郵舍。輿夫見官僱。知從憲府下。將我作奇貨。簞直索高價。停肩不肯行。求益恣嚇詐。名士值

幾錢。竟似將我賣。民轉膏官貲。此事殊可詫。輿夫前致詞。使君幸勿訝。平時官賤民。錯鉢弗肯赦。惟此聊取償。稍嘔老饕炙。

謝公昔遊山。屐換前後齒。我老不能行。筇輿代步履。其奈高下間。將我簸若秕。上山身仰眠。下山手旁抵。老夫忽設計。奇智出囊底。輿夫有短長。呼來就排比。上則前矮張。下則後短李。人地一調劑。遂覺平如砥。所慚役人力。彼肩代我趾。

遙山最深處。想必無人居。一縷炊烟起。乃亦有室廬。始知生齒繁。到處墾闢劬。虎豹所窟宅。奪之爲耕畝。尙有傭丐者。無地可把鋤。民生方愈多。地力已無餘。不知千歲後。謀生更何如。

一層又一層。直疑到天上。及行至層巒。天高仍難量。試以目力揣。無異平地仰。乃知不可階。固絕人意想。本地者親下。身已落塵埃。橫可徑萬里。高難騰一丈。安得洪崖肩。何來巨靈掌。所以謝自然。退之斥其妄。

山雲纒滄起。頃刻雨點飄。乃知雲變雨。不必到層霄。祇在百丈間。卽化甘澍膏。君看雲薄處。曦影如隔綃。自是此雨上。仍有赤日高。

青山近可登。碧澗清可酌。結廬者誰子。牆荆瓦編籬。門外幾株松。濃陰綠成幕。荷鋤出種稻。攜鏡兼采藥。時復蒸木芝。清香透林薄。洵美此家居。足以老耕鑿。我非茲山人。恨不一椽托。可惜居山者。不識山居樂。

過青田訪劉誠意故居土人云在南田山頂去地千百丈其上平疇千頃村落相望皆公子孫也質之縣令趙君亦云惜匆匆不及往遊賦此以誌

我行青田江。言訪誠意宅。居民爲指點。宅在千勿壁。其上一洞天。良疇千頃闕。山平有迴環。水軟無跳擲。厥土乃上腴。畝歲收二石。處者皆劉氏。丁戶累數百。猶守故侯風。服田讀書策。雖無顯仕宦。亦少賤隸役。惟公精青鳥。堪輿審所擇。是以占地靈。椒聊衍蕃碩。斯語殊未然。公本志勳績。一經治春秋。決科早通籍。恢奇二鬼篇。英略蘊自昔。豈屑識緯學。小數叩幽蹟。時當元運衰。猶應行省辟。慷慨討賊議。同官舌盡咋。獨從石抹公。歷險冒戈戟。使其

果前知。肯狗陽九厄。是知世所傳。淺夫妄億逆。想公卜居意。但取茲境僻。外無紛華炫。內有耕鑿適。龐公計貽安。楚相地取瘠。老成垂慮遠。正以保宗祏。徒擬形家言。未免腐鼠嚇。英賢自有真。豈在著與筮。世所驚神奇。不直一笑啞。事往跡尙留。論定品始白。遙望青山高。遐哉君子澤。

嚴灘

去年過嚴灘。子陵向我笑。久作林下人。胡出逐旌纛。得非白頭嫗。塗粉思再醮。今來過嚴灘。我向子陵誚。披裘跡近街。加腹氣非傲。特恃故人恩。巧立高士操。繫余慕武夷。隨人入閩嶠。適當有軍事。借箸聊一効。非特酬知交。兼藉國恩報。事定仍拂衣。一路快登眺。出不為求名。歸不失高蹈。比君弔詭處。稍覺襟懷浩。湖天有一曲。去披綠篔釣。

樹齋大司馬述菴少司寇奉使奏郵扁舟往晤流連永日別後卻寄

老懶寡送迎。忽焉泝淮浦。難得兩使星。皆是我舊雨。一見不可無。別緒要傾吐。憶昔共樞曹。趨直日接武。踪跡負蟹盃。意氣食牛虎。神索夜草箋。朝靴曉踏鼓。退直偶得暇。餘勇尙堪賈。催詩走竿牘。折柬衍尊俎。徵逐豈厭頻。諧謔或致侮。人間朋遊樂。此可入畫譜。宦轍一朝分。相望萬里阻。使節漢南庭。樹齋屢鎮塔爾巴哈台等處。价藩日北戶。述菴南。勞深官亦高。雲霄果籜羽。開府門列戟。馳傳吏負弩。即今兩名卿。天下仰台輔。而我早歸田。一編守環堵。不敢尺素通。焉慚在塵土。卻荷故人誼。屢書問良苦。今朝獨何緣。握手覽湖滸。乍見看鬚眉。深談罄肺腑。稊痕緬鎖關。屢聲憶丹廡。陳蹟宛猶昨。舊交已難數。當時列仙班。半入點鬼簿。天留我輩在。要作秋容圃。升沉途雖分。衰晚力須努。立言有待查。策勳有盟府。在朝與在野。均貴桑榆補。名恐堪輩同。功肯噲等伍。皓首各勉旃。相期在千古。

反矐目篇壽王西莊七十

好書如好色。遇輒與目成。當其悅心處。不減對傾城。所以耽文史。亦名爲書淫。淫則必有罰。咎惟兩目任。先生探博博。萬卷羅縱橫。畫竭一線晷。宵燼五寸檠。有如訪佳麗。欲遍姬姜羸。乃招天公妒。強奪雙青睛。有花使霧看。無

燭使夜行。謂可示孽報。陳編難披尋。豈知盲其目。不能盲其心。翻令收視中。覃思益專精。照幽慧燈明。記事胸珠明。盃掩日射覆。鏡聽兼卜聲。遂比那律多。冥觀洞八瀛。天公顧而笑。困之乃益亨。由來禁好色。莫禁相思情。還他正法眼。炳燭追荀卿。拔釘淬速去。刮鏽翳弗榮。依然兩清臚。秋水光盈盈。宋豔消水日。黃嬾娛深更。直至方瞳年。巖電常晶熒。

清流關

我我清流關。擊翠孰椎斧。一夫瞋目當。可卻萬貔虎。天險與人傑。相遇出建豎。南唐守壽春。扼此作強戶。宿師十五萬。警備嚴旂鼓。北兵歌檀來。嘖嘖如風雨。夾馬有真人。先此試深阻。交綬偶失利。何以讐淮浦。西濶支半圓。擊堦月未吐。直擣郡治牙。一劍落皇甫。勝勢乘破竹。都監亦被擄。堂堂兩大將。一朝繫雙組。遂盡淮南地。畫江作邊圍。當時立奇勳。戮力王事墮。豈知日後觀。似自拓疆土。所以端命殿。奕奕誌皇武。開邊渡瀾滄。得國承柱宇。事變萬不常。固難一例數。我來一經過。陳迹久榛莽。時清無戍戍。民晏各安堵。山高而水深。巍然坐懷古。

昭明讀書臺

諸宮愛讀書。梁唐兩太子。昭明文選樓。舊在邗江涘。亦聞烏目山。續學構潛邸。匡廬有新臺。乃自昇元始。景遠方毓德。築館聚文史。書幃障皂羅。千植蓬萊紫。後來踐閨位。猶念舊遊里。賜田一千頃。養僧一萬指。空門豈無情。報國心共矢。及聞金陵圍。勒王赴江汜。誓將髡頭落。欲救肉袒恥。法和香火盟。繼顯倉府李。舉事雖不成。其志實英偉。是皆炳誌乘。可溯臺緣起。何年換蕭統。翻作不祧祀。乃知流俗說。數典食以耳。寺法僧盡蠹。世遠碑莫紀。鵲巢遂占鳩。張冠竟戴李。伍胥塑髭多。韓愈繪髯筆。傳不傳有命。自古皆如此。

棲賢寺瀑布

開先瀑布寺中。棲賢瀑布寺外。寺內得擅奇。寺外難稱最。豈知萬斛泉。東以二初滄。直繞寺門前。衆練絞一帶。積盈莫可竭。無鬼亦作怪。雄雷不贊泥。跳入此急瀾。咆勃起吼聲。震破垂龍曠。年久石被嚼。似切昆刀快。陷深遂成槽。始

信水力大。一落忽萬丈。澄淵斂碎泮。溢出復洶洶。勢仍怒裂眦。峽橋來夾之。騰下使出界。羞忿不回顧。一去駛莫  
搯。咄哉信奇觀。流遠力弗鐵。迴瞻三石梁。銀河百丈挂。彼乃跌自高。此則噴於隘。

### 王文成公紀功碑

粵西歸德峽。見公磨崖名。平田州所刻。今讀廬山碑。駭烈彌崢嶸。維時變猝起。稱戈出宗盟。殺吏據都會。欲徑趨陪京。  
公在震鄰中。羽檄張虛罄。使之邊疑間。下遊皆守城。迨賊沸唇出。急搗巢穴傾。攻其所必救。邀之於歸程。鄱湖水  
流血。樵舍風偃旌。遂令老劉漢。一戰糜長纒。偉哉儒者績。討逆談笑成。所率皆文吏。所用皆民兵。滔天禍變劇。一  
月手削平。亂同張方壘。功逾亞夫營。嗚呼豈異人。公亦一書生。諸詩皆簡潔奮發。不能增損。一句。是此公老境。故。

### 白鹿洞書院

鹿洞古書院。南唐所育賢。號廬山國學。養士有賜田。堂堂朱助教。鼓篋勤陶甄。盧絳剝鼈蓋。三害悉改衍。見陸  
唐書。晦翁守南康。踵舊開講筵。道學一以振。朗日行中天。名蹟遂獨擅。胥忘保大年。嗚呼後居上。創者轉就湮。書  
臺百尺基。既被昭明遷。書院千間廈。又爲朱子專。一笑李中主。身後太可憐。

### 題洪建侯梅花小照

梅花遇何郎。格韻正相肖。如何孤山翁。衰醜強索笑。欲待橫斜句。來作鏡臺嬌。老夫聘女妻。梅花未必要。花今獨  
何幸。相賞得英妙。景虛玉雪人。清才擅年少。姿與花同潔。氣與花並傲。來爲花作主。千株靜延眺。豐韶製鶴筆。陋  
彼齋背囑。潑墨南宮山。烹雪東坡銚。坐令花花增榮。絕勝紅羅幃。花亦慶所遭。珠蕊朗四照。一笑問梅花。幾生修得  
到。

春間晤西莊於吳門。因其兩目皆盲。歸作反矐目篇。祝其再明。詩成尙未寄。秋初接來書。知目疾竟已霍然。  
能觀書作字。鄙人不禁沾沾自喜。竊撰爲拙詩頌禱之功。再作詩以貽之。西莊當更開笑眼也。

七發能起病。一檄可愈風。少陵咏鬻髡。瘞鬼避血紅。彼皆待披讀。始祛劇疾攻。豈如鄙人詩。祝公明雙瞳。詩成未

及寄。公已豁霧縈。捷於灰飛管。驗若霜鳴鐘。婆羅門善呪。無此大神通。道士拜赤章。枉費斗檢封。一笑呂子明。果非舊阿蒙。自茲正法眼。巖電逾昭融。目力所透處。牆壁洞幾重。撮蚤易拾芥。懸蝨便引弓。不畏騎瞎馬。仍堪數飛鴻。字母煩手摸。花詎愁霧籠。重翻插架書。快比故舊逢。生平未定稟。敢戢束萬筒。時方排纂蠅頭積細碎。牛毛散駢毳。挑燈自排纂。縷縷入紀纒。訂訛蒙奏叟。指迷瞽導童。遂使天下目。障翳盡掃空。人呼照天燭。自喜磨鏡銅。得不歸功我。一詩挽化工。公方開壽讖。廣坐笑眼同。速演玲瓏曲。滿酌玻璃鍾。待余來稱祝。敬酬刮膜功。一詩遠成千古佳話。

新春招程霖巖湯蓉溪二丈暨莊學晦家緘齋小集

少時遇老人。輒思引而避。豈知入暮年。愛老轉有味。新春例宴客。折簡首耆艾。里中有皓首。數叶商芝四。年皆開八秩。程湯皆七十八。莊七。惟我齒猶未。方當拄几杖。敢便聯襟襪。惠然乃肯來。竟援溫公例。既免擁篲迎。兼辭執醬饋。酒弗限三巡。肴偶過五器。維時近上元。滿城鑼鼓沸。寒家少長物。華侈獨燈事。紈縠薄若空。玻璃透無滓。料珠與明角。一一出新製。榮光助豪飲。引滿連舉觴。老拳轟拇陣。謎語鬪鬪戲。醉上凍梨面。胥變朱顏麗。一笑五老峯。突起樽俎地。眼前此數翁。看似無關擊。庸知履舄交。中有昇平瑞。一葉知秋風。一花驗春氣。自非仁壽期。曷此耆耄萃。作詩傳他年。或可洛社繼。

題謝蘊山觀察種梅圖

梅花本豔質。滿樹瓊瑤瑛。不幸遇老逋。始以寒瘦名。遣伴枯僧寂。差配幽人貞。庸知冰雪中。獨領羣芳萌。公子楊裘來。美人縞袂迎。此乃富貴氣。豈徒含孤清。所以商位置。未可冷淡成。宮闈珠蕊朗。堂敞玉照明。襯以紅羅麗。吹之瓊笛瑤。粉額壽陽點。翠羽羅浮鳴。庶幾稱花格。不落窮柴荆。先生文章氣。朝日晃九英。家傍大庾嶺。官歷揚州城。與梅有夙緣。遷宦心仍縈。構軒曰補梅。署中軒名健步移幾程。繪圖誌韻事。課種趁晴晴。晏家一株白。間以姑蘇蘋。嫩香蓓蕾綻。淡色胭脂輕。公餘偶索笑。春風逗簾旌。況有三嬌兒。差肩花下行。崔梨釘座耀。果蓮出水擎。共花



相映發。角立刺史鏡。始知君庭階。信多玉梅榮。此段好游賞。一洗寒乞情。紙帳太薄相。竹籬嫌荒儉。前有何水部。後有宋廣平。與君迭爲三。替梅作主盟。梅亦慶得所。不專高潔聲。陋彼孤山翁。徒誇疎影橫。官梅與野梅。固難一例評。披圖爲梅幸。問渠修幾生。題罷忽自笑。吾方劇黃精。

### 揚州吳秋園之卦

老去朋舊稀。晨星日寥落。何當遠耗來。又惜一個弱。憶我初歸田。君已臥林壑。都講兩同年。庚午與君同考。教習。亦稱同年。握手

手成棣萼。遊爲同隊魚。居比連巢鵲。寓齋與君鄰。近過魯邾柝。寒酸兩措大。詎有豪舉作。觴政三升沽。局戲百錢博。罵座豎髮毛。尋芳鬪腰腳。午飯市有賸。夜歸門已鑰。此樂可忘死。塵網安足縛。我尋客揚州。累君感離索。自茲

不出門。伏蟄如屈蠖。我歸必相訪。漸減舊鬢鐸。因君衰態增。知我暮景薄。一見一回驚。動作數日惡。豈期竟撒手。遙空馭笙鶴。憶君六十時。早自治衾槨。君六十歲。即製衾。余曾有詩戲之。今又十八年。已非意所度。含飴到曾孫。鑄白供笑

噓。於君復奚憾。獨我悲寂寞。紛紛交游中。履舄慢交錯。徵逐水聚萍。緩急風散鞞。誰復似此老。痛癢不隔膜。他時買舟歸。陳迹宛猶昨。風淒白雲渡。花冷紅梅閣。都成黃公罍。并負素車約。魂遊渺何處。蒼茫望遠廓。

### 輓唐再可

自我來揚州。徵逐半舊雨。能詩唐子西。相識自軍府。余從軍嶺南。君方官天南一以別。重逢快傾吐。回首古戰

場。笑脫兵塵苦。江城多素心。晨夕共樂數。雞豚聯近局。折簡迭爲主。花箋險韻疊。葉格意錢賭。談深燭屢跋。飲醉

蔗或舞。荏苒七八年。風流映江滸。就中君最健。逐隊勇獨賈。蕭閒七十翁。髮不白一縷。非染陸展藥。詎飲張蒼乳。熊經而鳥伸。秘術擅禽五。丹元養鉛汞。胎息調龍虎。是以老不衰。徒步鐵腳股。方當享大耋。光景日正午。何期遽

飾中霞飛。倏化羽。風輪一霎吹。殿塌靈光魯。衰年戀朋舊。豈必交肺腑。老輩漸無多。缺一難再補。去歲悲吳剛。已赴脩月斧。滿齋去歲歿。今又弱一個。益傷少儔伍。流光下坂丸。暮景穿縞弩。生死臂屈伸。今昔首仰俯。哭君行自傷。等是殘更鼓。

雞鳴山將侯廟後殿塑仙姝蓋卽其眷屬也不知何年訛爲織女遂有織造使者葺而新之并蔣侯像亦加飾焉天神人鬼混爲一家可發一笑戲爲詩正之

一尉逐賊死現神自孫吳至今雞鳴山遺廟尙一區。冕旒坐正殿後宮列羣姝想卽其眷屬。粉祠聯禱楡何年訛織女錦機練絲綢匏瓜久獨處善保千金龜何至寄人廡弗隔一戶樞仙靈已無邪想不妨綢緞不然瓜李嫌竟減禮法拘已真宅分府便可雲行巫渡不藉橋鶴飛甯煩寫覺翻笑七夕期歲只一歡娛由來愚俗謬神鬼亦被誣在昔梁山祀配以湯陰姑亦有杜十娘遺嫁伍髭鬚甚至帝嬖廟武后並結跣攘取娥英位獨占有鯀處幻瀆太不經同此地封盧獨怪蔣子文身後遇何殊紫髯已肇祀侯封號中都六朝加帝稱幹蠶羣奔趨拔白晝出盪刀槩耀市衢後雖氣餒衰僅祭茲山隅乃又屈天孫來伴絳羅幃生以忠殞命死有色報就奇緣出非望真乃樂不圖只愁上界聞按律問擗輪齊姜本非偶羅敷自有夫亟防牽牛郎來援河鼓枹

奴子陸喜善蒸鴨子才食而甘之命其庖人用門生帖拜喜爲師遂授法而去戲調子才

宋嫂誇魚羹醉庖積羊腩食單雖鄙事亦豈專門業吾家有僕喜燒鴨妙烹割香味蜜釀花火功勻徹扎熬之汁漬融和以滌瀦滑濃可使脣膠爛不煩齒齧何來一老饕飽啖到釜裏頓起乞憐貧潛用媼竈貽傳薪冀密授瓣香乃虔謁庖夫稱門生奇聞兼喧聒古來擅絕技專席恐人奪駕針繡不度羿弓引不發王戎賣佳李去核斷胡杭衛公教用兵十僅示七八喜也倘自秘當守六二括乃被一刺投欣然謂先達淺夫好爲師竟爾付衣鉢發硯矜刃恢出囊快穎脫遂使郇公廚有人敢相軋若彷彿石崇例此奴便摩殺一笑且置之姑勿雞豚察但問何以報手訣謝披豁飲水當思源上樓勿梯技亟買綠頭雄烹飪製如法挈榼獻師門以代滄旆納助我蒸瓠餐一快雙箸夾

將入雲棧十餘里修篁夾路人行綠陰中清景獨絕肩輿中不覺曠曠乃以奴輩所乘馬騎而遊

名監訪雲棧一徑入深竹滄雲十萬竿夾道森碧玉檀欒影交橫併作凍雲覆一片蔚藍天晴霏卷新沐日光午

不濕。似羃方空穀。微風一以吹。解籜時籜籜。我乘巾車行。苦障帷數幅。擬仿賈平章。去蓋露頂禿。僮奴下馬來。勸我騎而矚。采勝囚望車。空曠豁心目。攬轡林蔕中。清陰滿山麓。馬蹄踏不碎。人面袂皆綠。維時四月初。正抽新篔簹。嫩翠衣欲濡。幽芬鼻微觸。猶恐領不盡。弗敢加鞭速。十步九遲迴。緩干跨數鯨。人疑老書生。鞍馬非素熟。豈知年少時。從軍遍荒服。振策千山巔。快驄追風足。今得款段游。早脫塵鞅束。甯復誇據鞍。聊以抵乘輦。臨風一長嘯。響徹篔簹谷。

題嶺南物產圖六十二韻圖為林氏詩畫。梁榮亭有詩。今摹本為吳觀筆。

范公誌虞衡。稽生狀草木。嶺外物產多。瑣異駭心目。我昔官其地。吏事困案牘。但翻城旦書。奚暇爾雅讀。景色失交臂。自笑吏也俗。何期歸田久。粵產翻盈篋。一棧沒骨圖。歷歷見南隴。詩畫兩名家。前輩留遺躅。彷彿吳延陵。追慕極縈緲。開函首螺貝。大小非一族。斑斕駢百寶。宛委旋九曲。次第到花鳥。龜采炫麗騰。馬纓披午風。佛桑映朝旭。六出梔子花。梵天號蔭葛。紅蕉宜綺疏。幽蘭稱空谷。為枝及龍眼。珍可薦奩盞。赤白兩鸚鵡。慧黠過鸚鵡。羅浮五色雀。合隊成錦縵。麻姑遺仙裙。化蝶如車輪。鸚鵡啼駒駟。翡翠飛熠煜。最後蚌吐珠。光搖海波綠。伴以珊瑚枝。水底燃絳燭。使我冰雪胸。頓起谿壑慾。神哉技至此。知費幾管禿。黃筓應汗流。徐熙定心服。而我撫卷罷。遍翻嶺海錄。覺此尙掛漏。試為數更僕。匝地青篲篲。漫山紅躑躅。十月開湘梅。四季霏丹粟。伽楠夜有光。陀利曉逾馥。椰子酒滿杯。桃郎麪論斛。雷柚大如瓜。扶蔗粗於軸。竹一節為舟。茄三歲出屋。桂有蠶堪貢。柑借蟻並鬪。媚草情必鍾。笑花容可掬。蜜有波羅甜。綿豈斑枝懷。植物既瑰奇。飛走更紛郁。孔雀彩自炫。駁驥力嘗觸。吉了巧能言。朱來啼似哭。水犀角在鼻。石羊膽藏足。果馬三尺高。獾牛一峯獨。飢蛟猛取虎。蝮蛇饒吞鹿。帶箭鳥拖尾。吐綬雞贅肉。風狸得風活。火鼠入火宿。下至喘栗倫。種類益繁複。牡蠣堅築牆。蛤蜊賤供馘。瑋瑋纈紋勻。蝦蟆錦襖盛。禾蟲汁可羹。土蝻乳堪澆。嗜蜋或改名。食螻矢與告。防嫩性是瑤。腹肚球名玉。西施舌微吐。楊妃乳新浴。胸膠紫引長。彭亨白出縮。蛤蚧腹能鳴。蟾蜍眉有毒。虎癩殼杯深。龍鱗鬚杖矗。噬蟹蜃樓幻。鷺浪蟹帆速。蜈蚣皮鞞鼓。陀螻甲拒

鐵鯨背高山邱。鱷牙磨人畜。斯皆南海濱。陽明所葺育。語非齊諧怪。事可諾臯續。已入埤雅編。何妨畫筍蓄。曷不增作圖。更寫百十幅。吾當再揮毫。倒盡便便腹。

松坪見余近詩以爲不如舊作深荷良友規益而精力日衰不能副所望書以誌愧

老尙作詩人。已貽士林辱。詩人亦不成。致煩良友勗。枉期精進幢。已入倒迴谷。聞言汗自泚。擬更下帷讀。笑撫白髭鬚。老矣中書禿。

題北溪謙齋蓉湖三壽圖

路公曾有言。獨壽苦無奈。故交零落盡。所遇少年輩。捧杖纔接談。避席輒思退。所以洛社開。廣結老人會。盍簪非一姓。佳話已炙脰。何哉一門中。乃有三耆艾。吾鄉北郭劉。名門著當代。傳經守家學。出仕凜官誠。北溪判隨州。事簡參佐靡。不肯傳舍視。辛勤績報最。政成賦遂初。腰腳尙健在。謙齋早摘科。蜚聲鳳羽翹。作令歷閩粵。所至有遺愛。歸老尙苦吟。詞壇樹旌旆。蓉湖擅經藝。設教先在沛。旋宰駱越鄉。兵後撫凋瘵。官罷貧不支。盤餐仍咬菜。懿茲好兄弟。鐘腳尙相配。幼已讓棗梨。老猶共鋤耒。人總一堂上。年皆七旬外。新詩壁紙廣。先訓書紳佩。無煩出門交。自有聯牀快。寫照者誰子。濡毫得其概。林下三白頭。善氣迎人藹。巾履各飄蕭。松石互暎帶。一幅列仙儒。翛然脫塵壒。遠比三茅君。遊戲良常界。近追壽愷堂。壘篋耄猶對。笑彼宋耆英。枉勞徵冠蓋。娛老求友聲。豈如家庭內。花萼久更榮。桑榆晚未曖。衣冠真盛事。千載此寶繪。

范莪亭孝廉得二扇面一爲倪元璐畫石一爲張煌言自書江上聞笛詩合裝成卷索題敬書於後

巡遠睢陽哀。張陸厓門厄。皆因同死事。連傳在史策。此卷兩忠臣。先後廿年隔。一攀鼎湖髻。一銜精衛石。死固非預訂。生并或未識。手筆乃各傳。無端作合璧。四明范莪亭。夙有嗜古癖。書畫廣購藏。兩篋快新獲。嘆其義烈同。聯之幅盈尺。我聞倪公畫。片石寫寒瘠。想見骨力堅。卓立千仞壁。我讀張公詩。聞笛秋江夕。和以激楚音。直進煙竹裂。二公染翰時。豈意共素冊。遺墨一朝聚。相映光愈赫。遂覺橫卷中。淋漓滿紙熱。石無巨鼇戴。笛有老蛟泣。當年

滄桑痛耿耿尙如結。兩氣化一虹。雙血凝一碧。自非搜剔勤。曷萃此名蹟。殉節前賢事。表忠後人責。繚誅誅千秋。應可慰毅魄。

人參詩

偉兒久病。需用參劑。市價甚貴。白金三百兩易一兩。尙不得佳者。曩閱國史。我朝初以參買高麗。定價十兩一斤。麗人詭稱明朝不售。以九折給價。而我朝捕獲偷掘參者皆明人。以是知麗人之詐。起兵征服之。迨定鼎中原。售者多。其價稍貴。然考查悔餘壬辰甲午兩歲。俱有謝揆愷功惠參詩。一云一兩黃參直五千。一云十金易一兩。皆康熙五十年後事也。其時參價不過如此。乾隆十五年。余以五經應京兆試。恐精力不支。以白金一兩大錢。易參一錢。二十八年。余病服參。高者三十二換。次亦僅二十五換。時已苦其難買。以今較之。更增十餘倍矣。市值愈貴。購之益艱。詩以誌慨。

貧家患富病。用藥需葠劑。吾兒抱沉疴。藉補丹田氣。其如價過昂。刀圭購不易。此物瑤光星。散華凝入地。三極五其葉。獨與凡卉異。結子蓮米紅。分陰椶樹翠。年深根成形。肢體或粗備。土中兒啼聲。往往驚夜睡。其始出上黨。僅等苓朮類。地運有轉移。乃爲我朝瑞。高高長白山。鬱蟠王氣萃。靈苗茁其間。孕結飽生意。以之療羸疾。庸醫亦奏技。幾同返魂香。不數肉芝臂。當年評直賤。購買不繁費。十金易一斤。隣市舊有例。十金易一兩。詩家亦有記。迨我服食時。猶只倍三四。彈指三十年。微貴乃無藝。一兩三百金。其品猶居次。中人十家產。不滿一杯味。珍過服玉方。艱於鍊丹祕。古稱萬金藥。始信語非僞。嗟哉此神物。天以救疵癘。乃因價不訾。翻若天勢利。但許活富人。貧者莫可冀。此事關隱憂。蒼生命所繫。吾兒病已深。非此不得濟。燃眉尙可救。剜肉違敢計。搜括罄貲儲。典賣到衣被。所愁力將竭。兒病痊尙未。中宵撫空囊。徬徨不能寐。

題陳東浦藩伯敦拙堂詩集

學詩必學杜。萬口同一噪。連城有真璧。未可砥硃冒。嗚呼浣花翁。在唐本別調。時當六朝後。舉世炫麗藻。青蓮雖

不羣。餘習猶或蹈。惟公起掃除。天門一龍跳。骨力森開張。神勇鬱雄鷲。陽鳥掩燿火。轟雷塞蚓竅。天壤此一途。疏繫曾未到。一開五丁岐。遂坦九軌道。坐令翰墨場。莫不奉旌纛。微之彷彿切。退之師排募。義山鍊格適。涪翁取徑。隋。豪宕放翁吟。悲壯遺山弔。斯皆分杜派。各具一體妙。迨明李何輩。但摹面目肖。彭亨鼓蛙怒。咆哮奮虎嘯。徒滋虛氣張。終覺輕心掉。曠代有東浦。孤詣異獨造。淵源派雅騷。根柢本忠孝。讀書必破卷。陋彼管窺豹。出語必驚人。驚若隼脫鷄。力厚巨鼎扛。思沉重淵釣。每於樸僊處。雋味出揉拗。以追少陵作。磁鐵兩孚召。得皮兼得骨。在神不在貌。緬昔老拾遺。入蜀詩益爆。長揖嚴尹幕。高歌葛相廟。至今舊草堂。萬丈光尙耀。先生甫筮仕。卽泛錦江權。固知關宿緣。豈特發遐眺。新詩十二卷。精心躡堂奧。子笑有替人。當亦意不料。寓齋得披誦。狂喜成絕叫。惟應瓣香燃。敢肆飯顆諠。傳語學杜人。津梁此先導。

## 五言古四

### 讀香山詩

我讀香山詩。曠懷真灑落。顧皆預防死。所以早尋樂。是其方樂時。中懷已作惡。何如無成心。悲喜隨所托。悲則有呻吟。喜則有歌嘍。

### 讀方千詩

我讀方千詩。求進一何躁。處處乞薦章。誓以殺身報。豈知要路人。高居但暗笑。曾無一文持。徒有百篇噪。區區螻蟻命。願殺亦誰要。

### 題鄒蓮浦小照

林霏澹無痕。深樹皺衆綠。超然靜者心。小憩寄幽曠。一童抱琴來。松風正謾謾。

和立崖遊虎邱用東坡韻。偶檢杜少陵壯遊篇。有東到姑蘇。憂闔廬。邱墓荒劍池。石壁久等句。是子美先已。

遊此而今莫有稱者爰再次韻以誌立崖仰蘇樓畔更築一懷杜閣以傳遺蹟可乎

遊山得勝覽不復躑嶮嶺。汲泉得甘味亦輒捨深井。物情大抵然。星替月光耿。虎邱有坡詩。獅吼噤萬聾。名蹟遂獨擅。和者句鍊礪。豈知少陵翁。壯遊氣豪猛。劍池闔廬墓。先會行腳騁。今乃人莫知。煙晦足悲哽。君家吳趨坊。負郭有二頃。甯徬呂汲公。草堂葺荒冷。呂汲公鎮成都。訪浣花溪遺址。重築草堂。地非浣花幽。跡以誅茅永。庶共仰蘇樓。分占慈山景。羅池誌廟文。孟亭畫壁影。故事倘可循。私心竊有請。

讀王予中先生白田存稿敬書於後吾師汪文端公嘗出先生門古人以親受業者爲弟子弟子所轉授者爲門人余於先生淵源故有自也

去古日以遠。道學世所鄙。方厭老生談。孰究先儒旨。風會趨益下。其病正坐此。白田王先生。學獨務根柢。下推窮六經。插架辨諸史。蘇湖初教授。名高特薦起。鑿坡稽古榮。特賜翰林院編修。鶴禁毓德美。行走疏廣賜金歸。力更救桑梓。生膺蒲輪徵。歿入誓宗祀。嗚呼洵完人。逸矣前賢軌。嗟余生也晚。汨沒詞章裏。一朝讀公書。不覺投五體。在昔東坡翁。怕見逢掖子。或以鬼怪嗤。或以麤精詆。獨於周濂溪。弗敢一言毀。造物乃其徒。恨不奉杖履。見蘇集。是溪詩。知真大儒。折盡才華士。我劣本無才。敢以坡自擬。惟此服膺心。傾倒有相似。韓門出陸莊。況是小桃李。雖未枕膝授。豈遂傳衣止。著錄稱門人。例在通德里。祇應飲思源。遠溯崑崙水。

前和立崖虎邱詩勸築懷杜閣以配仰蘇樓蓋一時偶見及此未敢必有成也不一月立崖書來已與同志諸公擇花神廟旁地擬即日營構可謂好事矣疊前韻以堅其約

偶然想爲山。未敢必成嶺。我倡懷杜閣。覓水慮智井。豈期同好多。慕古心共耿。選勝花神苑。雜草辟鼃鼃。不惜錢編埒。甯待金取礪。計日擊鼓興。趨事力何猛。此邦士大夫。洵多雅懷騁。爲護鴻泥痕。如祝鳩杖哽。佇見凌虛構。落成在俄頃。茲山有蘇樓。孤寄本凄冷。卜鄰得同調。益張大名永。千古兩詩翁。同占名區景。劍池明月夜。往還有二影。我當來守祠。不待諸公請。

立崖諸公方營杜閣東浦藩伯暨李松雲任曉村二太守聞之共誇盛事適虎邱有蔣氏園求售共捐俸千  
六百金買爲閣基任君并以虎邱本白香山守郡時築塘開路遂又祠白公於其中懷賢好古皆名流韻  
事也書來促余往觀厥成先疊韻奉寄

爲山得大力。蟻垤忽成嶺。諸公營杜閣。規畫方井井。事已聞當路。名宦有軒耿。明軒輓與歌九疇齊名。時尙嫌稱軒耿。見明史輓傳。所荒度。編尺類坎甍。一擲二百萬。買園剗礪礦。始嘆達官力。迴勝素士猛。風流賢太守。妙思更旁騁。懷杜方慨慷。思白又凄哽。遂彷彿澤田。杭秫各半頃。溪移浣花幽。路闢香山冷。恰對仰蘇樓。鼎足名並永。因一乃得三。古迹增新景。平池春雨痕。喬柯夕陽影。長作遊讌地。客到酒可請。

用少陵壯遊篇韻寄題懷杜閣兼呈東浦藩伯松雲曉村兩太守暨立崖明府

曠世有相感。千古惟名場。杜陵天人姿。才思軼班揚。一生遇坎壈。枳棘棲鸞鳳。乃其驚人句。塞破萬錦囊。至今咳唾餘。猶足潤枯腸。所以名不朽。高欲摩穹蒼。後人仰遺躅。肯使墮渺茫。成都背郭宅。任城泛池航。至今尙護惜。歷劫窮滄桑。茲山公所咏。闔廬邱墓荒。卽杜句。是知一兩屐。會踏山花香。乃讓東坡詩。獨占七里塘。自因題壁句。風雨湮淋浪。我來偶披檢。潛采耀喬皇。好古有同志。立崖。奮起購豫章。寄懷擬築閣。旻霄凌蒼涼。當路聞此舉。快若獲舊忘。別買蔣詡徑。來爲鄭公鄉。淥水舊名園。老桂森出牆。迴勝浣花溪。當年只草堂。旣振墜緒冷。儘供遊興狂。名更塔影舊。地恰海湧旁。遂使千人石。突過萬仞岡。我思公生平。鍛羽飛鶩鶴。身悲空囊盡。命托長錢強。西枝村選僻。東柯谷向陽。蜀郊住稍久。費索錄事王。尋復客梓閬。依人乞餘光。嘉陵未暖席。渝水旋寒裳。瀼西賃草屋。風捲不得藏。力耕仗獠奴。勞以酒一觴。晚落潭衡間。牛酒遽召殃。統計所歷處。無非謀稻粱。正因饑餓極。翻以醉飽亡。壯遊惟此地。年少逸興長。想當登眺時。佳麗快遠望。劍池寒流碧。石壁返照黃。跌宕風月窩。吟嘯花柳行。故應魂魄戀。驂鸞騎白狼。默令晦迹顯。丹雘煥棟梁。名流愛勝地。旣死猶膏肓。願非扶輪手。誰爲力表揚。舉廢冷灰火。輟俸剝肉瘡。僕構屹百尺。坡亦在下牀。古迹有雙清。大名無兩傷。氣已壓短簿。景堪畫長康。從此虎邱勝。流播益未



央。繫余拾級上。矯首凌八方。緬懷昔賢踪。憑弔心激昂。復嘆鉅公力。締造傳遺芳。雲磴聳崢嶸。風潭漾滄浪。彷彿何氏園。石林著蒼蒼。深壑透窈窕。浮嵐接夏常。懸知公精靈。乘雲翩來翔。

中秋後曉村太守招遊漢杜園閣在左偏已剝少陵像中爲思白室設香山粟主右別有樓遠并移東坡像

於此仍榜爲仙蘇總名曰三賢祠虎邱從此更增一勝地矣再疊前韻題蘇樓下

人隔唐宋朝。地分秦蜀嶽。誰能聚諸賢。暗對共廬井。作合有妙手。術過先生耿。南唐有耿先生。能攝人入山。見陸贄南唐書。因杜兼及白。營築力已罷。并移仰蘇樓。粉績飾荒曠。幾同縮地幻。直過移山猛。想見三時魂。結伴共馳騁。出有同游樂。居無獨吟哽。坡也雖後輩。才思潮萬頃。恰稱三雅聯。豈同孤鴈冷。相得乃益彰。彌擅千秋永。獨悲公去後。幾閱滄桑景。至今少替人。空矗高樓影。一廡倘可分。所願不敢請。

題周松靈杜詩雙聲疊韻詩

詩以詠我言。本從聲韻出。中有條縷分。古疎後漸密。隱侯辨仄平。孫炎著反切。關鍵一以開。千載莫能易。雙聲與疊韻。六朝始植樹。磳徵音響連。羸瘦字母壹。北有魏伯起。南有謝希逸。磳徵疊韻。見古史謝莊傳。羸瘦雙聲。見北史謝靈運傳。此法皆講求。祕矜專門術。杜陵益精嚴。對屬百不失。侵簪月影寒。逼履江光徹。杜詩。侵簪疊韻。見雲溪友議。逼履。老夫詩律細。此亦細之一。倘其可不拘。何以名爲律。無何讀杜者。過眼付一瞥。但誇奪絕塵。不屑駕循轍。海昌有周子。造契得真訣。手著括略編。韻學乃盡泄。從來文字緣。每隨氣運闢。古人挾其大。後人剔其窄。非必後所增。都自鑿空獲。即如近體詩。古人所未識。抑揚抗墜間。妙有自然節。古人縱復生。不能變此格。是知本天籟。豈鑽牛角僻。茲譜雖小竅。源出唇齒舌。詎畫混沌眉。乃逞崑崙脈。反語田顛童。測字杭兀木。矯揉尙稱奇。矧此諧繳繹。允作杜功臣。藝苑更繩尺。音籤韻府外。另豎一幟赤。

題馮星石鴻臚夢蘇草堂圖時註蘇詩已刻成。

我家顧塘橋。坡公上仙址。乘雲或來歸。乃不我一詣。翻訪大馮君。千里到幽薊。我賤君方貴。頗疑坡勢利。豈知君

與坡千載有獨契。眉山詩一編。箋疏良不易。一在援舊典。一在考時事。景廬但博觀。放翁亦引避。辛苦王梅溪。集註尙未備。施本稍後出。綿津加補綴。近時初白翁。精心更排次。我嘗靜披尋。似已無遺議。君也讀書多。一覽見疵類。遂獨出手眼。訂訛辨同異。大節据長編。瑣聞撫稗記。事參百家集。地考十道志。羽衣會何人。洞簫客何字。棠痕憶故宮。綠衣嘲下吏。漏必簡蠹搜。誤輒芻狗棄。如睹局中身。井及言外意。想當五夜披。青熒一燈翳。神光離合間。不覺接夢寐。匪特君精誠。感通力能致。實亦坡靈爽。欲以不朽寄。七年果訖功。真面廬山出。奎宿在絳霄。固應鑿勞勤。君今買草堂。恰傍西湖澁。坡昔遊宦鄉。歲或一再至。我當來從君。襖被同牀睡。庶藉介紹殷。得聆緒論秘。又恐成各夢。弗獲捧杖侍。

寄題同年項任田青士居祠堂

老闍後生多。端居想故友。任田我同榜。薇省班稍後。沉默下帷讀。恭謹循牆走。東華每聯步。跡似魚貫柳。一別三十年。雲山各翹首。聞君歸田來。名行著閩右。達官罕識面。鄰里無峻口。人蒙涸鮒煦。士倚鏗鯨扣。寄我一輯集。精比深甯叟。我思遊黃山。訪君相擊掄。俄聞山陽笛。不得一執手。及門著錄多。爲君謀不朽。瀟灑青士居。昔日傳經久。戶外屢常滿。納約悉自牖。數典鄭註參。析理閩學守。探源溯先河。訪逸搜小酉。榛翳有必芟。渤溲亦兼取。至今絳帳生。成就十八九。乃卽臯比座。築祠不盈畝。生托一瓣香。死奉一尊酒。以茲心喪切。益徵教思厚。嗚呼講學名。世已成窳臼。東林盛標榜。鄉願屹山斗。繼以幾復社。氣矜尙糾起。近時風稍衰。漢學又嗜吼。一字据葉龍。千言掃芻狗。豈真發奧窔。但自銜箕箒。君獨宗紫陽。尺寸不敢苟。名場詎屑爭。理窟默自剖。允矣鄉先生。典型古耆耇。固宜祀瞽宗。釋奠鄉射耜。雲亭游息地。翠色蔚林阜。修竹列如屏。溪水清且瀏。帶草通德鄉。菁莪育材藪。高風長不沫。千春薦香茆。

六哀詩

杜少陵作八哀詩。以寓嘆舊懷賢之意。余少也賤。多藉老成獎掖。得稍聞於時。中歲歸田。不能躋高宮顯。

秩以報恩施。副期許。此心常耿耿焉。今老矣。苦不及身記述。則諸公高誼。將付之漠然。何以自安也。爰仿少陵體作六哀詩。使子孫識之。

父執抗應龍先生

識士於未遇。援手已高誼。不論遇不遇。煦沫情更摯。繫余少偏孤。子立四無倚。餓窮食不給。飄蕩學且廢。童孺不知愁。尙逐羣兒戲。先生先子交。視如親子弟。爲營授徒館。俾作養母計。杏川白兼令兩郎君。共粹下帷肆。斯時先生心。豈謂可成器。正惟無所期。垂憫乃真意。及余得官歸。黃鱸已長逝。生有涸鮒恩。死僅隻雞祭。踈牕一閉屋。是我館餐地。短屏數行書。是公格言字。往蹟一追思。枕席淚尙漬。所幸有子孫。通家往來繼。雖嘗分薄少。百未酬一二。及余老未死。作詩誌高義。聊比柳柳州。石表先友記。

故吏部尙書汪文端公

東坡出歐門。一日聲價長。由來士未遇。必藉老成獎。吾師松泉公。一代斗山仰。燕許大手筆。高名塞天壤。庚午京闈。余方掉詞鞅。薄技謬見知。遂登京兆榜。時五經卷二場。例試漢詁。公獨收鄒作進呈。尋招入平津。林亭極踈傲。佳兒付我。今總憲。奇書恣我賞。得窺筆富藏。彌擴見聞廣。有時大典冊。副墨命擬做。初猶不中程。塗竄至三兩。余矜踈躄才。竄抹欲稱枉。久而益服公。文心戒鹵莽。自此窺津梁。古學聘誅蕩。一官直樞曹。仍喜侍函丈。入揮制草麻。出扈屬車輞。戎帳夜對談。有如共績紡。殖學期有源。立品貴無黨。語深忘就枕。每跋殘燭朗。情同骨肉親。誨極言論謚。無何梁木壞。俛俛吾安放。生平幾知己。恩況兼教養。龍門借虛聲。鯨鐘響洪響。至今五十年。魂猶接夢想。百身悲莫贖。九原痛長往。尙喜哲嗣賢。曳履雲霄上。當其入仕初。曾代蕙暉掌。至今駟馬門。或稍慰靈爽。

故公相贈郡王傅文忠公

段操鞭學士。終濯惡賈生。古來王侯貴。蟻視寒儒輕。傅公起法薛。璇霄佐昇平。讀書雖不多。胸有千古橫。會選西樞屬。余亦備品評。顏狀既鄙野。言語兼荒僞。同官共目笑。公獨鑒樸誠。試以著作才。一揮七制成。遂邀愛逾等。青

瞭超羣英。朱提贈十流。豐貂輝冠纓。履荷白金貂皮之惠。眷深起衆忌。媒孽設險坑。公默燭其誣。但戒買豎爭。輟直未一載。仍聽神索聲。及余入詞苑。已非公所臨。猶於黼座旁。時時說賤名。爰蒙御屏記。一麾出專城。會公討緬甸。余亦來從征。得復參末議。易地駐援兵。時議分偏師從晉洱進。以余言。惟有渡江策。不能阻公行。公議渡夏江。路險瘴威。力阻。改駐蠻蕃。為江外大軍應援。其行。不從。冒瘴涉洪濤。人馬斃郵程。尙賴偏師完。隔江發檣迎。阿雲嚴將軍。在蠻蕃。公竟染危疾。還朝遠奠楹。嗚呼公之亡。朝野成悲榮。豈少一腐儒。私為血淚傾。第念公門館。何限名公卿。乃獨於薄劣。數加拂拭榮。此情何可忘。事往心猶振。千載西州門。牟曇同此情。

故都察院左都御史觀文恭公

古有愛才者。說士甘於肉。非博宏獎名。實出嗜好篤。吾師總憲公。素無一面熟。偶從甥館處。見我詩數幅。遂枉車騎臨。不使前顏歔。公於令婿溫宮詹處見。揆枉駕見訪。自茲得從游。往往趁休沐。扈蹕為選駒。獵場過奔鹿。每歲秋出塞大馬。特為余選良駒。辛巳試禮闈。公握衡文軸。摸索在暗中。竟得李方叔。自詫一斑管。不迷五色目。金門旋對策。已占蓬頂獨。神山風引迴。猶列鼎三足。迴翔清閒地。無由脫穎速。公方領詞館。典策輒見屬。進御劄奏名。得邀乙覽燭。此段援引意。暗中寓推轂。翰林撰文。例書姓名進。京察列余。頌詞更選錄。萬壽詩冊。特為入選。謂可霄漢蹴。邊郡忽出守。永辭木天屋。負公期望殷。詩筆換吏牘。才有文字長。命無公卿福。公旋騎箕尾。我亦返耕牧。迢迢憶絳帷。未奠芻一束。作詩記恩私。長歌以當哭。

故相劉文正公

一代秉鈞衡。數不勝屈指。獨論柱石臣。落落能有幾。吾師表東海。間氣出英偉。鐵石宋廣平。模楷李元禮。華岳立秋隼。百鳥不敢視。直聲震天下。至今雷貫耳。易名比君實。萬口同一唯。生空重朝堂。歿更光國史。嗚呼相業高。非可一節紀。我昔客公家。每飯共素几。公門無雜賓。日與余共飯。隨侍者公子。今相國石庵先生。得習聞緒言。披豁無城壘。欲以身作霖。先特心如水。此段得力處。竊幸窺根柢。公家子敬畫。臨池擅絕技。石庵公時為孝廉。我嘗摹仿之。公笑頗形似。後公贊

樞廷。我又供役使。公爲中機大臣。宋光及辛巳對策。恐坡敵李廌。私改舊筆迹。另作率更體。公果不及知。按之冠多士。余素習石鼓詩。及任詩。然公以素識。坡雖大魁。雖旆失。虛名目茲起。士當貧賤日。每恨無知己。何期爨下薪。家費斷。焦尾馬。與願空羣。蠅不煩弔死。此情何能忘。回首淚瀾瀾。

故公相阿文成公

我昔直西樞。與公爲同官。公旋出領兵。赤手縛樓蘭。青溪雜下之。公比擒之。自此每戰伐。無不在行間。滇南與緬役。拜公大將軍。余適來從戎。參軍。餒餓。幕府一握手。商略誅冥頑。建議輒脗合。圖易先思艱。明年經略至。傳文東。總統王旅。噓。蜚語或聞之。嫌疑微有端。意見稍岐互。何以濟艱難。余以舊屬吏。委曲寓轉圜。事既切同舟。結須解連環。敢撫桓伊琴。聊破彌遠鐵。以茲用意密。知我心力殫。後公終獲禮。縹留勝衝關。二子戍兩粵。余又措之安。迨公重作帥。金川奏凱還。策勳爵上公。禮絕鷓鴣斑。余時已歸耕。不復違書翰。猶蒙記疎賤。寄聲到江干。使節適南來。稽帷喜再攀。公色愜不憂。嘆未能除奸。余謂大權減。正保令名完。公時聞我語。密遣開心顏。至今身後名。果然定蓋棺。當代第一流。青史媿富韓。繫余老菰蒲。萬事死灰寒。豈復援鉅公。藉作嚇鷹鷂。顧惟平生誼。金石有不刊。地雖隔雲泥。情實傾肺肝。作詩感存歿。曷禁涕淚潸。

論詩

作詩必此詩。定知非詩人。此言出東坡。意取象外神。羚羊眠掛角。大馬奔絕塵。其實論過高。後學未易遵。詩文隨世遷。無日不趨新。古跡後漸密。不切者爲陳。譬如聖駕馬。將越而適秦。滿途終南景。何與西湖春。是知與會超。亦貴肌理親。作詩必此詩。乃是真詩人。

重過虎邱題三賢祠

虎邱祠前賢。其論自我勦。三年復來過。雄麗果殊狀。酒樓低翠巒。畫舸隘晴浪。裙屐紛往來。沸聲日夜壯。遂使久湮迹。頓豁心目曠。三詩人千秋。一土阜萬丈。卻笑建議初。本意標所尙。庶幾鄒湛名。得附峴山上。庸知傳世難。非

可門戶傍。試問衆遊人。已把老夫忘。

揚州留別諸同人

我初客揚州。詞流盛裙屐。流連文酒讌。徵逐最酣適。何期數載間。多已墓草碧。過江一訪舊。淒絕山陽笛。尙幸四三人。留待續陳迹。四海魯靈光。端推謝安石。珠堂司寇爲詞館二十科。東陽雖稍瘦。其氣實曠。使。吳均正強仕。行即赴朝籍。外。杜村員。工詩玉溪生。高論每瓶獲。齋生郡。相見各無恙。不覺手加額。憶自來邗江。所交皆素識。前後十餘年。不曾添一客。新知既不增。舊好又頻失。剩此幾晨星。得不倍珍惜。諸公同此意。更番展瑤席。雜坐並飛觥。近游借杖策。依然鷓鴣地。光景追曩昔。臨分期後會。預約鄭莊驛。年年看花時。來此一浮白。

戲老

賀鍾老年人。未死先作鬼。鬼者人所畏。遇輒思遠避。老人亦復然。所至令人悸。寒松骨凌兢。凍梨面垢膩。自然生威嚴。非必性情戾。兒怕賁淵明。妾不媚鄒忌。一聞曳履聲。先托下帷肆。偶逢少年客。寒暄語未既。察其眉睫間。早露引退意。何況婢僕輩。聞呼強一至。勉效趨走勤。貌恭神已異。只有諸童孫。貧翁含飴飼。辟呬時一來。得食又掉臂。嗟哉老至此。衆畔親亦棄。雖尙廉頗健。已同伯有厲。應號活死人。讕語聊自戲。

中庭坐月忽。一女孫吉月。大如酒杯不覺駭。聽因歷詢諸孫。及婢僕輩。言人人殊。有同謂如杯者。有如鏡如碟者。甚至有大如盆盎者。乃知眼光各自不同也。余年七十四。向未知此。今因小兒女語。乃得之。然則近在目前而所不知者多矣。作詩誌之。

舉頭見明月。大如五寸鏡。謂衆目皆然。圍覽有一定。忽聞小如杯。兒語實駭聽。因之遍諏訪。令各說圍徑。細比半兩錢。大至尺口磬。始知眼光異。塵根有殊性。譬若長短視。遠近相去叟。花看霧中昏。毫察秋來炳。卽事悟學功。格物非易竟。老夫年七十。識月猶未盡。如何執成尺。輒負鑒裁柄。

夜不寐作

嶢嶢火雲高。日落半空赤。城居少林蔭。因此炎歊迫。捲簾候夕涼。鬱熱或暫釋。四垂無纖風。仰視天正碧。月光日所映。返照有餘赫。滅燈聊時眠。裸脅貼地席。羽扇幾脫腕。絺巾且瀝液。忽焉穰如疥。萬疇凸膚革。飛蚊又來噉。舉手急一拍。狡捷條已逃。徒自打頭額。嘻乎此夜中。直比入羶炙。卻憶西南天。烽火正絡繹。溽暑蒸臭穢。遍野腐齒積。吾儕幸安居。尙嘆爍金石。兵燹彼何辜。感時一悲惜。

書綿州牧劉慕陵守城事

綿州有舊城。地扼潼川渡。垣墉圯已久。履屐可平步。蜀賊方蔓延。州守早卻顧。先期集版築。百雉屹鐵鑄。城成賊隨到。殺氣振烟霧。百里避難民。望城作生路。開門聽其入。赤子得慈父。衆志本成城。有城志益固。弩臺穀機括。戰格列桎杻。賊方盛氣吞。唾手捨倉庫。梯衝百道來。墨守綽有裕。丁男畫地戰。婦女送餐哺。矢石所及處。仰攻悉顛仆。粉堞俄成赭。盡是賊血污。相持三晝夜。救至始解去。偉哉保障功。活人已無數。向非憑堅城。化離衆曷護。緊茲應變材。衝要端可付。書之風百僚。武功出儒素。

偶書

老向手一編。丹黃勘不置。若以聖學論。亦玩物喪志。其如結習深。舍此心曷寄。老鼠慣搬薑。蠹魚喜食字。藉遣時日閒。兼飫性情嗜。譬如呼盧盆。不過寓遊戲。奈何技稍工。又想以傳世。兩耳未甚聾。已難別宮徵。與客坐對談。惟恐失條理。內則以意聽。外則以目視。目光所凝注。不誤談媿媿。雖無顧曲精。亦免隨口唯。一笑雙明瞳。乃爲司聰使。人以耳爲目。我以目爲耳。香山與放翁。晚歲澹容與。語語不畏死。正是畏死語。死者誰不畏。豈真去得所。吾惟任自然。不迎亦不拒。食不恣老饕。眠不厭獨處。雖非卻老方。或是養生主。住則樂爽鳩。行即捨逆旅。

書放翁詩後

放翁志恢復。動慕臯蘭鑿。十詩九滅虜。一代書生豪。及開禧用兵。年已八十高。詔令少十年。必親與戎韜。是役出

卽敗。輕舉千古嘲。公若在其間。亦當帶汗逃。天特善全之。任隱皆奇遭。無事則恤緯。有事已善刀。

茅山紀遊

句曲古洞天。距家二百里。年耆尙未到。塵俗真可鄙。今朝忽興發。奮決枋榆起。買舟旣風順。登陸適雨止。昇盤兩輿夫。腳過茅狗駛。遙指大茅峯。直上青冥裏。屈盤十八折。疊磴何人始。每當一折處。輿夫劣容趾。吾身已在空。下瞰怖欲死。千丈倘一落。直作齏粉耳。自笑老何爲。乃冒險若此。

時當二三月。羣禮三茅仙。江國千里內。男婦盡翕駢。不到頂不止。欲表方寸虔。十步九喘息。力憊志益堅。乃知求福心。不惜性命捐。袞袞九霄殿。登降紛摩肩。棟宇熏已黑。總是梅檀煙。雖曰愚民愚。究是神使然。其身已登真。傳又千萬年。匪惟大名垂。兼攝衆心懸。嗚呼彼何人。占此福力全。

名山懋清華。惟在水與木。有水山不枯。有木山不禿。茲山乃兩無。但見春草綠。不知古仙人。胡爲此栖宿。及觀曉雲生。譎詭盪心目。或如孤煙輕。或如濃霧濁。其出也無罅。氣透毛孔肉。蓬蓬四飛揚。潏然滿巖谷。罡風吹不散。俄又聚成族。乃知茲山靈。地肺通天腹。所以三茅君。于焉吸清淑。

同人預訂牡丹之會。稚存不待花開。輒折簡邀集。作此戲之。索和。

借花作飲資。借飲爲詩地。此亦退閒人。居鄉一樂事。山茶旣開尊。海棠又舉觴。預期牡丹時。再續花下醉。先生乃不待。老饕急欲試。枝頭方鬪栗。折簡遽邀致。由來不羈人。作事必奇氣。仕宦甘勇退。雞肋竟輕棄。遊讌乃躁進。未卵輒早計。吾笑謂先生。此酒爲花黃。有花則成賞。無花則空費。待取花開時。須補卮庖治。

今歲桂花甚遲。九月望前始大開。而菊花已爛漫矣。戲效香山體。簡稚存。

菊花稱晚節。於桂猶後輩。向來不同時。桂謝菊始代。胡爲今年秋。兩花結同隊。方賞籬豔舒。尙喜天香在。桂有香無色。借菊發精采。菊有色無香。借桂出醴醕。菊非貪躁進。桂豈昧勇退。或爲吾二人。同處寂寥內。君舍老圃容。肯伍凡粉黛。我留小山叢。亦歷賤菅蒨。共支風露天。一掃胭脂態。得句箋互贖。談心牀共對。相期保歲寒。論交久可



耐。

靈谷寺

崇閣古招提。背倚鍾山麓。平岡左右抱。陰翳萬樹綠。山門到堂廡。鞭馬嫌不速。中恢無梁殿。制仿古陶復。累甃代棟隆。穹作層阿屋。旁有琵琶街。屢響琴瑟筑。最後功德水。趵突地底伏。憤盈一湧出。直上三丈竹。鐘魚臞僧顛。丹碧眩鳥目。當年誰結構。巨麗壓坤軸。聞昔寶誌公。隻骨占靈隕。明祖欲借之。墨不食龜卜。三百六十庄。特賜作湯沐。遂啓茶毘藏。跌坐容尙穆。地靈體不壞。指爪長繞腹。遺蛻竟奉遷。改瘞此巖谷。寶刹斯莊嚴。知費金幾斛。維時戢亂後。血沸戰鬼哭。於茲建道場。普度蟲沙族。迨夫永樂初。復薦考妣福。法王哈立麻。遠迎自乾竺。七日無遮筵。薰天衆香郁。甘露祇樹凝。慶雲觚稜宿。至今傳盛事。談者舌猶縮。信哉誌公神。百世能預矚。留此一牛鳴。巧中帝王欲。貧念圖安宅。雄心後土木。總在逆料內。增榮肉身肉。葬同樗里智。摸避曹瞞毒。噫嘻彼何人。擅此神通獨。

偶書所見

老尙手一編。藉此消閒計。或謂今生書。可爲來生地。樂全未了經。香山之無字。皆自風世來。微驗若左契。我聞喜不寐。一讀便兩世。卻笑老健忘。掩卷已不記。及身尙如此。遑問他生事。隨地第一聲。開口便是哭。可知有此身。卽是苦所伏。維苦斯活身。手足供口腹。其理本公平。習勞以養欲。乃厭四體勤。專想飽且煥。試問從何來。召苦必更速。世上苦人多。總爲貧享福。無貴賤何歎。無富貧何疚。君看飲啄禽。千古少爭鬪。人則等級殊。榮利百般誘。遂起貧忮心。智力角勝負。小則滋訟獄。大則興甲冑。好醜兩相耀。殺機遍宇宙。吾將問真宰。此害誰任咎。才士好自負。謂人皆遜予。豈如有心人。弗肯高自居。君看甫於白。愛慕終不渝。昌黎遇東野。名位已迥殊。乃輒推爲龍。願作雲前驅。是知集益勤。其心彌沖虛。惟知不如人。是以人不如。

竹初齋中建蘭盛開招同立菴瑩溪稚存香遠齋集卽事

賞花各有宜。氣味貴相感。鬪邊置酒肉。見者心一飲。是宜紉佩供。未可把杯覽。胡爲對清芬。召客快一噉。開筵羅肥鮮。水陸靡不墜。毋乃大嚼奢。弗稱素心澹。豪舉壓幽芳。岳正好大膽。由來主人高。品其晚香蒼。崔遠釘座梨。庾果出水菖。臭味無差池。如山谷嗜欒。因之腆治具。濃淡兩不掄。唐突西家施。此事只君敢。贏得老饕狂。饑捩腹填坎。花前忘形穢。飽啖聲有喰。

借月和尙以其名乞詩戲贈

月出照萬方。光普何必借。旣免束縲乞。亦省鑿壁假。云胡以借名。欲豎昇天架。山僧本無求。心空萬緣罷。燃糠勤何用。囊螢功久謝。將欲譜覽裳。安有法善駕。將欲折桂枝。恐被吳剛罵。乃竟不自量。妄向清暉贊。豈作夜亮木。隨身光四射。或誇夜明珠。照乘珍無價。嫦娥聞之笑。此僧愚而詐。殆謂虛空中。雖欠不索債。卽此貪痴心。其罪不可赦。罰守琉璃燈。不許風吹滅。吾試爲解鈴。安汝毘耶舍。昔有韓道人。與客泛月下。團瓢昏月光。頻向筠籃瀉。後當無月夕。放出光滿榭。與客譏盡歡。助勝燭燃檝。是真能借月。神通出變化。君果擅此術。吾當驗黑夜。

靜觀二十五首

大易論天道。恆久而不已。此從後天觀。未究先天始。試思混沌中。積氣一團耳。誰鑄陰陽爐。一一析條理。寒暑遲有期。日月行有軌。成法旣一定。萬載勿改徙。橐籥太極先。天地亦聽使。是何大神通。預創鴻濛裏。其來必有自。其故莫能擬。

謂氣從理出。衆口同一辭。理從何處來。非虛懸兩儀。有氣斯心知。有知斯是非。是非方是理。而氣已生之。豈非氣在先。早爲理之基。況或理所無。而爲物所有。有知變無知。連理木不朽。無知變有知。老楓或成叟。試問此何理。磅礴出氣厚。爲語諸腐儒。陳言未可守。

蒼蒼非正色。天有氣無質。旣無質可憑。不比地踏實。日月何以行。軌塗百無失。星辰何以繫。宿離亦不貸。使非有界畫。安得無越軼。界畫在虛空。又何處著筆。吾將問司天。推測尙有術。

人氣有出納。一刻百呼吸。天呼吸在海。日只一潮汐。幾疑天氣遲。不如人氣捷。豈知天一噓。十萬里而遠。惟其太遼闊。遂覺稍紆緩。鵬鷲同一遊。固難共往返。

日西沉虞淵。宜可稍休息。乃復連夕馳。東出寅卯刻。是知晝夜忙。不敢惜其力。獨念太極理。動靜每互根。唐堯古神聖。耄期亦倦勤。何以曦馭速。一息無停輪。吾恐千萬年。不免略欠伸。思窮忽大笑。此憂真杞人。果至天倚杵。汝身在何處。

兩間最恨事。莫如天不言。初疑天省事。不耐聒擾煩。豈知蒼蒼表。但以大德敦。其餘生殺柄。固各有司存。陰則冥司報。陽則王法論。使必親告諭。安得許舌根。沉彼大九州。昨喏不勝繁。勢必遍學語。始可訓諄諄。天亦當大笑。吾將譯无渾。

日月之運行。以東西爲程。寒暑之早晚。則南北爲限。吾嘗出塞北。八月已大雪。又嘗遊滇中。冬至桃花紅。江南黃梅雨。京畿在大暑。閩南臘月蚊。浙東蛙春分。此皆身親歷。非自傳聞得。大概氣早遲。百里一日差。以此計天咫。三萬六千里。然而南海南。不知幾暹耽。以及北海北。不知幾獯羯。重譯所不通。氣候更難窮。所以雖聖智。六合外不議。

人沒水則死。魚乃生於水。人埋土則閉。蟲乃穴於地。可知芸生鱗。各自路一條。大氣所磅礴。水土無不包。在水水氣盛。在土土氣旺。物從此氣生。卽以此氣養。遷地弗能良。受性固各爽。但觀種類殊。彌覺化育廣。

真宰果有權。陰陽能獨擅。應只儲祥和。不復布戾悍。人有正無邪。世有治無亂。物不生蜂豺。歲不降水旱。而乃冥冥中。不能盡如願。由來此大塊。二氣所塞徧。有陽必有陰。其力各參半。不死安有生。不寒安有暖。雖以造化功。不能偏於善。不見一日間。晝明而夜暗。

物物皆天生。自兼陰陽理。及至人爲者。天何所施技。乃如織紗綾。自然有表裏。甚至寸紙薄。背粗面如砥。始知二氣遞。無不爲所使。陰非專主惡。陽非專主美。兩不能相無。一又分彼此。此中造化微。眼前即可指。

避網魚潛淵。避弋鳥遁風。貪生而畏死。萬物無不同。啄蟲雞得食。擇肉虎供飼。損彼以利己。萬物亦無異。人甯獨不然。莫勿圖自全。有害輒思去。有利輒欲專。聖人立人道。乃力矯此弊。有殺身成仁。毋見利忘義。雖則愜於理。多不便於身。所以莊周言。仁義能殺人。

習聞古人語。天生物養人。不曠覽宇內。豈知天至仁。卽如食需鹽。煮海給數省。海鹽不到處。別有池與井。嶺蜀鹽池。戎羌無井池。崑鹽自生境。戎番播地皆鹽。色如水晶。味極佳。又如漠北地。寒不生五穀。偏有好水草。供其廣游牧。草以養

畜命。畜以飽人腹。卽此可類推。何況用五材。天之於斯人。亦太厚矣哉。

洪荒甫一闢。卽強食弱肉。飲血而茹毛。久已習成俗。人多物難供。益之以五穀。木棉出近代。亦以代蠶族。此皆天

苦心。欲稍減屠戮。或笑此論迂。謂北有獯鬻。殺生以爲糧。豈能築劍剝。斯語亦未然。吾嘗問戎族。肉食惟酋長。餘

皆酪充腹。日烹羊馬乳。晨夕當鹽粥。乃知獯鬻鄉。亦稀宰割酷。余嘗問海夷魯特。據云肉食惟酋長能之。餘則日飲酪漿。至過節祭先。始一肉也。

天生萬物初。一物付一性。芥翼辣難嘗。鷄鶉勇易競。傳種千萬年。不改胚胎孕。種一日不絕性。一日不更是以付

物始。一付事已竟。惟人則不然。熏習有不定。或先賢後奸。或始邪終正。沈充身從逆。幹蠱乃有勁。虞奕抗賊死。子

則藍面佞。天亦無奈何。又無轉移柄。激勸整齊之。此權聽王政。

人物共此宇。惟鳥去人遠。凡歧行蠕動。近人固難遣。只除六畜外。餘害人不淺。無論虺螫毒。無論豺虎鬻。蚊背如

芒微。蝟毛比絲軟。一中人肌膚。痛癢輒不免。吾方怨天公。人幾被物轉。卻思人戕物。恣睢更無限。搜皮到狼狐。取

肉及螺蛳。是知人與物。相逼各屠剪。並育不相害。此語恐非典。

五材民並用。火於人尤切。上自鳥雀繁。下至蟲魚鱗。飲冷而食生。不聞病膈噎。甚至蠶生冰。更或蛆出雪。自能萃

育蕃。不藉烹飪熟。惟人稟天陽。氣每用易竭。火食以益之。始補丹田缺。可知炎上者。專爲人而設。奈何資以生。輒

不知撙節。但快己貪饜。弗顧物夭折。所以杜甫言。燧人之禍烈。

人視衆蟻羣。同形無分別。蟻在其羣內。又各自辨識。不知蟻視人。可能認一一。大凡眼有光。各隨身大小。大視小

則蒙小視大則瞭。雖有離婁明。不知蠛螟較。何況小視大。一覽自了了。所以顯微鏡。西洋製最巧。能拓小爲大。遂不遺忽杪。

大撓造甲子。初但以記日。兼記歲月時。至漢始畫一。千支配五行。尤出方士說。乃以推生命。及凡擇凶吉。就其生尅理。參以推算術。趨避前民用。往往百不失。豈非廿二字。早默括陰陽。信哉古至人。神明過倉頡。

王者制刑法。輕重無弗備。虺蝮肆陰毒。豺虎逞狂噬。何不設一律。使之畏而避。乃自臯陶來。竟無此條例。是知生殺權。僅能備同類。威力所不及。神聖亦無計。

燈光所不照。室暗無所見。暗中視照處。乃無一不辨。是暗能視明。明不能視暗。因悟陰陽理。陰包陽過半。陽事陰必知。陰事陽難斷。人不見鬼神。卻被鬼神看。是以古聖王。精心創幽贊。祀先虔致齋。享帝嚴殿薦。報賽巫舞工。禱祈祝詞箚。豈徒借設教。冥契實有驗。干寶無鬼論。固出自狂誕。

世傳張道陵。能造符治鬼。吾心竊疑之。從何奉天旨。遂如定法律。幽冥咸聽使。及試請乩仙。乃知非虛詭。曾迂回道人。瞬息來千里。吾默思一字。彼已書在几。先我半字功。捷過駒隙駛。演幕亦設乩。竟遇曳白子。吾思一字成。彼方振筆起。困之以不思。彼又停筆俟。此實我親驗。降壇虛空裏。靈蠢雖不同。神魂有不死。楚俗祝由科。村巫圓恍技。萬事無不有。未可臆見揣。余在京時。王孝廉殿邦來設乩。是日呂洞賓至。方判一二字。余默以意續之。繼而余前乩已書。即余所思字也。及在廬南。將軍果毅阿公子豐公。亦能請仙。乩筆動而不成字。余試代思一字。乩即書之。余又以不思困之。果筆動而不成字。遂默爲足成一體。此余所親試也。然余所思字。初不出口。余亦未嘗手扶乩。但一食動而乩即知。惟回仙常早半字頃。讀鬼則余思一字。方書一字耳。此不得謂無其事也。

漢王父置俎。倘竟遭慘烹。後雖成大業。終負不孝名。葛王妻被召。倘竟受定情。後雖正宸極。難雪此醜聲。兩皆有天幸。一死而一生。妻不污鈿盒。父亦脫杯羹。乃知有道昌。天默與玉成。

古來稱英雄。大都出戰功。其中亦有別。難易各不同。時當開國初。兵威如虎熊。所至輒摧破。策勳爵王公。固由謀勇奮。亦乘氣運隆。惟有喪敗日。力擋阡危中。睢陽人肉盡。崖山海血紅。明知勢不敵。百死堅孤忠。舉事雖無成。浩

氣貫白虹。視彼褒鄂徒。恐無此英風。

古語每易傳。雖誕亦流布。日中有金烏。月中有玉兔。嫦娥奔月藏。夸父逐日步。精衛溟海填。織女銀河渡。何一非譌言。不值一唾吐。乃相傳至今。舉世作典故。後人苦效顰。小說出無數。旁羅極諾臯。瑣記到堅瓠。徒費鑿空撰。會莫有一顧。爲語好怪人。枉自用心誤。

兩閒無用物。莫若紅紫花。食不如橡栗。衣不如紵麻。偏能令人愛。讖賞窮豪華。詩詞亦復然。意蕊抽萌芽。說理非經籍。記事非史家。乃世之才人。嗜之如奇葩。不惜斂肺肝。琢磨到無瑕。一語極工巧。萬口相咨嗟。是知花與詩。同出天菁華。平添大塊景。默動人情誇。雖無濟於用。亦弗納於邪。花故年年開。詩亦代代加。詩以道性情。罕有說事論史。已獨闢一境。茲更以詩說理。橫說豎說。皆未經人道。而昆刀并剪。無一腐語。無一個詞。尤其是獨絕處。保泰。

偕王仲瞿孝廉蔣于野秀才游洞庭東西兩山時吳縣湯明府爲治裝

足跡半天下。南戒徧登眺。家鄉有名區。垂老乃未到。枉自稱好遊。將被向平笑。邂逅天假緣。偶泛吳門櫂。洞庭近百里。山靈默相召。辦裝有賢侯。結伴得同調。遂果此願償。湖山領佳選。胥口布帆開。一鷺已前導。

洞庭本湖名。今名湖中嶺。七十有二峯。東西列屏整。聞有靈威書。禹跡藉導引。鴻冥角里村。龍隱柳毅井。明知語荒唐。烏有如捕影。卻因流傳久。典故千秋永。遂令好事人。雖幻亦引領。豈慕湘瑟鏗。甯尋鄂被冷。一聞茲山名。恍在九疑頂。微雨忽空濛。恰作瀟湘景。

探奇先東山。村落何葱鬱。田少人戶多。不供一頓粥。卻因管竇還。術善操盈縮。遂多擁高貲。鱗次總廈屋。其俗況淳朴。目不見可欲。隨時山有果。過午市無肉。相見各愛敬。善氣藹可掬。人間真樂郊。安得一椽卜。

莫釐最高頂。俯瞰全湖光。三萬六千頃。縹緲盡我腸。其下多奧區。妙又在隱藏。面湖忌淺露。每借山爲障。山所不障處。護以竹木蒼。最好古雪居。濃綠森千章。不知上有天。但覺翠幕張。清風颯然至。毛竅俱清涼。何當來結夏。快此披襟當。

西巖有絕壁。其腹忽嵌空。不斧鑿而破。不棟宇而穹。造物亦好奇。傲人智力窮。創此無梁殿。摩訶占百弓。仰睇衆  
碗礮。一一倒挂胸。壓卵倘一落。命在齏粉中。巨壑終渾成。萬古含饕餮。遂發此頑石。八面開玲瓏。罔圖質雖蠢。混  
沌竅已通。不知命名初。何以呼石公。

林屋古洞天。一穴入地底。相傳通峩峩。誰與證遐軌。我來秉炬探。實可五六里。蝙蝠驚火光。撲面亂飛起。其下坎  
陷處。膝行不得跬。匍匐泥滿身。笑比負塗豕。過險又空闊。一喊甕聲咋。恐有饑蛟藏。口鱗奮舌踢。老膽亦生怯。路  
恰隔凡止。洞盡處有隔凡二迴身作猱升。經時始見峇。乃知向所歷。湖在頭上矣。

昔有席允來。湖樓寄嘯傲。乘興泛湖回。放鶴先歸報。紅粉盡出迎。笙歌兩行導。又有徐尙書。宦成得予告。猶令修  
官書。設寫此巖隕。號召諸名士。彙集赴蘭棹。嗚呼彼二人。一富一貴要。各擅意氣豪。湖山增照耀。至今訪遺迹。已  
無地可弔。何況我輩來。偶然快登眺。他年鴻爪痕。誰記王蔣趙。

### 到揚州沈旣堂前輩留飲話別兼訂蘇杭之遊

我昔客揚州。詞館列末座。有酒必互招。有詩必共和。春花接屐探。夜雨對牀臥。生平朋簪樂。興發不暇情。何當二  
十年。十九入楚些。俯仰一傷懷。駒隙蟻行磨。今茲再來遊。碩果公一個。人以罕見珍。得不當奇貨。喜公精力強。豪  
氣弗稍挫。書燈久逾味。詩牌日有課。公自號味燈老人。以詩牌集字得句。日足覘老不衰。耄耄可預寫。我雖後輩。馬齒乃較大。  
亦幸腰腳頑。未至憚勞瘁。相見各無恙。喜極淚翻隨。人當暮年來。萬事付一睡。惟此故舊情。入骨不可割。一尊軟  
腳筵。不覺成久坐。明知後會稀。且禁勿道破。安知古怪喬。不是我輩做。臨分更先訂。蘇杭秋捩柁。我歸當掃門。罇  
候蘭橈過。

### 舟過召伯埭

泝流送故人。正值秋濤壯。召埭地勢窪。衆水所畢向。河湖乃混合。線隄弗能障。隄外本村墟。俱入湖光漾。其有未  
浸者。四面空所傍。但見樹影浮。漸少炊烟煬。可憐編葦牆。半截已在浪。米鹽何處求。出入憑兩槳。嗟哉昏墊民。長

恐魚腹葬。當年謝太傅。胡爲築城仇。想當典午朝。沃壤尙平曠。淮流獨到海。不向此奔放。自從河南徙。淮無路可讓。翻借清刷黃。洪澤作水藏。高堰有危急。尾閘洩怒漲。遂令下流地。原隰入漂蕩。生無餬口田。死無埋骨壙。我來一櫂過。驚波白彌望。水不行地中。船乃坐天上。

歸途阻風

歸舟遇逆風。所恃順流捷。水爲風所捲。順流亦成逆。遂覺風與水。兩力併一扼。清淮十丈河。學作海水立。浪浪劈面來。白日擊霹靂。水撐兩篙彎。岸挽一縷直。邪許力已盡。進寸尙退尺。由來年運衰。動輒有阻格。姑令楫杙待。勿與爭旦夕。已甘鷁退身。甯競鶩趨迹。敬謝風水神。微命不足嚇。

戲書

豈不願作達。出身本陋巷。經歷艱辛多。遂入愁魔障。卻看少年輩。意氣何豪宕。行樂恐後時。追歡窮所向。老者寸腸結。少者兩眉放。一笑孔聖言。有時或多爽。君子長戚戚。小人坦蕩蕩。

送劉石菴相公還朝

昔歲在己巳。我初客公家。譎劣不自知。跳擲矜井蛙。公爲發其覆。尋之指南車。我雖未肯降。默已開心芽。夜談剪絳蠟。晨餐怯肥羶。每共飯。余爲羊肉。公特善喫。當時從游樂。聯翩接翅構。先後箋詞苑。才思紛天葩。公獨結主知。不藉門第華。歛歷過中外。入相宣黃麻。我從解綬歸。胸次忽槿枒。妄思鑽故紙。不慕建高牙。自此音塵絕。雲霄隔泥沙。何期四十載。重接笑語譁。乞假爲親壽。南來道里遐。遂使林下踪。得復披絳紗。喜公八十五。老健杖不擎。亮節表臺閣。高名朗雲霞。餘事到揮毫。蘇米不足誇。他年青史傳。粹然無纖瑕。而我一無成。俯仰祇自嗟。送別臨河干。離緒豈有涯。心逐輪蹄遠。目斷煙樹遮。倘再期後會。毋乃願大賒。惟當晚節香。爲公歌黃花。

余簡稚存詩有縱不千年也百年之句稚存答詩嫌百年太少蓋其才已獨有千古也再簡奉酬  
少陵見同輩。不輕許必傳。千秋萬歲名。只屬李青蓮。夢李白詩。有此句。自揣身後名。亦云垂萬年。蜀中詩。丈夫垂名動萬年。其他高



岑徒。但讀十數篇。由來才大小。可預定銜銓。我才本踈澁。大名未嘗識。姑以百年計。猶恐光易闕。君也十倍才。出語破萬膽。橫矛奮一呼。決死戰誰敢。已視一世空。會輕萬里貶。笑我目寸光。固難共遐覽。而我私自喜。得爲君執鞭。昔唐有韓孟。雲龍兩連翩。宋亦有蘇黃。榘鼓相周旋。至今四勁敵。輝赫在目前。固知聲名播。兼恃氣類聯。孤掌最難鳴。雙飛乃易翥。與君共詩國。查初白詩。毘陵自古稱詩國。狎主齊盟壇。已令天下士。趨風快睹先。稱君必及我。曩如貫珠連。藉君光焰長。挈我聲價懸。蒼蠅附驥尾。一日路亦千。不朽竟分我。竊有厚幸焉。

### 初用拐杖

暮景忌頹唐。作意自抖擻。氣矜尙外強。步已不敢苟。惟恐一不戒。或至踉跄偶。卽此是衰徵。惟當歌鼓缶。何來柘一枝。質輕力則起。老比萬年藤。勁豈三眠柳。短長剛及腰。徑圍僅如拇。根腫自成癩。可以佛其首。刮磨到瑩澤。槎枒不覺醜。攜之當結扶。便捷得未有。用在股腳外。功出僮僕右。遂成鼎足三。何須筇節九。雖難躡壁行。可穩循牆走。蛩蛩負距驢。蹉蹌逐茅狗。我年屆杖朝。廿載林下叟。已輸佔地先。甯漸落人後。祇憐步蹒跚。憑誰托衰朽。幸茲木上座。晚作歲寒友。遠敢捷季先。誓將交耐久。所嫌把握牢。尙煩臂指肘。添得一條腿。佔去一隻手。

### 右手忽患風痺。食指中指不能把筆。將成痼疾矣。

昔偶中風痺。尙不關血氣。兩指今不仁。竟難使以臂。要害況在右。坐令百事廢。枉負巨擘稱。謬忝中權寄。書窗一把筆。尤苦入重腫。由來筋力衰。消息早暗遞。老樹雖尙榮。一枝已先萎。迴憶年少時。作力何最厲。捧日擎青天。直欲隻手試。漚麻李陽拳。白打肯誰避。寸唇輒萬言。一揮亦七制。淋漓盾鼻間。腕脫未告瘁。庸知入暮年。默已減生意。枯皮裏瘦骨。軀殼久漸敞。精氣貫不到。先已折一翅。昔輕百斛扛。今重千觔墜。若或掣其肘。牽絆力徒費。敢闕拇陣酣。只供肱枕睡。偶然一濡毫。冀托翰墨戲。離披偃風草。槎枒觸眼刺。翻似蝨斗奇。或類蚯蚓斃。可憐斛律金。竟不成屋宇。一紙糊塗帳。笑我亦不記。

### 暑夜納涼孫男女七八人爲我敲背衆手並舉雜還無序亦一樂事也戲書

暑夜坐納涼。月陰度簾幕。七八孫男女。憐我太寂寞。如厥小兒拳。都向船背拍。雞肋不足當。幸非李陽惡。爭先試技癢。不禁喜躍躍。也無先後序。竟似叢毆虐。或疊如貫珠。或碎如飛雹。重輕紛不齊。疎密相間作。就中有黠者。新意壓筋絡。按摩到脊腰。爬搔及股腳。陋彼吐納方。元牝竊秘鑰。禽戲尙矯揉。熊經亦隔膜。茲獨暢肢體。導引勝良藥。欲勞以舍飴。口衆難遍嚼。慰之好言詞。私心實懷怍。一笑兒女累。向恐塵鞅縛。爲祖二十年。始識有孫樂。

稚存招同里中老人孫上舍葆舒年九十余八十吳上舍俊臣七十家味辛司馬六十皆取成數其餘吳封

翁書屏七十八楊刺史述庭七十七吳封翁蘭齋七十五劉瀛坡總戎七十三並以次列坐主人亦六十  
一矣鄉邦此會頗稱佳話與諸君同作

香山九老圖。沿社著英會。白傳富鄭公。會主本耄艾。稚存六十一。齒序尙未逮。豪舉忽盡簪。似欲附我輩。計年取成數。餘皆七旬外。思邈病未來。葆書未到。我遂忝居最。斯筵應我設。乃煩破慳代。維時正作社。殘雪猶未退。輝映衆白頭。精采發光怪。與來拇陣轟。叫呶角勝敗。狂不諱老鶩。諛或肆撒賴。由來天與壽。原令脫拘械。倘慕溫克名。硜硜守抑戒。縱誇強哉矯。甯挽甚矣憊。當年白與富。老尙食鮪噉。吾儕散誕人。可勿謀一快。社酒堪治聾。諸公況未曠。好繼前賢踪。風流付圖繪。

楊舍寓齋平池一畝跨以石橋橋左右向有紅白荷花余今歲來游適交夏至荷葉已滿池面忽一夕大雨  
如注水長二尺衆葉皆淹感賦

寓齋何所戀。爲有池荷芳。池長三十步。石橋跨中央。兩邊紅白花。年年開滿塘。我來正夏至。茁菖菖方將。或小如蒲粟。波面尙半藏。或如盧鼓植。粗可搗漁陽。預擬花繁時。開筵具壺觴。招邀同調友。準備吟詩腸。賞此衆嬋娟。破慳趙壹囊。酣爲碧筩飲。刷藕劈瓜瓢。左昵粉白盪。右擁嬌紅粧。晨夕爲歡娛。吾將老是鄉。豈期一夜雨。水長二尺強。散載千萬頭。嬌魂盡沉湘。想渠被溺時。望救情孔傷。恨無握苗者。掖之身頓長。坐受滅頂凶。安得奮首昂。嫩蕊一被浸。難甦返魂香。欲俟再發類。補綴好景光。竹非上番筍。茶已第二綱。精神固暗減。甯復新嫁娘。由來書生命。

清福願莫償。美食剛到口。忽有扼其吭。轉念忽自笑。此意殊癡狂。時當翻犁候。得雨如瓊漿。君但知惜花。可計及栽秧。

### 耳聾

我昔耳最聰。萬籟攝呼吸。審音師曠傳。奏曲周郎識。食葉聞蠶聲。搗牀數龜息。有人語隔垣。往往防聽竊。如何近年來。若有物壅塞。初投石鏗。旋閉關隔闕。對面語不知。惘恍以意測。但見遶梁塵。豈解羈玉屑。偶然話不投。輒欲摑其頰。古有王晉卿。壯年患此疾。東坡爲發怒。向耳大噴喝。勒限三日痊。過期便當割。果然翊日瘳。不煩社酒力。見侯鯖錄。我耳獨不然。五官遂缺一。由來氣盛衰。默有司嶰律。少壯局易開。枯槁窒難豁。只好作難陀。返聽叩虛寂。世務紛蝸蟻。聆之本何益。少聞殊省事。放翁言破的。從此長杜門。一概謝喧聒。

### 題李靜菴印譜

史籀變鳥跡。古文已可棄。何以孔壁中。尙有蝌蚪字。可知流溯源。事必究所自。卽如真行草。用已過斯世。印章需繆篆。千載不能廢。爰有鐵筆生。嗜古擅絕技。開鑄花乳石。衆體無弗備。直將斯冰手。妙彷彿唐製。我思文藝中。優孟最可忌。獨於篆刻家。惟恐不貌似。倘徒炫新奇。俗書貯篋笥。貝葉抄西番。木皮襲南裔。鱗鱗及蝨吒。槎枒眼增刺。雖足侈繁博。未免趨詭異。此編援倉雅。耽玩勤所肄。之眾嶧山碑。祖丁父己器。一一入揣摩。腕力遠告瘁。體勿論圓方。文各別粗細。懸針與倒薤。愈拙愈嫵媚。遂自成一派。不數甘字智。能事探先河。共窺羲頡祗。

## 七言古一

### 十不全歌

世間萬事無不有。奇形乃見支離叟。眼無縫。頤有紐。胸怒蛙。頸癭狗。足一腿。手半肘。儼然一身叢百醜。市頭坐乞錢。人呼十不全。天生是使獨。彼亦不知所以然。我讀山海經。人生初本無定形。或蛇身牛首。或三臂獨肱。臍爲口

無舌。乳爲目無睛。天公見之不好看。逐件端相細改換。譬如塑佛欲成滿月面。鼻大減幾分。口小拓幾線。自從鑄就人樣子。化工能事始畢矣。聽他夫妻父子依樣畫葫蘆。大概不出範圍裏。何哉爾獨缺不完。縮長凸短雙必單。得非女媧搏土未定稿。千年拋落荒山道。爾托生時不暇擇。負之出胎太草草。獨眼龍。稱豪英。豁鼻馬。爲公卿。瞎兒一淚亦大貴。鑿齒半人且得名。爾則手不能持。足不能行。同在覆載內。天柱地枯過此生。噫噫乎。謂出自天意。生之胡令痼疾廢。謂是惡所招。受形時豈即召戾。將無輪回果報信有之。今生苦是前生致。不覺對之爲悲涕。願天生好人。願人行好事。奇交乃爾。千古絕作。枚。

青山莊歌

毘陵城北背平地。何許林巒層層翠。路人說是青山莊。門帖新題宮賣字。我來出郭偶經行。款戶曾無主出迎。繡閣雕甍空尚在。殘山剩水不勝情。頭白園丁老扶病。爲余縷述資談柄。園是前朝貴介爲。依稀記得延陵姓。後屬安昌相國孫。廿年行樂尤繁盛。相國勳名在廟廊。清貧未有午橋莊。令孫繼起爲方伯。分陝曾栽召伯棠。罷官歸徙常州住。百畝林扃供散步。入門便陋舊規撫。大笑前人大寒素。已編錢垆買堂成。拚倒金囊將地布。不覺松杉也改觀。何曾臺榭還如故。綠垣甃異枳編籬。低室築臨花夾路。十馬馳毬鬪作場。百牛拖石排依樹。粉本溪山似幃懸。壁衣簾洞皆紗護。一重一掩景迴環。某水某邱途錯互。倚杖疑探栗里幽。汎舟訝入桃源誤。勝賞經年與不殘。四時花鳥暢游觀。清音警露鳴仙鶴。浩態矯春豔牡丹。西府海棠移鉅砌。上林盧橘植雕闌。跳波魚婢能知樂。挂檣鸚哥解勸餐。園林成後教歌舞。子弟兩班工按譜。法曲猶傳菊部爭。新腔催打花奴鼓。反腰貼地骨玲瓏。擎掌迎風身媚嫵。阿誰棋墅伴壺觴。緜几羅幃樂未央。幸舍賓朋珠履貴。便房姬妾翠鈿香。傾城妓入籠鶻館。要路官登射鴨堂。熱客倚冰終日計。乞兒向火一羣忙。主人自顧矜豪放。揮霍不將錢篋障。博局籌償舊帑錢。纏頭錦出新花樣。茶經蟹眼碎旗槍。食品猩脣調醃醬。蠟淚成堆更熬膏。酒瓶臥壁仍傾釀。笙歌酣倚賞花亭。燈火醉歸邀月舫。自製當筵上壽詞。青山與我長無恙。豈知卮漏比泉流。猗頓潛懷折閱憂。已失又思求塞馬。未蹊輒欲奪

田牛。豪名本足招人妒。禍事真成與鬼謀。張樂正期投轄飲。叩門忽報檻車收。填口園土悲黃犬。回首歡場付爽鳩。春夢一場那可再。視今惟有青山在。青山也要屬他人。官價三千聽人貸。猶憶倉皇對簿趨。難憑複壁寄銘錄。委地圖籤爭剔玉。隨身衣履敢留珠。翻教百口求春賃。那有千金賄獄輪。籍到平泉花木簿。林霏亦似淚模糊。平生枉使錢如水。此日人情薄於紙。有誰廣柳路旁迎。并少綠珠樓下死。老僕如今也入官。仍充園戶守荒寒。飢窮全仗遊園客。給一文錢一度看。往日監門梁肉厭。近時失路斗升難。我聞此語心根觸。信有與衰如轉轂。重向林巒曲折尋。繁華彷彿留人目。垂楊影裏釣堪垂。秋樹根邊書可讀。愛山我乏買山資。有山渠少看山福。空餘別廟祀花神。自塑泥身占巖谷。晝寢香消落燕泥。空堂氣冷飛蝙蝠。平津廢庫古曾悲。華屋山邱今莫哭。梓澤風流昔未經。踏春偶到訪池亭。無端一段園丁話。說到傷心不忍聽。日暮歸途回望處。夕陽猶照晚山青。極似梅村仿長慶體。而精麗過之。

### 題閩典史祠

傳芭伐鼓到羊豕。前代孤臣今代祀。不警枯骨國法寬。不忘忠魂民意美。是時王師下金陵。大江以南望風迎。小朝廷已被俘去。爲誰保此彈丸城。國亡援絕獨拒守。作計雖謬心則貞。姓名已入點鬼簿。滿城皆鬼作鬼兵。以鬼易人一當一。人則怕死鬼怕生。梯衝環攻百道禦。積屍高與雉堞平。縛芻爲人夜取箭。緹緹出卒霧斫營。軍久絕糧。鼠掘土不解甲。蟻蝨生。相持八十有一日。一日中有千輸贏。君山礮聲沸江水。鐵騎平明滿街市。短兵巷戰血尺深。袒臂一呼仆者起。力盡俱甘駢首戮。至今白骨填荆杞。嗚呼明季雖多殉節臣。乙酉之變殊少人。將帥降旛蚤豎壘。公卿款表先趨塵。高門王謝獻城頭。盛名棄由拜路頻。何哉節烈奇男子。乃出區區一典史。刻藝處。何止入木三寸。保泰。

### 岫嶼碑歌

滿堂蝌蚪何蜿蜒。峩然鳩濛落我前。十指欲捫不敢近。中有神聖千萬年。伊昔昏墊五行汨。龍漢餘劫留水厄。人

命慘填魚腹。枵。民居爭結烏巢窄。黃熊九載績弗效。聖子起任平成賈。齋夔感夢蒼水使。告以宛委貯金策。肅刑白馬。啓石函。玉宇銀編妙尋繹。遂乘山櫟跨泥橈。分醜涇洞闢壅隔。塗山弗顧子泣呱。輾轅并愁妻兒嚇。亥章奉令。齟跟踵。支祁就縛鎖骨骼。山河兩戒次第清。萬古坤輿奠祗席。功成勒銘告葦事。岫螻山尖斷貞石。文括山海岳瀆經。字挾沮誦倉頡蹟。堯碑舜碣不可見。世間點畫此最昔。開天古篆形樸奇。難與後人較波磔。想見摩崖作擊窠。六丁下照火光赤。我聞此碑久失稽。道人偶見旋復迷。杜陵所觀已贗本。肥而失真燭若犀。昌黎親到猿猱窟。千搜萬索無端倪。此刻何時出磨洗。使我劍睹驚且喜。得非鐵石充逸少。或者朱繇貌道子。目無罔兩雙明瞳。真假誰能定片紙。我重聖德垂寶瀛。珍之不管尺璧瑩。洪荒禽擇數字外。口不能讀心敢輕。盲翁捫籥但取似。華公好龍固爲名。况茲筆力自奇古。不真亦是好手成。貌鶩敖卽衣冠氣。妒閻氏亦傀儡精。君不見七十七字長八尺。蛟螭攫牽龜魚擲。頑蟲蝕木蛙眼枯。雄雷劈山斧痕裂。鑿椎欲破渾沌竅。鑄鼎直寫神姦魄。嶧碑獵鼓空爾奇。猶斯安有此體格。縱輸明堂琥璜價。也北宮縣追蠹迹。

戲題魁星像

是何猙獰鬼戴斗。曷鼻魑顏貌粗醜。云是星精主文衡。彙榜榮名在其手。黃金點目儼方栢。牛頭夜叉舞跳頭。市頭忽逢白日鬼。陣上突出黑面王。似此險怪倘操鑿。甯免軋茁災詞章。我聞奎爲文昌宿。一十六星光彩秀。昔時五緯聚此躔。肇啓道學朗如晝。不知何年訛爲魁。奉之不異瞻三台。東坡死後作魁宿。道家幻語誰見來。古人字以象形起。今反就字求形似。遂令點頭朱衣人。抹粉塗丹作魑魅。毋怪亭林老人笑。科目人皆不識字。

寒夜澄懷園步月

幽人夜吟一燈擁。明月來窺入窗孔。清景撩人眠不得。起步空林力賈勇。流漸已涸澤腹枵。殘雪未消山背腫。萬株枯樹無一葉。似鳥畏寒翻去翫。濕衣無聲霜華下。暗結冰稜磴滑踴。此時世人盡酣睡。蒙被家家闔裏蝟。清寒只我與嫦娥。天上人間兩不懂。興來登山發長嘯。喝退浮雲不敢湧。林魑亦駭此狂生。潛伏深叢盡驚恐。惜無人

送半臂來。不覺臞仙兩肩聳。歸到虛堂清不寐。坐看庭階尙潑汞。清與獨絕。德麟。

德州南有地名夾馬營。查初白詩謂卽宋祖所生地。而以不能克復燕雲致鄉社拋落邊鄙。會不如漢高之統。有燕代詩中有微詞焉。按宋紀太祖生洛陽。夾馬營張溟雲谷雜記及孫公談圃亦云是夾馬營在洛陽。此地特名偶同。未可牽合。又楊誠齋揮麈錄謂南京應天寺本後唐夾馬營。大中祥符二年以太祖所生地建寺。錫名其說稍歧。然宋南京乃今歸德府。亦非德州地也。詩以正之。

德州城南地如赭。河畔有營名夾馬。詩人曾賦宋遺墟。謂是發祥丹陵野。我聞藝祖生洛陽。紅光燭天騰異香。御極歸來謁桑梓。舊埋石馬猶舍旁。戎服登臺射弧矢。矢所落處昌陵起。千秋魂魄依故鄉。不比歌風悲沛里。是知生葬皆西京。莫向平原覓遺址。豈煩雞犬新豐移。肯使樓桑敵境委。隔河雖是遼提封。其時耶律亦正雄。君不見乾柴入烟識終驗。熱鐵翻餅語竟空。病龍臺邊返車駕。拒馬河上棄甲弓。關收飛狐復被陷。城見掘蟹旋罷攻。由來燕雲氣尙隔。天之所限人無功。陳橋戴後削僭僞。已并諸國宅土中。封樁庫擬換幽薊。志豈一日忘混同。漢高亦未殄冒頓。甯遂因此虧英風。不揣時勢輒懸斷。毋乃目睫論未公。先生登高故能賦。懷古情深動遐慕。爭墩偶忘謝公先。疑塚幾被曹瞞誤。才人往往好逞才。得題不暇攷典故。

### 登金山塔頂放歌

生不能搗浮邱袂。拍洪崖肩。又不能隨列子。御風行冷然。黃塵蹴躡日奔走。安得矯首凌雲烟。我過金山凡五度。昨歲始一登。又逼白日暮。不及憑高暢遐顧。今朝乃到浮玉之頂來。遊目四矚心爲開。寥空飛鳥盡在下。青冥誰掃無纖埃。不知上距大羅天邊尙幾里。但覺繁星磊落可摘三兩枚。海門東去望不極。混茫一氣雪浪堆。此中卽是瀛洲方丈兼蓬萊。凡爲車兮神爲馬。忽如山僧出定遊九垓。回視憑欄之我。但肉胎。臨江下瞰復殊狀。塔身如臥江濤上。倘逢罡風獵獵吹我落。不免竟入魚腹葬。振衣忽長嘯。平生空負狂。五嶽未遊一。遇險心已惶。何以更向蓮花峯頭挽鐵索。天台山。上度石梁。不見古開士。懸崖撒手凌蒼茫。浩歌未終日將夕。閨黎邀我飯香穡。半龕

夜借蒲團眠。滾滾濤聲撼枕席。腳力已盡與轉雄。題詩驚破蛟鼉宮。聽取天雞鳴時擬再上。要看五更日出扶桑紅。

漂母祠

淮陰生平一知己。相國鄼侯而已矣。用之則必盡其才。防之則必致其死。何物老嫗偏深沉。能於未遇相賞深。吾哀王孫豈望報。此語早激英雄心。布衣仗劍試軍職。寧但重瞳不相識。將壇未築官連敖。劉季亦無此眼力。何況區區亭長妻。固宜葶食私鹽齏。客來轅釜似邱嫂。飯後打鐘如閨黎。獨悲淮陰奇才古無偶。始終不脫婦女手。時來漂母憐釣魚。運去城姁解烹狗。結處警切。保泰。

阜城咏古

驅車曉過阜城路。偶翻逸史徵典故。當年曾出兩僑朝。楚齊先後建國步。張邦昌。劉豫。皆阜城人。見岳珂程史。邦昌受冊權一時。終迫羣議未踐阼。六等定罪尙可原。其死乃以官掖汚。豫也叛奴警故主。公然牧馬向南渡。未幾被廢遷臨潢。故里枉稱御莊鋪。地有御莊鋪。程黨墩詩。居人不傳聞崇甯全盛時。此間王氣鬱盤互。詔斷支壘殘地脈。逾年漸覺晦如霧。後來二豎皆不終。或亦幾先敗厥祚。斯言父老今猶傳。我思其故殊未然。秦皇曾鑿秦淮水。擬洩靈孕髡山川。黃旗紫蓋翻作讖。六朝割據三百年。拓跋欲厭壺關氣。親巡上黨盤游畋。豈知高歡來駐旅。一戰遂創霸業偏。金源亦碎蒙古石。作瓊華島徒置燕。一朝元祖入定鼎。其島適在禁籞邊。從來王霸關天意。水土安得司其權。得地若便可僭竊。是謂有地而無天。君看二豎忝高位。國難不扶反自利。已無天理一綫存。地縱不殘豈成事。我來時正值昇平。往日妖氛久洗清。但覺桑麻景象好。黃圖三輔拱神京。

戴瓊草根鬪蟀圖

戴嵩畫鬪牛。尾不縮股牧童笑。黃筌畫飛鳥。頭足並展弋人誚。乃知體物未甚精。名手往往失其名。何哉此圖兩蟋蟀。意態都從拗怒出。其一剽疾性命輕。雙股屈鐵作力勛。陣前聞罵周陽五。單騎突出誓捉生。矯如秋鷹掣鞵



去。落處定有毛血驚。其一蓄勢伏不動。側腦凝眸伺鯁縫。高蹠城孤堅壁守。楊劉渡險夾寨控。偏於靜若處女時。陰鷲已具脫兔用。蓼花根下雄二豪。赤身搏戰無弓刀。一手掌地殺機起。天色慘澹風蕭騷。豈有封侯到蟲豸。爲誰博進爭功高。畫家九朽始一罷。如此寫生孰方駕。豈曾諦視戲金盆。或半閒堂翫清暇。全神注入蟲身中。不覺蟲我兩俱化。何異龍眠李伯時。馬腹投胎懼不怕。戴生供奉宣和中。臂腕曾封御筆紅。當時真跡已難得。何況傳流到今日。鯽魚口裂古絹紋。更非臨自他人筆。珍藏亟入枕函秘。還恐夜深喧窸窣。生動警刻。吳道子畫所不到。舟。

### 題肅本淳化帖

淳化天子盛文物。愛古墨寶勤搜羅。摹之秘閣葺木板。侍書王著精編摩。世惟此帖刻最古。亦惟此帖刻最多。當時禁本已難得。潭州絳州石各磨。泉汝臨江利州路。後先鈎勒枝磔波。紹興又鑄國子監。神理漸失招詆訶。何況近代屢傳刻。一佛化作千百魔。譬如畫家寫生法。須見笑人描翠蛾。後來人去但留書。翻從畫裏求嫦娥。曷怪形存意態失。甚或新婦變爲婆。傀儡索然生氣盡。劣到假面方相儼。此本傳自明肅府。憲王跋尾無滯訛。明祖當日封愛子。錫鎮國寶傳山河。龍膽壺搜碧澗島。鳳喙卮採丹山阿。就中銀錠帖第一。垂之竹矢兌之戈。錦腰繡襦白玉匣。重逾介圭綠緜緜。文孫雅意惠來學。妙選賓友相切磋。百四十四富平石。錢成肥瘦心手和。中藏筋骨有盤鬱。旁出鋒穎無沓拖。大壑泉奔渴騏驎。新礪劍斫生蛟螭。古意尙可燈取影。成法未煩斧伐柯。較他裝潢碑洞物。相去奚啻蔑稗禾。傳聞平涼昔叛亂。欲作礪石守賊窩。有僞官以詭詞對。得免逆落荒山坡。始知名蹟良足貴。雖非文士亦護呵。緊余臨池學故淺。空買石硯研灘哥。忽購得此喜過望。晴窗一日三摩挲。響搗不辭揩眼晴。蠶肚時復坦腹睡。迫暮鏤鏤透側理。展拓筆力書壁窠。所嫌腕弱但塗蚓。敢請墨妙堪籠鵝。數典聊爲誌緣起。傑句殊愧石鼓歌。

### 食田雜戲作

貧官日咽酸鹹齏。忽聞廚頭將割雞。亟呼爨婦問特殺。並非羽族鵝鶩鷄。乃是一羣脰鳴種。縛來輩輩指爪齋。惜

哉皮已去。青靚黃蛄無由稽。於焉商食單。芼薑滓酒醢。速趁出餽熟。芬烈朵我頤。不暇致詰官與私。遑問東行者。雄西者雌。就中兩股尤瑩潔。想因跳躍暢在肢。鱗鬣出肉淨無骨。雉臆作脯肥不脂。有客輟箸前致辭。此豈足供口腹資。其類雜虺蜎。其性汗草泥。有時脹作白出鬪。彭亨大似董相臙。曾聞長吉食之瘦。甯免形如飯顆杜拾遺。我笑謂客不必疑。請爲數典語客知。嘗攷康成註蠹氏。上供御食始漢時。周官蠹氏註云。今御所食蛙也。井偕羔兔薦宗廟。丞相樽減且被譏。粵人更嗜疥滿背。相戒勿脫錦襖披。抱竿羹成誇大饗。貴過斑鷓玉面狸。由來雋味在翹肖。何用猩腎糞炙熊蹯。君不見鼠名家鹿瀆以蜜。蛇字茅鱗剔作絲。土筍立盤即曲鱸。翅緞入饌維蠹斯。况茲申潔水。樂令濟饑都尉職所司。輪囷雖同蝦螯醜。率孕實共鮪魚滋。與其去聒焚牡鞠。何弗侑飽炊屨屨。如客所言太拘忌。毋乃井蛙之見陋可噴。游戲爲文。波瀾層出。足觀腹笥便便。係泰。

行園即景

虎槍

白褂朱纓虎槍客。手執長槍尋白額。長林豐草何處尋。幸其出沒有常跡。入山偵視得其處。乃伏叢薄密伺隙。數人山後驅虎來。虎亦驚走向薺澤。伏者挺槍當其衝。人虎此時共一厄。注目槍尖不看虎。但看槍尖一片白。知是虎膺非虎脊。舉槍便刺不更擇。虎哮而起死相格。人虎空中互跳躑。斯須攢刺虎不支。拗怒竇恨洞胸膈。獸歸獸獲惟宮前。腥氣薰蒸血狼藉。中涓傳旨催賜金。孔雀修翎長一尺。亦有身手遭虎傷。重者肢體輕膚革。吁嗟此獸誰不畏。乃獨以虎爲職役。職虎遂與虎爭命。足徵國家威令赫。豈徒力過斬蛟勇。實乃心比當熊赤。以死奉職不敢辭。此意真堪使赴敵。

相撲以手相撲。名曰布庫。即古角氈之戲。

黃幄高張傳布庫。數十白衣白於鷺。衣纔及尻露襠襠。千條綫縫十層布。不持寸鐵以手搏。手如鐵燬足鐵鑄。班分左右以耦進。桓桓勁敵猝相遇。未敢輕身便陷堅。各自迴旋健踏步。注目審勢睫不交。握拳作力筋盡露。伺涼

忽爲疊陣衝。擣虛又逼夾寨固。明修暗度詭道攻。聲東擊西多方誤。少爲肉薄緊交紐。要決雌雄肯相顧。翻身側入若壁鷄。拗肩急避似脫兔。垂勝或敗弱或強。頃刻利鈍難逆睹。忽然得間乘便利。拉脇摧胸條已仆。勝者跪飲酒一卮。不勝者愧不敢怒。由來角觝古所傳。百戲中獨近戎務。技逾蹴鞠鍊腳力。事異拔河供翫具。國家重此有深意。所以習勞裕平素。君不見教坊子弟也。隨行經月不陳默相妒。

跳駝驕足者躍

明駝身高八九尺。人欲騎之駝屈膝。是誰捷足矜跳騰。曲踊能向駝身越。如丸脫彈決而起。如水經搏躍而出。翩然騫過駝背來。不著駝毛一毫忽。自起至落二丈餘。到地植立仍不蹶。老駝不解人何故。似騎非騎欺非欺。但見背上雙鳧飄。捷於猿狖健於鶻。海上漫傳着翅人。軍前已掩拔距卒。綵棧定覺履險平。攀堞台見先登疾。得非會住深山中。日從劍仙學鍊骨。旁觀咋舌咸歎詫。駝背有峯高突兀。昔聞超海今超山。怪事應補諾臯闕。

馳馬番少年騎馬廿里外。聞營中轡聲。疾馳而來。先到者爲上。

生長戎番事畜牧。騎射精能擅所獨。詐馬筵前獻技來。不賭身強賭賊逐。結束鞍轡拴鞅絆。要使兩足踰馬腹。距營廿里按隊排。屹山不動力預蓄。忽聞營中轡一聲。齊著先鞭鬪誰速。平蕪草淺無纖塵。四蹄如風雙耳竹。可憐此人與此馬。併作一軀但異肉。綠蛇迅擊閃電光。跋躑連叫離絃錢。不及兩刻已到營。訕然而止苦槁木。賜之斗酒一彘肩。下鞍拜受神何肅。噫嘻乎。戎騎自古利馳突。中國所以每被蹙。昔以此技窺邊陲。今以此技效臣僕。足知威朝德威大。鞭撻四裔無不服。莫漫誇他聲控嫻。正是廟謨駕馭熟。

套駒

兒駒三歲未受羈。不知身要爲人騎。跳梁川谷訖原野。狂嘶憨走如驕兒。驅來營前不鞍轡。掉尾呼羣共遊戲。旁看他馬困鞅勒。自以蕭閒矜得意。誰何健者番少年。手持長竿不持鞭。竿頭有繩作圈套。可以絡馬使就牽。別乘一騎入其隊。兒駒見之欲驚潰。一竿早繫駒首來。舍所乘馬跨其背。可憐此駒那肯繫。愕跳而起如人立。如人直

立人轉橫。人歸而騎勢真急。兩足夾無爰上鉤。一身簸若箕前粒。左旋右折上下掀。短衣亂翻露袴褶。握槩伏翫何晏然。銜勒早向駒口穿。纔穿便覺氣降伏。弭帖隨人爲轉旋。由來此物供人走。教駢非誇好身手。驟施不嫌令太速。利導貴因性固有。題新詩新。可備國朝典故。枚。

題王摩詰渡水羅漢圖

一僧誕先登彼岸。芒屨未著露兩脣。一僧半渡波沒膝。回視後僧尙隄畔。倒持錫杖來相援。後僧手接若魚貫。凌兢似怕一失足。水作醜詞頂中灌。遠尾結股鉅蹶行。尺非繩趨不敢亂。臨池賭馬夜愁蹶。聽冰老狐春懼泮。是何緇流有底急。不待船來葦間喚。我聞釋氏妙變化。寶筏能引迷津斷。乘桴過河駛往還。踏蘆渡江狎滌汙。胡爲此獨憂及溺。帶水拖泥背淡汗。豈因鍛面觀河悲。恰似繫腰向井看。應知畫師意匠舛。別製禪真托髮輪。貌出溪邊老古椎。敬懷不作散人散。慳眉傳是右丞筆。年深絹素已漫漶。既無思陵妙題跋。亦少後邨清論斷。畫師堂錄。畫守張萬戶家。畫王維渡水羅漢圖。有宋高宗御題。又劉後邨集。有跋王維渡水羅漢圖。此幅俱無。或係臨本也。丹青真寶那得驗。屈揭神情獨可按。空門久已外生死。猶自臨深存畏憚。卽事足悟垂堂戒。絕勝賈休畫羅漢。莫矜寶給供香殿。好挂虛齋澄水觀。

哈密瓜

甘瓜來自燉煌西。重覆裏歷明駝蹄。或長如枕大如斗。覆棚培土法未稽。路遙價貴競珍重。綠膚弗忍刮以錫。刮之猶恐太暴殄。截來寸寸成方圭。其中應有汁滿腹。日久疊入紅玉肌。甘芬不數文官果。清脆欲賽袁家梨。惜哉到京已冬節。切處先愁寶刀折。僅堪杯酒佐解醒。未得巾絺効消熱。潤肺雖同咽清露。戰牙不免嚼銀雪。我思此瓜亦熟秋夏期。郵籤萬里到乃遲。色味幸非香荔變。節候已等標梅悲。李廣本足侯萬戶。數奇毋乃不遇時。古來物產可移植。曷弗試種當陽陂。杜詩。陽陂可種瓜。君不見。蒼蘭分根自大食。茉莉購種從波斯。菠稜舊爲婆羅菜。安榴故是塗林枝。高昌葡萄上苑茂。大宛苜蓿離宮滋。卽如西瓜產回紇。胡虜出塞驚絕奇。今已蔓延徧中土。功妙驅暑逾涼颼。可知芸生信蕃變。遷地亦有諧土宜。阿誰好事姑藝此。未必踰淮橘爲枳。倘同萍實結滿畦。六七月間

涼沁齒。老饕斯時快大嚼。甯羨刷竊調冰水。

題柳如是小像

女假男裝訪名士。絳雲樓下一言契。美人肯嫁六十翁。雖不鬚眉亦奇氣。幸膚雪白鬢雲烏。伴郎白鬢烏肌膚。肯同搽粉稱處侯。肯陋持門勝丈夫。扁舟同過京口泊。桴鼓金山事如昨。何代青樓無偉人。可惜儂家貨主惡。早聞讎叟寫降箋。不遣朱游和毒藥。妾勸郎死郎不膺。妾爲郎死可自憑。褚公偏享期頭壽。毛惜終高節俠稱。三尺青絲畢命處。尙悲不死在金陵。畫圖今識春風面。果然絕代紅粧艷。誰知膩粉柔脂中。別有愛名心一片。君不見同時卞玉京。心許鹿樵事未成。旋適貴人爲牽婦。流離含淚畫蘭英。又不見顧眉生。榮華會擅橫波名。當其夫婦從賊日。捧泥塗面逃出城。一樣平康好姿首。青青終讓章臺柳。河東君知

苦熱

吁嗟乎。天到爲乎。慘降此炎赫。去秋不雨。至今已將十弦魄。雷公伏藏雨師避。惟有織烏當空恣騰擲。敵陽吸吸森角芒。不作濕蒸作乾炙。百川泉眼蝸涎枯。千里土脈龜兆坼。赫熹餘威竟夜不肯散。繁星皆紅月不白。有時微雲黯黯似欲雨。忽然化爲冷冷之風去無迹。蒼霄如鏡無一罅。何處得以洩涓滴。翻嫌女媧當日太多事。何妨聽其灑天。而必補此一卷石。緊我苦熱坐煩鬱。膏齋敷椽地又窄。渾身忽遭入甕燬。束手慘受烹鼎厄。白汗翻漿浹胸背。赤痲成粟徧膚革。聊同禪子曰掩關。迄如病夫畫脇席。遙望晴空萬里正蕩蕩。上天下地無處不是赤餓積。我於其間渺如滄海粟。奚啻洪爐燎毛立見作人腊。沉吟掩卷忽自笑。書生脆弱真不耐煎迫。可憐心冷如冰尙中熱。何以處夫病於夏畦之熱客。

題唐明皇馬上擊毬圖

天寶昇平徧四隕。先幾未兆銜花鹿。九華殿已舞羽衣。千步場兼習皮毬。誰其從者一貴妃。又韓虢秦三阿嬈。禁烟初過賜新火。平明結束黃金羈。古人梘革蹴以足。此獨馬上用杖撲。杖頭紅拂妙轉旋。左撥右挑工起伏。一毬

突出廣場飛。君王控騎先追逐。錦鞵玉勒四蛾眉。齊着珊瑚鬪誰速。遊龍戲珠爭奮爪。流星趁月難矚目。奔馳將及忽折回。一拂驅之往而復。是時笑人更逞姿。翩若驚鴻翥平陸。回身或疑薛夜來。反腰直比孫荆玉。與酣樂極日西斜。墜履遺簪紛可掬。至尊含笑策奇勳。餅金斛琲輦來分。直自平陽公主後。又成一班娘子軍。宮中方演白打技。塞上亦演超距戲。一旦漁陽鼙鼓來。驍騰即用趕毬勢。可憐鍊就走馬工。只供倉皇避賊計。嗚呼一趨區區何重輕。江山遂入哀弄傾。始知五色毬空好。不及千秋鏡最明。

贈相士彭鐵嘴

古人相法相心曲。豺聲忍。烏喙毒。鸞肩蹙。牛腹躓。初不專以論禍福。論之實始周叔服。由也不得其死然。孔聖亦似據此卜。自後唐舉及呂公。下至麻衣道人柳莊翁。一十七家術愈工。我思人面各一尺。就中列五官。雙者自雙隻者隻。位置未聞有變易。何以千百無一肖。此實化工示奇迹。相者因之測天咫。固應巧中若著策。彭生挾術遊長安。一朝名動公卿間。終身能以立談判。自稱鐵嘴無欺謾。生平吾語爾。從來驗者可屈指。髭黥或真王。將相或餓死。眉長過睫文譽高。耳白於面盛名起。骨如多遜具貴徵。目似王敦召禍始。一雙鬼眼少宦達。半箇軍頭終竄徒。斯皆經驗方。操券可比擬。然而按舊譜。有時亦錯迕。褚蘊從理竟溫飽。庾夔豐頤乃貧窶。徐陵宜天享蒼蓋。柳澤宜賤躋台輔。此又何虞差。毋乃術莽魯。何況李嶠壽在息。元忠貴在怒。倘非值其睡酣與色變。懍藏天網也坐誤。感生爲我論窮通。問生此術會否精研窮。不然若但矜皮相。對鏡我亦能自量。幸免鼠目求官讖。本無燕頤封侯狀。筋猶束骨未召殃。脣不著齒或招謗。豈望眉間黃上來。聊守鼻端白無恙。淵翻不窮。舟。

于闐王歌

釋馬奔車汗流足。將軍遞到于闐王。大小磊落三十顆。生牛皮裏牢結束。白作截肪青蔚藍。瑩澤皆如水新沃。觚稜初曉肅奏進。光映朝霞炫人目。此邦遠隔玉關西。洪荒以來未內屬。崑崙西流入其境。分三玉河烏白綠。見平居薛千闐行程記。少時讀史疑天外。何處西域三十六。張騫使節空經臨。呂光兵威未降伏。豈知今日入版圖。周索新恢過

身毒。此玉遂充方物貢。水漲擄來不煩督。足現我朝德威傳。地盡九垓悉肅育。君不見天寶初載索西費。興師數律武功隲。襄糧轉戰四萬人。海激成冰一朝覆。見西陽雜俎。又不見大觀年間造八靈。遣使往來幣滿旛。答書竟號獅子王。國寶雖成國體壞。見游宦紀聞。即今緬載來輪蹄。習見翻似豐年穀。試披往牒徵典故。此事古來見者孰。傳之史策垂無窮。應笑漢家侈印竹。

觀回人繩技

走索之戲。晉樂志。及文選注。謂以繩繫兩柱。人行其上。是其索乃平繫也。今內地有能之者。回人則立一長木。斜繫一繩屬於地。步而直上。尤號絕技云。

險竿矗天五十尺。拔地孤撐少牆壁。其旁斜出十丈繩。短杙繫之堅椽石。彩虹影挂窅空高。紙鳶線入青冥窄。了無階級疊層層。詎設梯桄排節節。誰何健者獻技來。昂鼻虬鬚眼睛碧。奮足忽如履平地。直上不藉人扶掖。懸藤鼻鼻猶猴行。釣絲搖搖蜻蜒立。斯須更進竿頭步。獵獵罡風迎面拍。觀者睜眸。胎舌盡吐。深愁齏粉粹一擲。整暇故出一足翹。盤旋或作雙趺結。咿嚶更復操蠻語。要使廣場歎噴噴。神哉技乃至乎此。肉飛仙人不足嚇。問渠遠自回鶻來。戎索新恢就俘獲。勃律天西古不庭。今入幅員受屬役。絕藝洵過羣軒眩。盛事更勝越裳譯。太平物色於此徵。莫但看成一虛劇。

贈寫照沈錦

世人論畫重山水。花草翎毛仙佛鬼。畫人亦只畫古人。寫照雖工固所鄙。豈知繪事此最難。未可憑虛信手擬。伏勝縹緲圖塵詰。子敬書裙摹老米。王維有伏勝縹緲圖。米芾有王子敬書練裙圖。但取神采不取形。苟得其意一掃耳。試起昔人相比對。未必風貌果如此。寫照乃以人爲的。毫釐差輒謬千里。刻劃模成印板中。玲瓏影取惟燈裏。穠纖相稱配瘦肥。毛髮欲動肖悲喜。事兼東縛與馳驟。依樣葫蘆豈薄技。譬如拈題作詩文。一縷脈縈微妙旨。多少詩古文辭家。掉難弗屑挂牙齒。一朝執筆就繩墨。要駕蹠弛不成理。乃知傳神阿堵中。慘澹匠心幾生死。會稽沈生秘獨擅。布衣徒步長安市。我來請作壽母圖。時爲家母寫照。意思安閒拂素紙。詎須九朽始一罷。頃刻圖成未移晷。懸之粉壁羣聚觀。三尺小鬟亦曰似。信哉茲技有別長。弓人之弓矢人矢。古來絕藝當通都。早晚遺逢名鶴起。會看待詔金馬門。

縑素揮成進綈几。時將供事方略館。

翰林院有土地祠相傳祀韓昌黎詩以解嘲

瀛洲暑中坎社鼓。社公傳是韓吏部。建置本末無可徵。鞏祀不知義何取。從來名賢歿為神。各視生平所建豎。或班侍郎居碧落。或冊真人位紫府。或選閭羅分殿十。或封遮須列爵五。鬼官司命周顛除。太陽都錄魏徵補。白傅已列蓬萊仙。曼卿更拜芙蓉主。況公日星河嶽氣。立朝大節炳千古。絕派能開道學先。餘事亦號文章祖。抗疏幾碎佛氏骨。從祀不慚宣聖廡。豈宜罰作土地神。坐使淮陽噲等伍。屈宋詎稱銜官職。樂郤翻充皂隸戶。生前磨蝎坐命宮。會讀嶺南蛟鱉浦。庸知身後尙踰躄。無端又遭左遷侮。鄉先生可祭於社。此地初非公故土。即云立社為樂公。公未久修史館簿。區區冷官一鱗肉。甯足為公增華靡。我來展謁聊解嘲。且勿牢騷頑人俟。幸未改塑浮屠像。湖州有公像。作浮屠形。然撫郭魯。青巖。易以木主。見獨輜小品。儒服依然端章甫。香火祠雖處未僚。翰墨緣仍近藝圃。猶勝杜陵老拾遺。變作十姨呼阿姥。杜拾遺廟。說為杜十姨。望女像。見蓼花洲詞話。

贈說書紫髯鬚姓黃。名周士。以說書遊公廩間。

紫髯鬚貌何醜。荷頭寡髮面赤癩。帶恃滑稽一尺口。酣嬉每逐屠沽博。調笑慣侑侯王酒。妙撥鴟絃擅說書。故事荒唐出烏有。優孟能令故相生。渣于解卻強兵走。有時卽席嘲坐客。自演俚詞彈脫手。張打油詩豈必工。胡釘鉸句不嫌苟。但聞噴飯轟滿堂。炙輦爭推此禿叟。自言名隸教坊籍。缺段曾供宴燕九。華清承直知有無。唇舌君卿同罕偶。君不見石野豬。張浪狗。絕技俳優侍至尊。斗珠車帛承恩厚。如今朝廷絕嬖幸。不賜歌給田半畝。姓氏漫同蟠綽黃。談諧聊附敬亭柳。

汪水雲硯歌

昔文丞相有硯玉帶生。至今四十四字傳其銘。何哉復此一片斧柯石。再覩天水遺民迹。豬肝色映青花斑。水雲小篆文回環。更有七言一章章四句。自署頑民同石頑。硯乎硯乎。當日機速房。揮檄草。慈元殿。寫降表。爾幸未與



謀。完璧得自保。硜硜鐵筆錢。主思擬作魏公遺。笏傳家寶。何期臯亭山。畔悲疇鳴。蝦蟇更盡三宮行。是時守臣納款。宰臣遁。坐視鐘虜。稜徒銅盤傾。西母牕前考供奉。獨奮九死隨北征。此硜亦復不脛而走。來燕京。同際者萬卷書。伴者三尺琴。爲南冠。容供清吟。故國河山同瓦裂。石不能言也嗚咽。可憐不作高漸離。擊座塞。徒成朱少章。印懷袖熱。授書木波師。藏國公學佛。木波講師。韻王昭儀。水雲有和。王想當搦管濡毫時。蟾蜍滴淚和墨研淋漓。即今五百年來不知幾易主。一雙鴛眼猶似含漣流。從來離黍滄桑際。多少淒涼難盡誌。往往或托一人載一器。翻抵東京夢華西京記。君不見咸陽宮中鏡一奩。開元年間錢半字。觀者輒爲談遺事。况茲孤臣手澤存。忍弗什襲幸藏。亟標識。我爲作歌告奕世。不同武林舊事金聯羅。應比汝社詩人竹如意。淋瀝頓挫。可與竹垞玉帶生歌並傳。而結句更覺健舉。侯泰。

王貽堂編修邀客陶然亭而不及余。余是日獨游適至。遂入座兼訂法源寺看海棠之約。

經旬閉門不可耐。一壺酒掛僮奴背。城南野路確犖行。破車聲如老翁效。尋幽遂到黑窰廠。忽遇掩關但犬吠。疑有貴家姬妾遊。不許旁人見眉黛。圍扁難爲看竹袁。吳畫欲作廻舟鼓。無端犀啓蕭客入。一笑原來是我輩。似慚折柬不我招。肯復揚輝磨人退。客以不速倍合歡。酒惟無量自擇對。侑歌雖無二八粧。具饌不數三九菜。狂來髮或植如竿。酣處胸已澆無塊。地高一徑有曲折。亭敞四隅少隔礙。城上探出西山頭。似向鄰牆窺醉態。纔離人海境便猜。始覺市塵塵果穢。乞醬得酒真太賒。待隴望蜀不嫌再。春風計日到海棠。預約祇林重結隊。

連日筆墨應酬書一笑

詩非苦心作不成。佳處又非苦心造。縱窮罔兩搜元珠。不過寒郊瘦賈島。粉蝶雙飛桃李春。雄雞一唱天地曉。偶於無意爲詩處。得一兩句自然好。乃知茲事有化工。琢玉鏤金漫施巧。如何一管秋兔毫。立謀分程日起草。言情篤什貴雋永。豈比宿逋可催討。假啼那得有急淚。強笑安能便絕倒。君不見倩人搔背不着癢。枉費麻姑好指爪。題袁止所主政我我周旋圖

佛說有化身。易言貴觀我。君乃獨取蒙莊書。寫此一對解衣磅礴裸。既非形影神句問答頻。亦非千百億軀示現。

黠無端入畫一而二。一端正相一偏頗。初疑高人對奕間。又疑雅客晤談叢。豈知不得生區別。左者卽右右卽左。問君何事弄狡獪。幻出人間兩么麼。君獨不聞人之大患在有身。如蠶作繭自纏裹。笑君一身難了又一身。不知何時可以脫韁鎖。

上元後一夕同兒輩市口看燈

昨宵佳節天大風。市頭燈火一掃空。今朝無風天色好。滿街人沸月影中。兒曹牽衣喜相告。出門要看紅燈紅。對之那能卽嘖喝。聊與命駕菜市東。置膝自抱我誠癖。上車不落渠自雄。發蒙教猜春謎字。遠咻引避市語訂。尙逢相識見應笑。如雞穀雉在一籠。中年漸多兒女愛。已無大志立事功。竿木逢場且作戲。閒情聊托兒嬉同。卻憶倚閨人望我。亦如我愛諸孩童。

題長椿寺九蓮菩薩像

城西南寺名長椿。中有寶繪姿天人。貴極重闈禕翟賤。誠飯佛乘戒衣尊。當日隆稱觀自在。至今遺像儼生存。從來母后當冲帝。每利藐孤擅神器。女中堯舜有幾人。朝端平勃愁無計。殘婢驕稱中大人。權閹寢後十常侍。太廟祠被袞服臨。外家臘改黑貂祭。鶴將木刻竈新歡。歲以人爲讐舊壁。飄絮猶歌楊白花。摘瓜幾盡黃臺蒂。獨有前朝家法嚴。尤推孝定性和恬。恐辜末命黃襪托。不慕朝儀紫袖瞻。政委相公拱勅尼。保勤幼主讀書簽。經筵進講親催鼠。曲部聽歌痛示砭。期屆六婚移殿早。禮尊正嫡過宮謙。和熹應博常稱制。光獻猶多一撤簾。國儲未定妖書起。官家汝亦都人子。從此青宮有所歸。一語勝他千御史。璇室禔躬四十春。九蓮菩薩本前身。漢家賢母師黃者。今奉如來亦淨因。湧現化城輝紺碧。莊嚴香界布金銀。要令人識清修業。特賜禪林法相真。着色生綉闔立太。白指神筆李公麟。想當玉軸頌來日。繡繖珠旛溢九闈。諸佛也應投地拜。榮光萬丈耀金輪。轉眼孫曾遭百六。丹青也入滄桑錄。蓮花世界滿刀兵。只葉經堂橫血肉。可憐萬里好山河。無地可懸圖一幅。社飯誰遺念老身。僧寮聊復存遺躅。深谷高陵何代無。徽齋終自冠椒塗。道清死免僉名辱。鈎弋生偏享福殊。來自西天乘鳳羽。是時禁中

九首。見楊妃詩玉堂書說。去詩南海比龍宮。慈容滿月零縑在。筆殺臨朝武后圖。

## 七言古二

### 途遇大雪

先生身將作火鼠。去向炎方嘗淨暑。豈知寒酸緣未斷。還須歷盡冰霜阻。征途連日朔風厲。曉來風止稍和煦。化工何處萬剪刀。剪出玉蝶滿空舞。又疑揉碎華鬢雲。噴下層霄壓九土。混茫直泛洋伶仃。晃眩豈辨谷子午。世界幻入兜羅綿。恍見洪荒萬萬古。青山未老白頭催。枯樹不花素囊補。隨地無聲賦苦烟。伺隙善入狡於雨。絕無人跡難商途。見有漁舟始知浦。壓馬真看有腫背。隨車或不慮折股。先生畏冷又畏濕。亟下輿帘塊獨處。如曷且鳥寒自號。比紇干雀凍不語。此行正要褰幃帷。翻閉巾車作處女。傳妙乃爾。枚。

### 五人墓

駕軫來。逮吏部。吳民號。旂尉怒。大聲呼。囚趣對簿。誰何健者揮老拳。狐鼠紛紛竄無路。博浪一椎全秦動。北軍盡袒譖呂懼。豈惟激變事可駭。緹騎從此不出捕。君看德陵晏駕時。奸餒薰天勢已固。點將錄早打網盡。頌璋利皆向火附。詎有蕃武收黃門。并無訓注謀甘露。縱撰九錫盜神器。中外臣僚孰枝梧。正慮草澤有君等。或起義旗挽天步。奸謀坐是不敢發。信邸從容來踐阼。乃知此舉功實偉。又延十七載國祚。我來懷古過墓旁。彷彿生氣尚盤互。頌璋地即普惠墓。幻出神奇從臭腐。媚奄翻奉擊奄人。蟬綏蟹筮理難悟。襟山帶水一佳城。卜吉者誰毛一驚。墓其即普惠祠。毛一驚所建以頌璋者也。子才此題。亦有一首。專以頌璋勝。此從大處立論。故是堂堂正正之旗。枚。

### 岳忠武墓

背嵬軍來敵鋒逆。撼岳難。撼山易。樞密使罷賊疏彈。縛虎易。縱虎難。宰木蒼蒼向南拱。此是改葬祁連塚。祠前已植分屍棺。胡同知馬。傳所植。更鑄烏金長跪竦。都指揮寺。欲憶園扉橫實時。格天閣秘無人窺。臺壇安有肉笑齒。拉脇處

定柑剗皮。鐵椎郎君戮都市。銀瓶弱女投井淵。全家簿錄赴嶺表。僅有獄卒潛瘞尸。隗百戰不死死牢戶。從古冤禍無此奇。邪正由來冰炭異。奸臣逞毒何足計。獨怪思陵非甚暗。曾寫精忠鑿素志。是時權相日尙淺。未至鞞刀嚴戒備。言官誣劾韓良臣。猶能力持格羣議。胡獨於公任羅織。自壞長城檀道濟。千載人思贖百身。當年獄竟成三字。乃知風旨本朝廷。爲梗和戎亟拔釘。可惜垂成功八九。少緩須臾兀未走。生平誓踏賀蘭山。未飲黃龍一杯酒。空令數天抱冤憤。恢復初心豈願有。豐碑突兀西湖濱。孤忠雖雪志未伸。有時風號怒浪起。猶似熱血蟠輪囷。鬱勃頓挫。岳墓詩。斷。無有出其右者。保泰。

大石佛歌

是誰鑿破山骨裂。幻出如來身半截。淨磨頑石生面開。剗空危崖全羸突。昂藏十丈端正相。憑高氣欲俯一切。轟雲紺殿僅可容。聳翠遙峯迥相埒。耳輪縱未廣成市。指節已看粗似椳。繫腰豈但十圍帶。東臍知費幾許篋。伸脚恐踏杭州城。法座不琢跏趺結。巨無霸頭大枕鼓。狄僑如眉高見軼。相形尙覺成侏儒。何況焦僂等蠓蟻。我聞佛教色卽空。真諦不在崇像設。華嚴樓閣彈指現。陶輪世界隨掌擲。斯特維摩寓言耳。廣長舌豈論尋尺。胡爲翻事捫籥求。作此狡獪做鴟嚇。粵稽象教本西來。休屠金人著史策。真形繼入漢帝夢。塗像旋起窄融役。見後漢書陶其要備事之始。爾後踵襲遂流播。土木莊嚴日顯赫。或慕法相雕梅檀。或范慈容鑄鎖鐵。或同黃胖搏泥成。或被蘇扛爲銀竊。鏤牙刻玉矜貴重。撚蠟燒瓷闢奇闕。爭新炫異無不有。最大莫如斲山石。僧護鑄留寶相寺。曇羅鑿出武州壁。六十快牛拽不動。十層峭閣蓋還窄。額珠量可入石容。慧燈油須萬盆炙。此地秦皇灑船處。相傳下銷海眼碧。宣和異僧思發誓願。奇觀遂叛頑人頑。想見懸空施斧椎。剗剛功深歲月積。妙讚猶傳甄生句。甯宋瓊德巧塑不數楊惠躋。我來瞻禮一調笑。龐然其大究何益。倘灌醜酬須萬斛。若製袈裟要千帛。持履歸難寸步移。乘杯渡恐連頂滅。甯復手作兜羅對。安有毫泐琉璃白。徒負擎天拄地形。欲以皮相誇雄傑。得無選佛亦貌取。因將以此爲巨孽。每於巖引處賣弄家貨。實亦由

陽朔山

昔聞陽朔山。自非打人臂。綻齒折不得見。我今卻因典郡來。看盡峯巒勢詭變。扶輿氣入南條漸。崑崙瘦出青巒。一片皮。不裏骨。石岩巒。舌可入喉。穴漏穿。去聲。蒼根拔地起突兀。削鐵孤撐絕旁緣。去聲。或如覩女擁高髻。或如武夫載峨弁。或倏而立。忽拗項。或儂而走。又仰面。或翹駢拇。岐有枝。或露鬚頂。禿無鬚。峰岬或負蟲。屬碑。空嵌或鎖支。邪鍊。直或哮虎尾。能豎。曲或怒牛角。堪戰。上豐下銳。或卓錫。節斷身連。或累顛。背形想各有名字。不暇一詢。土謔。但覺無數青螺螭。撒來倒插江岸徧。又疑機括發地弩。仰空激射千枝萬枝箭。惜哉劍南樵客。井西道人俱未到。誰寫奇峭入素絹。齒爲世眼無定準。憎者詆謔愛者羨。談不容口。楊侍郎。除官南來詫榮選。或言兩頭之蛇。千仞翼。一錢不值人所賤。我爲平心主公論。銖兩默較嚴最殿。遺籍殊少雅人致。刻削亦類高士癖。石不能言。應點頭。真面匡廬乃全現。

過昭平峽

順流方駛忽艤舟。云有急峽在下頭。經旬積雨今幸霽。肯聽柁師輕逗遛。一鞭驅之速技杙。岸上人呼開不得。開不得。已難繫。渴驥奔泉脫銜轡。忽然入峽勢迫速。萬疊盤渦滿江沸。水如強弩將柁送。石似怒牙向船伺。千丈深。有蛟龍。饑一綫窄。防劍矛利。至此憚然始懼色。上不到天下無地。坡公已駭無射鐘。幼安并愁不冠廟。渾脫水帶那及儲。急取朱書神禹字。渡水者以朱書禹字在手。見鈞磯立談。五石漫思大瓠浮。一壺安得中流備。手持艫門三尺板。設有不測惟此倚。斯須出峽波稍平。柁師酌酒來壓驚。官是未經風浪惡。勸官遇險勿遑程。噫嘻乎。人生用壯信易敗。書紳謹誌瀧吏話。忠臣雖有叱馭時。孝子須念臨深戒。

樹海歌

自下雷州至雲南開化府。凡與交趾連界處。八百里皆大箐。望之如海。爰作歌紀之。

洪荒距今幾萬載。人間尙有草昧在。我行遠到交趾邊。放眼忽驚看樹海。山深谷邃無田疇。人烟斷絕林木稠。禹

刊益焚所不到。剩作叢箐森遐陬。托根石罅瘠且鈍。十年猶難長一寸。徑皆盈丈高百尋。此功豈可歲月論。始知生自盤古初。漢柏秦松猶覺嫩。支離天矯非一形。爾雅箋疏無其名。肩排枝不得旁出。株株擠作長身撐。大都瘦硬榦如鐵。斧劈不入其聲鏗。蒼髯蝟磔烈霜殺。老鱗虬蛻雄雷轟。五層之樓七層塔。但得半截堪爲楹。惜哉路險運難出。僅與社樑同全生。亦有年深自枯死。白骨僵立將成精。文梓爲牛楓變叟。空山白晝百怪驚。綠蔭連天密無縫。那辨喬峯與深洞。但見高低千百層。併作一片碧雲凍。有時風撼萬葉翻。恍惚諸山爪甲動。我行萬里半天下。中原尺土皆耕稼。到此奇觀得未曾。榆塞鄧林詎足亞。鄧尉香雪黃山雲。猶以海名巧相借。況茲蒼騎徑千里。何啻澎湃重溟瀉。怒籟吼作崩濤鳴。濃翠湧成碧浪駕。忽移渤澥到山前。此事直教髡衍詫。乘籃便抵泛舟行。支筇略比刺篙射。歸田他日得雄詩。說與吳儂望洋怕。

響水塘

深山鏗鏜殷雷鼓。人馬不敢獨行踞。不知聲從何處來。但見晴天灑白雨。天下瀑布皆下垂。茲獨仰歎向穹宇。建瓴萬斛方急落。有石觸之怒於虎。轟然騰出三百尺。響雷萬矢發地弩。潭疑神龍下取水。倒捲江湖滿空吐。小者如珠大如雹。激射寧煩桔槔屏。濕氣瀟瀟似烟濛濛。碎沫濺成霧縷縷。力殺去聲乃漸斜飛下。忽又拗作迴波舞。有時天風來戛之。飄過隔峯點三五。噫嘻乎。誰將珠玉唾九天。亂落星河日卓午。人間乃有過頹水。水經狹陋弗及譜。不因于役走遐荒。奇景何由快目睹。

娘娘叫狗山上有廟。壘一老姥。又鑄銅犬于旁。

蒼松參天山拔地。孤雲一握崇祠倚。中有仙姥跌坐深。黃耳鑄銅案旁侍。相傳武侯昔南征。夜迷失道絕探偵。忽聞此姥一呼犬。尋聲得路始度兵。茲事史策軼不睹。像設莊嚴非無故。宛如獨母撫鴿倉。莫疑帝女偶瓠瓠。獨思公也真天人。綸巾羽扇將略神。削木能爲牛馬運。壘石便作蛇鳥屯。天南孟獲小醜耳。謀非仲達勇豈惇。渡壚來宜唾手取。無煩搏兔全力振。擒之縱之弄股掌。何異兒戲軍棘門。豈知當日寶勞瘁。手提孤軍入荒昧。卽此徬徨

覓路時。想見深宵不能寐。照夜安得流螢光。識途已窮老馬智。陰陵或慮漢卒圍。荒谷行愁楚將縉。若非此嫗爲導引。何異紙落困危地。功成千古傳笑談。局中之人幾心悻。乃知古來立事功。未有不出危苦中。十倍之才尙艱阻。何況人本非英雄。我來懷古鞭梢控。恰值征蠻兵事動。從軍敢歎身獨勞。料敵端資策能中。陰符不望驪母傳。方物終期旅葵貢。

易羅池在永昌九龍山下。池有珍珠泉。甚甘。

我家住近九龍山。第二泉名播人寰。萬里吟鞭到金齒。誰知山名適相似。山下亦有泉涓涓。風味依稀比甘美。方塘半畝。甃四隅。塘底迸出瑟瑟珠。斜飛直灑千萬顆。碎若泡沫無根株。水底安得風捲入。有時晃漾偏縈紆。輕圓粒粒手可捉。將到波面忽又無。是誰倒插花數盞。應有地軸轉輪轆。不然驪龍睡其下。領中百琲隨噲呼。可憐游魚尾直豎。爲吸水根皆俯趨。乃知山空乳滿腹。晝夜不斷流清腴。龍泉之亭跨其上。虛窗不用畫紙糊。亭前琉璃三百畝。泉所流出匯作湖。長隄未栽綠楊柳。碧浪已長青菰蒲。迷離烟雨倏迴合。彷彿一幅江都圖。我來幕府參戎務。官比馬曹聊備數。偶然投罇出城來。拄笏看山輒日暮。閒揀旗槍滄苔嘗。齒頰清芬似甘露。陸羽茶經愧未編。贊皇水遞愁無路。踪跡鴻泥信偶然。故鄉拋卻竹爐烟。那知絕域瀾滄外。翻試清冷一酌泉。

### 王將軍拔柵歌

王將軍真丈夫。從征緬甸常前驅。千七百里到宋寮。緬甸名。賊柵十六虎負嵎。我槍及柵不及賊。賊柵出槍偏着軀。相持三日未得便。飢鷹側腦需攫雛。元戎下令攻肉薄。萬衆牆排尙前卻。將軍是時心膽堅。挺身突出爲衆先。不我殺賊賊殺我。直騰而上呼震天。一人獨前萬人恥。多少健兒總拚死。接踵入柵捷苦風。貪殺不遑割左耳。但見片片番刀飛。頃刻染成血花紫。羣蠻有刃不及交。鈍者被砍韃者逃。乘勢遂克賊柵四。其餘悉遁惟空巢。是時元戎親督戰。目睹先登識其面。呼來帳下問姓名。飛章亟奏南薰殿。天子非常賜顏色。小校超遷十二級。擢官游擊階將軍。孔雀修翎長一尺。三軍聞之懼如雷。誰不橫戈思殲賊。我聞建德擊世雄。乘霧升塞稱奇功。又聞隋破高

麗日有肉飛仙擲。自空罕之摩雲百折上。開平采石一躍衝。如君矯捷好身手。古亦不多今豈有。君言非不畏戈鏃。朝廷公道軀甘捐。不見古來多浪死。沙場白骨誰爲憐。

鬢華山殺賊歌

征緬師回賊躡尾。扎營猶距七八里。一朝師駐鬢華嶺。賊乃近逼山半眠。此賊目中已無我。將軍見之怒如火。明晨要與賊死戰。人必帶血馬必汗。賊久識我軍令明。三吹篳篥軍啓行。我軍啓行賊亦起。接踵來搗殿後兵。詰旦仍吹三篳篥。銜枚卻伏箐林密。沸聲賊果漫山來。只道官軍去已畢。忽然一礮驚轟雷。萬衆突出山爲開。刀如旋風矢如雨。賊駭欲退身難回。乘高大呼何處走。截殺快於宰雞狗。矢無虛發輒貫胸。刀纔一揮已剝手。其有漏刃紛逃生。前人趾踏後人首。是時官軍氣益壯。賈勇疾追窮所向。殺死猶少壓死多。填滿山溝一千丈。噫嘻乎。人間戰功有如此。數典古來誰可比。鏖射鷹涓古樹下。生擒乞術二殺裏。蓋爾緬酋力幾何。改復戴頭來送死。二詩白精神百倍。正如史家敘延平昆陽之戰。千載下猶有生氣。慷慨。

高黎貢山歌

巨靈開荒劃世界。奇山驅出中原外。聽他豪詎蠻嶽中。負地掀天逞雄怪。高黎貢山踞江畔。萬勿辱顏插穹漢。我行起趁雞初啼。行至日午山未半。回視飛鳥但見背。俯瞰衆峯已在左。雲經烈日晒不消。瀑作怒雷吼不斷。每一層冷一層爽。夾衣旋把重裘換。無端嵐氣蒸蘊隆。幻出白霧粥面漣。手伸十指看不見。何許厚騎將眼封。少焉罡風來一掃。了了仍露青芙蓉。五十三叅更難上。山上地名。線路盤旋旋繞。榛莽面真對壁何所叅。頭恐觸天不敢仰。危崖石裂藤絡蟻。老樹皮皴虎磨瘡。有時栖鵲戛長嘯。是處啼猿發哀響。自非人馬結隊行。黃青亦怯獨來往。何哉設險有此形。得非天以限邊度。豈知氣運有開闢。形勝不得相闕扃。至今漸成康莊坦。早有結屋層椒青。層椒青。白日西下。借問下山尙三舍。解鞍且就茅店眠。驚看繁星比瓜大。奇境。待雲捲來關生面。枚。

夜行大箐中記所見



月黑山深路顛頓。瘴霧鬱蒸胸膈悶。暗籌陰森不知里。馬上凌兢不敢困。怪鷄聲如鬼叫號。山魃影與人揖遜。忽然一陣腥風來。萬木齊哮作霹靂。腰間撫劍聊自壯。背已汗流短衣褪。平明出尋旅店餐。虎爪攫門深數寸。

同璞函游杜鵑園作歌

騰越之花多杜鵑。杜鵑園更花駢闐。我來戎幕暫無事。況有勝友同流連。相邀聯騎看花去。城東十里地最偏。沿池環列十萬樹。無一雜樹參其間。低昂相映出浩態。爛熳不怕春風顛。竊紅濃紫色不一。淺深乃有六十餘種。相爭妍。不暇細分別。一一索笑嬌。但覺花光高出花頭四五尺。照人不覺紅兩顴。滿園豔彩晃不定。乃在無花之處。烘雲烟。此卽徐熙妙手亦難寫。蘸筆徒費胭脂錢。一隊吳娃肉陣擁。三千隋女錦纓牽。笑他空谷佳人渺獨立。未免寒餓空嬋娟。天寒倚翠袖。何似袞衣炫服相新鮮。不意絕徼中。有此巨觀觀茲園。若量移得占中土地一阡。何減鄧尉之梅雪成海。武陵之桃花爲源。我爲作歌使之傳。毋令長此埋沒南荒天。

路南州食雞蹤

頻年蓐食增減甯。牛吼飢腸苦難療。平夏偶然得蘆菔。已饜脣猩與胎豹。一朝幕府謝事歸。忽逢猥人擔上懸。蕨蕪非草非木非果實。兜羅綿軟脂肪肥。問名曰雞蹤。可食不能飛。呼童買得來。叩茅店扉。豈暇接取廚娘竿。嘗試方法。亦未飭下門生蟹糖議。是非澆之井華水。和以煮蒼豨。斯須來入老饜口。老饜驚歎得未有。異哉此雞是何族。無骨乃有皮。無血乃有肉。鮮於錦雉膏。腴於綿雀腹。只有嬰兒膚比嫩。轉覺妃子乳猶俗。此豈菜肚老人所敢望。欲傲東坡羹糝玉。若使官膳日具雙。不愛家禽愛野藪。我昔曾讀昌黎樹雞篇。只疑雞鳴上樹顛。今朝始得餐芳鮮。試爲徵厥類。大者如蓋小者錢。或產於石或於土。或於荏竹松杉邊。狀如鳥者曰禽芝。食之可活數百年。得非仙之人兮。憐我久憔悴。錫我上藥壽命延。然而滇中瘴所起。生押不蘆毒無比。今我所食母乃是一笑姑聽之。古人有言。縱食河鮑值一死。憶惜驅馬走塞上。曾獲銀盤麝菇大如掌。何意蠻徼從軍還。復此雋味得欣賞。天南地北兩奇珍。不是塵勞安得熊魚坐兼享。獨憐十載走長途。似爲口腹營區區。他年歸作櫻筍會。好滌山中紅竹

菇。

士歌

春三月墟場好。蠻女紅妝趁墟。長裙闊袖結束新。不賭弓鞵三寸小。誰家年少來唱歌。不必與儂是中表。但看耶面似桃花。耶唱儂酬歌不了。一聲聲帶柔情流。輕如游絲向空裏。有時被風忽吹斷。曳過前山又嬈嬈。可憐歌闋臉波橫。與耶相約月華皎。曲調多言紅豆思。風光罕賦青梅標。世間真有無礙禪。似入華胥夢縹緲。始知禮法本後起。懷葛之民固未曉。君不見。雙雙粉蝶作對飛。也無媒妁訂蘿蒿。

元祐黨碑在桂林者今尙存沈魯堂太守搨一本見示援筆作歌

崇甯四年二月吉。臣京奉敕書黨籍。首編元祐結元符。所在郡司咸勒石。大書深刻何煌煌。執政待制分班行。聿從章相初定案。七十人已濫觴。子瞻儋州子由雷。分地各就名偏旁。茲更增列三百九。直空人國無留良。歿者追奪生者竄。并禁子孫仕朝堂。兼有會持詔述議。亦得附驥分餘光。問胡作此一網計。衆正登朝我將棄。遂甘鑄鐵錯竟成。肯令死灰復重熾。剪除異己期必盡。威福橫行乃無忌。太師原是一鷹鷂。錢氏私誌。見謬托左元仙伯位。林靈素謂京為左元仙。龍腦烟浮別院香。京焚香從別室。燒命賤行廚味。京好食鷄。夢鷄乞比鄰。女知避名諱。見燕閒常談。知京。天子姻家親賜醉。見太清樓。回視南遷諸黨人。瘴雨蠻烟葬無地。窮荒僦屋方坐愁。相府歌鐘正得意。豈知公道昭日星。錮之愈力名愈馨。朝端枉矜九州鼎。蔡確等鑄鼎。列司馬光誦千佛經。黨碑刻兩子監。有人題曰千佛名經。見朱弁曲洧舊聞。磨礱貞石妙鑄刻。翻似爲作功德銘。嗚呼。權奸所爭亦細故。祇此目前富貴具。庸知數十年榮華。不過蜉蝣一旦暮。何苦抵死讐正人。徒供千載嬉笑怒。冰山他日沉崩摧。白頭也赴長沙路。桃花三樹詔勒回。京安慕容邢武氏三人隨南行。有旨追取。以金人指索也。見王明清揮麈錄。東明佛燈黑如霧。京死於長沙東明。一椽投荒作逐臣。剩比諸賢多臭腐。相傳星變已毀碑。此碑何以完無虧。想因桂管地僻左。深巖無人施斧椎。碑陰不鐫刻工某。毋乃亦是安民爲。沈侯好古搨一紙。鐵畫銀鈎擅絕技。一點金鋒雖兆亂。京書玉清宮額。玉字一點極險。京書玉清宮額。玉字一點極險。有道士曰。此點乃金筆。

而聲絕。見臨池功深特秀筆。惜哉若亦作清流。故自不減蘇黃米。用書不下數十種。毫無補綴痕跡。老學菴筆記。

李郎曲

李郎昔在長安見。高館張燈文酒醺。烏雲斜縮出場來。滿堂動色驚絕艷。得郎一盼眼波留。千人萬人共生羨。人方愛看郎顏紅。郎亦看人廣座中。一个狀元猶未遇。秋觀時為舍人。被郎瞥睹識英雄。每當舞散歌闌後。來伴書幃琢句工。畢卓瓮頭扶醉起。鄂君被底把香烘。但申嚙臂盟言切。并解纏頭旅食供。明年對策金門射。果然榜發魁天下。從此雞鳴內助功。不屬中閨屬外舍。五花官誥合移封。郎不言勞轉謙謝。專恩肯作鄭櫻桃。儘許後房多粉黛。狀元官貴擁高牙。匹馬相從萬里賒。為聽甘涼邊曲好。相從泉閣官舍。當筵政學撥琵琶。主人酬贈千金臺。幸容莊嚴七寶車。送上雲程心事了。忽傷老大苦思家。思家位與東君別。歸到姑蘇百花宅。舊時同伴見資多。誰不咨嗟眼光赤。豈知遊興猶未已。盡倒囊金買瑤碧。捆載巾箱過嶺來。昔是玉人今玉客。時服玉玩至粵。謁僕恰趁放衙早。不覺相迎屣為倒。通詞會記托微波。欲卸仍離郎太狡。往日挑琴未目成。今朝擁轍偏人老。西子重逢范大夫。非復當時浣紗好。成陰樹已感司勳。轆釜聲兼記邱嫂。迴憶華年澹泊遭。編衷那禁私相惱。生平不喫懶殘殘。偏是人間禁鬱難。初日杲蓮雖已褪。晚風緒柳尙堪攀。樽前軟語聊調笑。李下何妨一整冠。絕世風情。枚。

石蟹

客來貽我兩郭索。石質天成不雕鑿。拳丁入跪臍雙尖。滿堂動色海物錯。堆盤正擬左手持。忽覺硜硜齒難嚼。雙鬢執銳尙如衛。一殼成匡不可斲。空煩門生議糖錫。枉勞饕子費糠粕。可憐彭越真壯士。死骨千年猶峯嶸。斂盡橫行萬里心。化作一卷堅石魄。相傳產自崖州濱。寒沙所生本軟弱。出水則死不移晷。得風而硬已非昨。薦來鑄杓難淪羹。劑以刀圭堪入藥。能令昏目清障翳。兼療熱瘡去煩灼。蟹圖十二且未載。縱讀爾雅詎云博。始知化工固奇詭。繁夥未可臆見度。木浮乃有沉香堅。石沉乃有浮磬薄。食鐵之獸吐火雞。化蟹者雉變蛤雀。繁茲變幻何足異。水土陰凝成磊落。陋儒少見每多怪。說與但增心膽慄。毋怪片臍過函關。懸之戶楣可愈瘡。

端溪

扁舟晚泊鈴峽口。閒訪端溪古石藪。前邨呼取老石工。爲余指點述縷縷。是山到處有硯材。文殊宣德皆凡胎。屏風背下穴三尺。乃是水巖宋所開。其中東洞勝西洞。洞內又分三層縫。上層窟燥下層腐。尤以中層爲貴重。雲氣水氣入石濡。石亦化作雲水腴。切以鸚鵡刀一片。磨以蚌蛇砂幾銖。嫩於三歲嬰兒膚。手一握之汗若酥。殺墨乃如磁吸鐵。研磨無聲雲自敷。數日不散光黯黯。宿墨一洗仍了無。斯爲品中最上上。鵲斑鴉眼鴛皮相。青花隱約差可憑。火捺有無不足尙。近來此坑亦漸空。非有大力難施功。澗水先費千人力。入竇要瘦七尺躬。燃燈在臍仰面鑿。一卷艱與尺璧同。我聞其言一笑哂。此州官場物力夥。何不結此翰墨緣。洞天割取紫雲朵。雖殊包老投石沉清冷。差比鬱林歸裝歷磊砢。

柳州

我聞吳中桑民懌。得官不赴柳州城。謂昔子厚擅其地。去恐掩卻前人名。斯言抑何過自譽。毋乃蚍蜉撼大樹。昔者東坡到嶺南。未聞潮州祧韓愈。將毋自揣實不如。翻作大言高自畧。名士取名非一端。鉤奇弔詭多用權。遙望古人已不朽。附之者傳攻亦傳。郭象註莊固同久。劉幾糾史亦並懸。桑生用意蓋在是。乃詭不欲厄兩賢。後來文苑爲立傳。竟因斯語特著篇。此正文人狡獪處。被我說破不直錢。快語。

古州諸葛營

我昔從軍走滇徼。所至俱有武侯迹。爛滄西去到木邦。遺壘爭傳丞相壁。永昌及木邦。俱有諸葛營。今來入黔首古州。又有營名表公額。夷攻當年用兵地。木鹿都魯極西磧。距此奚啻六千里。中有千山萬山隔。五月渡瀘七月平。統計出師日纔百。兵縱神速倍道馳。亦豈能來樹營柵。想是擒縱威聲在。一時羣蠻盡辟易。地中鼓角皆雷霆。山頭草木總戈戟。遂疑處處有公到。如水行地初不擇。英雄作事以氣勝。力所未至光已射。一方戰定各部讐。數月功成五古赫。經過我亦一儒生。懷古真慚軀七尺。

借補山崧霞遊雪崖洞甲秀樓諸勝

人生衣不過帛一束。食不能粟一斗。何苦出亦愁。入亦愁。身比鼠穴銜筭數。不如逢場且作戲。得錢便沽酒。今朝風日佳。發興自良友。提刑司。清枷杻。衡文堂。掃秕垢。相邀出城遊。屏卻騎從吼。或疑陌上逢三叟。或疑中散出街走。俄到雪崖洞。石竅嵌空誰所剖。穹窿笠覆竊。透漏孔穿竊。鑄鏡古佛好身手。迦葉應真相左右。斜通一罅開罅窾。燧而入坎似納牖。生平傲不肯折腰。屈使由竇也俯首。獨思單椒秀澤徧天下。何限玲瓏洞壑仙靈守。茲崖奚啻一培塿。特以近都會。名轉噪人口。足悟遇合偶不偶。一笑下山去。門前水清瀏。暑月應有紅芙蓉。春風猶未綠楊柳。沿溪隄。度林藪。又見危樓高。轟然靈光壽。其旁長橋如飲虹。其下淺水不涸狗。傑構突兀中流中。欄楯詰曲百尺陡。蠻荒本無秀可甲。不得不推此巨拇。前有鐵柱丈八九。記平苗功筆如帚。可憐幕府開疆印懸肘。至今祁連冢已競薪樵。何況壁間題名人。妄冀翰墨垂永久。噫嘻乎。事功莫移愚公山。著述姑付揚子瓿。君看汗牛著述汗馬勲。孰是人間真不朽。豈若朝彈絲。暮擊缶。縱浪大化間。清福且消受。山僧頗解事。邀我香積具瀟滂。盧同七碗餘。滔于二參後。耳熱歌呼到日西。歸來滿城燈火猶熒煌。上元後。灞陵醉尉不敢呵誰某。真成樂土樂。脫盡官場俗窳白。試問犵鳥蠻花天。千年以來曾有此舉否。

關索插槍巖歌

萬勿危崖拔地起。磴道盤空有遺壘。土人相呼關索巖。云是漢前將軍子。曾從諸葛征南來。丈入鐵槍插於此。我讀蜀志典可徵。髯翁二子平與興。此外不聞更誰某。毋乃荒誕未足憑。然而瀟黔萬里境。到處俱有索名嶺。若果子虛無是公。安得威聲至今永。當年壯繆心安劉。胸中浩氣橫九州。一門忠孝出天性。厥子亦定賢豪流。渡瀘深入不毛地。將種應爲丞相倚。斷頭掉尾紛猥苗。蠱毒蛇氛叢瘴癘。想見前驅摧陷力。生闢鬼鄉作人世。嵯峨翠壁高摩天。一槍留鎮何機權。豈同射石箭沒羽。或比刺山劍出泉。要以神奇響蠻俗。如鐵柱殺蛟龍涎。君不見。武鄉擒縱用心苦。亦假威靈靖南土。深崖往往貯金甲。貴陽有諸葛。荒村處處鑿銅鼓。蠻村多銅鼓。云諸葛鼓也。皆不知此物究

何用千載羣蠻舌猶吐。可知一枝綠沉槍。直抵長坂蛇矛萬人阻。我來跋馬蒼山根。陰風颯颯寒荆榛。欲求故蹟已罕有。偏覺英采垂千春。年深世遠不消蝕。此豈得謂無其人。嗚呼。書生論古勿泥古。未必傳聞皆僞史。策真句。千古名理。一語破的。侯泰。

白雲山羅永菴相傳爲明惠帝遜跡之所

白雲山上羅永菴。傳有明帝棲遜龕。考之前史帝朝火。安得遺跡留西南。稗官雖傳老佛返。譏者輒謂無稽談。我思金川事倉猝。母后未返宮已燬。當時死生究誰識。鬼門何必無逃驂。出尸七日葬以禮。特掩耳目欺愚憨。既命胡濙訪遺囑。復遣鄭監踰瓊儋。長陵亦疑帝尙在。何況天下思還簪。所以從亡致身錄。多摭軼事勒秘函。東湖樵夫補鍋匠。荒天野哭辭詰諫。亡國非以無道失。此意率土同悲念。人心未死卽帝在。焉知不雍爲瞿曇。皇覺寺中舊衣鉢。一脈正宜冢嗣擔。革除距今四百載。茲菴不朽猶精藍。想見師徒卓錫到。曾攜紅篋度牒三。新蒲綠時感懷切。菜根青處歌聲酣。獨嫌附會轉失寶。洞號流米泉湧甘。菴後有流米洞。相傳有米流出。供帝饗。前有必流汲。與王或有百靈護。泥馬著鞭蛇斬罈。遜荒久已時命去。空山魑魅甯朝參。當是遺民切哀慕。故神其說資窮探。我來弔古白日暮。羣鳥聲正啼烟嵐。相傳帝題菴中詩。惟有羣鳥早晚

將至朗州作

滇黔天爲山所械。萬山圍在青天外。今朝眼界豁然開。出得山來天始大。經年坐守深山幽。豈知山乃盡朗州。萬山送我卻私笑。此人去竟不回頭。獨嫌山盡水復壯。前途又狎稽天浪。洞庭湖闊漢江深。一葉扁舟兩枝槳。已徧天南萬里行。歸途翻更切心旌。山平水軟江南路。屈指還須一月程。

甘將軍廟神鴉歌

江行曉過富池鎮。片片亂鴉迎作陣。拂浪如偕畫鷁翔。乘鸞欲共相鳥進。榜人搏飯投向空。饑口啞啞大逾寸。高低接食百不失。眼疾機靈第轉瞬。有時旣飽坐橋竿。恰似倦旅便船趁。傳是甘將軍廟中。遣來相助蒲颯迅。將軍

生平勇絕倫。雄姿颯爽生威神。燕領自能飛食肉。鷹揚豈屑飢附人。由來英鷲氣不散。故應化爲健翮凌秋旻。獨是當日所部未有鴟兒軍。既不聞雁子都以鳥紀。又不聞黑雲隊以色分。胡爲身後統領萬鳥喙。直欲角勝水師鵝鷁羣。或云將軍賤時好劫掠。負旣帶鈴人被虐。草竊幾同孫白雞。陸梁不減趙青雀。卽今毋乃故智存。猶布黨羽恣吞攫。繫余只貧歸路遄。朝來正值南風顛。長年驚喜謂神佑。船頭瀝酒焚紙錢。老夫快聽帆獵獵。也學低頭拜杜鵑。

蠟磯靈澤夫人廟

危磯俯插滄江水。一片貞魂招不起。相傳魚復凶問來。玉骨冰肌此中死。夫人生長吳宮中。剛猛綽有諸兄風。侍婢執刀墜懷懷。幾笑大耳非英雄。歸甯手自抱阿斗。亦見異母恩勤厚。獨疑章武建號時。何不迎回冊佳偶。伉儷殊無故劍情。劉瑁寡妻翻作后。得非房闈餘威在。猶恐變故生腋肘。武侯云。主公在公安。近處孫夫人變生肘腋。我讀蜀志搜異聞。沉淵軼事無明文。要知夫人性英烈。自有一死留清芬。獠亭師敗聞應悸。沉堪更灑崩城淚。生不能歸蜀道難。此水猶從巴峽至。或者游魂可逆流。欲問永安宮裏事。杜鵑啼罷血紛紛。白帝城高國土分。一椽望夫身殉處。可憐悲更甚湘君。空江烟雨迷離合。還似蒼梧日暮雲。一聲河滿。江空月明。德麟。

燕湖鐵畫歌

畫家寫生尙沒骨。專以柔媚矜技絕。是誰巧匠能翻新。不用胭脂轉用鐵。堅鑲入煨無礪砂。鉗出爐燄紅于霞。陰陽之炭文武火。恍疑地窖烘唐花。梅根嶮奇松節硬。故宜鏤錐摹槎枒。其餘或拗風枝颯。或抽露葉垂橫斜。或魚魚游燕燕舞。當空鱗介紛盤拏。襯以素縠影浮動。映以絳蠟光交加。燈之屏之挂虛室。使我四壁生妍華。何哉頑鐵本粗醜。乃令作繪替丹黝。得非點鐵指。嚼鐵口。否則卷舒鐵鈎手。鍊得錚錚一寸剛。化爲繞指軟如柳。廣平不以勁直稱。魏徵轉因嫵媚取。揉堅接銳出麗藻。笑他磨杵爲針硯。成曰。鑄鼎象物古所珍。未有此法傳後人。我聞畫竹須用玉鈎鎖。畫山最要丁頭皴。想是良工於此得妙悟。遂以鐵筆來傳神。丹青無光卷軸掩。論價貴值雙鳥

銀。從來一技精能名可擅。沈錫張銅李昭扇。以鐵作畫尤未聞。特爲藝苑開生面。何不鐫取工姓名。流傳磨過千年絹。

### 七言古二

#### 虎邱寺玉蘭樹歌

蒼山變作白頭坐。訝許夜來春雪大。豈知中有逆風香。一樹琪花開萬個。槎枒老幹老不死。幻出蛟虬半空臥。千霄欲闕星榆高。拔地應強澗松挫。千步長廊圍不住。搜出簷頭勢掀簸。幸渠占天不占地。不然將塞古寺破。是時花光正爛熳。瓊盞銀盤炫奇貨。似入蕊珠宮。幾重。豈移羣玉峯一座。素華迥耀滿山明。落葉堪飮萬夫餒。根定千人石盡蟠。芬真七里塘俱播。翻疑列真此開筵。玉屑霏成九天唾。十丈蓮漫昌黎誇。千年桃枉方朔賀。噫嘻乎。世間縱有豫章材。多在深崖路坎坷。茲獨生長人海中。萬古能逃斧斤剗。得非身本紫玉魂。常有百靈爲遮邏。閱盡遊人珠翠粧。伴他池內鐘魚課。我來摩挲特矜寵。捫筆題詩少人和。笑比岳陽老樹精。可識回仙朗吟過。

#### 戲爲疊字體寄邵耐亭

憶昔與君初結交。儼直薇垣情最密。地豈頭廳隔二廳。班非隻日間雙日。每尋伯雅季雅酣。共訪大酉小酉逸。今雨不來舊雨來。朝霞不出暮霞出。西晉東晉辨書法。初唐晚唐究詩律。消寒欲過燕九九。催花擬喚殷七七。人笑負璧趨邛邛。我比連珠綴瑟瑟。無端居者送行者。看也掉頭歸著述。北戶之北南斗南。我獨揮鞭馭頻叱。柳柳州所謫居地。文文山昔戰敗駟。山號鴉飛飛不到。峯名鬼哭哭無歇。龍苗狗苗狀可噴。烏蠻白蠻語難詰。騎驢甚或覓驢忙。得馬又疑失馬吉。木偶漂逢土偶嘲。越人瘠豈秦人恤。此時君正北牕臥。名花滿庭書滿室。在家人作出家僧。一頃田栽半頃秫。右挂右丞畫一幅。左列左司詩數帙。逃禪非想入非非。談藝乙端抽乙乙。亦元亦史亦風騷。不履不衫不巾櫛。笑我山上又山多。長在夢中把夢說。如今我也返江村。與君相近肯相失。擬泛長亭短亭舟。



來從上山下山屐。某邱某水同釣遊。誰主誰賓旅肴核。本無翻手覆手嫌。何須白眼青眼別。公是公非訂弟兄。徐行疾行攜子姪。異酣百罰酒百杯。賦就一字縑一匹。留與江鄉作佳話。二老風流會真率。偶然游戲。遂創千

### 曉仙謠

街鼓三更人語歇。露華無聲冷透骨。野狐變人形未全。頭戴觸體學拜月。煉成七七四十九。脫落皮毛好姿首。黠犬縱識他元身。也畏神通不開口。金闕寥陽彩雲碧。公然混入羣仙籍。羣仙亦復愧不如。紫府清班推首席。身傍璇霄得地高。警效一聲飛霹靂。雙爐前引兩青童。五百鐵額避下風。旁人莫笑出非類。此亦曾經用苦功。李長吉可解處作奇語。人不能學。此卻從可解處作奇語。人亦不能學。兩人才分。未知孰優。按。

### 讀書苦忘以詩自勸

東坡壯歲在貢院。晝與同官恣喧瀆。暮燃寸燭閣卷多。一覽輒了數百幅。晚年北歸過贛州。對客頽然亦睡熟。晦翁少與伯恭學。有多目星夜受蹴。研磨到曉益神王。伯恭既醒大歎服。後來此物竟辭去。每夕亦須脇席宿。由來老境潛逼人。恰如惡客來不速。伊余自昔愛篇籍。常恨無資積滿簾。幾誤南華作僻書。偶得論衡矜秘讀。仕宦歸來力稍餘。插架新收三萬軸。嚴譟猶思限等身。健忘已歎虛過目。分明何處似相見。一斷機絲渺難續。剪紙漫費巫陽招。升屋空期臯某復。乃知茲事亦關命。貧慕膏粱富厭肉。昔時能讀苦無書。今日有書苦難讀。整挺牙籤奈老何。光陰漸少書正多。君謨愛茗不能飲。但滄香泉玩綠波。

### 疽發於背醫來以刀割治作詩誌痛

百病伺衰來侮我。始知身老無一可。眼昏齒豁且勿論。七尺頑軀結果腐。初謂癰疥不足憂。旋復墳起如贅疣。脹疑欲化馬背腫。痛若被整鬣尾鉤。醫來技窮匕首見。發矓直似剗庖牛。我愁纏割身亦死。渠謂癰養病弗瘳。一刀初入淚迸落。兩刀三刀喪魂魄。可憐消瘦一枯肌。不足當拳况鋒鏑。膚革幾防鑿壁穿。肺肝直恐和盤托。幸我回頭看不見。但見奴僮也驚愕。憶昔從軍絕徽秋。金瘡常備中戈矛。卻憐今日刀銜血。不作沙場刮骨流。

與客談黔中牟珠洞之勝補記以詩

我不知混沌以前世界作何狀。可亦地在下。天在上。禽羽獸蹄人裸相。自從攬勝牟珠洞。乃知人物與今同一樣。峭壁劃然開。中有小九垓。山僧秉炬導我入。千變萬怪何奇哉。竒如門啓扉。盡如柱立礎。方如棋罌圓如鼓。蹲如狻猊伏如虎。又有釋迦古佛觀世音。手擊香象調鸚鵡。都是胚胎石潭成。畫所不到況椎斧。謂是人雕鑿。世間安得愚公與楊焉。謂是化工肖物像。物像在後此在盤古先。始知龍漢劫前舊人物。水火風輪相蕩汨。一齊鎔入鈞陶中。有不化者剩石骨。海桑陵谷變遷俱已盡。偶然留此迹不沒。龍髯軒鼎追靈鐘。詎足相提較歲月。儒生拘墟守尺寸。動云六合以外存弗論。豈識洪荒橐籥有泄處。仍在人間堪體認。由來一個陰陽爐。十二萬年前後同此模。饒他劫劫塵塵千百變。不能另樣畫葫蘆。

同蓉溪芷堂遊獅子林題壁兼寄園主同年黃雲衢侍御

維摩丈室走終日。長房縮地稱仙術。人間乃有獅子林。一畝中藏百里闔。取勢在曲不在直。命意在空不在實。選盡湖黿皺瘦透。幻出奇峯排一一。大或朱劬網上餘。小或米顛袖中出。躡蹠如見奇獸蹲。病瘧似逢老人叱。嵌空都作骷髏竅。孤特欲撐散卓筆。一簣猶嫌佔地多。寸土不留惟立骨。山蹊一線更紆迴。九曲珠穿蟻行隙。入坎途愁黑穴深。出幽磴怯鉤梯窄。上方人語下弗聞。東面客來西未覩。有時相對手可援。急起追之幾重隔。箭筈門狹棧閣危。縮本摹成僅尋尺。遂令陶輪手掌地。折盡前齒後齒展。想見匠心結撰勞。起稿或經四五易。人巧奪到天工處。能使鬼神亦護惜。數百年來幾陵谷。此獨堅完縫不裂。萬石融成一片青。寸松長到千尋碧。倪迂當日慮崩頽。作圖欲傳不朽迹。豈知園更比圖永。宛委常含一區宅。我同勝侶來登臨。橫側看奇日將夕。踏花幸有僮引途。掃徑惜無主款客。如此溪山不在家。主人太少烟霞癖。

讀陸放翁詩題後

晴霞散綺光滿空。萬馬蹴陣聲隆隆。狼藉心花怒猶熱。映入燭燄成長虹。南渡全忘復讎事。留作先生不平氣。况

兼才思十倍雄。萬斛原泉不擇地。好景當前人弗見。觸目輒歸剪裁聲。直罄造物無盡藏。不許天公稍自秘。人言翁詩太求工。先得佳句後訖功。欲與千秋鬪顏色。寧免略傳胭脂紅。要其艷質本獨絕。修飾乃益妍無窮。不然無鹽滿面粉。豈遂可列施牆中。晚年藻采更悉掠。淡掃蛾眉使人認。老望舌頭老嫗頤。拾來都與名理印。試讀渭南以後詩。八九十歲猶精進。乃知老學益勤劬。老境逾甘啖蔗如。慚余五十編詩日。纔是先生存稿初。

### 橫塘曲

畫就蛾眉上酒船。酒船泊傍綠秧田。田間耕婦船中女。相對橫塘古渡邊。倚舷人映晴波綠。歌扇裁紈衫製縠。虬髯大賈催蠶頭。鈿合成雙錦盈束。田婦從旁黯自傷。可憐赤腳踏泥漿。朝行秧馬宵呼犢。不抵清歌侑一觴。有客清吟落花片。勸渠且勿心生羨。田家荆布首如蓬。形容雖愧紅粧面。紅粧伴客酒杯前。此景也羞田婦見。但免身爲濁水泥。省被人呼倚門賤。聽我橫塘一曲歌。田家本質亦修蛾。苦甘竄笑將人媚。未必輸他所獲多。

### 長夏曝書有作

嗜書空如嗜噉蔗。書不在腹乃在架。黃梅過後日如火。曬向中庭課長夏。高函大帙充棟隆。多少精血藏此中。當其志欲垂不朽。誰肯留拙不見工。如何遙遙千載內。傳者但有數十公。其餘姓氏漸莫舉。魚鼈滅沒洪濤風。由來茲事非倖致。邾鄆敢長黃池雄。文人例有一編稿。鏗棗鉸梨紛不了。若使都傳在世間。塞破乾坤尙嫌小。少年下筆偶得意。輒思橫壓古人倒。古人拍手青雲端。大笑班門枉弄巧。關張之勇施嬌妍。何處許人學起草。到此方知願莫酬。摩挲插架轉悠悠。卻憐齒豁頭童日。還托雕蟲一卷留。

### 老柳一株腹裂二丈許而枝葉特茂詩以張之

邨南老柳老空腹。枵然大可容百斛。當胸一劈誰弄手。慘裂似剗孕婦育。是宜憔悴日就枯。胡乃參天十丈綠。臨風尙學纖腰舞。過雨還矜鬢髮沐。恰如老婦得士夫。傳粉衰顏善粧束。使我摩挲增太息。憐爾外強中已蹙。有客從旁代解嘲。此論得毋眼猶肉。五官缺一神乃全。物理由來有盈縮。臂折或拜三公榮。齒落翻享百歲福。此柳餘

卻腹雖裂。恃有頑皮。歷涼燠。叔寶正以無心肝。能向人間耐榮辱。殘軀漫比半死桐。壽相端推不材木。長條依舊垂毵髮。不許人嗤老而禿。形骸欲朽氣轉雄。一投偃希狀可掬。婆娑合喚支離叟。好與先生伴幽獨。

謁雲巖公賦呈

去年見公淮陰城。公方底績河隄平。今年謁公浙江驛。公又專膺捍海責。禮絕朝班爵上公。勤勞亦復少人同。南征北討西平後。又奏河清海晏功。兩間落落數大事。盡出一手經營中。感公念舊迎倒屣。問我家居近何以。腐儒前身是蠶魚。寢食不離文字裏。自知學海尙迷津。妄想名垂著述身。當公百戰戰強敵。我亦百戰戰古人。堪笑毛雖不自量。遂欲與公爭千春。公遇狂生亦磅礴。肯出奇篇倒行囊。虹光燭天霞滿空。掩盡熒熒萬火爨。公平幸勿再佔此。留與腐儒稍立腳。

散花曲

空中捉花究何有。老來好色惟在口。偶然闖入烟花場。肯避風流作迂叟。就中聲價推珠娘。一笑千金擅名久。知是詩人杜牧來。不惜紅顏娛白首。滿屋明燈照綺筵。風光如夢夜如年。冰絲調曲彈銀甲。羅帕求詩代錦箋。背燭暗將眉語遞。分杯更把口脂傳。笑人能有名心在。標格先高錦瑟篇。推上牙牀誰惡友。欲試阿難禪定否。豈知嚼蠟抵橫陳。往日劉伶已止酒。完璧還君繫臂紗。鬢絲禪榻感年華。一場揆管靈山會。辜負天仙爲散花。

白鬚

無鬚與有鬚。人生一界限。鬚黑到鬚白。又是一關鍵。先生從不把鏡照。自覺心情尙年少。友朋諛我方精強。妻孥慰我未耄耄。一朝偶對菱花看。不謂竟作如此貌。昔從衆黑中見白。今從衆白中見黑。雖有數莖尙帶蒼。恐亦難堅後凋色。欲學拔都染。先愁塗抹作鬼臉。欲效子由拔。擢髮難數不勝殺。不如且聽他。留伴兩鬢華。塵談助罪清。玉屑牙慧增吐豔。雪花撇來色映白。題舞撚斷詩。推白戰家。既已白之謂白矣。何必元之又元耶。羅幃縱嫌陸展。面滅燭以後。看不見。團扇或畫放翁狀。可少幾縷銀絲鬣。清晨引鏡重自看。姑妄言之作笑端。倘然出山作相去。

省服地黃蘆朮丸。

### 箕衣仙歌

箕衣仙。既非冒雨叱烏犍。又非釣雪寒江邊。脫屣妻孥住道院。氈氈茸草披兩肩。出身曾作權門吏。遣往東南禱神庇。途遇主人對簿來。三木囊頭枉擊臂。囑傳口語語夫人。東窗事犯應難避。歸來新殯已在門。乃知所遇正其魂。喟然太息輪迴理。世間冥報非空言。遂脫押衙靴笏去。箕衣一領冬夏溫。噫嘻乎。權奸當朝快誅戮。那願阿鼻有地獄。方謂陰司亦勢利。生有餘威死餘福。地下橫財尙鑄爐。情面閻羅不難熟。所以當時格天閣。垂死猶傾數十族。若無斯人親眼觀。曷使世上奸膽寒。畫師數典有深意。莫作江湖逸客看。

### 大雪戲作

蒼天高高地廓廓。誰能力使兩相拍。合成一個大冰壺。只有冬來雪花落。雪花今日何其粗。當空似被神鞭驅。凝寒所成固其理。何以片片六出俱。倘須一一雕鏤出。化工雖捷亦大愚。初疑瓊屑糝徑厚。旋訝玉蕊回枝枯。老梅亦復難自別。香來始覺與衆殊。同雲漠漠米家派。都將淡墨淡粉畫。雲耶雪耶混一團。莫辨覆盃仰孟卦。想見洪荒未闢時。雞卵中間涵沆瀣。天公毋乃太作戲。富貴驕人銀世界。老夫無物可鬪奇。白鬚相映發光怪。

### 陳灣山下大銀杏樹歌

水有長鯨陸有象。物產每多破格樣。陳灣山下一銀杏。大數十圍長百丈。霜侵雪蝕老不死。峯攬空中勢張王。不知何年托根牢。近或唐宋遠六朝。生於平地不自量。其意欲與山爭高。團團廣蔭更數畝。綠棚遮徧千僧寮。皮皴甘作鐵石醜。竅古翻似洞壑枵。探卵無驚烏夢穩。吸露易飽蟬鳴驕。樹中此亦巨無霸。俯視萬木皆兒曹。名材摧折世何限。樵斧砍伐獵火燒。輪囷何以獨無恙。或因僻在荒寒郊。倘更長養千百歲。天公亦恐觸脊腰。我來正值秋聲響。雄猛神威使人怯。戰罷西風葉落黃。有如老將脫金甲。夜半猶聞吼作濤。倒捲太湖樹頭壓。話必驚人。老杜一生被無一語落平。故。

西巖齋頭自鳴鐘分體得七古

化工豈許人捉摸。忽被巧匠偷秘鑰。宛委中含十二時。添得嘉名列編錄。形非九乳九耳垂。製豈雙夔雙螭攫。但覺莊嚴小佛龕。琢玉鏤金燦輪郭。云有靈機能發響。暮如冶金奮騰躍。按候恰與晷景符。昕夕告期了不錯。得非雞人坐其下。司旦司昏手奏樂。豈知絕不假人爲。自有噌吰出寂寞。寶刀剃尙愁無聲。寸莖撞或慮不答。茲獨繫音起腹中。似轉轆轉飢腸涸。一條金線縮鐵桌。鉅齒痕邊度岵嶠。寂靜微聞食葉蠶。盤旋默作循條蟻。忽然觸動蕤賓鐵。突出刀槍鳴歎薄。內有金聲外針影。聲影相隨若素約。捷於緹室氣飛灰。驗比鈴閣神撼索。何須景陽催曉粧。豈但楓橋驚夜泊。直從一寸關鍵中。地紐天根貫脈絡。笑他僧寺百八聲。考擊磴磴謹踐諾。神哉技乃至乎此。問是西洋鬼工作。其初攝從利瑪竇。今遍豪門炫樓閣。刻漏法本自中土。軒帝姬公幾荒度。後來摹仿制益精。渴烏吸水滴涓勺。金銅仙人金胥徒。四十八箭遞插腳。蓬公蓮葉又意造。燕肅荷茄亦手斲。倩女捧牌按時登。神將持杵應候擲。此皆震旦千載傳。海外何由窺囊籥。乃知到處有異人。聰明各把混沌鑿。先生何處購求得。位置高齋映筆格。趨朝曾記景過擲。退直或至更<sub>平</sub>。起柝卽今歸田輟待漏。猶惜分陰肯拋卻。投籤常恐就睡酣。繫鉢不怕催詩惡。有時放筆吐偉詞。鞞鞞能令四座愕。此鐘便是程書石。想見績學綜浩博。腕力健扛百斛鼎。腹筒富逾千石鑊。可許我來叩春容。蒲牢一聲震寥廓。<sub>保泰。工力完足。</sub>

西巖招同沈旣堂王夢樓兩前輩集旣堂以髻癩不能坐長跪終席戲用西巖語作詩奉粢

不以膝行以膝坐。雙趺例爲先生破。旁人不知髻無膚。只道先生謙太過。先生生平骨嶙峋。但有強項無曲身。將軍幕下長揖處。尺八腿鑄鐵作筋。胡爲歸田少拘束。足恭翻作鞠臆人。謂逢壯士按劍怒。座中若個帶櫛具。謂向老人進履恭。我輩誰是圯上公。主人解嘲言語妙。金搭繡襦論果報。童年鈍或跪讀書。君乃一目十行俱。罔政嚴或跪請咎。君家伉儷無獅吼。官卑不免跪路歧。君由翰林擁旌麾。此膝從來未被辱。故應罰支軟腳局。教他略嘗踈跼苦。始信人間有委曲。<sub>風趣橫生。辨才無礙。枚。</sub>

西巖治具全用素食以夢樓持齋故也作素食歌見示亦作一首答之并調夢樓

古人齋食但忌葷。所謂葷者乃五辛。後人誤以指腥血。葱薤羊豕遂不分。王莽素食禱秋熟。元后手詔催食肉。是知素與肉相對。西漢以來已成俗。更從佛教戒殺生。齋老公乃麪爲牲。自此世間俟佛子。必以素食表至誠。豈知素也可爲絢。又增一番烹飪精。夢樓持齋老不怠。西巖饜之去割宰。我非禪鐵亦伴食。正嫌主不燒豬待。似淵明入蓮社中。頗以無酒暗生悔。豈期下箸倍覺珍。不數豹胎猩猩脣。香菌自南磨菇北。慈必秋後筍未春。有時故仿豚魚樣。質不相混色亂真。問誰作此太狡獪。素食想倩素手人。豆粥非萍洩秘法。昔人曾把庖丁殺。肅賓賓肯帶庖來。此事殊較季倫遠。是日即用夢樓庖人。獨思澹泊本明志。咬斷菜根齒纔嚼。茹素若又鬪新奇。何不仍來決大齋。向來只道肉食鄙。肉食恐無此繁費。八百里駁一割嘗。豪氣翻借素風試。名實不稱殊反常。寒儉幻出繁華場。有如寡婦雖不嫁。偏從淡雅矜素粧。衣裁縞袂曉雪色。佩綴白璧夜月光。遊行梅花李花下。自謂守節追共姜。吾知其心未必淨。招之仍可入洞房。滿堂聞言笑噴飯。街鼓統如夜將半。老髻捫腹亦彭亨。登車不覺腰帶斷。

贈三元錢湘舲己亥解元。辛丑會元狀元。

三千年桃十丈藕。世間奇事乃竟有。滿街爭擁看三元。三元肯來訪衰朽。秀才頭上三重關。何限英雄老此間。禹門登或浪打去。神山到又風引還。至於名冠多士上。尤其是人生所不想。偶然得一已足誇。何況連屢黃金榜。歐文忠。王文恪。兩元已在握。臚唱聲中又飄落。君獨連擲得梟若捕博。國手棋無第二着。毋乃真天仙。身騎白鳳凌雲烟。三垣九閣攔不住。直到玉皇香案前。我聞奪標紫宸殿。榮過將軍奏凱宴。卻嘆三箭定天山。猶只了卻一場戰。古來惟有蘇定方。手平三國皆擒王。直至前明張英國。三征南交渠必得。君也一書生。遂與二公先後相抗衡。設令國家更有別科目。不知又領幾次雁塔名。噫嘻乎。讀書孰不望傳世。千氣萬力尙難覩。羨君占盡科名榮。一日聲華滿天地。從此不愁不千秋。祇須建豎堪相伴。累朝如君十一個。唐張又新。崔元翰。宋孫何。王會。宋元王宗哲。明商輅。事蹟半在青史留。贈君一篇三元考。更期進步百尺竿。上頭。時以所著三元考一篇奉贈。

大風從丹徒口出江至瓜洲

風向西行水東注。風水相薄乃發怒。初疑風在水面掠。旋驚風入水底吐。生大聲吼作百里雷。碎沫濺成半空霧。捲翻蛾頂亂雪堆。倒豎匡廬急瀑布。湧來突過逆上魚。蹴起打落高飛鷺。一波未平又一波。水皆壁立直不仆。江神似妬金山名。幻出銀山與相爭。想當蠱風蓄力處。徵集百靈供使令。豈惟封姨肯助勢。陽侯冰夷齊赴盟。激濤巧趨子胥憤。迴瀾弗顧河伯驚。羽檄飛催鼉令騎。符書速召龍伯兵。洞庭君分犀兕甲。樓舍人借鵝鸕營。作使水族各賈勇。推潮排浪高於城。鰕鬚蠹杆前導引。蟹螯執鉞旁橫行。負山巨鼇厚軸撼。吸川長鯨洪鐘鳴。磨牙鏗將鑿所欲。暴腮鯉且洩不平。下至白小一二寸。亦復跳躍學怪精。遂使澄江一疋練。掀天蕩日爲鏗鏘。我來正值滿江閨。萬斛龍驤莫敢動。篙師欲試十幅蒲。拚我老命作戲弄。剪江一霎三十里。奔馬脫銜不可控。鐸語斷渡悔不遵。墨色覆舟恐竟中。乘危幾愁軀骨捐。出險又覺心膽縱。擬借青天作紙張。寫出奇觀豁醜瘡。

未堂西巖松坪既堂悔菴杜村招陪松崖潛使醺集九峯園并爲湖舫之游作歌

半年不上游湖艇。爲怕出城見荒景。四月麥熟已食新。適遇佳招吾可領。巡漕使者將還京。此間地主皆多情。九峯園中大設宴。招陪折簡到老儉。九峯中有一品石。八十一竅透寒碧。傳是米顛昔所遺。其餘八峯亦奇闢。綺寮抵室交掩映。最玲瓏處集裙屐。烹鮮斫鱸炊雕胡。主人稱觴客避席。酒闌乘醉泛淥烟。去探芍藥開未開。東風一夜萬花發。到此始嘆天公才。是日輕陰半寒暖。滿湖珠翠紛往回。水學眉翠綠微皺。山分髻色青澗堆。似爲游人助清悅。襟塵一掃何快哉。嗚呼此會不易得。勝地名流兩相敵。蘭亭修禊溪陂遊。俯仰人間幾今昔。江山常新人易老。樂事轉眼卽陳迹。可少題詩記登歷。一爲歌行歌主客。

汪劍潭自汴歸見示汴中古蹟詩戲和博浪沙一首

道旁一擊若竟中。劉項紛紛俱不用。正惟瀉池壁未來。遂覺倉榘椎輕動。十日大索羅網張。兩人飄然終遠颺。此段屈伸變化處。已賽荆卿秦舞陽。一試不效身再出。子房終把蕪秦蹶。獨怪持椎狙伺人。勇于猛兕俊于鶻。何以



羣雄虎鬪時。不復起事豎突兀。將毋此亦大英雄。識幾甘避沛大風。神龍見首不見尾。去作海外虬髯公。

題春閨睡起圖

窗外一聲秦吉了。落花驚破香魂小。夢回何處續餘歡。倦坐無言繡幃悄。小鬟多事漫相猜。鏡卜瓦占翻聒擾。夢中所歷只自知。說與旁人那得曉。

醉時歌贈春農同年

春農先生我老友。武庫胸中無不有。貫穿經史羅百家。碑榜文章推巨手。江北江南四十年。乞文車馬滿門前。其門如市文如水。不擇地湧萬斛泉。昌黎諫墓金無數。皇甫酬碑絹論千。腰纏壓得鶴背重。坐令不得飛上天。有官不補主壇坫。龍門聲望青雲巔。一年一年風氣變。米價日高文日賤。貞珉讚頌錦屏詞。昔是嫁衣今棄扇。黃紙豈屑寫表送。織罽漸稀修贄見。生平手積萬卷書。飢來一字不堪噉。噫嘻乎。百足之蟲一足獸。各自得食不偏瘦。人間只有賣文錢。其技雖工計則謬。時來紙貴洛陽城。運去窗糊酒家牖。明知雞肋已無味。老矣肯改花樣繡。昨見高門去請醫。或有誌銘來相救。

題周昉背面笑人圖

髻縮烏雲斜不整。一片銷魂綠鬢影。亭亭背立碧欄杆。不見蛾眉見螭領。毋乃避人含嬌羞。復似向隅抱悲哽。當筵平視無所施。穴隙旁窺亦難省。前身豈是韓淮陰。相君背已非噲等。千呼萬喚頭不回。令人想殺姿容靚。崔微自寫卷中人。毫釐惟恐差笑鬢。延壽索錢雖不遂。未敢竟遺眼鼻唇。何哉此圖含毫邈。不着色相妙寫真。既無琵琶半遮面。又非霖霖全單身。取意乃取返照景。瞻之在後笑絕倫。昉也貌肥夙所擅。并不貌肥意太新。得非其人本不笑。別構阿堵爲傳神。君不見李夫人。病態恐使君王見。君王臨問下羅幃。轉向牀陰不露面。又不見李晉王。一日眇兮微似線。命工爲作習射圖。眼光側注雕翎箭。大都疵類好掩藏。圖中人必貌不揚。只因寢陋怕人看。翻以護短巧見長。真容安知非鹽媼。遺照轉共疑施嬙。此正畫師狡獪處。騙盡人間浪子腸。

兩臂風痺復發自春及秋瘰癧不效殆將痼疾矣

我不能挽強弓。挺長戟。奮臂軍前立勳績。尙思左持螯。右揮毫。掉臂林下遊逍遙。胡爲風痺欺我老。患起肘腋費攻討。昔年發幸瘥。今年纏不了。酸疑醞醋碎。痛甚頑石擣。屈伸僅餘腕。可運轉旋難。與項俱拗。有衣不能披。如兒待人褓。背癢不能搔。想殺麻姑爪。曲肱尋樂翻苦辛。張拱作禮欠端好。有時敲以女手卷。耐打李陽毒不飽。曾聞足中有鬼多。迤邐詎知手亦有鬼相掣牽。幸而罷官兩肘已無用。不然斗大金印如何懸。醫經急尋繹。灼艾煎膏俱不惜。傳藥少驗方。攻火又下策。徒成豫讓漆身癩。莫償田吳熏體灸。或言辟寒須用煖湯浴。復汲井華煮滿斛。坐使皴皮垢面一衰醜。忝充華清妃子胭脂肉。療治亦已工。依然折臂翁。由來衰至疾自攻。一葉落可知秋風。君不見。老樹原非一朝折。今歲枯幾條。明歲禿幾節。數十年始生意竭。從今且學舞支離。笑比孤桐半死時。亭亭百尺龍門上。老榦特立旁無枝。生與方橫俗。末疾豈能爲累。德麟。

贈販書施漢英

我昔初歸有餘俸。欲消永日借吟誦。汝從何處聞信來。滿載古書壓船重。我時有錢欲得書。汝時有書欲得錢。一見那愁兩乖角。乘我所急高價懸。雖然宦橐爲汝罄。插架亦滿一萬編。我今老懶罷書課。囊中錢亦無幾箇。愧汝猶認收藏家。捆載來時但空坐。

題吳並山中翰青崖放鹿圖

十年騎慣揚州鶴。花月春江殊不惡。豈知雅志深山中。要與麋鹿游寂寞。雄文早歲賦鹿鳴。領髭連摘南宮名。便當入關開路出。虎幡熊軾雙蜺旌。胡爲掉頭不肯顧。夢游天姥同遙情。一幅丹青寫胸次。青崖叱馭瑤光精。青崖迴在峯六六。中有千年雪色鹿。不掛禁園放免牌。不隨官府行春轂。只供仙人乘騎用。斯奔足過蒼麟速。君也馴之如擾龍。籬狗疇豨一例畜。解角齋池確磔聲。養茸庭草芊綿綠。有時放入碧雲去。雲深不知在何谷。夕陽西下樹影斜。呦呦仍來屋北宿。自是君身有仙骨。天與神物件幽獨。塵心已付覆蕉綠。霞想應償踏花躅。我亦遺榮慕

丹邱欲游汗漫少朋儔。搗來相遇平山下。把臂不覺意氣投。從此相隨戲壺嶠。君騎白鹿我青牛。

題范瘦生詩卷

寥陽夜半呼捉賊。秘籥元機被人竊。六丁望氣何處尋。飯顆山頭光燄徹。其中端坐瘦書生。哦詩正作蒼蠅聲。忽然攝到上方去。天神一見笑且驚。是何寒酸此么麼。非仙非鬼非妖精。孱羸手無縛雞力。造句乃與千古爭。兩間靈慧要儲蓄。留待陸續新耳目。一朝若爲汝泄盡。後世那更有芳縵。速還夢篆使腸枯。亟拔生花教筆禿。東方駭駭雞三號。一跌直下蒼霄高。依然落在飯顆頂。風露冷逼霜顛毛。

清明前二日壽菊士招同棕亭再可立堂諸公泛舟至平山堂卽事

我昔曾訪平山堂。己巳歲。小舟泛入菰蒲荒。到山欲問醉翁蹟。數間古寺支斜陽。垂老重來景非昨。山色增濃水痕

擴。紅橋南北渺風漪。處處名園互鈎絡。一株楊柳一株桃。五步樓臺十步閣。水學杭湖裏外分。山疑蜀崦東西各。

好花得地態倍如。時鳥占林聲更樂。舟行如駕半車游。到處竹籬留住腳。畫稿從誰粉本翻。匠心直運月斧斲。平

山堂子更鬱蒼。紺宇琳宮入寥廓。故物惟存榜頭字。平山堂三字隸書。向歐陽公款。其餘皆出新勦。一勺清泠第五泉。粧

成千層好巖聲。信哉繁麗推維揚。肯讓他邦誇繡錯。爲問締構起何時。庚午年間始荒度。自後踵事益增華。一度

翻新一丹牘。荒疇開出波濤衍。平地壘成峯岬嶸。古松十圍桐百尺。帶土栽來葉不落。移山欲笑愚公愚。陷河幾

同惡子惡。到此始信錢神力。直把混沌重開鑿。坐中有客唐子西。偏嫌脂粉非天姿。再可持論如此。此論未公吾不取。

趣呼麪酒罰滿卮。淡掃蛾眉鬪真艷。古來有幾號國姨。縱復天生好顏色。藍縷出見成何儀。我公踏遍西南徼。懸

崖絕巖無限奇。求一茅亭不可得。解鞍藉草坐片時。又嘗遠浮湖湘水。滄波萬頃極渺瀰。苦無村館供小憩。聊復

暫艤河之涇。豈如此間景攢簇。臨水有軒倚山屋。迴環不出十里間。盡日探幽探不足。百萬金錢粧點成。始供我

輩來遊矚。猶復雌黃議其後。毋乃處福不知福。

# 七言古四

萬安橋畔有夏將軍廟，即傳奇所稱入海投文之醉隸。夏得海也，事見明史。蔡錫傳中戲書其事於壁。堂上方呼下得海，小吏應聲某斯在，遂令費檄赴海投官，已簽名不可改。歸來先學鯨吸川，一口直欲乾渤海。黑風任墮毒龍國，白浪何須水犀鎧。正潮來處企腳眠，蹠出劉唐尺八腿。是人非人鬼非鬼，巡洋夜叉見而駭。急白鱗堂廣利王，有個糟豚可作醅。豈知明神助利涉，特作報章答守宰。乘酒而出得醅還，西月廿一址堪壘。遂成鼉梁互萬丈，雄跨蛟浦屹千載。蔡公祠旁嚴像設，易換頭銜發光彩。生爲賤隸死將軍，香火至今雲鬢鬢。始知從古成名人，總出癡歎氣不餒。

戲本所演八仙不知起於何時，按王氏續文獻通考及胡氏筆叢俱有辨論，則前明已有之。蓋演自元時也。沙溪旅館有繪圖成軸而題詩於上者，詞不雅馴，因改書數語於後。

何人學作王老志，劾召鬼神示游戲。把他多少古仙人，亂點鴛鴦集冠帔。韓湘張果呂洞賓，此外較籍無其人。由來化城本荒幻，何必捫籥求其真。天下都散蘄，竟作時代看。鐵拐無姓李，或言劉跛子。趙家外戚傳，不聞曹佾能修煉。藍衫老采和，丈夫忽變爲嬌娥。又況何姑愛酬答，偏與羣真坐聯榻。仙家想是無凡心，不妨男女相混雜。舞衣今作畫圖傳，此輩猶爲有漏禪。少年狡獪非我事，舉手自拍洪崖肩。

## 啖荔戲書

苦啖荔枝在南粵，食不知味爲忙碌。老來忽作閩南遊，天補此翁饑口福。端陽纔過初嘗新，酸澁猶教舌本縮。一日一變到圓滿，百顆堆盤紅鞞鞞。甘夫人臥絳紗中，一壁驚看白如玉。豐腴應笑只識酥，鮮潔兼令不思肉。就中一種更尤物，核小而尖誰結束。魷魚無刺蟹無甲，快事乃在佳果熟。乳軟不煩齧，齧勞蜜甜兼徹中。邊複擲根豈植沒骨山，結實偏仿虛心竹。始信人間有絕品，托酒蔗漿總凡木。楊梅幸出半月前，不與同時入市鬻。趙家姊妹

將人言。婕妤早避長門宿。龍眼在旁也狡黠。故緩登場暫退伏。玉環去後無笑人。如仙媛亦伴幽獨。只有李桃不自量。正用此時綻如穗。自恃猶思邢君爭。相形已覺與臺辱。老夫日翻君謨譜。品題直到江家綠。彈圓箏。櫛次第嘗。擬仿前賢增手錄。人情最愛側生兒。忍引鄉思頓撥觸。

同安道中遇雨

尋山阮孚自蠟屐。因人作遊本非策。我行夜過漳南道。邪許人多虎無迹。一燈遠店紅有光。千樹深林黑無隙。曉色夜色兩相迸。此段清暉最可惜。不知是烟還是海。但覺茫茫一片白。少焉日氣蒸霧來。熱逼鬚眉不可隔。方延朝爽輿。攀帷已炙午。歛衣透綵。風聲雨聲山欲坼。水帶泥流滿溝赤。直疑中有蛟龍鬪。湧出空山血盈尺。是時老夫心膽裂。本欲快遊翻受嚇。惹他旁觀笑何苦。垂老翻爲漳鄉客。

漳州木棉花懷古

快事千秋一拉脅。我爲天下殺此賊。木棉花底血流紅。血紅花紅共一色。憶昔平章正少年。夜遊燈火滿湖邊。門高戚里連宮掖。朝倚長城奠海堦。勳名蓋世誇援鄂。暗許金繒有成約。歸去翻矜卻敵功。福華一部書韜略。正當北國造基忙。留得南朝處堂樂。是時黃閣倚天開。葛嶺初暘改舊臺。五日都堂班絕席。百僚文案稟鈞裁。買田供饋邊軍費。增餼牢籠太學才。多寶閣成晨躡屐。半閒堂靜夜傳杯。威行玉帶重泉取。權劾金輿大祀回。以去要君天子拜。暫歸葬母太皇催。廿載湖山紛綺繡。不堪砲打襄陽透。圍城久絕虬蟬援。相府方酣蟋蟀鬪。事急倉皇再出師。橫江戰敗難遮覆。潰兵旗亂喚誰應。逃將舟迴呼不救。昔人會恥言和議。謂是偷安無志氣。到此翻思秦會之。乞和未必非長計。早知諾責召鄰兵。悔不盟書輸歲幣。有詔師臣誤國謀。山陰小吏正懷警。願充押伴炎方去。狹路相逢南劍州。捧詔來呼買團練。巾車去蓋無呵殿。杭歌嘲客夾途多。閩檄逐人傳帖徧。已問吳潛何故來。况堪葉李重相見。當年意氣壓公卿。今日仰看丞尉面。黯黯江清不肯投。猶恃國恩延一線。漳寺喬柯蔭碧穹。老拳於此逞英雄。雖輸王著揮椎早。已勝施全刺刃空。笑指木棉花樹下。破銅山賊有奇功。可憐此樹無端辱。長使遊

人訪遺躅。一樣投荒故相來。累儂不作萊公竹。著花亦將呼醜枝。息陰或更比惡木。風聲夜半似號冤。老樹精啼非鬼哭。

諸羅守城歌上以諸羅土民。力守孤城。特改縣名嘉義。以示獎勵。今仍舊名者。守城時會未改名也。以

諸羅城。萬賊攻。士民堅守齊効忠。邑小無城只籬落。衆志相結成垣墉。浸尋百日賊益訂。環數十里屯蟻蜂。援師三番不得進。山頭連夕惟傳烽。是時矛戟脩羅宮。陣爲天魔車。呂公賊用枋車來攻。爲砲擊碎。吼聲轟雷震岳岳。噓氣縹霧迷高穹。孤軍力支重圍中。草根樹皮枯腸充。翔飛鳥雀不敢下。恐被羅取爲朝饔。裏瘡忍餓猶折衝。壯膽寧煩蜜翁翁。百步以外不遙拒。待其十步方交鋒。一砲打成血衛衛。尺腿寸臂飛滿空。戈頭日落更夜戰。萬枝炬火連天紅。何當范甯拔耿恭。赴援艦已排黃龍。會有長風起西北。揚帆直遠滄溟東。

颶風歌

昔聞海風颶最大。我今遇之驚門廡。誰將噫氣閉土囊。一噴咽喉不可撻。鬻鬻萬鼓排陣來。羣木盡作低頭拜。鬱怒似有塊磊填。憤盈直覺虛空隘。鬼魔掀動天擺靡。虎豹吼裂山破壞。立腳雖穩尙愁倒。對面相呼只如曠。可憐鷓鴣亦不飛。恐被扛出青天外。是時習流千戰權。眼望赤嵌不得到。湧浪上薄浮空雲。濺沫橫轟發機礮。盡排鷓首椽杙牢。猶自終宵驚簸掉。風名颶母應雌風。胡爲更比雄風雄。想從少女封姨後。老作陰怪多神通。多神通。何不吹轉颶向東。不然竟刮海水竭。平步可達扶桑紅。吾當綠章上箋奏。俾爾配食天妃宮。

贈李莪州孝廉

交誼從來在生死。世間乃有真義士。贊皇出築籬邊樓。中有參謀同姓李。丰裁峭不受人憐。議論平能令公喜。一朝劇賊起隴東。殺吏攻城捷若風。書生袴褶催上馬。馬蹄血滑頭顱紅。前鋒戰敗蜂豺集。一日羽書三告急。空城孤守無一兵。賊來便可攀堞入。此時守臣惟一死。散遣賓朋盡兩泣。不會食祿爾何人。乃願同膏寶刀澁。肉將尸隄林下填。魂已鬼門關畔立。問道援師會天幸。倘緩須臾必無及。旋收殘旅哀散亡。再選新鋒嚴伍什。整軍重卜

鼻鳴牙。蹴賊漸看豕入苙。詔按封疆失律誅。檻車連夜趣追符。矢石已教同死地。髡鉗那更伴危途。夕陽亭下人揮涕。慷慨從行更高誼。一諾甘償國士知。千金笑卻通侯幣。生須寧武囊。隨死要劉濟。收骨殖。或傳漿水將加誅。或揣圓扉但頽繫。消息遺憑郭解探。艱危屢出陳平計。緩死爰書下九關。更從請室慰生存。論詩消遣彙臣寂。降氣周旋獄吏尊。早入鈴柳喧未歇。夜占貫索瘡無痕。春來秋去牕前草。曉謁宵還陌上輪。直待賜環方告別。已經四百五晨昏。義聲從此流傳遍。多少公卿求一見。我亦聞名想下風。只疑窈髻虬髯面。急裝足裹豪華鞞。奇服腰懸鹿盧劍。豈知今日一班荆。弱不勝衣大瘦生。傾座清言霏不盡。分題險韻鬪先成。衣綰蘊藉無凡格。花月留連有勝情。妾解吟詩奴識字。荻簾氣味一家清。翻怪孱軀耐驚恐。由來仁者必有勇。才工大禮賦。爭傳名到上邽門。愈重始信人間節。俛流原須出自風雅種。

軍中擒獲逆首林爽文檻送過泉紀事

木籠裝囚語啾啾。兵衛簇成片雲黑。不須露布曳長纒。夾道爭看海東賊。海東賊本一細民。豈讀兵書習部勒。半夜無端嘯廷戈。殺吏攻城血流赤。是時鼎沸雖披猖。猝起猶堪滅朝食。後先航海諸宿將。持重養威示不測。隔海調兵動幾旬。兵添一萬賊添億。孤城遂困重圍中。糠粃俱空菟屨革。倘非廟算決大舉。絕島妖氛幾時熄。卽今就縛入檻車。不過圈牢一豚膈。若論經歲軍費費。千兩黃金一兩骨。

戲筆

一卵課一雞。疋絹八百梨。驅驢索輔脊。送騾嫌跛蹄。見客吐瓜皮。取啖不嫌泥。東門受羊賣向西。馬豆作粥嘆其妻。銖積而寸累。管鑰手自稽。一朝委骨青山蹊。荒墳無人鳥自啼。

臺灣俘囚絡繹檻送內地再作凱歌

海風恬。海波闊。帆檣絡繹執俘歸。口目睚眦賊猶活。初疑海外人。琵琶之腿碌碌身。齒可嚼鐵碎。手能舒鉤伸。誰知入蒐獮。狺狺一羣犬。吳歪頭。陳弔眼。爾男伊何而徒覩。當時若早勤搜爬。咀爾不搖牙。踢爾不用靴。胡爲養成

洛姬肚大於宋公鼓。羽檄經年始就擒。已費廟謨遣龍武。嗚呼一雞何用牛刀割。不是牛刀割不得。朝端應有黑頭公。世上乃無白頭賊。

夜行曲

雞未鳴。月先墮。陰風蕭瑟滿天黑。夜迷失道踏坎坷。暗中。有鬼不露形。但閃金睛赤如火。老夫獨持正法眼。定光自放青蓮朶。天明但見塚纒纒。斷碣無名草沒髻。

武夷山

生平踏遍天南戒。一隅尙缺甌閩界。武夷欠我遊山緣。我欠武夷作詩債。天風借我便羽翰。雙鳥飛墮來崇安。正當春水發。刺篙可以泝急湍。路如螺紋旋。一曲一收觀。懸崖奇巖不可狀。畫手欲寫愁荆關。想當開闢初。天神早有無扁般。各出新意弄狡獪。運斤斯斧斲出千巉岉。幔亭峯更在天際。傳是錢鏐曾孫夜宴地。仙人亦有故鄉情。招飲山下之人萬千計。雲璈朗奏碧月清。錦幄高張彩霞麗。當時廚饌太狼藉。鳳肺麟脯屬饜到奴隸。笑他後世秩祠官。一片乾魚也供祭。勝會一散三千年。至今寂寞空雲烟。太白廬山謠。東坡羅浮篇。名山例有名人傳。茲山雖有考亭樞歌句。儒家氣象不稱上清八洞仙。老夫偶來過。或亦天假緣。笑語武夷君。倘可與君兩連翩。

李忠定公墓在福州懷安桐口大安山

靖康如用公。或免北轅辱。建炎如用公。或免南渡蹙。敵退公亦去。敵來公已逐。徒令後世悲擯棄。何補當時計。恢復有宋李忠定。有明于忠肅。皆當天地翻。力欲奠坤軸。一則言不用。身存國被蹴。一則言見從。國存身被戮。若論純臣心。豈願全軀國家覆。懷安桐口青山麓。我過荒墳瘞盈掬。生無百日立朝端。死有一坏留海曲。

樂清北境可入天台歸途不及往遊賦以解嘲

會讀興公天台賦。赤城霞起艷海表。我行永嘉途可通。便擬芒鞋往幽討。前路但問人口說。身雖未經已了了。獨思劉阮誤入時。看花遊客知多少。蕪菁裹飯獨相引。想爲兩生顏色好。仙家也復愛少年。自嘆形容已衰老。深恐



麻姑爪未搔。駘背先打鞭絲鉤。一笑迴車速歸去。任爾落紅紛不掃。

子才書來有桐鄉秀才程拱字少年美才手繪拜袁揖趙哭蔣三圖蓋子才及余并亡友心餘也自謂非三人之詩不讀可謂癖好矣書此以復子才并托轉寄程君

唐初詩人各標置。品題乃定旗亭妓。千年佳話復見今。不是女郎是佳士。蓮花如面好風姿。香草題詩艷才思。拜袁揖趙哭蔣君。手繪成圖供去聲。清闕衛軍同日進三公。敬則武夫出不意。老韓合傳縱被嘲。亮瑜並世豈須忌。得君一揖已足幸。敢望五體俱投地。我觀李杜兩大家。吹臺同遊早結契。青蓮落落賦飯顆。少陵惓惓慮魑魅。當時聲望李獨高。後世才名杜寧次。貴不可卿賤乃卿。人心何容設軒輊。獨羨隨園文字交。福比香山白居易。名先元九齊。晚更劉郎觴咏繼。遂稱元白及劉白。陽五件侶隨時異。翁昔買鄰有心餘。近復把我入林臂。前呼意蔣後袁趙。恰與醉吟同故事。舊遊已記三徑開。新知兼數一樓倚。天生詞垣兩後輩。似爲此翁助聲氣。程生作繪定可人。雅尚所存非漫戲。繡絲已肖平原俊。聞笛兼下山陽淚。三分鼎豈吾所堪。一瓣香知渠有寄。座有揖客自增重。我亦本非折腰吏。

### 兜觥歸趙歌

觥爲吾宗常熱文。毅公劾江陵廷杖出都時。許文穆贈行物上有銘詞所謂文牟一角者也。後流轉於黃端伯陳潛夫章藻功何韃音諸家。近在曲阜顏衡齋處。翁覃溪詹事以告文毅五世孫者。庭者庭將以玉杯易歸而乞覃溪文爲乘韋先并遍丐諸名士作詩張之。以要必得余。故者庭父謹凡先生門下士且羣從行也不可無詩爰爲作歌

相公父死宜歸哭。相公不歸門生促。白簡纔上赤棒來。午門前濺書生肉。柴車一兩削籍行。良友贈之青兜觥。神牟一角理沉黜。銘詞親鐫鐵筆鏗。彝勺班中一禮器。朋酒絲衣肅賓祭。胡爲翻入纍臣裝。率彼曠野竄榛駢。緣知醜態寓意深。要寫觸邪力蠱鳳。當日權門勢炙手。虎豹當關誰弗避。奪情疏忽出延陵。削牘繼之亟奮臂。陸孤延

與霹靂鬚髮俱焦呼震地。拜杖并不喻蝮蛇。家有渾身膽堪試。此段錚錚百鍊剛。伉直豈惟杜黃驪。一株犀角斷成杯。恰肖透骨冰霜厲。是宜什襲逾瓊瑤。長與腊樹藏宗祧。何年流轉出人世。主雖屢易器尙牢。頗聞魏公傳家笏。近傍顏氏陋巷瓢。神物將歸有先兆。邂逅覃溪爲介紹。仍孫凜然念先緒。誓返故物弃家廟。已琢玉卮爲厚償。復乞椽筆作先導。杖瘡忍痛祖宗烈。棖澤與懷子孫孝。此意應蒙觥主憐。會見完璧速歸趙。

酬畚生郡博見贈韻

時擬分體重編拙稿。畚生代爲訂正。

力不能千仞。鑿山通。功不能九年。面壁窮。三錢筆作千古想。原是天地一愚公。甌北老生好吟者。墨瀋淋漓快奔瀉。作詩不到古人處。正坐貪多難割捨。晚知摺摺百無成。設版擬築焦瑕城。十七史從何處說。時已秋穫方課耕。先生鑿裁擅隻眼。苦心肯爲披沙揀。不辭格佞作譁友。要證千年鐵門限。編成更贈琳瑯篇。榮逾四明呼謫仙。深源幸免高閣束。后山翻托瓣香虔。古人著作不容贊。堯典舜典供點竄。化工著色真妙手。紅霞一染半天爛。堆盤火齊光眩眸。干將出匣萬鬼愁。長鯨尾掉碧海動。大鵬背負青雲浮。我於其間敢充數。食麥搬薑祇默喻。瞻粧顧影枉自妍。未足招他尹邢妬。感君謬許爲傳人。牝牡驪黃賞有神。用李諧短吾技淺。藏魏公拙君意真。獨慚毫學昧雌蜺。炳燭餘光徒勤說。少年精力不焚脩。垂老方覓燒丹訣。

題洪稚存寒檠永慕圖

慈母機上絲。孤兒案上書。併入寒檠影。映壁光踟如。此是景廬舊流寓。老屋三間白雲渡。即今青熒一炷燈。化作萬丈光芒吐。著書藜照太乙分。博物犀然百怪懼。幕府銀釭光草檄。鎖廳椽燭待奏賦。此檠好棄牆角邊。偏寫殘輝誌哀慕。覓火常思束縵時。映窗肯忘燃糠暮。非是母不生是子。始信義方教有素。我來買宅雲溪濱。君已別移通德門。里中老嫗尙能說。君家篝火連朝暎。悔不早遷依孟母。師他家法教兒孫。

題褒忠錄

郝景春。江都人。明崇禎中。爲房縣令。時總理熊文燦撫賊。安插羅汝才白貴黑雲祥等於其地。即所謂曹

操小秦王整十萬者也。張獻忠反穀城。汝才等應之。城遂陷。景春及子鳴鸞。僕陳宜俱死。揚人輯其事爲此錄。

房縣城頭殺氣黑。死響入鼓鼓皮裂。一片刀光滿地來。頸血如湯浴鐵熱。臨危殉節豈所難。所難與賊共彈丸。先是寇氛猶未熾。封疆失計在招安。守臣主勤不主撫。總理令來誰敢阻。可憐小邑萬山中。分插賊營十四五。大吏以縣爲鄰壑。醜徒視城作外府。臥榻旁偏睡有人。窮山坐乃衛以虎。是時勢已養癰成。制客兵須仗主兵。間道乞師百不應。獨教一木去支傾。一朝賊魁鄰縣起。此地羣兇盡殺矢。殘黎二百急登陴。分塚當衝半餒鬼。陰風一刮立不牢。城頭亂落如飄藥。享士并無妾可烹。簽兵已嘆民皆死。雉樓月暗燈無光。綠梯萬蟻上女牆。賊願得城活君命。君拚捨命隨城亡。嗚呼。臣死國。子死父。僕死主。一門忠烈入汗青。碧血斑斑照千古。想見強魂作鬼雄。不屑人間嫉如兩。

同年胡豫堂閣學視學江南相見話舊賦呈

三十年前共館閣。徽省花磚履交錯。三十年後重相逢。公作名卿我老農。感公不隔同年面。尊酒留髡恣談讌。比日雲泥尙弟兄。當年閨閣如親睥。在京時。兩家內子相往來。今公夫人及令子俱歿。話舊重添骨肉傷。撫時各歎鬚眉變。鬚眉雖變亦何悲。丈夫出世要有爲。如公遭際最堪羨。獨以清白結主知。子公氣力能援進。公於權要不通問。彥昇晚節爭詩名。公於壇坫不角聲。迴翔散地無營競。十年偏屢持文柄。似水心懸物論平。無花眼在文風正。九霄月旦品題高。一代斗山聲望重。致身至此亦足豪。報國文章功已炳。愧我辭榮太作顛。早拋簿領守丹鉛。乘軒野鶴知無分。祇掌孤熊祇自憐。只慚如此昇平世。徒把精神耗一編。

芷塘南回謁我於揚州喜贈

一十五年纔一見。見來又隔十年面。今朝何幸得相逢。握手卻驚顏貌變。憶君二十登蓬瀛。干將出匣千人驚。鴈節掄才半天下。新陰桃李多豪英。分得餘光到裴臯。門生門下見門生。改官柏臺筆如帚。白簡威聲震朝右。瘦竿

官乃索肥羊。合口椒難禁開口。立仗馬鳴雖可怪。蹲池鳳唳實所醜。君勅司業某索賄事人情欲比王拱宸。臣力尙慚朱伯厚。呼嵩禮畢乞身歸。金爵觚稜莽回首。書生命不到公卿。且向吟壇作主盟。死後榮名生前福。二者未知孰重輕。老夫年來效暗啞。白首掩關同調寡。舊交已看零落盡。後生又以老毫舍。君來頓覺起我衰。豈但離懷得傾寫。敢從行輩說後魚。先比旌麾有前馬。襪材遣向文湖州。雲氣長從孟東野。東南詩社自此開。一笑人間誰健者。

大柳驛相傳爲趙韓王授徒處

館師封王齊博士。後有宋相繼前軌。大柳驛邊老學究。家塾聚徒擁烏几。身爲儒乃術不儒。奇計居鄴智樞里。火輪小兒未爲帝。勳名最是八滁偉。首途募得李左車。軍籌敬聽發蹤指。滁州城西蘆子窠。趣使潛度勿移晷。半夜遂成懸瓠擒。膽擒金陵東海鯉。佐命功高自此基。帷幄參謀契魚水。陳橋變後作首相。十年前一村夫子。遇同臥龍岡下奇。迹豈抱犢山人詭。眷深不諱瓜子金。權重咸知鼎鑄耳。半部魯論佐天下。猶似不忘兔園紙。書味終淺機心深。歷事兩君保終始。金滕自明家相緘。桐圭竟擠介弟死。嗚呼。一代元勳勒太常。千秋公論歸青史。磨盤山前訪遺迹。門巷已非村落是。惟有村童讀書聲。都都平丈喧不已。

廬山紀遊

廣陵漣接潯陽漣。夜夢五老來相招。趣辦芒鞋青竹杖。要我去踏廬山高。山靈此約意良厚。那禁屢及窳皇走。遊山不憚千里遙。疑與古來亦罕有。江西詩派江西人。大都少肉多骨筋。廬山亦復犯此病。青孱片片摩穹旻。要其靈秀有獨絕。雲爲海綿爆天紳。必逢蘭若始一憩。不是遊山是遊寺。四禪林乃各擅奇。瞻雲。秀峯。樓賢。占盡泉聲與嵐翠。右軍墨池僅方塘。昭明書臺亦已荒。萬杉之杉不盈百。棲賢舍利黯不光。寺貧僧亦少粲可。蹟湮碑并無宋唐。惟有景光略不改。銀河仍挂三石梁。噉轟直與霹靂鬪。鼎沸不許蛟龍藏。五老鬚眉更奇古。昂精所化頽而長。見我裹糧踐宿諾。似爲拱揖相低昂。我來歷遍諸方丈。移步換形莫名狀。輿夫十二健驃九。如此遊山太豪放。當年李青白香。歐陽蘇。未必有此行色壯。獨愧前賢寂寞遊。其人已往名長留。未知今日扶筇叟。可有人傳

趙倚樓。

剝皮山

鄱湖旁一山。皆積沙所成。不生草木。如物之去皮而無毛者。土人呼爲剝皮山。相傳明太祖追陳友諒至此。友諒忽不見。得逸去。明祖怒山之庇奸。故褫其皮云。語極無稽。然可資笑端也。髮演爲詩。

寸草全無山骨露。皮之不存毛焉附。傳是蒙茸會庇奸。剝之出自真主怒。古來殺機深。多有法外刑。冤句春磨案。粵漢刀劍林。牽機腸絞李煜斷。夾板腰鋸孫揆擒。剝皮之法獨未有。阿合馬會橫兩口。明祖用之殺貪吏。剝皮場開縣門首。後來或踵事。慘毒試亦偶。擅草狀行屍。蒙鼓誌獲醜。要只誅人不誅山。山豈有皮如虎斑。縱遺庖丁批。窾郤。新剝亦恐奏技艱。胡爲譬无膚兮頭寡髮。爲破面鬼無容顏。未得麻姑搔背快。翻如那吒拆肉還。孫臍削來竟夜白。劉禹暎後逼體殷。得非與王威令赫。五丁六甲齊助雜草菅。文叔渡滹沱。無船冰印凍。婆留照石鏡。崖壁悚而動。蒙哥征欽察。海涸聽騎縱。皆祇應蓮效一時。運過百神未必奉。勝國版圖今久革。嶽鎮寧猶受屬役。何妨迴枯再生稊。乃竟噬乾永作腊。幾同巨靈劈華終古分。不數秦皇赭山至今赤。噫嘻乎。齊東野語原無稽。姑妄言之。妄聽之。一笑髡黥不毛地。何時樹鬚兼藝眉。題奇詩奇。此公故不肯放過。枚。

浙二子歌贈張仲雅程春廬兩孝廉

搖筆爲詩傳世傳。人將塞過天地。何以迢迢千百年。代只數人屈指計。乃知異才不輕出。河嶽英靈有深祕。老夫生平閱人多。物色常愧一目羅。何期垂白倦延訪。眼中突見雙嶽峩。張郎裙屐名卿後。閉戶披吟失昏晝。工夫手累十二碁。學殖胸包廿八宿。險語不顧鬼膽破。奇思直穿月脇透。危幢側足都虛綠。猛火焦鬚霹靂鬪。程酸金將爛似泥。來嚼鐵且爆如豆。摘驪頷珠寧待睡。探虎穴子不畏吼。一聲喝我數日髡。張君任贈七古一章。三昧乞君半偈授。程郎才大隘九州。萬斛泉不擇地流。銛鋒莫當徹扎鏃。厚力能負藏壑舟。渥注神馬箭雲躡。奇肱飛車馭氣遊。鯨波正澄紫碧澗。蜃市忽幻青紅樓。哥舒只持槍半段。栗磔兼使矛兩頭。明珠走盤面面到。機絲入扣乙乙抽。顧

我豈當一揖重。對君方欲五體投。程君即繪拜袁揖趙吳蔣圖者。文章有神交有道。晚年乃見此二妙。倒屣遑知論輩行。款門幸不棄老毫。譬如袁姬遇麗娟。又似退將逢粟姚。斂眉敢復誇塗抹。曳足猶思觀鼓噪。福衷我非不妬才。欲與一決爭行枚。卻恐難堅背水陣。不如早築避風臺。乃知歐陽讓頭地。正懼相逼先相推。一言聊爲作嚆矢。天下人才浙二子。他年應並坡谷傳。此日敢將湜籍比。

連日翻閱前人詩戲作效子才體

古來好詩本有數。可奈前人都佔去。想他怕我生同時。先出世來搶佳句。並驅已落第二層。突過難尋更高處。恨不劫灰悉燒卻。讓我獨以一家著。有人掩口笑我旁。世間美好無盡藏。古人寧遂無餘地。代有作者任取將。浣紗女亡出環燕。拔山人去生關張。真仙不藉舊丹火。神醫自有新藥方。能勝大敵始稱勇。豈就矮人乃見長。君自不登樓百尺。空妬他人在上牀。

孫介眉太守招同霖巖丈暨立菴樸齋食鱧魚頭羹戲爲作歌

孫公治具擅精巧。就中鱧魚羹更好。習家故有百畝池。魚出君家鵝陂。網得修鱗侑清醪。從來一物有一味。一味中又各分地。猩以脣見珍。熊因掌斯嗜。豪誇紫駝峯。官賞爛羊胃。雞蹠矜廚娘。牛心啖名士。卽以水族論。腴饜應候異。蚌推瑤柱鮮。鼈取甲裳膩。是知一物身。肉又別粗細。鱧魚之美乃在頭。頭大於身如兜鍪。雖不能戴蓬山。觸不周。卻有雋味凝入活。饜饈本非冬烘狀。詎有風眩愁。負此殊尤秘不得。張腮鼓頰突兩眸。似欲出頭地。策勳岸頭侯。肯作元談居士縮頸項。并非白簡參政鯁咽喉。先生顧而笑。其中有奧妙。爾旣奮頭願作高敖曹。何妨成齋斷頭將軍號。於焉奏車斤。藉席羹。調以滑甘滲瀾融。毛以辛辣桂薑擣。火攻炭選鶉鴛青。武煨文煎百沸到湯老。客來薄暮始設食。割烹乃自天未曉。一筮如缸擎出堂。果然香味先向鼻觀繞。豈無水陸諸珍並羅列。都作元白被壓倒。老夫不覺攬臂舉饒叔。太岳今朝纔一飽。朶頤且快我吟咀。碎首那顧他苦惱。此魚昨夜游濠梁。定已夢人伏而墮其腦。

金川門

大本堂摧懿文死。應立燕王爲太子。以長以賢事皆順。孱孫亦得免刀几。乃留弱幹制強枝。召亂本由洪武起。臨濼奮跡開草昧。豪傑才兼聖賢理。目不知書性有書。每就儒生講經史。檀弓開卷重立孫。春秋特筆譏逆祀。千年成說牢不破。此語燕閒久入耳。遂將神器付太孫。分國諸王稟同軌。豈知覺即起蕭牆。臂小何能使巨指。削藩方工。鼉錯策。搆兵遂蹈張方壘。王師轉戰力不支。夜半翻城九江李。袞冕燼灰火滿天。縉紳赤族血流水。可憐十丈金川門。慘過晉家蕩陰里。向使當初改建儲。叔正青宮姪朱邸。臨淄自能厚本支。臨賀豈逢干倫紀。何至一家骨肉殘。家嗣翻成若敖鬼。我來經過弔陳跡。終覺高皇計失此。處常無事貴守經。銷患未形難據禮。徒將誤國各方黃。猶未窮源推禍始。

郡城菊事甚盛與立菴雲曠曉東子蕃緘齋更番治具爲看花之會流連匝月不可無詩

人生何者是真福。飲酒看花一生足。只愁此願徒虛語。讓他樂死箴之獨。今年秋稔人豪華。家家買菊堆成霞。老夫聞之興勃發。招邀同志爲窮奢。看花先不可無酒。治具更番賭適口。官場珍錯盡不用。惟取活殺飛潛走。黃雀綿厚耐咬咀。紫蟹甲堅費剔剖。就中尤數高家肴。綠頭雄鴨九斤九。累人啖到腹彭亨。翻惱廚娘太好手。有時酒後出看花。相攜闖遍東西家。到門不復煩典謁。直入嚇煞雙鬢鴉。亦有自排花當去。整徹夜張燈對花飲。紅燭高燒照靚粧。坐到四更風露冷。間日必一集。一集必竟日。那顧酒債增。但恐花事畢。嗚呼此樂不易得。偶然遇之莫輕擲。百年能有幾閒時。一鄉能有幾閒客。不見袍韉踏鼓人。陶家籬畔無游跡。

至揚州約同人作青魚會。會將遍適子才至。又更互設饌。迭相招陪。今年口福殊勝也。戲呈子才及諸同人。先生今年口福高。在家一月旣老饕。揚州又作青魚會。招邀素心凡幾輩。此魚宜冬不宜夏。及冬不食復何待。揚人不識魚味殊。饒奴只解尋腹腴。怪我專以骨敬客。留肉自享主誼無。久之始悟美在此。近骨者佳頭與尾。遂令此魚價頓昂。哄得滿城動食指。同儕排日迭傳杯。忙殺籃輿往復回。吃到輪番剛欲遍。隔江又報故人來。故人來

復覓相款雅集重開續宴衍。連朝傳食東西家。自家翻覺廚烟斷。噫嘻乎。人生真樂惟食色。少年已過不必說。久將嚼蠟看橫陳。只要殘牙快鋪嚼。如此歡場動浹旬。庶幾不負暮年身。斷盡咬菜成何事。老去甘爲飲食人。

題錢曙川竹初庵圖

圖名竹初庵。宜寫篔簹谷。竹萌桃正華。乃以桃伴竹。寫出十株百株紅。映入三竿兩竿綠。作圖時正擁印牀。敢期結願後必償。圖成七年竟踐諾。歸購嫗孃手荒度。青蚨落到雅人手。幻出荆關得意作。雖無萬竹千桃花。小山有供池有狝。輞川長卷縮本摹。半畝中迴幾林薄。君才况擅畫詩書。與到解衣一磅礴。幼與遂置邱壑裏。身兼富貴神仙樂。看君出任看君歸。我亦當年早息機。只爲買山錢太少。至今未就釣魚磯。羨君園成頭尙黑。不改圖中好顏色。趁取腰強腳健年。儘消臨水登山力。其高或可攀。其年不可及。

述庵司寇新刻大集見貽展誦之餘爲題長句兼懷亡友璞函

塞翁失馬何足惜。先生奇遭在削籍。紫微郎剩白衣身。萬里從戎歷重譯。當日都門送臨賀。分岐誰不悲遷斥。豈知官秩從此高。詩亦從此窮風騷。滇南三載蜀五載。踏遍徼外地不毛。路爭鳥道入穹漢。復尋象跡翻崩濤。石碣木棚番落屋。鐵索竹竿蠻江橋。炎鄉三冬輟雷吼。陰嶺六月陣雪飄。洪荒以來人不到。奇景留待公鑿雕。吟毫既得江山助。况值羽書正馳驚。弓刀隊裏一毛錐。百萬貔貅聽指顧。矛頭米浙咽風餐。盾鼻墨磨揮露布。一礮人頭落滿空。千燈鬼火攔行路。裏屍之革浴血刀。逼出才人拚命句。遂令椽筆鑄偉詞。上掩白狼下朱鷺。卽今秦凱十五年。卿月崇班已屢遷。煌煌大集亦鏤版。光照四裔聲摩天。就中突過黃初處。終屬淋漓橫槊篇。倘非參軍入蠻府。平步公卿享華旒。雄略雖餘捫蝨談。壯心誰激聞雞舞。南山詩不如北征。只爲未經戎馬苦。乃知絕域烽烟中。正是玉成大名古。獨憶當年老趙岐。與君同出不同歸。挑燈別闕媿隅集。痛絕空山暴骨時。璞函從軍滇蜀。有歐陽集十卷。

舒城題旅店壁

日將沉。路難進。滄暑中人頭目暈。布帘飄處旅店招。馱鈴騎轡一齊奮。到來暫喜息勞筋。邊計洗塵覓佳醞。炊烟



熏屋墨穴黑。青蠅成團蚊作陣。輿夫騶卒紛屑摩。咄咄逼人何太近。汗漿迸出葱蒜汁。其氣臭於牛馬糞。一笑聞雲野鶴身。失足無端落藩溷。

汪屏周二尹買菊作花當招同宣我士檢討楊恆夫明府及蓉溪霖巖學晦絨齋諸人讌集凡八十以上者五人餘皆七十以上余年六十七得與焉立庵更小於余最後至以末座讓之合座十人共七百七十歲鄉社中盛事也不可無詩

汪倫大壺猶踰躡。菊花排格開長筵。老人愛老邀老伴。鬚眉白映紅茸氈。首座宜公八十四。其餘次第差隨肩。共年七百有七十。坐以齒序爲後先。若教併作一人壽。已在北宋熙豐前。是時滿室明燈燃。燈光花光相新鮮。因龔倍作大聲語。有警不礙捷鬪拳。蓉溪稍聾。霖巖嘉肴雜陳飯能健。畫燭已施坐尚堅。旁人勿怪太叟鏘。不爾何以能華顛。古來安期浮邱輩。只在塵世非在天。吾曹倘傳入圖畫。安知後不驚爲仙。賤子未及古稀歲。殷兄張丈殊相懸。故事叨援洛社例。附庸俾得隅坐偏。無端蔣詡最後至。末席不免爲之遷。累爲溫公做不得。百杯罰此惡少年。

曉東小巖香邃邀我神仙館午飯至則坐客已滿再往半山玉流諸館亦然作詩誌慨

歸田二十年。市脯未入腹。吾友貪養頤。誘我作近局。云有神仙館。珍味擅所獨。炙蹠武火煎。炊餅熱熬熟。尤推魚頭羹。遠追宋嫂躑。老饕一念差。隨之走坊曲。酒肉氣熏人。未到鼻已觸。入門擬大嚼。座客乃滿屋。縱橫數十筵。無隙可布褥。見我做不禮。噉而睥其目。彼既佔地先。吾敢下令逐。王式本不來。受此驪駒辱。一笑舍之去。再歷館五六。喧擠聲一槩。並少席半幅。歸來忽長嘆。茲乃無底谷。一館百十人。各破牀頭麓。館館盡如斯。日費錢幾斛。自非物力豐。曷此肴饌鬻。君不見。古來饑荒載簞牘。水擷曼茨野采蕪。圍城易子薪析骸。屠肆賣妻格懸肉。履折牛革燻湯臭。壁搜鼠穴熏烟毒。斯時闕闐景可知。市有醉人已奇福。睹茲舖啜緊金錢。足見昇平調玉燭。已幸生遭繁盛時。惜無力挽奢靡俗。

雜書所見

我詩愛人讀。好友來激賞。對我長吟之。快若搔背癢。可惜我讀古人詩。古人不見我拊掌。乃知相需殷。相遇偏多爽。九原弔隨會。不聞鬼答響。峴碑淚空墮。叔子已長往。所以虞仲矧。生前每切知己想。

偶得一奇聞。如獲珠滿斛。豈知博學人。胸中已爛熟。君不見瑯琊稻。十歲兒已腹筍蓄。又不見金根車。名父之子猶誤讀。乃知太倉一稊海一粟。論衡未可矜秘牘。

猿豈無樂時。鴉亦有喜處。只因其聲似哀怒。遂使人人悲且惡。君不見潘安仁。恬退賦閒居。難掩拜路塵。又不見蘇子卿。風流娶胡婦。寧玷志節貞。丈夫自立貴有素。身名成敗非旦暮。

羽族色一定。千古不改易。卯生歲歲增。烏黑鶴必白。蹄者則不然。父子或各殊。犂牛出辟角。白牡生驪駒。乃知本乎天者有一定。落地便多雜氣勝。光音天人不肯食地肥。只爲保地本來淨。

物生有限制。傅翼者兩足。蜻蜒乃倍之。翼四足則六。是宜橫四海。瞬息千里速。胡爲款款飛。竟不踰牆屋。輕只立釣絲。捷但點波縠。乃知技雖多。早爲器所局。鷺鳩且自捨枋榆。燕雀勿輕慕鴻鶴。

錢鏐照石鏡。見己如王侯。遂渡江討逆。雄霸十四州。傳國及數世。英名至今留。吳曦出獵歸。月中有人揖。遂發南面想。叛降覲冊立。一旦安丙來。頸血歐刀濕。或謂有先幾。鬼神實導之。而我不謂然。視其所自爲。使鏐乘亂起。閉門作天子。安知杭州城。不作董昌死。使曦效忠勤。聲援淮泗軍。百年忠孝家。茅土豈不分。乃知雖有富貴命。亦須

順受得其正。

少時不敢望六十。今我過此願轉賒。乃知切己處。貪癡老愈加。君不見。白首種松期偃息。後來未覩干霄色。又不見。九十食柑種其核。種成又得十年食。由來修短非人工。莫拋現在期無窮。

王樓村先生十三本梅花書屋圖爲其曾孫少林賦

十三本梅繞書舍。樓村夢久傳佳話。我昔曾讀初白詩。知是鴻臚禹鼎畫。今遇文孫始見之。三尺素練色不壞。綠

萼六株紅七株。屋後屋前各分界。恍遊雪夜紅羅亭。不作月明綺衣怪。樓村本是梅花仙。百花頭已符靈籙。一十三本是何兆。其應當在世澤延。松十八公介圭錫。竹一束策藥榜懸。易千賜粒三十六。三刀作州興呂虔。訊之占夢歷有據。披圖可悟祥徵先。君家故事吾能說。文采風流自古昔。巾箱家學七葉中。人人有集光史冊。墨窮沉蓄高曾書。二十七人總名蹟。所以瑯琊族望高。馬糞香過龍涎炙。卽如此圖失楚弓。復有後賢返趙璧。圖已失去。少林重購得之。足知繼起代有人。還似烏衣世裙屐。嗚呼。魏徵宅費官錢贖。梁公像向武襄鬻。幾家故物能長留。守器今推王氏獨。此屋雖違築室謀。少林擬仿圖作屋以賣之。此梅已協植槐卜。

麗川中丞奉使過分水鋪定山東江南洋面有觀海詩次韻奉和

混茫無涯絕飛鳥。滄溟安有道里表。中丞明過分水犀。齊尾吳頭一目了。抽刀斬水水不斷。設界洪濤枉自擾。卻從陸地指羅針。一線遂達扶桑渺。直於鰲背劃龜紋。墨食痕清不糾繞。是時紫滌波不揚。決皆雄觀極天杳。三神山豈遐。九雲夢猶少。萬里澄鮮盪胸皎。老龐一口吸西江。對公尙覺神通小。

## 七言古五

僧澱菴生宿高旻寺次日鑑公同遊金焦遇趙偉堂縣博及巨超諸僧作詩會又同往甘露寺

出遊無勝地。不如閉門坐。勝地無良朋。不如掉頭過。今日何日樂事并。高僧名士同江行。金焦相距不五里。煙雨空濛一帆駛。正逢詩社建鼓旗。同叩禪關脫巾履。人皆林下閒神仙。地是江南好山水。快哉人地兩清絕。意本不圖緣偶結。明朝竹林招隱寺。乘興更擬尋曲折。人生得意勿太貪。且留不盡待再探。

焦山江上爲張世傑與元阿珠元史名阿珠董文炳血戰處事見宋元二史舟行過此補弔以詩

江上峯浮一螺碧。啼鳥落花僧寺僻。豈知曾閱古烽煙。往往山根見折戟。白鷄船名。雄排水寨開。戎旂萬舸截江來。箭風礮火吼水立。蛟龍駭走不敢迴。可憐殺氣乘潮漲。南北戈船互衝盪。一貪佐命立奇勳。一誓捐軀保危障。

功臣忠臣共戰場。運異興衰氣同壯。終然浩劫入滄桑。縱有赤心天不諒。煙燄橫空鬱蔽江。十萬健兒魚腹葬。我來斜渡一帆風。往日兵氛久洗空。閒把陳編撫遺事。江山如舊哭英雄。山前一片飛濤洶。想見當年戰血紅。

齋前寶珠山茶一樹數百年物也。萬花艷發其光絳。天邀北溪謙齋蓉湖立庵瑩溪曉東緘齋諸人贊之賦。

詩以紀

季倫珊瑚高七尺。賈胡貴街紅刺石。天公憐我蕭齋陋。賜以寶珠滿院赤。山茶難得千瓣妍。况復老幹數百年。吾家獨擅此奇古。其根拔地枝摩天。胚胎含英隔年結。繭栗春來始綻裂。大瓣外長六出奇。細瓣中噴一腔熱。不知何物染得成。世間無此猩猩血。東風一吹千萬朵。高下都開笑口歌。熊熊日午光絳天。嚇得鄰家來救火。火齊木難枉擅名。以名嘉樹乃真可。此時安得無杯盤。爰邀素心來盡歡。家貧不能列歌舞。借此聊作紅粧看。便如張鉞畫堂宴。妖姿十隊胭脂丹。又如三千殿腳女。錦衣袂服明江干。尊前忽然大富貴。景象一洗儒生酸。斜陽過墻日將夕。花光流艷照座客。樹老花愈紅。人老頭愈白。白頭映紅花。頓覺老態失。未醉已覺朱顏酡。大得此花增氣色。

題周山茂觀察老圃秋容圖

冷艷離離入焦墨。不寫春華寫秋色。風光偏稱白髭鬚。是我故人幾不識。公昔登科最少年。吹簫子晉綠山仙。明光奏賦不起草。搖筆壓殺才人千。遂乘露朝按五管。清風瘴掃蒼梧煙。我從詞垣早師事。出守又爲公屬吏。鎖院秋燈酒共傾。壬午秋。校京闈。同粵江夜雨舟同繫。己丑自端州隨公至桂林。彈指俄驚三十春。雪鴻往跡不堪論。公會出塞悲流徙。我亦歸田作隱倫。此時尙說香晚節。三尺兒童也笑絕。豈知人各有秋容。何必升沉共一轍。君不見陶家籬。韓

相圃。一在巖廊一環堵。後先兩個菊主人。一樣清芬占千古。公今才望隘九州。書法況埒虞褚歐。煌煌碑版照四

裔。宦雖未達名長留。此正暮年著力處。不徒占盡老風流。只憐同作揚州客。幕府沉沉幾重隔。何當攜手菊花天。

醉倒落英紛滿席。公方客巖使幕中。

題楊斐園研室長卷

平泉醒酒石。忽落他人手。壺中小九華。瞥眼不復有。一卷之多難世守。石不能言乃能走。何哉楊氏清白貽。獨以一硯當鼎彝。令子護持築精舍。名流矜賞攜妍詞。五世其昌果奮跡。道是石田田不石。濡毫鵝眼掃犀眉。兄也撥科弟通籍。魏徵牙笏王祥刀。遺澤熏後多賢豪。况茲文房之珍逾拱璧。載得家學傳風騷。香霧黯凝文養豹。黑雲瀾起詞騰蛟。會與紗縠巷中魚。膚碧坡穎二老各同高。

題女史駱佩香秋燈課女圖

東坡要兒愚且魯。女生何必求聰明。一分才折一分福。不櫛進士徒虛名。豈知深閨讀書種。也要傳心度針孔。佩香女史絕世才。忍使清芬無接踵。手撫么絃傷寡鵠。巾箱况少遺孤續。一个嬌娃解語花。綺窗親課秋宵讀。梧月蕉風夕館涼。一燈如豆光微綠。風詩誦到柏舟篇。女未知悲娘暗哭。篝火書聲夜漏邊。依稀柳母舊家規。可憐一樣丸熊苦。他課男兒此女兒。

計五官歌

紫稼歌殘薊苑霜。吳梅村集。有壬郎曲。即名紫稼。百年曲部黯無光。天公怕斷煙花種。又出人間計五郎。計五生來好姿首。家近虞山黃子久。竟體香分景滌蘭。纖腰軟入靈和柳。天風吹落到揚州。一日聲名不脛走。冠蓋西園夜賞花。笙歌北里朝酣酒。偶然斜睨眼波橫。勾盡滿堂魂不守。座中替宿也發狂。簾內嬋娟自嫌醜。無人不愛鄭櫻桃。只是有心難出口。揚州樂府聚風華。陳寶陳大。秦坑。郝金官。有坑人。共誇。絕調能翻金縷曲。形容雅稱玉鈎斜。小垂手。博纏頭錦。初上頭添繫臂紗。計郎一出爭相惱。斂避都甘作房老。尹邢豈但怕相逢。元白已皆慚壓倒。若非占得十分妍。妬口如何亦稱好。乃知一樣眉目清。天獨爲他陶鑄巧。我來作客十餘年。看盡梨園舞袖翩。太息選仙空彩格。老來方遇鄂君船。鬢絲禪榻茶煙颺。腸斷春風擁檝憐。

邵松阿落一齒已而落處更生所謂兒齒也走筆奉賀

憶昔從君少年日。利齒剛牙快鋪歎。舞陽盾畔一彘肩。不怕生吞口帶血。忽忽四十年。我老作牛齧。曾官打牙疔。

猪鄉竟儻齧齒哇列。軟飽惟資張蒼乳。柔存幸剩商容舌。空齷枉想過屠門。以咀代嚼味不出。羨君頤齶尙無急。編貝堅完不兀艱。偶焉弱一个。略似童牙齶。非遭鄰女核。豈被邏卒擊。尙堪石之漱。何妨屐之折。胡爲落處又萌生。宿草去根起新蕘。琴軫方愁雁柱虧。瑾泥已塞狗竇缺。古稱兒齒信有之。新發于硎倍剛烈。有如老將力將竭。添以生軍再盪決。童子行先尊勝隊。孩兒兵壓飲飛傑。問君安得此寧馨。英銳獨擅昆刀切。定可陷堅爛似泥。寧徒吐慧艷於雪。斯乃壽者相。專爲老人健飯設。東魯旣並黃髮頰。北齊況傳智牙說。知君尙有萬年未食盡。天遣雍齒封侯助饜饕。噬腊堪稱程敵金。決濡應賽來嚼鐵。笑我空將饞口張。方倚杖鳩祝哽噎。

石刻諸葛忠武侯像歌

像爲閩立本畫。後有王齊賢摹本。張南軒贊。朱考亭書。印君鴻緯。於嚳城俞氏見之。借摹上石。以廣其傳。爰爲作歌。

諸葛大名垂宇宙。豈須絲把平原繡。誰摹遺像入貞珉。墨本新翻唐畫舊。臥龍當日出山遲。三顧情深始展奇。倉猝扶危敗軍際。畢生盡瘁受遺時。天心已定三分局。臣力猶勤六出師。中樞叢雄甘不戰。髡鉗僚吏泣無私。奪來駢邑人忘怨。芟後甘棠地繫思。八百株桑傳素節。二千尺柏颯英姿。圖形未續雲臺位。隨淚還先峴首碑。右相丹青追髣髴。妙手重樵稿頻易。南軒作贊考亭書。愛其人者寶其蹟。清高旣肅宗臣容。題拂兼增大儒筆。印君遇之倍珍惜。更做殘縑壽諸石。遂使綸巾羽扇人。一身化作千百億。我昔南遊緬節麾。七星關上拜公祠。在貴州畢宰相威儀儒者氣。至今迴憶儼鬚眉。老來訪古倦行腳。得此莊嚴供去聲齋閣。風貌寧煩粉本臨。典型幸獲瓣香托。愧無長策效馳驅。惟有清襟師澹泊。

金二雅繪襖游圖集蘭亭字爲序長卷索題戲書其後

天邊鴻鵠隨家雞。集句已被東坡嗤。況復割裂巧集字。大方之家應不爲。豈知此法昉梁代。千文韻語今猶垂。李唐御製聖教序。亦撥墨寶刊穹碑。遂令右軍好手迹。幾遭寸磔無完肌。蘭亭真本尤絕筆。幸未碎剪翻錦機。金君

被飲忽遐想。湯燐暫借充饋遺。不取其文取其字。一篇別擣春游詞。破之片片墮地甌。貫之縷縷入扣絲。百寶修成滿輪月。衆腋聚作無縫衣。咄哉文心太狡獪。繭紙幻此一段奇。襖游圖邊襖游敘。句新字舊觀者疑。何須舐髓缸面酒。已似染毫洗墨池。地非會稽世非晉。幕然突出王羲之。重三從此增故事。不數典午永和時。

題蔣心餘攜子游廬山圖爲其季子師退孝廉作

我昔遊廬山。孤行少伴侶。但鏗拄杖聲。遙答鐸鈴語。今朝讀君廬山詩。乃知先我祭其阻。奇才勝境兩相值。磁石吸針鐘應杵。山靈不放君空回。君亦不肯虛此來。胸中萬斛泉遂湧。欲與石梁瀑布爭喧豗。況復鶴鳴有子和。登高作賦非凡材。或疑二兒昇陶令。籃輿閒赴近局杯。不然坡公石鐘伯。與邁同步凌崔嵬。快哉此遊足千古。海綿萬頃天爲開。惜我曩時鞭獨控。先後十年成各夢。若使同看九疊屏。也應喚作三遊洞。曾聞元白遇夷陵。文酒流連旬日共。事往空思寫木蓮。見舊唐書白居易傳。道山人已騎白鳳。天爲徐凝藏惡詩。不使與君相伯仲。一幅生綃想故人。履綦陳迹淚沾巾。慰君幸有斜川集。能寫匡廬面目真。

秦夏玉錦袍歌傳是明莊烈帝所賜。其子孫有遷江右者。猶世守之。師退孝廉爲乞詩。

節了羅襦縛袴褶。提兵屢赴疆場急。戰袍裂盡錦袍存。猶帶當年淚痕濕。召對平臺拜賜時。爲旌健婦勝鬚眉。五色繡成宮女線。九張機織尙方絲。可憐此賜非輕得。歷歷忠勳九重識。奢安軍變定川南。遵永城亡趨直北。世間有此女英雄。授以男官總兵職。俄驚烽火滿夔巫。東邊西馳更勤賊。撲面塵沙當粉塗。滿頭蓬葆臨風櫛。縱有羅紉豈暇披。甲裳血汚淋漓赤。百戰山河到夕曛。茫茫浩劫寒妖氛。高牙大纛皆巾幗。翻仗劍殘娘子軍。陵谷遷移成一夢。廿年心力堪悲痛。一丸泥遂閉函關。千樹桃仍罨秦洞。老寡寧將瑟再彈。故侯自有瓜堪種。此袍猶是舊君恩。盟手開緘時一慟。什襲收藏付後人。扶南犀杖杖亡陳。敢論均服黃金甲。聊返初衣白氎巾。遺笏魏家先世澤。傳衣曹洞昔時珍。陋他譙國高涼洗。錦繡重誇嶺外巡。

綿州刺史劉蔭瑩駐藏回蜀遠寄藏佛一尊賦謝

我聞佛有千百億化身。本寓言耳乃竟真。自從霍去病。收獲休屠神。後來明帝夢金人。遣使求得四十二章經。釋迦之象偕來賓。其始但圖畫。竿融特舫裝塼新。爾後遞仿製。葫蘆依樣遍人垠。琢文石。鑄貞珉。雕檀櫺。鎔金銀。最賤用土木。尤易紛傳薪。三家之村一闌市。皆有過去未來現在三世尊。其多豈特八萬四千阿育塔。直與恆河同數微沙塵。然皆震旦造。非從身毒到。漆器終推裏樣樣。錦紋須出蜀江源。旄牛徼外烏斯藏。傳是耆闍古靈隩。曾出帝師八巴思。大寶法王賜嘉號。至今已閱幾輪迴。換身猶帶前生竅。其俗家家修淨業。大乘黃教小紅教。良工善鑄如來容。真本臨摹狀維肖。不比貫休畫應真。僅向夢中見風貌。綿州刺史劉孝威。從軍絕域窮奔馳。腦日逐。髓月氏。梯危絕險二萬里。歸途又餉駐藏師。君從征廓爾喀。歸途留藏。購得一尊遠寄我。名以長壽代祝詞。我不知是彌勒。是牟尼。抑或阿難迦葉及辟支。恰比中土黃金面。豐上銳下差毫釐。惜哉丈六身。縮作三寸小。難具三十二相八十一種好。棘端刻猴地幾多。七滿八平何處可施巧。珠火眉微分。青螺髻空線。安得金粟影接寥天長。玉毫光共素月皎。要是彼中五嶽真形圖。不用減鼻開唇屢易稿。譬如唐方鎮雖各有旌節。終輸本色來自長安道。繫余衰朽枯木禪。得此瞻禮良有緣。愧無七寶莊嚴般若座。亦少百花供養伊蒲筵。腰不能爲膜拜折。詩豈足當梵唄宣。燈傳難助長明火。筏渡尙虛大願船。惟有此心清淨退。周妻何肉早悉蠲。已作在家出家一老衲。蕭齋正可同龜眠。

題黃陶庵手書詩冊

五言律十三首。乃崇禎丙子赴試金陵塗次之作。書於是年九月十六日。薰在報罷後。公至壬午。始築於鄉。癸未成進士。殉節於乙酉。距作詩時僅十年。

耳。齋生郡博購得此冊。敬題其後。

作詩赴舉時。寫詩落解後。詩不必坡谷。字不必顏柳。遺蹟乃獨珍。光壓瓊瑤玖。是時明社將爲墟。方赴鹿鳴鄉射。耦迨公通籍已板蕩。需次里居歲乙酉。天兵南下金陵降。風掃百城快於帚。馬前叩頭草間活。國破君亡誰拒守。公也林下一書生。衣不掩脛袖露肘。回天挽日何等事。豈出區區搢大手。揭竿市兒無戈矛。釋褐鄉官未印綬。無端糾集一旅師。欲飽百萬磨牙口。山河政局斃折柱。天地爲籠魚在笱。正惟成敗百不計。足知志定甘授首。嗚呼



公已駭箕去。故紙殘零亦何有。一鱗片甲乃幸存。其字其詩遂不亡。摩挲忍汚寒具油。激賞欲浮大白酒。君不見同時衆名流。聲望出公右。書推王孟津。詩擅錢蒙叟。至今令人笑齒冷。斷楮零綠付醬甌。

贈張友棠孝廉

我來揚州把談麈。絳紗弟子殊侁侁。就中最賞張思曼。七言韻語尤清新。君亦傾心自著錄。康成門下稱傳統。講堂散後五六載。每一相見情瀾親。嗚呼近時山長席。鵝湖鹿洞非等倫。鄉官聊作祠祿寄。諸生藉補館穀貧。此豈有意在學問。毋怪別後同路塵。君獨不以老耄舍。自因知味共苦辛。其思沉密學繁博。功力要復老斲輪。緝鐵能成錦五采。鍛鍊不惜錘千鈞。壘堅牆厚攻不破。開壁一戰摧強鄰。眼前空兀真畏友。先導吾敢誇梁津。識途馬已智無用。掣韉鷹方氣未馴。看君出應著作手。詞壇旗鼓驚千人。

題瓊花觀圖長卷

卷長三文餘。多唐宋以來各人題識。

廣陵胭脂氣薰天。惱得天花欲妬妍。一朝飛來蕃釐觀。要與色界爭新鮮。三千殿腳萬驍果。拚擲江山就花坐。南朝枉自誇瓊枝。豔殺羣芳無一朵。風流賢守惜花心。更榜無雙白石亭。想見滿城遊女集。夜歸齊妬玉娉婷。司花天女偏膽小。驚失瑤林一株好。急遣巫陽下界尋。收得香魂天未曉。從此人間不復見。附書難托風箏線。花生花死一千年。只當優曇纔一現。我來訪古步庭墀。但有丹青一幅遺。免葵燕麥久荒寂。樓臺猶仗虛名支。月下珮環招不得。卷中人可崔徽識。挑燈題罷露臺寒。一樹冬青夜深黑。故址今有冬青一株。

題洞庭尉程前川三百首梅花詩本

梅花性孤冷。貴少不貴多。籬落兩三枝。自足供清哦。豈知多更好。彌野漫山阿。羅浮數十村。鄧尉千萬柯。遂擅天下勝。遊客紛肩摩。咏梅詩亦然。繁篇古未有。老逋入章出。已古名不朽。何哉程前川。乃至三百首。別開生面目。不落舊窠臼。妙想入非非。消寒遍九九。元珠直遺象。罔搜璞玉竟。代卞和剖。豈特長康畫三毫。自是陳思才八斗。人皆爲梅幸。遇此知己友。相得乃益彰。壓倒衆芳藪。我謂梅不幸。遭此寫生手。巡簷索笑日千迴。攝魄追魂無處走。

色香神韻不留餘。後世更誰敢開口。澤竭但供一時快。和寡將冷千秋久。由來詩人爭大名。必創奇觀世無偶。叩門示我牛腰卷。萬丈瑤光溢戶牖。我吟一詩飲一杯。竟滿李白三百潑醅酒。

顧晴沙選梁溪詩成瘞其舊稿於惠山之麓立碑亭其上名曰詩塚爲試七言古一首

晴沙妙選梁溪詩。二千餘年盡羅致。一將功成萬骨枯。所餘殘稿將焉置。既非青史薰園焚。敢托黃冊後湖閉。錦軸虛掣桓元廚。銀杯恐化公權筍。同志有人出奇策。文塚筆塚可援例。遂傍龍山九隴長。選得牛眠一弓闕。或笑秦儒將被坑。或疑李集欲投廁。豈知琢石比榔堅。兼復立亭彷彿瘞。遂使此邑千才人。詩魂上天魄歸地。雖悲一邱貉不分。且喜千腋狐已萃。昭陵匣殉修禊文。汲郡簡藏編年記。多少精靈聚一團。行看蒸出菌芝瑞。清芬自少荆棘生。酸氣并令螻蟻避。宿草滋含文露濃。野花開帶心香膩。嗚呼才人苦愛名。慮到陵谷變遷異。元凱碑付江波沉。思肖函從井底墜。猛將甘作沙場塵。酒人願化陶家器。此舉正合古遺法。不怕竊鈎出非意。發邱耶識無金銀。掘墳賊豈要文字。況諸作者非並時。前不預知後徒企。賴君作合結同龕。不隔去來今三世。有如周秦紀行篇。蛾眉一堂集佳麗。又如幽燕憫忠寺。馬鬣一坎聚烈義。故鬼新鬼紛並肩。舊雨今雨欣把臂。月下定有秋墳唱。歲除不煩詩草祭。九原詞客果有知。此亦吟朋大快事。我來經過一憑弔。欲喚何人莽無次。但覺蒼蒼宰木邊。常有光芒透山翠。

寄題法梧門祭酒詩龕君。蒙古人。

杜詩萬里行。歐詩三上成。作詩必以龕。毋乃拘心旌。豈知泐衆虞。端在嚴關扃。或仰屋梁臥。或觸醋甕傾。屏除萬籟靜。獵微窮至精。詩龕之策無多楹。虛白一室涵空明。會無四圍皂羅幃。但有五夜鐵燈檠。想當晏坐吟興發。風籟不捲爐烟輕。眼光直洞重垣透。思路迥曩層霄清。一龕廣不過十笏。已逾五百由旬程。信哉人地兩超絕。毋怪詩律堅長城。聞公家世本沙漠。契苾勳門埒褒鄂。卽今西南戰伐殷。何不奮戈就戎幕。乃耽手筆造鳳樓。遂忘弓刀響麟閣。緣知風雅味獨深。嗜好與世酸醜各。君不見。雲石小海牙。橫絕酸齋作。鴈門陸都刺。亦歷蘇天爵。公才

十倍此數人。已爆高名動寥廓。惟有湛然居士集。邪律文。經濟文章。胸可拓。好當彌勒結同龕。一瓣心香寄所托。遊網師園贈主人瞿遠村

市闌難把塵鷺隔。何許林扃擅幽僻。主人好客過鄒莊。買得名園集裙屐。買園貴舊不貴新。爲要濃陰綠如帶。惜哉喬柯已伐盡。但有一池枯葑積。乃窳土木妙結構。欲以新景賽古色。小山堆出華子岡。幽壑散來到公石。一重一掩曠與兼。煥館涼亭境屢易。若非導僮幾觸柱。倘藏逋客敢搜壁。想當意匠經營時。多少黃金付一擲。明月清風四萬錢。笑他子美真寒乞。就中風潭已改濬。數畝中涵百頃碧。網師之名尙仍舊。定有千石魚策策。紅衣垂釣可作圖。青笠擎音便泛宅。老夫大發結網想。擬捉銀鱗長一尺。

### 梁製觀世音像歌

王仲瞿孝廉得古銅佛像一軀。長身玉立。首有金冠如翠朝。衣袂多繡。紋極精緻。與世所塑釋迦像。探髻袒胸跏趺坐者不同。其底有篆書。天監二祀十有一月。中天竺王屈多。使竺盧達多。獻西域土物。優闡賢王。造釋迦真像一。摩訶觀世音像一。摩訶至像一。三夫人丁氏。進位貴嬪。皇子大通。誕彌月。皇太子統。三周。皇帝命顯陽宮監臣陳舍利王寶臣東方迦葉。奉造一佛二菩薩像。臣舍利奉皇大統于永福省。授太子統孝經一卷。觀世音像一軀。臣太子統臣舍利稽首頓首云云。據此。則梁武就天竺所貢三像。別勅仿造。而所授昭明太子一像。則觀世音也。按梁書。昭明生於齊中興元年。梁武天監元年。立爲太子。二年。昭明恰三歲。母弟簡文帝生。小字大通。時昭明年幼。仍居於內。東宮官屬。皆入直永福省。以款文証之。一相合。其爲蕭梁舊物無疑也。爰爲作歌。

昔得烏斯藏中佛。佛土中來敬齋祓。所嫌鑪鞴新鑄成。尙非象教初來物。王君仲瞿其名譽。前身當自彌勒龕。購得古觀世音像。身被繡緘頭翹簷。款鑄天監二年造。昭明太子歲正三。年深色黯質未改。但是斑駁非縷襪。惜哉王君愛塗飾。重與莊嚴失古色。添得黃金一百銖。論價翻輸舊時直。幸渠色新製自古。猶是六朝人手蹟。我思是

時釋教興。鳩摩羅什佛圖澄。譯經演法闡大藏。舉世版嚮如雲蒸。佛前大士尤顯應。不比羅漢諸小乘。罪人持咒枷鎖落。北齊書盧景裕傳。敗將諷唄刀斧停。宋書王元讓傳。兩足埋土忽免脫。一隙透穴俄猿騰。晉書載記。皆是皆耳目所震耀。至今尙誦高王經。何況梁皇信佛篤。親講華嚴高座獨。持齋戒殺麵爲牲。祖宗亦不許食肉。同泰寺中頻捨身。帝王有價可錢贖。奉佛必兼奉菩薩。固宜肖此慈容穆。真形圖旣出優闈。方物貢恰來天竺。想當宮監仿造時。比對西來元面目。敢同延壽寫照差。并非貫休夢見熟。煎金火用歐冶爐。刻像刀切昆吾玉。煉出金剛不壞身。不矜一寫而成埒。勅賜青宮虔供養。永爲儲君介景福。豈知淨業空精專。避災終未入四禪。文選樓高但主器。鸞鵠厭勝遽天年。後來青絲白馬過。荷荷索蜜更可憐。斯時大士竟安在。不來一救禍亂延。乃知像設亦徒爾。弗及一紙臺城蒿。我獨摩挲爲太息。重是千年尙完璧。雖非嚙紐追蠡鐘。也比出泥甓寶鐵。豈必有神爲呵護。世久自覺堪愛惜。來是長安本色旌。摹猶定武初刻石。

虎鞞歌 鎮安郡舊作。偶檢出錄存。

書生出作山郡守。不能令虎渡河走。德不足感且用威。下令捕之大合圍。士民談虎輒色變。聞當出獵心膽戰。乃檻羊作籠。虎不愛賤畜供。更掘地作阱。虎別走淺草徑。百金一虎購價高。經旬不獲虎益驕。向武州人懷阿玉。囊智出奇立兩木。下有機轉牙。上有鈎掛肉。虎來攫肉必觸機。機發鈎繩忽上縮。斯時鈎已吞。正痛領間鏃。四蹄早懸空。一尾徒倒矗。英雄遂無用武地。哮吼一聲裂眦哭。平明爭作異事傳。山中有个虎鞞。似貫柳。魴鱖懸。似帶繚。鷓鴣翻。得非此乃燕脂虎。黑章黃質文煇爛。欲學雲裾霞帔。仙乎仙。只嫌身似環肥吹不動。安得臨風瘦影。蹻蹻躡。扛來府廷等獻鼓。太守獎之賞破格。幾同陣獲飛空人。已斃毋煩縛太急。爾虎向來莫敢攫。不意爲口傷身亦遭厄。毋乃許褚凝。并少長康黠。亟命打鈎架木廣施設。誘入微纜盡就磔。只愁他虎又爲偃鬼告。繩索空懸不上鈎。

鎮江觀都天會

神會蓋始鄉人儺。黃金四目揚瑠戈。漢家原廟亦遺制。衣冠月遊長樂坡。城陽景王歲一駕。用二千石儀衛多。南朝蔣侯更出盪。張弓拔白聲驅魔。有元帝師泥銀繖。至撥鹵簿爲撝呵。流俗相沿遂成習。附會神鬼訛傳訛。潤州城東都天會。年年四月大報賽。七香亭導八摑輿。彩仗前驅一對對。金童玉女乘雲輶。夾以饒簫盜闖闖。刀矛浴鐵皆似銀。旗幟繡絲不用繪。列隊幾長十里餘。糜財不在萬金內。但求角勝肯惜費。富者破慳貧者貸。不知是何神。擅此大富貴。或言唐張巡。睢陽百戰捍賊塵。保障功在江淮民。或言一儒巾。夜遇疫鬼散毒氛。獨以一死活萬人。究竟未識何者是。徒令世眼滋擬議。我思天下祠廟多。原可不必一一考姓字。大凡人間所祭神。非卽此神來受祭。韓擒虎作閻羅王。未必至今尙占閻羅位。卽如關壯繆。血食遍海滋。安得百千萬億身。處處明裡悉親蒞。是必有衆神。分享牲牢饌。可知香火區。有同衙署地。三層殿閣尺五祠。一樣流官屢更替。倘憑祠額廟號辦僞真。竊恐頂缺冒名不勝計。都大神。來何途。我不復索稽神樞。但覺不呼能使萬衆集。必其靈爽能感孚。君不見。大官旌麾耀市衢。乃是官募非人趨。

### 題甘雨應期圖

今歲長夏無雨。田禾將盡槁。費中丞憂之。七月八日。率僚屬步禱諸神祠。遂連日甘霖大沛。今居秋成。豐收倍於往年。蘇守任君。命工繪圖。索余詩紀事。故題左方。

我不知蒼蒼者天。薄薄者地。至竟於人何關繫。洪範五行傳所編。毋乃附會非實事。及觀中丞祈雨兩應期。乃知天人果相契。今年盛夏愆膏澤。桔槔將吸長河竭。可憐農夫千滴汗。不博田間雨一滴。中丞對此憂心忡。芒鞋步禱元都宮。當其泥首乞民命。敢謂一念能感通。此意早達九閻九。作使列缺豐隆百靈走。鞭起癡龍鱗鬣飛。倒捲太湖噴郊藪。遂令江北江南盡沾渥。捷於調水之符。噴火酒。從此村坵企脚眠。準備烏鳥歌擊缶。蘇州太守繪作圖。濕雲一幅猶模糊。邀我題詩紀靈異。我親聞見詞非誣。迴憶歛陽曠爲厲。家家禱雨聲如沸。民禱不應公禱應。頗疑天亦太勢利。庸知萬民所繫岳牧身。一方災祥視其人。卽今迴枯起羸瘠。有目共見功通神。得不羣頌中丞。

作霖手。中丞卻復欲然不自有。

楊舍城北登望海樓

暨陽城北皆洪流。尙是江尾已海頭。何人好事欲窮覽。傍堦築起凌霄樓。我來拾級快登望。六十里沙爲外障。障外卽是滄波涵。果然一豁心目曠。曾披載籍徵典故。陰火陽冰莫名狀。橫爲摩竭豎難陀。鼓鬣揚鬚動千丈。幻影樓臺蜃市觀。寶光珠貝龍宮藏。方壺員嶠仙往來。奇肱飛車不粘浪。書生薄相那遇之。健筆韓蘇枉摩盪。是時卓午懸曦輪。潮氣上逼白日昏。不知是天是水還是雲。但覺混茫一色無區分。偶然萬斛舟如墨。一點滓入寥廓微留痕。欲駕鼉梁渺何際。江湖比作蹄涔細。中原水皆地所包。至此始信水包地。不識此水又用何物包。六合以外真難議。頗聞近日萑苻萌。連踪結隊紛縱橫。劫財買舶略無忌。漸恐登岸殘村氓。安得三千水犀弩。鯨鯢戮盡常澄清。

問魴魚

問魴魚。爾旣雋味供人食。當使老饕快餽啜。胡爲肌理如凝脂。鋒銳似叢棘。鰓生竟作魯宗道。骨鯁令人有難色。本謂甄針莫敢坐。誰料領珠終被摘。饒撰入口費剔搔。齒舌無功兼手撥。滿堂無不賞鮮腴。卻但畏威弗感德。魚也聞之笑。此論非通人。名花品不許褻玩。美女姿豈輕橫陳。吾生自有味外味。正恐鹵莽一嚼不見珍。故教芒刺在背稍齟齬。欲令徐徐咬咀方識真。顧乃吹求到細故。欲去槎枒滑喉嚨。知君原是一腐儒。只合終朝喫豆腐。

醉蟹 泰州人甕貯甘醴。投蟹於中。聽其醉死。謂之醉蟹。味極佳。

霜天稻熟郭索行。雙螯拗折香珠杭。經旬飽啖腹盡果。團尖臍結脂肪盈。忽然被擒請入甕。方憂炮炙渾身痛。誰知甘醴已滿中。送入醉鄉黑甜夢。醉鄉豈怕滅頂凶。鋪糟啜醢酒池中。既非人彘投廁溷。何必醢雞瞻吳穹。沉醉三日不復醒。米汁味已透骨融。食單方法有如此。物不受痛人得旨。休悲彭越遭醢冤。且幸羲之以樂死。

放歌

我不能引長繩繫住西飛日。又不能抽快刀斬斷東流水。徒負昂藏七尺身。實只太倉一稊米。胡爲前望千古後。願萬年。欲作擎天拄地一男子。少年鼻息衝雲漢。唾手便思拾青紫。果然館閣取次登。意謂星辰即曳履。忽焉驅馬出春明。兩粵滇黔走萬里。從戎又想圖麒麟。按部亦曾冠獬豸。序選不及待。歸仍鑽故紙。撐腸五千卷。縱目廿二史。復將三寸毛錐尖。妄擬一柱中流砥。統計生平履徒業。一波未平一波起。我觀古人志專壹。強吳者員霸。越蠱用盡一生心。只了一事耳。誰教東馳西騖多歧塗。貪如奪標棄如屣。毋怪百能百不能。略嘗之味鼎染指。如今衰老始知悔。氣矜之隆病良已。非無一言半語傳世間。未必百年後尙掛人齒。回思鄧林棄杖逐日時。枉費奔忙喝不止。噫嘻乎。生世甯易得人身。爲人甯易通文理。可惜黃金擲虛牝。錯已鑄成錯到底。

紀事 六月下

浙東舟山多海澳。海賈經由必收權。向來清晏少萑苻。近數十年始有盜。初但壟斷不澤竭。什二抽分盜有道。其渠死後羣黨橫。劫財殺人日逞暴。奸民趨若附火蛾。賊艘遂至數百號。一艘百人百艘萬。實繁有徒據津要。直從水面別開國。竟視估舶同轉漕。樓船將軍空駐防。水師入海已眩掉。伎倆久爲賊所窺。嚇以虛聲反被笑。駸駸振柁欲登岸。往日孫盧輟將蹈。今年六月起趨風。十日不斷聲大嘯。鷓母鼓浪掀高穹。天色晦冥日不耀。半空疑有蛟龍鬪。千里但聞神鬼譟。可憐賊艘難習流。至此亦把天妃叫。檣傾檣摧碎如粉。萬命盡入滄波浩。十五巨鼃食不盡。飽到鯨鯢也懼跳。有得脫者十二三。縛板回來伏巖嶠。不死於水死於刑。一一就擒戮諸纛。從此妖氛當稍甯。縱有漏遺已衰耗。若非天遣風濤誅。竊恐今秋有閩鬪。獨念天心方厭亂。東南已叨慈旛霽。秦蜀蟻賊肆剽屠。西顧亦應垂痛悼。豈其能水不能陸。只殺蛟鱉遺豺豹。何不作使萬陰兵。悉殄陸梁靖區隩。

紀夢

閩罷邸抄正午倦。忽夢選官戴武弁。西睡寇盜紛如麻。仗節專征往靖亂。肘懸雙紐黃金印。腰插三稜白羽箭。虎旗開道十二街。鼙鼓震天五百面。行間紀律陣演蛇。馬上驍雄手接雁。聲威大振刀槊鳴。號令一施旗幟變。出鞘

劍氣寒斗星。浴鐵甲光明組練。巢車望賊最多處。指揮三軍各爭先。短兵近接剗作齧。巨礮遙轟疾於電。窮追不暇掘竈炊。生嚼俘囚當朝膳。乞降悉就糜長纒。旅拒誰敢張空拳。割賊頭顱祭國殤。斂賊屍骸築京觀。鴟張豕突一掃空。依舊江山景清晏。歸來獻捷絳闕前。免胄千人萬人見。形容圖上凌煙閣。策券頒來紫宸殿。書生到此真足豪。正欲作詩紀酣戰。無端栗爆折腳鎗。驚破鏡簾大凱宴。僮奴恰報煮藥熟。來問衰翁可下嚙。

曉東內兄素強壯無死法也六月中左掌忽患一疔醫者但治以解毒散不急拔其根遂蔓延四布已而腕間潰成一孔膿血涓滴不斷馴致滿身氣血盡從此流盡而歿嗚呼事之類此者多矣爰再作詩哭之

目識一丁掌邊伏。焦釜漏舟救宜速。庸醫惟恐痛刺膚。但劑清涼期解毒。豈知杯水滴車薪。翻致燎原不可撲。初看腫硬過臂肘。旋覺薰蒸上頭目。未幾腕底潰成孔。如覓引泉來續續。紅紫者血黃者膿。晨夕涓涓潰牀褥。遂令遍體精氣神。盡化漿流無底谷。命脈微如將斷絲。膏髓涸成久枯木。親朋猶來問無恙。病已不支俄續屬。嗚呼。癩疥初生藥誤投。癰疽既潰手空束。世間萬事類如此。事過追思豈勝哭。

題稚存萬里荷戈集

人間第一最奇境。必待第一奇才領。渾沌倘無人可擊。不妨終古憺不醒。中原一片好景光。發泄已盡周漢唐。所未泄者蠻獠窟。天遣李白流夜郎。又教子瞻渡瓊海。總爲僞昧開天荒。伊犁城在西北極。比似炎徼更遼僻。烏孫故地藍裘鄉。誰咤何曾讀倉頡。近年始入坤輿圖。去者無非罪人謫。一聞嚴譴當出關。如赴鬼門淚流赤。豈知天固不輕與。若輩紛紛何足數。要等風騷絕代人。來詢鴻臚舊風土。稚存先生今李蘇。狂言應受櫻鱗誅。熱鐵在頸赦不殺。廣柳車送充囚徒。天公見之拍手笑。待子久矣子纔到。鍾儀故是操南音。斛律何妨歌北調。從此天山雪嶺間。神馬尻輿恣吟眺。國家開疆萬餘里。竟似爲君拓詩料。即今一卷荷戈詩。已如禹鼎鑄魅魍。狂風捲石落半嶺。堅冰鑿梯通九遠。人驚鵬攫抱頭窺。雷法龍鬪飛輪馳。生羌變醜或剩腿。降夷化魚皆游屍。皆詩中隨手拈作所記。錦囊句。諾臯狡陋甯須支。翻嫌賜環太草草。令威百日歸華表。倘更留君一二年。北荒經定增搜考。憶君惟恐君



歸邊。愛君轉恨君歸早。

湯樸齋邀飲紫藤花下相傳東坡手植物。

顧塘橋館藤花開。相傳坡公昔親栽。主人重是名賢蹟。邀客共醉黃金壘。我思公歸自海外。五月真州已暴下。荆溪買宅旋折券。始到此間做寓舍。入門未久即上仙。那得復有種花暇。只因旅宿幾晨昏。此藤遂傳手澤存。七百年來屢易主。藤與公名共千古。孤根不肯曲九泉。借用坡咏上乃屈蟠半空舞。皮皴腹裂老不僵。化作瘦蛟戰風雨。過客猶思拾落英。居人不敢議斯斧。想見深宵月白時。魂兮歸來尙摩撫。即今正值花開繁。鬢髮環珞朝朝帶。猶疑帶公舊文彩。來吐爛熳催芳尊。名流草木皆可敬。况此名隸大雅門。卻慚咫尺為鄰並。不敢來爭謝德門。相傳僅三十步。

偶有遺忘問之稚存。輒錄示原委。老夫欣得此行秘書矣。無以為報。擬質一事即勞以酒一壺。戲書此為券。年老苦健忘。又懶尋故牘。每當數典處。搦管證兩目。邂逅洪景廬。便便五經腹。我欲納履質所疑。惟恐括囊秘弗告。豈知華鯨待撞蕤。直為亡羊追捕足。憑君胸羅儲侍多。供我耳食取攜速。共誇到老尙奪強。誰識從旁有刀捉。快哉得此行秘書。讀萬卷如為我蓄。安世能備三篋亡。張巡過記一城熱。予取予求不汝瑕。何以報之心愧。願欲將文通殘錦贈。君才自有天機欸。欲作曹邱寸舌揚。君名已播風輪軸。聊援酒甌借書例。一事勞以酒一斛。只愁醉後發狂言。笑我南華不會讀。

石女歌為翁恬情作兼柬佩香

化工爐鑄誰能識。一樣胚胎搏活脫。偏有金剛不壞身。幻出嫵媚鎖子骨。黃山谷詩。金沙灘頭鎖子骨。不特怪錄。禁坑空期有路通。台洞偏苦無門入。可惜修眉曼睩姿。外是玉人中是石。生小揚州邗水濱。會隨阿姊入朱門。其姊為和督妾。縵緗插架閒供讀。紈綺裁衣儘稱身。留取待年嬌養慣。銷金鍋裏九年春。自知不中採封菲。一片雄心終不已。既負奇軀要出奇。芙蓉面粉從今洗。會聞潘姥稱將軍。揚大服妻。見北史。何必木蘭讓男子。遂擬巾

幘改衣冠。改作男子裝。習騎射。夜習韜鈴畫矛矢。綵裙脫去著繡襪。纏足放開穿革履。公孫劍器蟠螭弓。高歡娶嚙嚙公主。射能

北齊書。見跨馬疾馳三百里。破賊思隨娘子軍。守城好助夫人壘。誰知有志竟無成。朱門忽傾阿姊死。和督病歿於朝

南軍中。其姊聞南還故里已無家。蹤跡飄零似落花。已作健兒縛袴裙。肯同商婦抱琵琶。只有空門堪送老。擬之。卽自經。

飯淨業誦楞伽。一朝邂逅吟紅女。莫逆論交水投乳。小姑居處本無郎。正少孟光來奠廡。畫船同載過江來。茗椀筠爐共環堵。佩香招與同居京口。若論平日粗豪氣。也愁變作胭脂虎。豈知風雅有風緣。已自好文不好武。巧思原工織

錦機。師資更得修月斧。閒陪拈韻墨花鮮。兼學畫蘭風葉舞。對局圍棋午一枰。分燈繡佛宵三鼓。天上嫦娥暗羨他。廣寒無此好儔侶。從此清涼過一生。不知何物是風情。遂把俗緣勾一筆。悟情兩字換芳名。我來相遇京江滸。石不能言乃傾吐。本非望夫所化成。甘此磴磴竟終古。我聞石亦有點頭。未必胚胎盡頑魯。譬汝豐肌弱骨身。一旦改粧卽儉楚。試學女媧煉石功。凡有缺陷皆堪補。異時倘應長吉詩。石破天驚逗秋雨。

楊桐山招飲肴饌極精賦贈

老夫昨日已不飯。爲有今朝美肴饌。果然雋永出郇廚。入口幾疑易牙撰。色潔先招目食饞。香清更引鼻觀羨。斯須舌本溢芬腴。咬咀未忍遽下嚙。世人競詡開華筵。廣徵水陸窮蹄筌。可憐烹飪不得法。枉費何曾一萬錢。豈如君家食單好。至味原不逾肥鮮。同是一題作文字。妙手獨抉題真詮。遂擅个中三昧秘。其味可領方難傳。繫余不比窮杜甫。冬菹土酥便輕許。也會喫過五侯鯖。等閒飽炙不足數。君獨能教旣老饜。酸鹹想見手親調。爲我一番捫腹快。費君幾夕用心勞。卻愧儒餐本草草。礪齒曾堅菜根咬。爨底勞薪雖識味。家常那得此精好。笑比江陵張太師。今日吳庖纔一飽。

稚存往甯國時會約同遊黃山邊余不到歸以負約相嘲和韻報之

孤居足不出鄉土。那得一豁塵襟腐。自君前歲塞外歸。勁敵相逢互客主。過從不覺步履頻。治具甯嫌盤格粗。有花必酒酒必詩。正是酒龍遇詩虎。意珠不畏驪頭探。思縷直傾蠶腹吐。始知草聖運腕神。端仗劍娘鬪眉嫵。削簪

樂事此焉最。冠蓋西園何足數。無端飄風吹萍散。聯轡到門君出戶。爲增山落擬雲篇。拋卻鄉園行藥圃。臨分約我黃山行。覽勝歸來過端午。老夫已辦宿春糧。欺與忽停發船鼓。遠招諾責時譏嘲。塵壘致師將覆楚。淋漓大篇五百字。咄嗟立辦一炊黍。公然欺我老無力。謂此衰孱勇難賈。憑陵直欲以氣吞。三寸筆鋒當刀斧。豈知我昔亦壯遊。歷險探奇不知苦。從戎會到日南天。親領羌羣狎犢齒。高黎賈山一萬丈。五十三參等堂廡。仰瞻星斗手欲捫。平視華嵩首俯俯。三休三上拚臂腰。一掩一重爲肺腑。比似天鄣六大峯。各有玲瓏碧虛府。回鞭更踏五管東。羅浮秀發亦罕伍。蓬萊左股夜失卻。風雨漂來止其所。天雞一聲海日紅。不拗扶桑慚不武。飛雲終歲不見頂。飛雲峯爲羅浮最高處。終歲雲封。故不見頂。井陋黃海鋪綿補。凡茲絕境悉親歷。眼界奚止小東魯。興來不禁嘯蘇門。狂甚那肯暗河渚。是時君纔課童律。一穗寒燈瞰饑鼠。如今才名雖蓋代。何得便將老成侮。勸駕偶發王猷興。停車亦豈臧倉阻。倘因負約輒見譏。勢必尾生死水澣。已拚頭地讓君出。那把降旗強我豎。君子不欲多上人。有才安得獨千古。

呼匠刷印所著詩文戲作

恨不借祖龍火。燒盡好詩獨剩我。恨不借黃虎刀。見明史流賊傳。殺盡才士讓我豪。笑問此心報不報。要顯我長幸人短。果能置身萬仞岡。何山敢與爭低昂。乃欲臨深作高竈。固知所挾本淺淺。歸田已歷三十年。著書未滿二百卷。余所著陔餘叢考四十三卷。廿二史劄記三十六卷。臨北詩集四十四卷。唐宋以來十家詩話十卷。皇朝武功紀盛四卷。雜記四卷。共一百四十卷。

可謂勇兄老而善睡頗以爲苦余方苦不睡不意其轉苦睡也戲贈一首

人生何者是老福。能食能糞能睡足。見明史方技傳。緊余老境日就衰。衰微尤在眠不熟。眠不熟。百苦生。暗數一更又一更。翻似聖賢養心法。虛靈不昧常惺惺。初焉手腳熱。旋復昏舌渴。曾無淑女繫寤思。輾轉反側竟終夕。朝來如在雲霧中。扎闌枉祈目交睫。羨君黑甜味獨長。駢駒時入華胥鄉。午簾弗驚幻蝶幻。宵衾弗覺荒雞荒。倒身甘寢百疾愈。此天私厚俾壽康。胡爲翻恐涉昏情。欲作魚鱸夜司鎖。我聞春困堪賣爐。堪躲。邯鄲枕。借不能。希夷方。覓亦可。君不願作瞌睡漢。去撥狀元五雲朵。何不結柳爲車。縛草爲舸。將此睡魔來送我。我當移與君對牀。分君三

昧北窗涼。君如飲醒酒湯。我如嗅返魂香。減君鼻息。輟雷吼。省我目眈。巖電光。庶幾嚮晦。晏息各守常。只愁同林。又各夢。不能隨入槐根洞。臥榻旁。空有睡人。仍自獨醒聽蟻鬧。

題文信國致永豐尉吳名揚三札

名揚。金谿人。官永豐尉。信國勤王時。辟署幕尉。奏補江西制幹。兼禮兵部架閣。名揚專任軍糧事。此三札。皆催糧書也。吳氏載在家譜。裔孫蘭雪。另梓以傳。爰題其後。

魯公乞米帖。但爲舉家艱旅食。充國屯田策。事可緩圖。非至亟。信公此札。乃救亡。欲飽戰士。速勤王。誰其任之。永豐尉。不惟募糧兼運糧。是時義旅雖烏合。元戎意氣方鷹揚。手書籌餉代官檄。時危豈論官低昂。木牛流馬未暇製。陸則任輦水則航。千五百貫官會子。早喜頓宿能供張。書中發一千五百貫官會。充夫腳等費。誓收殘疆完破碎。實賴同志勤勩。空坑戰敗散如雨。何處趙家乾淨土。可惜當時衆幕僚。姓名大半草木腐。寺井沈函鄭所南。釣臺擊石謝臯羽。宋史忠義已漏書。吟嘯集亦未及數。鄭退曾謝期二人。宋史及文山指南吟嘯二集。皆無其人。何況問關共事人。獠狻噉盡點鬼簿。此札吳家獨何幸。鬼護神訶鏗家請。遂令區區一縣尉。長附丞相共千古。想見荒天野哭時。手抱遺篋淚縷縷。經年名刺字懷袖。一寸蠟丸書納股。酒悲時復一開看。尙覺毫端血花吐。白翎雀調世已彈。朱烏味詞心獨苦。精誠所結不消蝕。又有裔孫起摩撫。紙敝雖同晉帖臨。原札已失。翁覃溪舉士。以意仿寫。文存不待東詩補。傳家此卽教忠書。故應數典不忘祖。

戲題魁星像

北斗爲文昌之府。其第一星至第四星。總名魁星。決科者咸乞靈焉。世遂就字象形作鬼跳躍。爲魁星像。近日村劇又增一手執筆。一手執銀錠。蓋取必定得雋之意。爲赴舉者發佳兆也。余薄有詩名。生事亦粗足。人遂以魁星目余。謂有筆能作詩。有錠可致富。一時竟傳爲口實。爰賦以解嘲。

老夫顏狀縱不笑。何至被人擬作鬼。世傳魁星主文衡。就字象形出怪偉。曷鼻魃顏見者驚。度索山中一巖壘。象

形今更兼諧聲。一筆一錠兩手擎。意取音同必定字。巧爲赴舉兆榮名。但俗無稽堪笑。歌無端混號忽到我。謂我才高家又智。班管握右白蠅左。書生眼孔真可憐。非指喻指竟妄傳。欲將黔婁侶猗頓。更遣貫休充謫仙。東坡謂李白集中笑矣乎等詩。皆五代時貫休等所爲。我縱有筆堪脫穎。不過著書鉛槧冷。豈能造鳳樓。扛龍鼎。最清切處七扎揮。大制作來一椽挺。我縱有錠可代耕。不過賣文銖兩輕。豈能鑄成劍。積滿籬。多比孝傑萬錠庫。高於齊淞八尺瓶。浪得虛名翻自喜。生已爲神不待死。聲望雖無北斗高。位置恰鄰東壁邇。幸非盜魁大澤鄉。亦豈黨魁甘陵里。一个搦管持筆者。竟上穹霄垂玉李。賢人聚爲陳寶臨。少微隕關戴逵恥。由來郎官應列宿。安知我不麗五緯。他年弄假倘成真。文章司命掌青紫。紫府雖讓韓侍中。綠袍亦儕鍾進士。樂得人間衆秀才。瓣香奉我虔拜起。

學門喜晤王述菴司寇值其八十大慶作詩稱祝兼簡錢竹汀宮詹

垂老故人無幾見。邂逅相逢適我願。到蘇聞公在虎邱。急往相尋艇如箭。款門不暇敘寒暄。先認五年別來面。喜公書骨倍峨嶒。頤頰增長一寸半。視聽兩官雖漸廢。聲如洪鐘聞者戰。高名動人戶屢多。竟日將迎弗告倦。始知天子老健身。特教歸作靈光殿。繫余年亦七十七。幸附殿兄列行厲。寓公況有錢穆父。齒序亦堪後動殿。竹汀少一朝都聚吳趨坊。共詫老人星出現。看取江南三老圖。明日家家畫圍扇。

題竹初自述文

趙岐斷墓石。司空誌生壙。竹初自述文。亦以代家狀。讀之見其真。自處尋常人。一語無矯飾。詞卑意彌瀟。古來三不朽。皆出常人手。祇此擇地蹈。循牆走。身不踰檢閑。官不曠職守。得時可奮幹濟功。不遇亦作釣游叟。豈必鼻息衝雲漢。脚步踏星斗。穿溟滓界透險重。遊罔闔鄉隘州九。然後魁奇絕輩流。倣詭賦儕偶。君今安其常。乃更謙而光。若論名行及才藝。我覺此文猶未備。學有兄在專師資。謂令兄文產比仲多均活計。待仲兄篤出無官謗民歌。歸有去思人墮淚。辛鄞縣以餘事更兼風雅宗。詩思文心兩精銳。工書善畫各入微。學佛求仙並深契。倘得巨手爲鋪張。將垂史乘芳。更炳金石光。君乃不乞韓歐陽。并不假趙子昂。董其昌。自搦一枝雞毛筆。直寫素履無避

載。想見寒窗夜深悄。熒然一燈含毫逸。一念不將彘影欺。寸長未敢竿牘表。此卽供狀到閻羅。不用減增另具稿。偉哉此正非常人。只把常人之事了。

舟泊汜光看孟蘭會放湖燈

一燈兩燈千百燈。滿湖熒煌炳繁星。孟蘭益借佛毫相。放大光明豁沉冥。人燈放入鬼界去。陽火變作陰燐青。是時湖天夜昏黑。黑中正顯燈光出。一燈一鬼爭來擊。涼燄不愁炙手熱。暗飛忙似萬點螢。自照羈魂欣解脫。漆天墨地枉死城。今夕朗開覺路徹。夜叉羅刹不敢攔。爲有一道紅光赫。魚龍不知徒驚逃。何暇燒汝頭額焦。甓社有珠恐被掣。老蚌亦復閉口牢。迷津筏渡有如此。萬荷花裏歡聲囂。斯須燈散了無跡。皎月當空一輪白。

楊桐山具精饌招飲賦謝

安得三百六十楊桐山。使我日日旣美餐。不然一百有八十。亦可隔日快鋪啜。老夫雖非飲食人。每遇盛饌亦登珍。且勿論豹胎熊掌猩猩脣。鵝增四腿鼈兩裙。但從蜀黍選肥美。昔人烹飪有絕技。濃乳蒸豚爛。熾炭炙驢死。駝臍脣入饅。雞羽精擇米。此皆豪門矜秘方。至今談者津溢齒。君并不仿古食單。自出新意調鹹酸。所用不過飛潛走。獨取精魄遺蹄筌。文火武火一晝夜。恰如郭虛舟鼎燒金丹。遂使滿堂動色到。屬饜弗顧脹斷腰帶聲。可惜一年一召客。不作鄭莊勤置驛。令我數日之前早朵頤。數日之後尙流沫。從此腐儒餐。入口總不適。爨婦被譙訶。饜子受鐫責。都恨楊家廚。以巧形我拙。一笑大烹養。翻爲衆怨集。君欲息此謗。只有朝朝開宴席。

午節後二日方慕雲明府招同劉檀橋中允莊迂甫贊善洪稚存編修蔣立菴楊星園兩太守龔稼堂州牧蔣瑩溪別駕陳春山大令泛舟看競渡卽事

常州龍船天下無。今年膩雨愁沾濡。天憐措大作豪舉。雲端忽翥黃金烏。主人發興大召客。十千高價雇舳舻。長魚大肉咄嗟辦。水晶之盤白玉壺。客來大半雙鬢皓。最少亦已蒼髯鬚。俄看三龍蜿蜒到。震天鐃鐺轟前驅。龍身幻出錦鱗甲。金支翠羽紅珊瑚。樓臺都攝寶光內。化作貝闕煙模糊。遊船彙集競追逐。奮力似欲爭驪珠。千艘萬

柯無一罅。辟道莫敢磨。發孤洛浦佳人。簾影閃。扶風豪士。酒氣粗。老顛亦復風景裂。醉倒不倩旁觀扶。昔人一藥動千古。采石仙李黃樓蘇。杜牧水嬉亦兒戲。竟共屈子傳江湖。吾儕此會頗酣縱。他年可亦傳畫圖。且食蛤蜊不知許。當饗而嘆毋乃迂。

古玉琰歌。刻玉爲蠶形。古人斂屍。用以壓舌。宣和博古圖謂之琰。蔣瑩溪出以見示。索詩。

蔣侯示我白玉蟬。幽光逼人毛髮寒。來從千年太陰裏。斂屍曾歷舌本乾。殘骸敗齒爛成土。獨此血漬紅斑斑。我笑古人太癡絕。一副革囊已破裂。何妨速朽化泥沙。乃競飾終填窆窆。縱有虞瑄夏瑋瑣。詎返遊魂起僵魄。徒令發邱郎。掘墳賊毒手。交相碎枯腊。淒涼金盃出人間。狼籍珠襦棄道側。地下長眠倘有知。懷璧其罪鬼應泣。胡爲古癡君更癡。不祥之物翻稱奇。傾囊購得自矜寵。如削廁簡擲面皮。昔舍死人口。今弄生人手。將生替死引親膚。未死先同骨已朽。身佩幾優燕玉溫。魂來或索弁瓊取。由來寶物不終淪。特借暗投鍊形久。多年凶穢殉髑體。一旦晶燧燭星斗。勸君他日勿附身。恐又發塚不脛走。

稚存見題賤照有十萬黃金之嘲走筆戲答

秀才眼孔本不大。墮十萬青錢便塞破。青錢忽變作黃金。驚喜橫財所望過。得毋折鈔非實支。大似考賊竟懸坐。若果腰纏如此多。跨鶴應愁半空墮。古來藏金誰最豐。六十匱記安漢公。武陵王懸一千餅。張孝傑貯百萬錠。彼皆倚勢哀斂多。送使精鏐堆作廩。繫余出身故寒陋。得官稍藉俸錢救。趨朝會耐冰一條。出守但矜風兩袖。歸來不及陸賈裝。問舍求田俱未就。老年生計略可支。不過賈文錢。潤筆資。作碑尙須斛斯索。酬繚安有裴相貽。既不

能負。眊帶鈴劫掠廣。又不能點鐵鍊鉛變化奇。何當橫加金夫號。祇拒布地名同馳。今試與君較歲入。我僅錙銖營什一。君挾大名驚世人。廣致賂遺來絡繹。乞書幣湧李邕門。問字酒填揚子宅。居則坐收海賈餽。蕭子雲出則

滿載汴京獲。元遺山詩。大船。元遺山詩。大船。輿載汴京來。築室已規元暢樓。爲園更運到公石。君新構精舍。極。漢上足穀翁。江南多牛客。

總作陸莊供取給。是我有限君無窮。黃金早向君家積。想應怕我爲劉叉。先發制人防攫奪。

余既答稚存黃金之嘲乃又有詩來索戰再作長句報之

我昔有賒願。可惜不如算。欲屈徐凝代治庖。日具精饌饗老饕。徐肇瑣通判。食品最精。欲屈蔣誦作狎客。時聽劇談供笑

啞。蔣心餘編修。善談謔。二事俱不遂。誕語竟付空。老年被人稱富翁。會計正少研桑工。昨得君詩意似妬。憑空坐我賞

財數。將無作有揣囊金。以一爲十彷彿布。報捷書。以一爲十。見魏書。未免司空城旦書。卻似度支上計簿。向來只服君能

詩。不謂才兼可管庫。我將請司甲乙帳。朱出墨入煩記註。君勿笑聘錢。一囊僅錙銖。我尚有燕公。未鑄三十鱗。君

勿笑東修。十艇空誑腸。我尚有衛公。未食一萬羊。行將再積元。相胡椒八百石。恣君擣香篩辣調膾炙。更置循王

田租六十四萬斛。聽君饌玉炊珠果其腹。平生徐蔣不可招。得君爲我掌記亦足豪。一一代插紅紫標。省得繞牀

阿堵損我高。君亦明知此譎語。姑妄聽之口相許。劇緣來就孟嘗君。試問積鏹在何所。枉見金夫不有躬。闕坐空

倉作飢鼠。

憂旱

今年天作去聲。奇文章。大開六合爲弛張。一雨輒經數十日。一晴又歷匝月長。可憐麥收已大歉。萬命只托新栽

秧。雖有長河足灌漑。踏車先要飽糗糧。轉轡饑腸枯棹槳。枵戰醉盡白汗漿。田高於河僅尺咫。餓不能屏安陵風。

黃梅至今兩月耳。憂潦忽改憂旱傷。乃知天公好奇奇不得。乾啼濕哭俱爲殃。不如手筆仍故常。無恆雨亦無恆

陽。

逃荒嘆

男拖棒。女挈筐。過江南下逃災荒。云是淮揚稽天浸。幸脫魚腹餘瘡疔。百十爲羣踵相接。暮宿野寺朝城坊。初猶

倚門可憐色。結隊漸衆勢漸強。麾之不去似吠犬。取非其有或攘羊。死法死飢等死耳。垂死甯復顧禁防。遂令市

闌白晝閉。餓氣翻作凶饑張。黔敖縱欲具路食。口衆我寡恐召殃。側聞有司下令逐。具舟押送歸故鄉。卻望故鄉

在何所。洪流降割方湯湯。



擊鼓歌戲作

南海廟會見銅鼓。獻自林邑番王府。曲律襲頭壤其一。其一留鎮神祠古。雄觀今復得祥金。石綠黛青光益巨。而徑三尺圍九尺。陽凸陰凹紋可數。彭亨勾列六墩墓。三足怒蹲努其股。援袍一擊奮袖來。頭如青山手如雨。空腔不血虛牝通。艦腹無喉大音吐。鏗鏘幻作靈鷲鳴。想見爐錘烹鍊苦。相傳葛相南征時。鑄鼎象物鑿蠻土。得非中有靈瓠魂。收掃嘍囉憑乃祖。當年粵帥韓襄毅。懸之戟門肅儀矩。劉顯搗巢都堂蠻。獲九十三更威武。腐儒竄復慕勳名。鑄錫軍前效貌虎。惟聞鼓聲宏者易千牛。我將富過弦高賈。聽人呼作多牛翁。擊缶歌呼醉起舞。

題忠節金正希先生遺像為其族孫素中太守作

昔從燈窗讀公文。浩氣上薄秋空雲。今從畫卷見公像。蛾眉闔袖書生樣。書生何意好論兵。正值時危國步傾。陳鷹斜痛戰車覆。高勾驪輟使節行。投効歸來退閒久。南渡屏王又出走。故國招魂史憲之。新朝易帥洪亨九。黃山白嶽集鄉兵。一彈丸地為誰守。包疙疸竟願裹瘡。毛葫蘆皆甘碎首。見金元二史。皆鄉兵起義者。已聯家志結成城。不藉甲囊懸在肘。明知一旅事何成。猶欲挽天憑隻手。蚍蜉蟻子絕援師。襍草草根充宿糧。五坡嶺遂執文山。生祭無煩炎午酒。事隔滄桑百六年。重蒙昭代易名傳。狄家能保梁公像。尤見清門有後賢。

哭王述菴侍郎

前年遇公劍池石。正值懸弧慶八秩。喜公夙具壽者相。髀骨距頤長一尺。方冀泛舟結近遊。豈期哭寢成長別。憶昔同官京國時。僦舍寄園各半宅。余與公同僦贈天羽。聯吟聲每應隔牆。照讀光常分鑿壁。醉書不惜墨濡頭。白名。公齋。綠樹陰。中有兩人履齒迹。無端演徵有兵事。共作征南幕下客。晨炊苗米。苗米。見宋史。戰互以筆為舌。蒲褐山房。漸矛頭。夜草軍書磨盾鼻。書生履險雖陸危。好友偕遊亦酣適。我旋按部粵江清。公又從戎蜀山僻。矢石叢中過六年。身最艱勛名最赫。下臨絕。甄萬丈深。上劈危。礪一線窄。馬蹄雪踏人頭紅。鹿角砦浮燐火碧。鬼門關上幾度經。僊倖孱軀脫死籍。遂佐羣庭掃穴功。豹子羆孫盡俘獲。奏凱歸京大策勳。屢擢崇班到槐棘。是時我久臥

菰蒲。公亦繼歸勤著述。立功纔了又立言。壇坵東南來佔席。春江花月常往還。邂逅一尊話曠昔。江天落落幾作家。袁蔣王錢皆巨擘。同是千秋有數人。缺一可憐難再得。十餘年乃盡凋謝。剩我與公兩頭白。晨星碩果倍覺珍。百里相望雙突兀。殘年有伴差自壯。相倚爲強作耆碩。何當公又騎箕去。天不慙遺催召亟。後生雄駿豈不多。非我素交終膜隔。宵來或可通夢魂。月落猶疑照顏色。從此人間無故人。獨立蒼茫悲影隻。

八月二日天甯寺旁巽宮樓火。內有四楠木柱。皆萬年物。亦焚。最可惜。

常州城外古巽宮。宮樓踰過佛殿崇。殿高九丈樓十丈。忽然火光照城中。是時八月旁死魄。麗譙更鼓纔裝擊。乍驚朝暘何太早。又疑晚霞豈在東。趨觀乃知此樓燬。利竿突兀招祝融。籊籊片火倏透頂。卻又倒熱重簷重。遂成洪爐韞熾炭。躍冶靡不歸銷鎔。千層瓴甃落遍地。萬株檣櫓飛滿空。家家煖思涼露坐。處處熱逼熏籠烘。地高燄烈速有耀。十里以內皆鮮紅。四十三龍救不得。救火具。名水龍。城內外四十三龍齊到。掣水五丈力已窮。下方猶疑照天燭。其勢竟欲燒蒼穹。幸而直上不旁及。招提得保五百弓。不然諸佛衆菩薩。頭焦額爛逃何從。樓鐘大於五石瓠。火中色似赤董銅。拉然一墮成死鐵。啞無聲不震耳聾。最可惜者四楠柱。被焚香滷毘嵐風。大五十圍長百尺。何論漢柏秦時松。此是盤古以前樹。生於混沌長洪蒙。當年永樂神木廠。得一已誇神運功。海幢寺中亦一幹。廣東海幢寺。亦有一柯最鉅。獨木難以作棟隆。可知奇材世所罕。章亥亦恐尋無踪。擎天拄地乃有四。薄海內外何由逢。茲寶吾鄉一大寶。虞瑄夏璜價敢同。層樓一炬細事耳。豈知中有太古恫。萬千年物一朝燼。想是劫數應告終。長成何艱摧何易。使我憑弔心忡忡。

兒童既爲余暖壽遂演劇連三日即事志感

今朝兒曹大合樂。饗我八十懸弧辰。兒童歡笑婦女喜。爲有綫段百戲陳。瓊筵排日列樽俎。先謙官長次縉紳。下逮里鄰衆交舊。敢以章布嫌非倫。居然歡場大富貴。滿堂羅綺爭鮮新。豈知儒家作豪舉。半出假貸東西鄰。屏風借得錦步幃。地衣賃來紫茸茵。濁醪恐露牆過酒。精餠謬謂蠟代辦。終非出諸宮中物。捉襟輒復肘見痕。東堂合

射本不易。見晉書。劉乃妄欲以富飾策。腐儒積貲有幾許。幸獲溫飽已奇人。譬如奔馬宜稍勒。勿使力盡蹶絕塵。胡爲拚竭數年蓄。博此數日快意辰。獨不見陽陶轉喉肖歌哭。幡綽弄舌假笑頰。擎掌臨風胡旋舞。反腰貼地倒刺身。正當歡娛忘夜永。恨不窟室酣連旬。紅袍一出戲鼓歇。霎時過眼如鸚輪。吳歌楚舞復何在。依然篝燈一種寒相親。

除夕戲作

巽宮樓。晉天福中所建。至今將千年。忽燬於火。余年衰老。世頗以魯靈光目之。得非余玉樓赴召之兆耶。今已歲除。居然無恙。既得免於榱崩僑壓。竊又自疑人微樓古。恐不足應此劫灰。則又將貽笑於求死不得也。

巽宮樓于我干何事。只因人皆推我魯靈光。便覺古物有關繫。此樓已歷宋元明。我不三老亦五更。儒冠楚剝兩高壽。相與似有瓜葛情。傑構一朝燬。得非應在青年英。巫陽雖未召。祝融先催行。嚇得呂巖爐底伏。深恐遭劫當遯征。不免預治狸首棺。馬鬣瑩。顧視日景飾巾待。知是先甲是後庚。無何歲酒飲過最後觥。仍無笙鶴來相迎。乃知樓自樓。我自我。不得牽連一場火。戴逵何與少微星。枉自驚惶抱頭躲。且勿慕虛名。聊幸留此生。丈夫不朽自有在。豈必攀附古蹟垂徽聲。君不見宏景層樓高可眺。子瞻黃樓遠有耀。至今樓圯名自傳。何至求死不得被人笑。

蚊有不鳴者蓋鳴者雄不鳴者雌也戲書

白鳥營營聚成陣。響或如雷滿堂震。豈知中有不鳴者。猝不及防巧伺釁。向來只解聞聲撲。無聲可聞便不覺。一朝撲得不鳴蚊。翹肖中有此陰惡。想當化機亭毒時。二氣已自潛分滋。一般形模兩般性。有聲者雄無聲雌。眼前習見孰留意。靜觀乃識同中異。由來無物無陰陽。此亦格物中一事。卻笑讀書八十年。格物僅在一蟲細。

六月十三日大雨三四寸旱田皆可補插秧苗喜賦

五日喧赫。城河灘已露。時方屆插秧。謂當有甘澍。孰知期竟尙。赤裂江鄉田。不雨四十日。土燥成石堅。有犁翻不得。聞煞老烏捷。塘澗本無蓄。溪港亦涓涓。只有運河猶未涸。強有力者搶耕作。萬條桔槔如渴龍。一吸亦將罄。杯杓。何況高原距水遙。眼看龜坼地不毛。官爲斷屠民折柳。一步一拜敢憚勞。呼天禱地仍不應。束手相視惟哀號。豈知天無絕人路。六月十三兩大注。曉聞颯沓驚夢回。起看簷溜粗於柱。恨不將髮續兩絲。惟恐中斷戛然住。綿延乃竟二十刻。仰視彌空黑如霧。晚來解澤更淋漓。餘勇可賈尙鬱怒。從此家家補蒔秧。再過數日已無措。頃刻簑笠紛四郊。方罫布肘弓彎腰。急趁田水滿。甯暇筋力懶。雷轟耳不聞。蟲嗜膚不管。有噲其鱸攜筮筐。肉必大盤酒大盃。傭奴佃客當饗賓。日暮醉紅齊上臉。可憐豐裔頓殊施。昨尙憂荒夫豈敢。老夫亦復度量增。向來寒儉今痛懲。囊婦柴勿論斤兩。饗子米豈計畝升。譬如旱成子遺盡。食雖有粟吾其能。

舟行忽得順風戲作短歌

雙檣停。片帆掛。一郵亭又一郵亭。欲記行程不及寫。千里江陵一日還。始信青蓮語非假。知章騎馬似乘船。我今乘船似奔馬。

題孫子瀟翰林詩冊

世間詩思已說盡。豈知尙有未開徑。子瀟太史太好奇。要與千古人爭勝。康莊大道嫌共趨。別鑿凶門誇力勁。唾餘牙後盡掃空。一縷心香獨盤硬。遂令維摩十笏中。五百由旬不能竟。檀溪奮躍三丈闊。邛坂叱登九折巖。妙知蝸角有戰場。伏尸百萬地猶剩。古聞縮地壺公壺。今乃闢塗禁坑禁。貽我天真閣一編。不知幾費椎斧柄。海內詩人應第一。嘔出心肝不辭病。卻笑名場值幾何。乃爲求工欲拚命。

題百體壽字

昔人造書本物象。仰觀俯察皆師資。自從鳥跡與思後。依類肖形日漸滋。垂露偃波取殺烈。鵝頭虎爪做走飛。錯刀懸針器什樣。轉蓬倒蕘草木姿。以及星雲禾蠶穗。麟鳳鼠兔蟲魚龜。西秦八體漢六體。掎摭未備多闕遺。韋仲

審定九十一。功曹九法更益稗。自茲百禮有成數。合寫寶始庚元威。至墨各半妙結構。屏風十疊光陸離。當時未作畫祝用。但供玩賞後幃帷。此幅何人所撮。一壽字以百體爲。考搜廣摭極繁。後歷倉雅靡不窺。秘刻窮探舊碑。奇款遠攷古鼎彝。就中亦有杜撰筆。世無可證聊相欺。森列素紙徑八尺。整熨不用闌烏絲。或莊嚴如詩禮。或屈曲似盤蛟螭。或灑縱開金翠羽。或婀娜搖填花枝。巧製古來未經見。文房譜系罕及之。相傳前明張御名。小。見。得。自。渭。陽。舅。氏。貽。來。臨。本。漸。傳。播。多。取。吉。祥。介。秀。眉。我。笑。掇。拾。猶。未。廣。額。限。以。百。嫌。畫。錐。世。間。小。品。若有百歲老。將此持贈定不怡。曷弗兼收到近代。更復旁索及遠夷。君不見。契丹損隸神冊製。金源做楷希尹。西夏番書創國主。蒙古新字造帝師。其他完戎代木刻。騎管蟲吒咸紛披。浮提幻人壺貯墨。婆羅字母音費辭。住樓瓶畫演貝葉。勃泥進表寫木皮。白善粉描甘字智。精鑲刀鏤馬八兒。詰曲舌人說不到。龍鬼八部能通詞。是皆博學所不應。旁行左轉各異宜。編摹尙可數十種。增補壽數逾期頤。生納丹碧排磊落。傳之藝苑亦一奇。綴。本。引。其。枝。足。見。腹。資。繁。博。蓄。生。

### 與兩歌

桂花開過。飄落如雨。竊仿桃花紅雨之例。名之曰黃雨。戲作短歌。

桃花亂落如紅雨。兩點太粗殊不似。凡花黃者多不落。秋菊落英寓言耳。木樨謝乃落紛紛。灑地秋霖正可擬。青天白日漸瀝來。不用青涼織遮體。布金焜作祇洹宮。撚蠟散鞏切利市。贏得風姨也帶香。并疑月姊真潑水。桂林一棧定誰折。時諸生方鄉試。黃色上眉先報喜。紅雨新翻黃雨歌。數典不妨自今始。

### 東坡洗硯池歌

吾郡顧塘橋蔣氏宅。有石池一。形似槽。長三尺許。深半之。相傳爲東坡洗硯池。按公生平。居常者再。元豐八年春。被命許歸陽羨。遂居常州。未幾赴登州任。其所居今不可攷。建中靖國元年。自嶺外歸。五月至真州。病暴下。復止於常。據方嶽深雪偶談。述公是時。先卜居陽羨。已用五百緡買宅矣。夜與邵民瞻步月。聞

老嫗哭聲。詢知以將徙宅故。即公所買宅也。遂焚券。不索其直。至毘陵。借顧塘橋孫氏宅寓焉。是歲七月。即歿於寓所。然則顧塘橋宅。乃公晚歲所居。此池亦即養疾一二月中所用也。今蔣氏宅。相傳卽當日孫氏故址。池幸無恙。名賢遺跡。良可寶也。爰作歌記之。

是誰斲取銅官石。節角四周腹深尺。傳是東坡洗硯池。一斛清泉浸寒碧。公昔投老居常州。顧塘橋做孫氏樓。翩然乘雲倏仙去。手澤惟此一器留。讀公集。硯可數。御黼硯。王齊愈。龍尾硯。孔毅甫。丹石硯。唐林父。更有石鐘鏗。銅雀古。窪或形似瓢。欹或狀如斧。是皆公所銘。而非硯主。諒未洗向池中。墨花舞。公之硯。鳳味工。許硯乞從孫。莘老。洮硯貽自黃涪翁。沙湖所獲文有呂。定國所贈字作風。以及紗縠行中掘地得。魚膚淺碧非人功。類皆聲銅色寒鐵。不比青州石末兼絲紅。未知何者攜向此池洗。至今硯去池已空。我思當日瓊海歸來托無地。途次真州已下痢。貧廡聊復養衰疾。豈復能作文字戲。得非嶺外日。久苦筆墨焦。取煤幾致茅屋燼。捃管直似鬮蹬搖。一朝北還。復得諸葛散卓毫。常和劍脊膠。不覺見獵心喜。技癢不可搔。想當臨池手自滌殘墨。解衣磅礴氣尙豪。光浮金星銀星燦。波映鵝眼鸚眼嬌。餘瀋續紛灑作雨。疑有潛虬下噴黑浪高。噫嘻乎。身行萬里半天下。晚就吾鄉來羽化。遺此石池湛不瀉。似與此邦之人獨結翰墨緣。風雅千年相枕藉。雖輪定州雪浪質。已過壺中九華價。莫同岐陽石鼓作柱礎。好共吳興碑亭覆深廈。此先生意二義所作也。後此池從蔣氏宅移出城外贛舟亭。先生又有詩。皆刻在顧北集。今詩鈔補刻一首。

重九前一日管公祠看菊

世人共愛春花妍。豈知秋花更穠艷。吾鄉近年菊事繁。園戶俱工馬騰藝。連畦幻出冷胭脂。五色爛熳無不備。醉楊妃與粉西施。譜入羣芳立名字。遂使陶籬高潔姿。也逐時趨染肥膩。吾特取其晚節香。不與羣卉共榮悴。春花從無百日紅。茲獨能耐風霜厲。不見初白查翁詩。曾接早梅插同器。

孫武子祠堂假山石歌

是誰巧琢山石秀。不取其肥取其瘦。百萬蜂窠紐作堆。藕孔玲瓏竅穿透。俯瞰將身入坎窞。仰睇擊翠開戶牖。人

工巧處卽天機。斧斤無痕似絺縞。我思朱勳當年貢花石。搜盡吳門好巖岫。黃紙封來便屬官。發屋毀垣肯遺漏。此石不知何處藏。米顛恐無此長袖。獨思孫武本將才。投石超距指揮就。豈屑更占風雅名。令人拄笏看礪齒。漱位置一卷想傳後。我將遠馳域外觀。姑妄言之列坐右。移作夔府城邊八陣圖。長在江心噴濤吼。

捏塑傳真

虎邱陸起元。以捏塑人像稱能手。余亦令其捏成一軀。供以小龕。戲題於左。

我聞西天大秦國。一大佛像高摩天。百尺椀竿跨下過。只如淮陰受侮惡少年。自從象教西來後。中土彷彿遍八埏。畫家亦有寫生法。縑素尙屛此尙圓。劉鑾楊惠各絕技。技出妙手兜羅棉。軍隱帳中聽人譁。肥則稍減瘦則添。遂令一身化作千百億。心縱未廣體自胖。我來虎邱偶遊戲。三寸小龕妥位置。贖面泥笑人。空心紙皂吏。一樣翻新擅絕技。笑我方師天竺古先生。乃與此曹同把入林臂。

## 五言律一

紅梅

等是冰霜骨。偏看着色殊。高人多倚醉。仙女亦施朱。伴鶴迷丹頂。先蘭試絳趺。天桃休便附。終遜一分醜。

五牧鎮爲宋將尹玉戰死處

五牧塘邊路。經過弔夕陽。一軍忠義鬼。兩岸戰爭場。地尙多遺鏃。祠今有奠觴。當年運河水。想見血如湯。

苦雨

事有不如意。韶華夢裏過。一春晴日少。三月落花多。空擬乘吳榜。誰能挽魯戈。遙山亦含悶。煙際蹙修蛾。

遊陽山清水洞

獨山拔地起。邱壑頗幽偏。骨立通身石。腰藏一眼泉。離家無十里。結屋有三椽。五岳茲遊始。題詩紀歲年。僧寮留一宿。萬象沈寥中。夜色高樓月。秋聲落木風。身臨白雲迴。心與碧天空。安得辭塵鞅。來營一畝宮。

秦園

看竹何須主。林扃曲折通。人行山翠裏。秋在水聲中。邱壑因天巧。松杉有古風。我無書可賣。敢問爾家東。

微山湖隄晚步

野色青於染。春流滑似膏。風鑿千樹亞。浪捲半湖高。落日明鴉背。平莎沒豕豪。翻因觸鄉思。髣髴我東臯。

客興

京國依人慣。謀生倚捉刀。布衾寒似鐵。名紙敵生毛。燈火蟲聲啣。風霜馬骨高。那禁鄉思切。此日正持螯。

曉行

野店餘殘柝。荒郊已展輪。曉星明似月。古堦立疑人。邨暗猶無火。風微未起塵。擁衾三十里。味續黑甜淳。

出古北口

鎖鑰憑天險。因山戍壘成。千盤蛇陣勢。十萬馬蹄聲。隘比函關扼。危如劍閣行。時清無警備。不用怯長征。

南天門

峽束青冥上。巖扃構沈寥。天惟通一線。星可摘三霄。路鑿鉗椎苦。峯排劍戟驕。控臨戎索大。拱衛帝京遙。狹僅容

單騎。驅難並兩鑣。地形愁倒馬。風力稱盤雕。險叶泥封谷。危如棧架橋。時清無戍壘。歲迥有僧寮。捲幔羣空翠。炊

廚拾斷樵。鏡魚聞上界。沆漭吸中宵。雲族漫爲海。山支湧似潮。平生登覽興。我欲馭輪飈。

木蘭

形勝輿桓壯。盧龍左界偏。芻蕘靈囿啓。羽獵上林傳。境是無人處。天留太古前。風雲千嶂合。霜雪九秋先。花草無

名字。川原絕火烟。木蘭內無田盧。孕莘蹄角富。儵俟友羣連。獸簿書難盡。魚麗陣可聯。周法歸禁籟。甌脫稱遊畋。地紀

諸番獻。本蒙古地。康熙年開。盧爲國場。人供大獮虞。千三百騎集。四十九旗編。塞上蒙古。編四十九旗。每歲出千三百騎士打圍。屬國東西尉。名

王左右賢。軍容分際肅。殺氣合圍填。較獲量山谷。殲鮮論髀肩。祭龜原古典。表貉寓兵權。悉率兼戎索。來同晒甫



田黃圖仍近甸。紫邏接遐邊。扈從叨榮遇。漸無五柞尊。

汪文端師歿已數月。每欲一述哀情。卒未暇也。輟直樞曹閒居。無事甫得和淚漬墨。以詩哭之。凡一千字。人物高千古。師生近十年。乘箕歸浩渺。爲位哭潺湲。作楫中朝望。和羹內相權。身尊河砥柱。班侍樂鈞天。密勿參温室。謀猷布細旃。嶽雲千里潤。谷黍一陽旋。廟略絲綸渙。朝章黼黻宣。胸常涵霽月。量莫測澄淵。鏘冶精金鍊。廻翔吉羽翩。廷推風度獨。門絕黨援偏。餘事兼風雅。斯文極討研。別裁嚴僞體。孤倡挈真詮。領袖蓬瀛上。淵源漢魏前。尊彝崇法物。鐘磬考宮縣。清廟朱絃淡。明廷白璧圓。羣材趨匠石。巨手斲輪扁。納履慚初學。升堂揖大賢。龍門依杖屨。蛾術課丹鉛。跡爲依劉穩。名叨說項傳。羽毛邀假借。規矩得周還。杜曲尙書塢。蕭齋弟子甄。林亭規賭墅。花木麗平泉。鄴架籤論萬。曹倉卷累千。驕函分宛委。寶笈聚鄉嬛。祗室挑燈坐。重簾下榻眠。一瓶奇肯借。三篋秘甯鍵。貧眼驚羅貝。飢腸旣割鮮。聽遊烟海浩。更指軌塗平。北轍無紆軫。南針有捷阡。轂中棲鶴矢。視後牧羊鞭。檄命陳琳草。文憑任昉編。每教頻易稿。代擬未完篇。結構排文陣。淋漓仿筆椽。一裘狐腋集。九曲蟻珠穿。窗紙呼蠅出。車輪踏蠹懸。弗辭三折臂。索解九方歎。點有成金鐵。拋真引玉甄。不調還解瑟。得意並忘筌。瓊處鳥搔快。癩痕癩補痊。乙鴻精鑿別。五雀定衡銓。相賞頻攜酒。從游或扣舷。門庭高座獨。絲竹後堂專。仕版登初地。樞曹忝備員。喜供文字職。仍侍斗台躔。插羽宵催牘。濡毫曉奏箋。詔麻頒魏闕。軍檄定先零。事集中書省。才慚上水船。漏沉鈴動索。燭炬炬分蓮。鞋底遭非辱。詞頭改愈妍。斧戣修月快。斤到運風遄。清蹕車同扈。黃沙帳更聯。山深秋落葉。夜永月臨邊。旅跡征隨騎。鄉風話叱犍。鏗炊塵滿甌。野宿幕支枅。矮几東西列。行牀上下連。癯常餐互勸。病或藥親煎。吟撚枯髭禿。書呵凍手攣。影形同鉅蜃。踪跡比夔蛟。賓主家人誼。門牆宿世緣。百年人草草。一別淚漣漣。梁木俄傾折。刀圭漫祝延。至尊親哭臨。諸老各悲牽。美諡榮褒袞。崇祠肅饗筵。尙方營斂具。內帑治喪錢。國有良臣誅。門凄坐客筵。升榮魂豈復。負土手甘胼。子立身如贅。單行步每蓮。疲牛仍輓磨。孤鴈忽驚弦。鎖院簪臺地。周盧待漏塵。豈曾潘鬢老。共謂旭書顛。輟直歸西掖。投閒類左遷。雀羅貧宦味。蠹簡腐儒拳。仰屋重探學。扃門自省愆。叢

編動獼祭。殘卷剔蝸涎。淺落官難退。摩挲腹尚便。書成揚子詆。調絕伯牙絃。慧業空期佛。凡胎孰識仙。寶珍乾鼠璞。魔噪野狐禪。虛燄方熏灼。遙源肯泝沿。蒙頭聊瑟縮。貴耳任轟闐。彌憶援垂手。頻傷企及肩。敬容殘客感。宋玉大招虔。老輩真難得。餘生益自憐。重來尋步履。回憶荷陶甄。人寂廉公市。莊荒陸氏田。門庭涼似水。履舄散如烟。琴忍雍門鼓。碑難峴首鐫。身原飛退鷁。情比噪寒蟬。無復聆揮麈。空思效舁篋。師資今已矣。宦迹益孱焉。歎逝情彌切。酬知願枉堅。惟憑修綆汲。還炷瓣香燃。文苑芟榛莽。書城築澗瀍。表彰餘論播。續述緒言綿。壇坫爲標幟。江河助障川。浮談除稷下。絕學溯河先。後死文終托。先生道未捐。遙遙千載事。天咫證空元。君古學多得力於文不覺真切辭藉。故。

愍忠寺石壇相傳唐太宗征高麗回瘞戰骨處

古寺重簷閣。平臺五尺墩。征東功已泐。恤下蹟猶存。貞觀方開國。高麗失奉藩。六師爰出塞。萬乘自攻垣。斬獲軍雖振。傷亡士亦繁。歸途收葬慘。御筆祭文尊。不凍佳兵戒。徒矜掩骼恩。一區開作塹。萬骨聚爲屯。豈乏功臣狗。兼多君子猿。忠皆兵死鬼。哀到國殤魂。碎或如蛇蛻。殘猶帶犢禪。生無半面識。死比並頭婚。舍鍤填泥築。藁裡帶兩掀。結蒲工不暇。裹革例難援。聊免飢烏啄。差無餓虎蹲。首邱終未遂。京觀詎同論。想見緇經座。曾招剪紙幡。歸隨遼鶴跡。啼有蜀鶻痕。陰陣空中嘯。靈旗夜半翻。血風臨穴臭。燐火滿壇昏。邱貉屍難認。沙蟲命總冤。異鄉悲瘞旅。故國羨歸元。幸托空王近。能拯新鬼煩。叩鐘開魘夢。施食慰饑飡。喚醒沉冥路。來皈清淨門。枯骸滋法雨。厲氣散朝暉。事往今千載。詩成紀片言。由來戰爭地。枉死偏郊原。工力完足。無一懈筆。保泰。

飲倪敬堂少僕寓齋次韻

仗有通宵飲。能消急景馳。酒監三約法。鬪戲七稽疑。燭影翻燈海。甌香碎茗旗。醉歸應犯夜。已是曉鐘遲。古來名利路。行者盡如馳。作婦公孫衍。爲卿子叔疑。酒兵君拓戟。詞壘我擎旗。一笑皆迂客。生天未免遲。

與耐亭寄園步月

官暇無公事。交親有比鄰。荒園三畝地。明月兩閒人。語味清談雋。詩情白戰真。誰知人海裏。得此豁襟塵。

哭汪幼泉民部

不謂吾師後。驚傳冢嗣殂。門庭望弓冶。名字是醍醐。官未施行馬。人猶愛及烏。盛衰何限感。賸有淚痕枯。

再出古北口

紫塞秋風緊。凌寒踏曉霜。涼餘沙盡白。關外柳先黃。飲馬長城窟。呼鷹古戰場。平生登覽興。敢惜髣毛蒼。氣格。

扈從途次雜咏

帳房

陸居那有屋。布幕羃荒腔。地恰規方丈。天淮隔一層。常分茅店月。敢擬幔亭燈。風雪聊堪蔽。求安本未曾。

風旗

帳房所在。各立旗以爲識別。

危竿旗色別。卽此是心旌。不畫龍蛇動。偏分赤白明。遙知戎帳在。略似酒帘輕。人馬皆能識。於斯悟用兵。

土竈

掘地爲竈。

莫笑塵生甑。由來掘地炊。柴燔無老婦。葷食似潛師。詎仿風爐製。聊存土鏗規。行圍非禦敵。不用減增爲。

晃燈

夜則懸燈於竿。亦以識別。

懸燈形製異。識別爲宵行。陸地成星海。荒原列火城。方圓無混雜。三兩各分明。訝許冰霜夜。何來萬點螢。

矮桌

高惟憑寸木。方豈僅三隅。攤卷宜卑論。摸稜敢短踰。當筵跌坐慣。隱几鞠躬劬。或作齊眉案。侏儒所必需。

馬繩

繫大短於竿。所以拴馬。

曠野無閑廐。長絙繫短桅。似將綿葛禮。欲範駢跣才。也比金羈絡。非銜鐵騎枚。繫維終雅意。爲恐遠颺開。

短褂

短後衣原古。戎裝稱服駢。十圍腰欲露。半臂手難函。古半臂之製。想類此。褻袂雙非隻。明衣一可三。兩袂皆短。明衣一

僅半身而已。

縛處藏紆袴。披來露繡襜。何須白練製。略並錦繡長。衣反居裳內。男偏作女裝。裙腰青草色。相映道途旁。

割草。木蘭中。濕地皆草。既佔地。即割其草以秣馬。

行雍聊除地。兼堪秣我駒。不攜三品料。但束一生芻。木蘭草最肥。飼馬不用豆。詎刻陳根盡。愁逢野燒枯。倦來思小憩。還作

綠茵鋪。

打柴。木蘭中。各取山木為薪。無禁例。

釋有牛車載。薪甯馬矢燒。材原多棧樸。園不禁芻蕘。劇趁摧枯勢。擔乘射的颺。日斜方待爨。莫作爛柯樵。

唧噥。謂喊叫者營中禁此甚嚴。置卒巡邏。

肅肅鈞陳靜。司囂按路稽。跡如尋響卜。威可怖兒啼。日落惟鴉噪。風清或馬嘶。無譁見軍令。萬帳出聲低。

買賣街。買人隨營設街貿易。

負擔來成市。熙熙為利忙。塵疑夫布製。列布帳為市廛。貨取子錢償。也似趁墟鬧。居然列肆長。見珍因物罕。敢怨價增

昂。入木蘭久。則物益昂。而價益昂。

棒椎。在熱河平岡上。突立一峯如椎。俗稱棒椎峯。

峯頭驚子立。石筍忽然生。頗似金莖狀。殊慚玉杵名。空中禪棒喝。月下搗衣聲。遠壯行都色。孤標接太清。

達巴罕。蒙古語。謂高嶺也。

蜀道難真見。青天一線通。人行飛鳥上。馬踏亂雲中。一落愁千丈。三休到半空。更憂輜重阻。露宿滿山風。每道

輜重難行。或遲數日。始追及。

蘭中戲咏藍筆

未解題紅葉。常教蘸碧甌。墨朱俱不近。皂白總能翻。蠅不污人壁。螺甯糞佛頭。由來管城子。封邑在青州。架少珊瑚製。牀宜翡翠鑄。幾行分漢幟。數點散齊烟。禿到三條燭。圈成萬選錢。聚奎清閼處。直作蔚藍天。

里中杭生汭潮先友杭雲龍之子其兄廷宣又余五友中之一也父兄皆歿來京相依詢知先友黃季游楊新友及潘本仁諸老人相繼物故感賦二首

父兄皆棄世。千里一家拋。年僅逾髻鬢。貧思覓斗筲。世無朱郭俠。我忝紀羣交。相對惟滋愧。無能代治庖。桑梓懷耆舊。頻年感逝波。昔遊如夢短。新鬼比人多。名僅聞鄉里。身皆老轡軻。柳州先友記。石表待鐫磨。

錢茶山司寇以大集見示捧誦之餘敬題於後  
已撞魏科最。兼期不朽垂。王瞻碁射酒。鄭老畫書詩。身本有仙骨。學仍無斷時。始知名世者。未易淺人窺。欲識通懷處。談深引濁醪。人如東晉達。才有大蘇豪。僞體別裁盡。真靈位業高。幸叨鄉後進。請益敢辭勞。

贈吳鑑南民部

癡絕吳民部。詩才迥不羣。官貧常數米。客到便論文。似舅何無忌。君爲商賈爲耶揚子雲。沉冥甯用歎。佳句已流聞。

觀家人醃菜戲成四十韻

物產推安肅。秋成慶阜豐。剛來樊圃畔。輦集藁街東。民幸無茲色。儒原稱此風。灌憐園叟苦。賣厭市牙缸。碧葉經霜綻。嬌芽帶雨芄。略同三韭品。不雜五葷叢。細異辛堪薦。肥看甲不衷。蕉心包宛轉。藕腕研玲瓏。瑩白光凝外。含黃美在中。洗隨銀指滑。截愛玉肪融。拗嫩先冬筍。嘗新並晚菘。飴鹽同日貴。塵甑一時雄。賣處爭求益。挑來各禦窮。春盤猶未設。地窖或還烘。剝似層層籜。堆疑寸寸葱。酒餘西爽送。饌底下陳充。入粥成羹沸。爲齏用火攻。芼時薑桂糝。醃後麪糟蒙。生熟俱宜口。清腴詎鼓隴。儘多回美味。兼有解醒功。蕪漫龜絲綠。葵輸鴨腳紅。茹蔬貧宦慣。

蓄旨內人工。食肉曾嫌鄙。飢腸故久空。珍藏登瓦缶。賤價倒筠籠。嚼賽屠門快。烹矜鼎養隆。煮分煨羊火。切傍點  
菹筒。入腹隨藜覓。呼山免鞠窮。餘甘施婢獲。均惠到兒童。尙愧遺羹遠。聊矜宰肉公。祭修尼父豆。齋比太常宮。才  
本胡蘆樣。餐勝首宿叢。恰宜疏食擔。何取葷醢饌。名敢元脩獨。貧甘庾果同。侯鯖羞挾瑟。官鮓陋郵筒。自愛枯僧  
味。還慚老圃躬。咬根心故淡。送把意彌崇。鄉思懷櫻筍。生涯感梗蓬。歸猶慳杞菊。嗜敢望魚熊。已免黃精劇。兼資  
白粲饔。俯看盆盎滿。吾亦富家翁。

三月十三日程載園舍人招同錢籜石辛楣兩學士曹來殷編修王述菴比部吳白華庶常陸耳山家璞函  
舍人各攜壺榼陶然亭爲展上巳會分賦

淺水蘆芽嫩。平隄柳色新。城中如野外。酒客盡詩人。會尙名修襖。遲兼當送春。還期消暑飲。重此滌襟塵。

題吟薌鏡影小照

白毫光滿月。不是結跏人。才擅詩書畫。心參形影神。甯同化身幻。恰與故吾親。想見澄觀處。匡廬面目真。

賦得紅藥當階翻甲戌試中書  
題。得書字。

薇省韶華麗。名葩燦玉除。地當承露處。花是殿春餘。映日敷紅艷。因風動綺疏。影搖青瑣闥。光映紫泥書。非諱偏  
如贈。將離若故徐。過甄陰不定。傳粉畫難如。清切仙墀內。舒長畫漏初。綸扉方視草。恰對五花舒。

賦得賢不家食辛巳會試題。得  
同字五言八韻。

聖治光昭日。英賢奮跡同。館餐方異數。家食詎高風。自有千鍾粟。甯棲一畝宮。指囷辭里友。抱甕謝園翁。鱸拜蓬  
池上。羹和寶鼎中。酌泉逾表潔。宰肉故能公。籩簋誰加飭。塵囷豈愧豐。願常懷澹泊。仰報國恩隆。

五月斯螽動股

舞竇迴緹籥。翹肖起螽斯。未振誦詵羽。先看趨趯姿。動無肱折慮。響出足音奇。錯訝鳴雙翼。從知暢四肢。詎矜超  
距勇。似演踏歌詞。健不當車轍。輕難立釣絲。化參魚躍共。按豈鷲趨隨。聖德徵揚詠。羣生以息吹。

竹箭有筠。壬午考試差題。得書字。

翠篠榮嘉植。蒼筠竟體舒。文堪彰外美。心本蘊中虛。新雨抽萌後。清風解籜初。光分水蒼玉。功在汗青書。到凝斑處。嬌含帶粉餘。詩筒鑄易就。墨筆畫難如。自覺菁英煥。何嫌節目疎。猗猗堪咏德。睿賞寄林筵。

月中桂樹。壬午順天鄉試題。得香字。

月殿森嘉植。敷榮玉宇涼。淨根甯著土。老幹久經霜。不識何人種。常留太古香。花真能四照。譜不入羣芳。賜木應輪秀。星榆敢較長。味增丹杵藥。嘉映素娥妝。信識千霄迴。應多滄露瀼。藥珠宮闕朗。攀折許吳剛。

春蠶作繭

節屆條桑過。春蠶上簇肥。錦心真欲嘔。笥腹詎愁饑。一縷輕抽緒。千層密作圍。有綿非霧縠。無縫亦天衣。道協藏身固。功成化羽飛。文章五雜組。經緯七襄機。珠網懸何益。鮫綃購亦稀。皇仁宏衣被。挾纊萬方依。試帖中有此神化之句。丹。

德車結旌

行旌昭物采。表德異戎車。豈乏旒堪綴。匪伊帶有餘。鈎衡轅共曲。如組轡同紆。蘊結心能繪。飛揚氣已除。不鳴風獵獵。恰映日徐徐。略似垂纒屈。甯同析羽舒。洵覘文治盛。想見武成初。以樂堪爲御。和鸞仰翠輿。

題程尺木上舍夢雲圖

非想非非想處。是誰引入吟魂。正逢洛浦拾翠。忽踏鄂舟到門。一幅唐人小說。九分莊子寓言。人生若非夢境。安得副此情根。

仙遊也復多恐。好境原難久棲。欲到還防風引。再來兼怕路迷。涼人秋在天末。催客月落花西。始悟癡萍逐水。不如禪絮沾泥。

## 五言律二

常山道中

古路依山關。參差柳影疏。川原分楚越。水陸縮舟車。旅店房分鷓。擔夫跡貫魚。近南時令早。三月已耕畬。

樟樹鎮爲王文成誓師地

藩邸猝稱亂。文臣此誓師。倉皇臨大變。智勇出良知。烏合乘城日。狐疑返旆時。從容樵舍縛。儒者事原奇。

鎮安土風

宦轍經年到。郵籤萬里修。地當中國盡。與安南接壤。官改土司流。明時土府岑姓。峻坂愁雲棧。路從蓮花九竇而孤

城彷彿月鈞。城惟東南西三面。近邊多埃吏。按部半番酋。土司。密箐千尋木。寒泉百丈湫。泉自鑿隘山穴中

四時無落葉。一雨或披裘。瘴要澆胸魄。中瘴。則胸妖會記肉毬。相傳府衙有肉毬肉脚之異。見府志及說鈴。深宵蠶疊放。白晝虎

偃遊。魁客從人雇。狙公作盜偷。蠻方天混沌。猿語鳥鈎輶。儂姓還豪族。韋家說故侯。地名。儂韋二姓。儂則智

少子。蕭相國以託南越王。其子孫散居蠻土。點脣檳汁染。釣臂釧紋鏤。跳月壚爭趁。嬰春俗善謳。儂皮齊贅

去韓之半。以韋爲姓者也。見溪峒織志。易握算賈胡留。粵東賈此者。邛婦無弓足。山農總帕頭。性愚供使鹿。見小重多牛。籬壁穿多穴。貧民編筐作筐。

如籬。欄房隔作樓。欄房上層人所居。燒畚灰和土。接水木剝溝。靛采藍盈匊。民皆采藍自染。塗以泥。多穿漏

落成把。不。差包鹽有渣。菹窖菜成油。以諸菜及牛羊骨煮甕中。久則爛成汁。犬肉多於豕。墟場賣犬以

刈藜粘。山木供爨。雖。鷓鴣羹味薦。蛤蚧藥材收。糞膽從蹄剔。石羊膽。以在蹄心者。豬豪激矢抽。野豬豪似

賤似檀。紫檀不貴也。人百步。山羊因血捕。水獺爲皮搜。石斛花論價。出奉。枕椰麪可渡。雷。竹根人面活。向武有竹。其

外。大箐中多萬年。藤。可以作杖。物產真驚見。民情易給求。挂魚官閣肅。羅雀訟庭幽。閒倚半山閣。署中獨秀山半有

盧衡稽桂海。草木訂春秋。詩已傳邕管。官非謫柳州。勉修循吏績。撫字輯遐陬。

楚雄守秦岵齋留飲卽贈

長安稀會面。相見百蠻中。人地推秦望。江山得楚雄。簞邊論兵略。爲吏守儒風。使我忘羈旅。深談刻燭紅。



遮放

蒼葦西南路。軍行此駐蹕。妖星天狗落。毒蟲夜蠶飛。五色有浮瘴。四山如合圍。功名須絕域。敢憶釣魚磯。

干溝

地陬多蒸鬱。催鞭趁鸞屐。瘴氣頭痛國。癭俗頸粗人。霧濕常疑雨。泉溫不待薪。尤防香氣過。閉息俟黃塵。

橫州大灘謁伏波將軍廟

功名非水戰。祠祭乃江濱。直以將軍號。長爲水府神。蠻方銅柱界。漢戶馬流人。何必靈臺像。千秋廟貌新。我來祠下過。江水正蒼茫。石齒千堆雪。灘心百沸湯。據鞍絲鬢鏘。裏革想飛揚。彷彿英靈氣。洪濤共激昂。

鑿隘塘驛舍小憩

偶然留駐馬。地僻愜幽尋。古木翠圍屋。夕陽紅滿林。山雲沒骨畫。澗水不絃琴。頓覺忘塵鞅。悠然生道心。

嶺漢卡檄安南官勘地

中外毗連處。居民起細爭。壁先會假許。田豈得歸祊。一筆鴻溝畫。千秋馬角生。番官虔奉約。誓守載書盟。國計宜柔遠。邊臣重守疆。古來憂厝火。多起鬻爭桑。虎落新分界。猺藩謹立防。銷萌無跡處。庶以固金湯。

平江道中

放棹滄江穩。春隄草色新。山牛多似蝨。沙鷺立如人。湖海名何有。烟波意自親。中流瘡容與。暫此豁襟塵。

接同年黃學望書知其以暗疾去官來主韶州講席賦答

省垣風雅最。何事去官歸。囊筆崔青蚓。詩名杜紫薇。暗非河渚疾。和本郢人稀。守默原前訓。摩兜省是非。山水韶陽好。明生共昇籃。傳經多筆授。對客有碁談。詩豈吟方就。禪原默可參。無言桃李樹。已遍嶺梅南。

疾。雋妙乃  
源。枚。

二詩字  
字切暗

祭南海廟禮成二十韻

秩祀南溟重。時維月孟冬。扶胥襟粵會。廣利紀唐封。地在九州盡。王爲百谷宗。周廊簷四角。複殿陞三重。環楹威

嚴勢。垂旒肅穆容。介鱗森拱衛。禕翟配印顛。王夫人亦蠡鳳寫碑壯。波羅古樹穠。玉書無跡考。銅鼓有聲春。吳萊古蹟

記。廟有玉簡。今不可考。是夕宵氛淨。中天月色濃。蕭蕭升鶴鼓。炬火似鰲峯。濤戢冰夷怒。風收颶母凶。星河

垂角絡劍佩。集瓊瑤。蛻節悠揚動。金支颯沓從。羣靈朝貝闕。萬派匯珠濛。腥氣蜿蜒隊。陰光彷彿蹤。工歌翔鶴鶴。

人立舞魚龍。宴娛神應喜。歆居禮益恭。不揚占浪靜。善下豈堤衝。水線安估客。潮田阜澤農。永昭清晏德。於廓助

時雍。莊重稱題。故

題陳望之太守長林遠望圖

寂歷長林下。惟應靜者論。中州詩派嫡。前代黨人孫。陳定生曾孫。能居商邱。柳暗湖湄影。苔深屐齒痕。超然吟眺意。踰髮

向朝暾。

廣州候代同沈秀才鳳翥吳畫士灑遊羅浮

得暇羅浮去。扁舟發夜分。月華涼在水。山影澹於雲。詩思遙相入。秋聲寂不聞。出門纔數里。已覺豁塵氛。

努灘

疊嶽危磯轟。江心截急渦。千尋鍊交鎖。十萬劍橫磨。篙逆灑頭刺。舟穿石罅過。灘名應記取。努力慎風波。

苗人

侏儻言不辨。椎魯意偏真。混沌猶無竅。獠狂略似人。千針縫衲細。百褶製裙新。莫笑鬼方陋。淳如懷葛民。

水城

百里蠶叢盡。孤城帶碧川。地偏無古蹟。山豁見平田。莊叟無何境。仇池小有天。如何此佳處。拋落徠人邊。

再遊葡萄泉作

噴碧泉成串。疑通海眼生。我慚臨水照。他是在山清。未可龍珠挂。偏宜馬乳名。挑來試新釀。會及臘醅傾。

江行

風細江行緩。中流日暮時。遠帆如不動。寒月故相隨。巴水來三折。湘雲望九疑。從來騷客地。遺跡令人思。

曉過儀真

九日江干住。今辭燕子磯。浪隨殘雨盡。船趁退潮歸。孤月寒相照。閒雲澹不飛。到家堪計日。猶及試春衣。

送馬沅亭歸里兼寄邵耐亭

萬里相隨久。歸仍共一船。詩多成笈束。人瘦似梅花。客窘慚爲主。途長喜到家。憑君先寄語。一問邵平瓜。

簿灣曉發

邪許喧開櫂。冥濛一望中。江雲殘夜黑。海日五更紅。巢鷓驚棲夏。潮雞喚舞雄。當年曾擊楫。慚愧漸成翁。傑句突 備感唐

誰謂雲崧不講 格律也。故。

五日郡城觀競渡

蒲酒觴初泛。榴花火欲燃。歲華當夏五。戲事到秋千。珠翠中流舫。笙歌徹夜筵。歸田吾過分。正及屢豐年。

聞王協和總戎之訃

裹革原初志。驚聞折將旗。虎飛曾食肉。豹死亦留皮。殺賊髯應磔。臨戎甲不拔。可憐分手日。本不問歸期。

舟夜

寒戀重衾臥。舟行何處溪。孤燈殘夢蝶。落月滿村雞。作客將衰矣。懷人正渺兮。櫓聲將斷處。已到草堂西。

戲咏老少年

自是寒能健。休嗤老尙童。雞皮三少候。鶴頂百年功。晚照散餘綺。衰顏發醉紅。蘇詩。兒童謔喜朱顏 在。一笑那知是醉紅。西風黃葉

裏。暗慰白頭翁。

再題小倉山房集

只擬才華艷。誰知鍛鍊深。殺人無寸鐵。惜墨抵兼金。古鬼忽聞泣。飛猱不可擒。挑燈重相對。何許妙明心。  
汪時齋民部奉太夫人喪歸里道經常州相見道故兼以文端師遺集囑余編訂付梓即事感懷泫然有作  
十載驚相見。停舟古驛旁。麻衣俱似雪。蓬鬢各成霜。曉闌尙書履。宵燈弟子牀。前塵重撥觸。酒淚滿河梁。  
屈指論交舊。真逾骨肉情。十年同筆研。兩世互師生。余鄉試出文端公門。時齋兄弟。又從余受業。書館依劉跡。詩壇說項名。重逢歐  
叔弼。能不話深更。

述菴到常適袁子才亦至遂并招容齋緘齋魯斯謙集寓齋即事

擬近名流集。朋簪此會奇。我當師北面。客似隴南皮。扶醉花頭下。聯吟燭跋時。聽談軍府罷。騷壘又張旗。好句欲  
泰。

丹陽道中

曉發丹陽郭。春波綠上篙。河分江溜急。岸似峽門高。官路新舒柳。君恩舊賜袍。迎鑿何敢後。廿載俸錢叨。

程晴嵐太史招飲荻莊即事

小築堪尋勝。湖干第幾灣。是村仍近郭。有水可無山。疎密花千樹。迴環屋數間。主人頭半白。養靜作禪關。

破寺

楚楚鐘魚院。何年遂式微。臥苔碑沒字。支木屋無扉。古佛蛛牽網。殘僧虱滿衣。空門亦興替。小立弔斜暉。

渡太湖登馬蹟山

元氣混茫間。雄觀上碧孱。無邊天作岸。有力浪攻山。村暗楊梅樹。津開苦竹灣。離家纔廿里。垂老始躋攀。  
地是夫椒舊。兵戈久已訖。漁歌秋水杳。人影夕陽高。放鴨船通港。浮鼉石漱瀟。何當一椽築。晏坐息塵勞。唐句。

東臯露坐

浴罷渾無事。東臯候月明。涼生秋有信。濕重露無聲。蛙鬧當更鼓。螢多似火城。野夫閒富貴。或謂勝公卿。

野泊

野宿依叢葦。寥蕭水觀澄。疏砧秋巷杵。遠火夜船燈。暑謝平頭扇。涼催半臂綾。倚絃趺坐久。纖月吐微稜。  
四月初一日營葬事於馬蹟山禮成敬誌三律

頻歲憂窳窳。今纔構一阡。湖山傳馬蹟。整兆得牛眠。丙舍營猶待。龍岡表僅鐫。可憐安厝日。已是服除年。  
多謝術家言。佳城陰後昆。敢因藏父母。更想福兒孫。祭掃編家法。哀榮記國恩。他年吾祔葬。死亦奉晨昏。  
色養慚多缺。惟茲地頗佳。神靈應陟降。山水最清華。或可垂千禩。何須置萬家。惟期一廬築。終日誦楞伽。  
爲長兒娶婦

五十始稱翁。今朝喜氣重。何時畢婚嫁。從此學癡癡。花燭粗成禮。門楣冀亢宗。朝衫吾久疊。一爲啓塵封。  
贈啓龕

前輩風流在。吾鄉只此翁。無錢偏作遠。每事必求工。具饌常留我。論詩輒憶公。何當一爐火。相守歲寒中。  
莊叢英同年索詩戲贈

里社尋同榜。南華有散仙。居官甘下考。娶婦已中年。食是書中粟。歸無俸外錢。會嫌折腰苦。偏折鏡臺邊。  
生事

生事漸蕭然。年荒剩石田。薪燒連葉樹。飯待作碑錢。僮少將兒使。家空恣犬眠。微聞奴僕話。列鼎服官年。  
屏跡

屏跡無塵事。空庭綠滿苔。杜門閒客散。攤卷古人來。茶瀾大團月。琴彈小忽雷。經句少詩思。或待牡丹開。  
太湖口守風

泊舟羅步港。風勢正喧脛。白浪無人渡。青山似馬來。野香花信報。春色燒痕回。隱隱祥符寺。聽遙鼙鼓催。  
村居

門掩綠蘿陰。團蕉晏坐深。新詩多杜撰。舊帖有唐臨。不管飢腸吼。惟知抱膝吟。家人竊相笑。黃蘗下彈琴。

咏史

食椒能幾粒。八百斛猶貧。枉署摸金尉。先爲入草人。但知烏攫肉。豈悟象焚身。何事狂奔者。依然覆轍循。

納涼

盆池新浴罷。雨過淨遙空。霞色隨孤鷺。秋聲在一蟲。移牀風過處。捲幔月明中。晏坐生禪悅。此懷誰與同。

連日飲晴嵐家賦贈

良晤連旬日。深切地主賢。家多佳子弟。身是老神仙。杯續過牆酒。詩成湧地泉。晚香風味好。正在菊花天。

哭蓉龕病歿杭州

鄉邦年最宿。臺館職皆清。老尙好丰采。貧偏富性情。琴樽前輩韻。月旦後生評。何事西湖去。俄驚笙鶴迎。

漁梁驛韓蘄王擒劉正彥處

地險漁梁驛。狂酋此擁師。雖非大敵勇。正值小朝危。一戰無遺寇。偏安有德基。江流千尺岸。故跡令人思。

建陽市謝疊山賣卜處

出亡悲故國。忍死爲衰親。托業重三卦。埋名陽九辰。滄桑爻象變。薇蕨課錢貧。始覺成都市。垂簾是幸人。

食荔支

百顆新登市。無煩驛騎馳。肌膚姑射白。風味玉環肥。頓覺清芬溢。先令暑氣微。老夫情不禁。爲脫絳羅衣。

廈門大風望海卽事

海聲連日吼。鯨母發狂飈。信有水皆立。兼疑山亦搖。樓船依古嶼。烽火隔秋潮。安得鞭驅石。排成萬里橋。

食江瑤柱

荔支會飽啖。瑤柱此新嘗。味美勝熊白。形潛似鱗黃。孤撐非獨骨。相倚有連肪。口福吾滋愧。居然服玉方。

冲祐宮

水複山環處。琳宮絢彩霞。路疑毛女洞。地是羽人家。丹竈錯銖火。茶經粟粒芽。何當息塵鞅。晏坐讀南華。

抵家觀競渡

一載參戎幕。今纔返釣游。幸非歸馬革。猶及看龍舟。簫鼓喧河市。烟花映水樓。故鄉終覺好。只合老菟裘。

張荷塘明府訪余揚州不值留詩集見貽寄謝

枉訪偏相左。瑤編荷見貽。官爲強項吏。詩比折肱醫。聲氣三生癖。江山六代奇。何當遠來謁。各慰十年思。

瓜洲江上遇欽齋制府歸樞哭之

告別纔春夢。哀音到及冬。勤勞軍事蕺。贈卹主恩濃。身遍八州督。官還五等封。恩旨給遺飄飄丹旆返。江上泣相逢。

胸次有千卷。目中無一人。面常寒似鐵。髻已白如銀。料事洞觀火。防奸濕束薪。曾師張太岳。或果是前身。

人情憎貴倨。帝眷鑒精誠。久擁八騶唱。頻驚五鼎烹。公兩入賜環無喜色。仗節又威聲。海國終資奠。功收赦孟明。

臨分尙留客。爲未了儲胥。失我渾身膽。催公發背疽。公以背歸艤長路冷。贈賻故交疎。何限存亡感。憑棺一慟餘。

吟薌歿於京邸其子孝方扶柩過揚廿年老友遂成永別憑棺瀆酒不自知涕之無從也

歸櫬來千里。嗟乎我瘦銅。君改神清如叔寶。詩峭學涪翁。偕隱言猶在。聯吟願竟空。長安重回首。曾共一燈紅。

久趨微省直。終乏草堂貲。死有飛蠅弔。生常借馬騎。又停方朔米。誰斲蔡邕碑。稍幸名山業。刊成廿卷詩。

聚散真難測。交深會忽慳。幾年同硯席。一別遶河山。官閣論文罷。蠻江送客還。豈今纔永訣。廿載隔容顏。余在廣

君來數月。別後復不復見。

寄晴沙

露冕猷方壯。循陔跡早還。詩兼雙井派。家傍二泉山。雖覺顛毛白。猶欣綵服斑。遙知色養暇。瀟灑有餘閒。我亦離塵事。深愁染素絲。早爲鴻羽漸。恰共虎頭癡。問兩隨農父。臨流作釣師。江湖須我輩。歌咏太平時。

舒城有感於周公瑾道南推宅事

一見心相許。交深意氣中。霸圖初草創。年少兩英雄。名已君臣定。情真骨肉同。道南何處宅。千載想遺風。

夜宿棲賢寺

一宿招提迴。山空夜更清。餐分僧粥淡。光借佛燈明。呼吸總雲氣。夢魂猶瀑聲。人間惟此境。寂寞少人爭。到此絕塵慮。兼忘陟險勞。不眠同佛醒。無語覺僧高。月影空庭藻。松聲牛嶺溝。清遊恐難再。題壁一揮毫。

岳母墓

岳侯茲負土。千載塚嶙峋。好母生賢子。忠君卽孝親。棲霞翻裏席。防墓幸鐫珉。應慰劬勞意。祠官尙薦蘋。問之寺僧。今

庾樓

危欄瞰無地。千載庾公樓。吳楚天南界。江山國上游。已無塵污面。尙有月當頭。想見賓僚讌。新亭笑楚囚。

送億孫入京補中書

是我歸田歲。看君出仕纔。釣遊雖雅尙。館閣正需才。著述成家久。江山攬轡來。秋風方颯爽。十幅布帆開。舊德尙書重。華資學士清。龍頭家故物。鳳沼宦初程。暫草綸扉制。行題杏苑名。烏衣門第在。待爾振英聲。薇省吾曾直。歸耕跡久違。紗誰籠壁字。笥已疊朝衣。去國桃千樹。流年柳十圍。巢痕想如舊。回首五雲飛。鄉國稀同調。惟君結契深。文章千古事。甘苦兩人心。此去關河阻。吾衰歲月駸。尙能重見否。不覺涕沾襟。

報恩寺塔二十四韻

傑構崇千尺。前朝一刹竿。事因慚德起。財以報恩殫。欲借莠蒿感。聊瀕骨肉殘。天開新窳堵。地鎮古長干。戰伐矜



餘力莊嚴出大觀。輪蹄精衛運。塹垣女媧搏。遂盡浮圖峻。平臨象緯寒。九層危折屐。萬堞俯憑欄。忙棟霞連紫。琉璃日耀丹。江山窮遠目。金碧駭飛輪。勢極凌虛迥。工尤入細難。瓦紋浮翡翠。石質琢琅玕。梯級千桃轉。龕燈百盞攢。綺疏雲錦繡。畫壁海波瀾。累壁衣無縫。圻牆額豈癡。是誰都料匠。幾費管勾官。想見尖初合。爭諛績不刊。幽冥資薦福。靈爽慰胎安。不有捫心愧。焉成仰面看。直思欺佛慧。豈果得親歡。世已更甚劫。基猶鞏石磐。天樞唐折柱。露掌漢傾盤。獨此雄都會。常教聳戒壇。惟應歸佛力。恩怨總無端。

可型內弟自甌甯罷官歸慰贈

出宰纔三載。匆匆似掛單。腐儒爲吏拙。貧宦事人難。贏得顛毛白。聊嘗荔子丹。多君瀟灑意。甌破不回看。只道琴堂好。全家可食租。翻無臺避債。幾置獄追逋。劉寵錢能幾。平原米孰輸。妻孥滯甌越。典賣到天吳。憶曾官帥上。頗耐廣文貧。臺有歌風蹟。門多立雪人。至今思牧耜。轉覺勝勞薪。諫果多回味。知君念昔因。賴有西江潤。能噓涸轍枯。令姪合州牧印全。代。始知家孝友。堪共命艱虞。祖父遺風厚。詩書食報劬。得歸聊慰意。先業本寒儒。

遊高旻寺贈清涼上人

來往頻年數。禪關總未登。誰知三寶地。獨有一詩僧。定力降魔杵。圓光禮佛燈。從今已公屋。每過好支藤。瓶拂安心處。烟凝篤耨香。稱詩才子氣。持戒少年場。芥孔須彌座。鈴言替戾岡。神通羅什大。開口喫針芒。最是禪堂寂。團蕉證淨因。結袂成土偶。緘口豈金人。柳或將生肘。花應不染身。出家殊太苦。吾不羨修真。是夕觀衆僧坐禪。

船馬交馳處。中藏地百弓。始知虛室白。能隔軟塵紅。身已安單穩。才仍出世雄。縑流三百輩。齊守本師風。

寓西湖十日雜記游跡

足跡半天下。西湖夢每牽。有山皆老樹。無地不清泉。昔到曾三度。重來又五年。艣郎如舊識。迎我瘦筇前。

居停借禪榻。攬勝有湖樓。才退無佳句。年衰只近遊。地連衣帶水。路穩木蘭舟。來往從今熟。思爲結夏謀。不有空王力。湖山孰別搔。半千列羅漢。百八吼蒲牢。寺大魔妖伏。年深檜柏高。儒家空謗佛。安有此雄豪。孤山好林館。丹碧映清漣。暮竹無山鬼。春祠有水仙。馬蹄芳草路。人語綠楊煙。遙想逋翁隱。當時尙未然。雨鬢波如拭。峯舟夜正中。天心孤有月。水面四無風。此地真離垢。吾身已付空。始憐塵土夢。向日未消融。昔人論勝賞。水木足清暉。泉有源方活。山無樹不肥。湍流喧石瀨。濃翠暗林霏。此景惟靈隱。何須後鶯飛。南海栴檀像。西天梵唄音。寺因闍世古。佛亦借山靈。齋粥僧千指。香錢歲萬金。是何津筏力。天福到如今。雲樓吾未到。乍此踏芒鞋。十里入深竹。一菴依峭崖。齋規平等法。物命放生牌。何許蓮池老。空門另立階。送客風篋嶺。談深不覺遙。遂令龍井寺。遠配虎溪橋。韻事成千古。清泉尙一瓢。辨才安可得。依樣亦難描。憶昨迎鑾歲。湖山渲染頻。至今亭館舊。非復畫圖新。鐵點無靈術。金剛有壞身。佛仙俱望幸。何況是齊民。

德生庵夜坐

晏坐佛堂深。燈殘漏欲沉。上方清淨地。獨客寂寥心。賊不偷春夢。鬼能聽夜吟。是夕有所警。故云。湖光微閃動。弦月上高岑。

題余伯扶孝廉黃鶴樓圖

崔顥題詩處。危磯最上頭。千秋猶傑句。四海一高樓。後世才誰敵。先生興獨游。遙知豪氣溢。俯瞰大江流。遊焦山贈巨超練塘兩詩僧

孤嶼中流矗。扁舟一纜維。有天無地處。過暑未寒時。乍到慚生客。相迎有導師。盤旋雲磴迴。百級此探奇。境與世相隔。滄波四面澄。山如隱君子。寺有好詩僧。說法神魚舞。安禪怖鷓憑。天親與無着。相對一寒燈。蒼耳甯愁墮。相隨杖錫飛。江清天作底。山瘦樹爲衣。藥物尋黃獨。鐘聲出翠微。尙嫌浮玉俗。丹碧耀禪扉。山深絕塵跡。禪侶似孺僮。草茁知更歲。花開必作詩。幽居憑鑿翠。韻事出披緇。享盡清閒福。參寥不自知。

頻歲思探勝。勞勞未得閒。始知一塵海。錯過幾名山。衰老遊纔早。登臨力已孱。何當來結夏。長共掩禪關。

西干故里

野景農家好。西成候薄寒。晚風牛背笛。秋水鴨羣竿。山樹紅黃綠。村醪苦辣酸。年豐民氣樂。相見勸加餐。

祥符寺

地擅夫椒勝。重來杖策登。秋山黃葉路。古寺白頭僧。穉極占高廡。琉璃續慧燈。前朝留梵筴。籤軸至今騰。寺有言  
德中所

碩全部  
藏經。

澄心

澄心觀物化。空翳掃無痕。身具小天地。名逾賢子孫。老猶薑有性。貧幸菜餘根。鎮日安跌處。禪牀坐欲溫。

課兒輩

衰老無堪述。清貧詎有貽。惟將前輩事。說與後生知。家法恬侯傳。官箴聳叟詩。羸金定何物。徒益汝曹疑。

渡江

復此橫江渡。荒郊落木時。關山秋滿眼。風露曉侵肌。白小鮮宜汁。黃團膩有脂。豐年光景好。比戶總恬嬉。

夜泛

清游趁良夜。風露卷吟身。天遠似連地。月高偏傍人。塵氛一以淨。詩境此焉真。何處漁歌起。寥寥古渡濱。

時交夏至久晴難以翻犁地方有司亦斷屠祈雨忽甘霖連至喜而有作

好雨如償券。平疇待插禾。世能郇伯久。天怕杞人多。早聽驅秧馬。甯嫌長麥蛾。麥溼則  
生蛾先生輟耕慣。亦且試青錢。

揚州寓齋椿樹一株高五丈許數百年物也夏日納涼了無暑氣作詩記之

檻外靈椿古。繁陰五丈橫。雨來無濕地。夏至已秋聲。借陰當張蓋。驅炎省搭棚。八千春最壽。老愛此佳名。

靜中觀物理。似為便衰慵。紅日將增暑。綠陰亦漸濃。因高多宿鳥。無艷惹游蜂。晚飯經行處。盤桓當撫松。

傅文忠公以子嘉勇公勳封郡王。追贈公如其爵。江鄉故吏。恭闕邸抄。國恩私誼。感涕交頤。敬成四律。

濟美分茅土。追崇溯構堂。相門兼有將。異姓特封王。不數韋平盛。真看帶礪長。褒忠思命極。誰不涕沾裳。

曠古真希見。桐封累代榮。世家蕭北府。遼史蕭氏。世膺北府宰相之選。王爵李西平。懋賞頒金策。崇勳勒鼎鑄。豈真因子貴。公

自有忠貞。

廿載黃扉地。從容退食遲。當時初不覺。今日有餘思。長養人才出。調和國脈滋。昇平論相業。圭組本非私。

遠附王門瑟。殊慚越分嚙。六年東閣吏。兩世北平交。喜聽新龍詔。重懷舊燕巢。受恩貧賤日。此意總難拋。

渡江

又指瓜洲渡。輕舟狎暮瀟。江山長不老。名利兩空勞。稍喜張帆穩。甯誇擊楫豪。前途有闕若。一訪遠公高。詩高受寺鑿和

尚。

老去要知止。夜行殊未休。已拋文字蠹。猶作子孫牛。大夢誰先覺。勞生敢自由。漆園應暗笑。夜壑苦藏舟。

治病

壯健殊無疾。俄驚體不康。刀圭纔下藥。癰疥欲成瘡。誰覓三年艾。徒炊百沸湯。及今猶可治。急選國醫良。

夏寒

正當驅暑候。偏怯薄寒時。夏日翻堪愛。秋風似預支。自因水氣盛。枉負樹陰垂。紈扇何須怨。裘還六月披。

蘇州元妙觀登三層樓

傑構雄都會。重簷碧落邊。地離天不遠。道與釋爭傳。紫極宮垣峻。青冥殿榜懸。修功窮土木。壯觀奠山川。瞻俯千

尋樹。香連萬井烟。獅林人僅寸。虎阜塔齊巔。玉座三清像。瑤臺八洞仙。圭裳班肅穆。旌旆勢飛鸞。岳瀆羣神列。風

雷一氣旋。猶龍宗派遠。鳴鶴咒符先。科律黃冠習。威儀繡緘翩。八琅天樂曲。七宿斗壇筵。丹篆雲霞上。金華沆瀣

辭降魔椎作杵。送鬼紙爲船。別有披蓑客。相傳脫屣年。朱何立。身尚存。肉東臆看鼎鑊。下界棄蹄筌。地以仙靈著。人彌信嚮堅。神都增胥蟹。佛刹遜喧闐。萬乘巡會駐。三元會共虔。周廊千步地。列肆百區塵。祝卜筵筳集。遊觀履寫駢。種桃詞客句。賣藥道人錢。我躡丹梯級。來緝綠字箋。市聲翼不到。天籟咳相連。眼廓三千界。胸羅廿八躔。置身霄漢上。已覺斷塵緣。

### 湖海

湖海生平氣。徒悲兩鬢皤。作詩新意少。入夢死人多。薄俗鑽螻蟻。虛名疥駱駝。何當一藤杖。空谷老烟蘿。

### 讀杜詩

杜詩久循誦。今始識神功。不創前未有。焉傳後無窮。一生爲客恨。萬古出羣雄。吾老方津逮。何由羿轂中。

### 用白傅虎邱寺路韻題思白堂

虎阜東西寺。詩仙載酒頻。時人稱公爲詩仙。見舊唐書本傳。至今遊賞處。又有表彰人。地較匡廬麗。園更蔣徑新。名流護名蹟。

應與共千春。

杜蘇鐺脚峙。靈爽往來頻。恰比三游洞。何須九老人。山川今視昔。亭館舊翻新。懷古情何限。年年此地春。

### 述菴司寇竹汀宮詹過懷杜閣寓齋小集

舊雨一朝集。欣聯李郭舟。若非憑勝地。安得召名流。幸脫龍蛇厄。子才西莊。皆以巳年下世。同爲笠屐遊。山塘人已說。好作

畫圖留。

館閣青雲契。林泉白髮年。相逢非偶爾。欲別輒凄然。况是鶯花地。而當櫻筍筵。一尊同話舊。能不重流連。

### 春蘭禁體和呂叔納廣文

霜雪亦青葱。春來發幾叢。有香羣草內。無色萬花中。粉氣薰常借。鉛華寫未工。幽人憐臭味。最喜素心同。

吳下諸生聞余至。多以詩來謁。頗費應酬率賦。

偶此成流寓。何期戶履盈。我慚無實學。人尚愛虛名。豈有傳衣付。殊勞倒屣迎。此邦風氣好。前輩肯心傾。

棲霞訪竹濤上人。不值留贈

高旻推上座。鑑公弟卓錫到棲霞。佛土重開境。僧詩一作家。喬松雲氣古。奇石浪紋斜。探藥往何處。還余過午茶。

四哀詩

前五哀詩皆於余有知遇之恩。故記述稍詳。而同輩中文字性情之友已歿者。有四人。各記五律一章。為

四哀詩。

杭白峯委才

老數平生友。終推董學真。賭文期必勝。覓過或相嗔。冷淡黃齏飯。癡狂白眼人。傷心一衿死。舉世未眉伸。

張瘦銅舍人

京邸留君住。寒酸共芋羹。劇談千古識。奇氣萬人英。校試攢方叔。丙戌。余分校春闈。而君下第。歸裝薄陸生。君訪余廣州。譚騰博未能厚。

生平漸負處。留取卹孤嫠。命嗣孝門等。皆貧苦。

家璞函主政

獻賦登華省。徵試取中書。從戎死戰場。殉木果木之難。與余同氏族。愛爾好篇章。漬帳言千縷。在嶺從軍。與余同帳。黔郵淚數行。君

溫將軍入蜀。過余威寧官舍。握別。豈知成永訣。目斷蜀山蒼。

徐秋園別駕

宦味皆恬淡。風塵早息肩。同為林下客。時掛杖頭錢。游戲昇平世。消磨老大年。祇今誰伴我。顧影一凄然。

接同年李兩村觀察書。乃嘉慶二年十一月朔日自綿州封發兼附兩村詩話十六卷。採拙詩獨多。感賦四

律寄答

不見李生久。今朝接寸箋。來原經萬里。到已歷三年。想像鬢眉老。傳聞子弟賢。京華舊遊跡。棖觸一燈前。

天各一方遠。年皆七秩餘。料無重見日。但望再來書。豪氣應猶在。交情故未疎。採詩偏我厚。百首累抄胥。  
此書前歲發。蜀土尚無虞。豈意魚鼈國。今成豺虎區。可能扶老杖。當作辟兵符。莫是將軍號。真教展壯圖。君京宦日。人

呼爲小季將軍。

得信知君在。其如寇禍侵。遙知驚夜火。不敢響秋砧。契闊同年面。迢遙兩地心。憂時兼憶友。不覺涕沾襟。

### 覽社湖隄守風

秦郵方掛席。覽社忽停舟。鬱怒風成塊。狂飈浪出頭。不圖險有此。自笑老何求。漸覺寒威重。呼童檢敝裘。

### 馮涇道中

間道出江郊。舟輕水不膠。一條河路暗。兩岸樹陰交。村火有時閃。漁榔何處敲。幽栖須地僻。安得此誅茅。

不覺

不覺喟然嘆。蹉跎愧此身。無窮千古事。只作一詩人。炳燭空勤夜。栽花已過春。茫茫天地內。斯意向誰陳。

### 秦望山道中

秦望山邊路。冬寒水落槽。蒲編包籠賤。地產蒲包。石築堵牆牢。過斷船搔背。本成語。燒荒地燎毛。鄉邨淳朴象。真可隱

東臯。

爲偉兒得葬地於金壇夏蕭邨感賦

頻年謀葬子。今始得佳阡。地近三茅叟。名傳八洞天。距大茅峯十餘里。山光畫屏上。民俗結繩前。窀穸於茲定。應無憾九

泉。

久不音容接。孤魂若箇邊。忽欣來蝶夢。恰報得牛眠。卽抵籬簞小。堪營堂斧堅。佳城得安厝。倚廡子孫賢。數年來

入夢。是夕忽夢見之。而買地成券之信適至。

暑雨

暑雨今年劇。天容潑墨團。顏雲張破敗。重霧呂糊塗。敢厭泥行滑。聊欣稻把粗。江湖無國事。惟有頌多稌。

衰態

衰態今年甚。精神恍惚看。燈前敲石火。飯後問朝餐。客厭言辭複。僮嫌服侍難。只餘詩興在。亦漸少波瀾。

也識書何味。徒虧目力微。因之姑舍是。忽又悵無依。食蓼蟲雖苦。搬薑鼠豈疲。笑看殘帙在。吾與爾同歸。

偕立庵瑩溪隴舟亭看辛夷花

玉蘭開一樹。雪髻坐三翁。頭似爭花白。顏須借酒紅。流連遲夕照。笑詠答春風。亦自成清賞。何嫌地百弓。

不寐

一夜難安枕。初更到曉烏。撲蚊翻擊類。搔蝨至傷膚。我豈有鎗行。渠偏善鷲趨。茫茫天地內。此輩詎勝誅。

好雨

好雨栽秧早。纔栽雨又添。人工天總代。秋稔夏先規。濕壓青蓑重。勻浮翠剌尖。江南真福地。穩放老夫潛。

已驅秧馬遍。甯藉土龍求。狂吠增田蛤。閒眠到水牛。勞皆忘潑襖。兆已卜車籌。并省豚蹄祝。天心亦太優。

南村坐雨

幾被老天吞。雲濃裹一村。遭雷聲在甕。怒雨勢翻盆。啼怖兒收淚。奔追客斷魂。忽然風一掃。夕照又當門。

夜坐

初夕無纖月。中庭坐露華。繁星紅似沸。穹宇碧無瑕。浪說支機石。誰乘犯斗槎。稚孫誇數典。騙我劈涼瓜。

早起

趁涼貧早起。剛盡五更天。月出衆星後。鴉鳴百鳥先。荷鋤農適野。打鼓客催船。忽憶東華路。車塵已似烟。

毒暑

毒暑今年甚。當空爛赤烏。人將投炙甕。天果作洪爐。毛竅珠拋汗。癩根粟突膚。何當縮地法。遁入水晶壺。



飯摩天未到。烟瘴地猶輕。犬舌喘長吐。烏吭噤不鳴。劈瓜童競奮。揮扇僕頻更。忽念夏畦苦。頓教心太平。

王仲瞿孝廉見過

樂事偶相值。非關步履尋。良朋來不意。好句出無心。便覺煩襟豁。能消俗累侵。黠奴知款客。早備一壺斟。

老鈍

老鈍人皆棄。孤行我自尊。門庭無過客。城市亦荒村。緩步但三徑。小詩多五言。草花栽滿地。聊復當名園。

一室

一室澹無事。寂寥性所耽。丹砂祛姹女。白香山燒丹詩。姹女隨煙飛。黃面證瞿曇。落想到非想。常談見不談。惟將本來質。受

和保初甘。

曉起

寒深夢易醒。曉起步莎廳。屋瓦霜千片。爐灰火一星。暖胸浮大白。療眼點空青。只苦閒難耐。明窗畫治經。

閩粵間有所謂天地會者。爲匪徒結黨名目。余客閩時。已聞之。日久益熾。今閩邸抄廣東博羅縣會匪之在

羊糞山者。不下萬人。據險結寨。將爲不軌。總督吉公慶提督孫公全謀調兵勦殺。追至羅浮山之華首臺

冲虛觀。諸處生獲賊首陳爛。展餘黨亦盡殲。洵奇功也。喜賦

是我曾遊處。天南好澗阿。余官粵時。曾遊羅浮。誰知仙佛地。竟作犬羊窩。幸未蔓延出。欣聞草薶多。梅花村在否。知剩幾

殘柯。

憶昨荆巫亂。初猶易撲蚊。只因堅壁守。遂使燎原焚。縱有全收局。何如早奏勦。偉茲功拙速。省得歲調軍。

風氣

靜裏觀風氣。遷流有疾徐。何當人滿後。迴憶我生初。物價市三倍。人情鬼一車。城多新樣善。害有不時蔬。昆曲更  
絃索。京靴走里墟。戲場千步埒。神會八摺輿。賣菜備求益。牧豬奴善擲。飲坊喧夜肆。遊舫泛春渠。翡翠鑲花鈿。玻

璃嵌綺疏。廚羹窮雉兔。燈事舞龍魚。馬妓魂猶弔。雛姬髮始梳。但貪嬉燕雀。曾未識犁鋤。身計傾卮漏。時趨竭澤漁。官箴嚴簾蓋。吏竄橫苞苴。白望興無賴。朱提妬有餘。甘鈴強好劫。汶芋富然狙。俗已蠶難靖。憂將蠲載胥。不知從此後。流極更何如。

送邑侯高松亭調任宿遷

六載循良績。賢聲浹萬家。猷爲兼有守。悃懃更無華。民已相安久。君無別望賒。如何留不住。忽駕北轅車。徐泗殷繁地。端賓治行高。官應從此貴。心又一番勞。郵傳連三省。漕渠過萬艘。精強原素慣。游刃亦堪豪。河決封邱岸。鄉邦險剝膚。地纔離咫尺。家不損錙銖。今秋河決封邱。距君家纔三里。全家無恙。昏墊災甯擇。神明理不誣。部民聞喜信。比戶總歡呼。

季女出嫁

名已封章奏。知難借寇恂。去思今始見。公論久逾真。民擬祠樂社。君猶念趙人。相期環五馬。重布晉陵春。恰了向平願。應償五嶽緣。只憐婚嫁畢。已近耄期年。力怯登山屐。費墜掛杖錢。惟應仿宗炳。畫壁看山川。

山茶花開卽事

節正改熟火。火珠駢故柯。滿城一樹獨。老幹百年多。燄奪燒丹赤。光增醉酒酡。倚闌相映發。不用障紅羅。草草具盤格。美名援戒奢。也知晶蠶飯。不稱曼陀花。無酒望鄰富。味辛自攜佳釀就飲。有花貧客誇。後期還預訂。已茁牡丹芽。

偕葉保堂秀才遊楊舍城外顧氏廢園

平壤無山水。爲園仗樹多。喜茲三畝地。竟有百年柯。矮柏臂旁攬。高藤尾倒拖。稍芟蕪穢去。亦足寄清哦。

桐山齋中杜鵑花二十餘盆皆貴種每開時必治精饌召客今歲又數同諸公讌賞卽席賦謝并索諸公齋和以張之

開應鵲啼候。幾疑血染。種殊山躑躅。色壓木夫容。移豈鶴林幻。蟠瓦雁塔重。詩林曲作三。似塔。主人真好事。歲費酒千鍾。

共入三三徑。來看七七花。頓驚丹竈火。欲飲赤城霞。況有牛心炙。兼烹雀舌芽。命葩與精饌。使我醉忘家。  
春遊

春好惟三月。追歡要及時。花繁紅靺鞨。天淨碧琉璃。尙少流觴會。何嫌步履遲。路旁人暗笑。此老又尋詩。  
送人赴黔

因君遠赴黔。歷歷憶郵程。地有萬山險。天無三日晴。趁墟嘗酒擔。敲竹夜餐聲。都是奇聞見。應供琢句成。  
夜泛

清涼貪夜泛。坐久露華凝。潦退秧皆補。塍翻芋已登。蛙如助街鼓。犬不吠船燈。何必深宵寐。原無事虱冥。  
外孫金阜京闈發解喜賦

喜聽星郵報。賢書捷鹿鳴。洽成吾宅相。早決汝科名。阜。弱冠有才。余決其。到。妻以孫女。辛苦三條燭。飛騰萬里程。渭陽推自出。亦覺有餘榮。

鄉科年似我。發解亦京闈。余年二十四舉京兆試。阜年稱其詞。敢謂傳衣付。須乘破竹機。遠書烏鵲喜。接浪鯉魚飛。一第應連綴。鵲登紫頂歸。余廷試卷。進呈第一。後改第三。大對。始笑。心常澹然。故以此望之。

麥大熟  
麥秋今年最。香雲萬頃黃。共驚盈尺穗。已抵半年糧。市餅邊增闊。墨禾價減昂。螢中誇飽食。竟欲傲朝堂。

驟雨  
驟雨不成寸。狂飈又掃空。未蠲消渴病。差有解煩功。痴隱暫停癢。眼昏忽豁蒙。那堪簷溜乍。復見曉霞紅。

咏物四首

蓮蓬人

出水亭亭立。形容老更奇。高同三友品。松竹梅。豔改六郎姿。蓮步甯初學。荷衣本舊披。得邀君子愛。儻輩故難隨。

鯨魚鶴

驗合飛潛性。能令臭腐神。姓丁非故我。去乙是前身。不藉胎生幻。居然羽化真。出波纔幾日。便欲嘖青旻。

掃晴娘

佳人執箕帚。勝挽魯陽戈。豈比曝巫女。禮弓。真成乾爛婆。舊唐書僖宗紀。掃寧先灑水。步亦戒凌波。何用紫姑卜。明朝

霽景多。

不倒翁

但稍煩人力。登盤便有神。場中胡旋舞。陌上踏搖身。糊紙顏何厚。封泥足未伸。掉頭渾不止。絕似醉吟人。

又簫鶴一首

海闊天空境。升沉倏兩分。腥聞雖鮑肆。骨鯁肯雞羣。似蛭蟬餐露。非池鯉躍雲。漫疑鳶跼水。浪泊去求勳。

兩望

一兩人心定。霖甘不厭多。遠難辨牛馬。沛若決江河。已遍高低地。寧分早晚禾。天財千百萬。盡散作恩波。

謨覽二孫俱就塾識字喜賦

又見童孫兩。相攜就塾師。文須先識字。昌黎語。老正藉含飴。莫悞陳山可。休訛杜十姨。方名雖小學。九勿此初基。

正屆插秧經旬無雨夜寐忽聞浙瀝聲以為甘樹也起視仍月色滿庭感賦

四更聞浙瀝。夢醒適然驚。百物有生意。多時無此聲。豈知膚寸合。仍是耳勞鳴。急起開窗看。依然皎月明。

喜雨

膏雨來何暮。民情望欲窮。苗枯猶待救。河斷漸能通。破夢驚簷溜。開唇沸市訇。可憐農已億。力盡桔槔中。

潤難期沃若。嘆暫解焚如。田吠猶無蛤。廚烹漸有魚。頗聞官糶賤。敢望佃租輸。胼胝民勞久。聊堪歇踏車。

閩三國志。蜀向朗仕諸葛丞相。史免官後。優游無事。垂三十年。潛心典籍。年踰八十。猶手自校刊。開門接賓。誘納後進。但講古義。不干時事。人皆重之。余出處踪跡。頗似之所不及者。官職聲名耳。昔東坡慕香山。謂生平似其爲人。故詩中屢及之。然晚途尙有不同者。不如余之與巨遠。無一不相肖也。爰作詩以誌景附之意。

望古尋同伴。私心孰比倫。子雲期後世。向朗是前身。時已千年隔。踪如一轍循。葫蘆依樣畫。尙恐未傳真。

即目

百草皆蕃廡。綠知暑已深。荷花高出岸。葵葉蔚成林。向日葵廿株。皆高二丈餘。閒處驗生趣。靜中生道心。向來嫌理學。此亦舞雩吟。

俊兒隨侍久。詩學日進喜賦。

客邸相隨久。詩功喜日新。老年無樂事。家學有傳人。何必金籬富。惟愁腹笥貧。滿門紈袴習。吾更與誰親。

近日作詩多用金玉字書以一笑。

玉白金黃色。非真亦壯觀。老方嚴戒得。窮僅免號寒。漫拾殘牙慧。爭嗤至寶丹。貧兒殊淺露。富貴在毫端。

詩壽

毫齒尊鄉黨。虛名主坵壇。苦吟三折臂。強飯一加餐。世要詩何用。人惟壽最難。有詩兼有壽。敢復歎衰殘。

活計

活計銖銖積。堪資一笑哈。死何妨速朽。生不食嗟來。北海文爲富。侯鯖錄。李邕東坡儉養財。清波雜志。東坡財。費以養。如今亦惶恤。且醉眼前杯。

秋分後天氣已涼。忽復大熱。

秋冷復驚暑。渾疑節候差。幾如回馬箭。仍障辟蚊紗。白落荷無瓣。黃蒸菊有華。笑同新米價。已賤又增加。近日事。

喜晴

累月春寒重。陽和今乍回。藥苗藥。偷眼長。珠藥寶珠山。嘔心開。一氣同噴薄。天工不剪裁。靜觀多妙理。小憩步蒼苔。

五月望後正在插秧大雨連日夜不止喜賦

天似防人憾。栽秧雨過濡。蠶猶聞潑刺。耗益視糊塗。表廣逾千里。新陳接二醜。老農勞亦喜。今歲又多稔。

憎蚊

豈不愛他命。其如嗜我膚。嗜微偏善刺。聲隱更能呼。物理有相殺。王鈇所未誅。化魚身喂衆。吾不學浮屠。如來身見洛陽伽藍記。

目暗

作文須識字。昌黎。老眼欠精明。尙擬攤書課。幾同潑墨成。之無非姆教。香山生七月。識之無二字。何況豈人名。鄭以偉入。以何

兄二字爲人名。見明史本傳。拚得雙眸耗。糊塗過此生。

高年

共說高年好。高年敢自尊。與誰談舊事。舉世厭陳人。詩已寒蟬噪。心猶尺蠖伸。桑榆留暮景。珍此歲寒身。

宵行

旅跡孤無伴。宵行限有程。嘯聲何處鬼。村影尙非城。足倦屢嫌重。衣寒翻覺輕。何當一甌粥。燈火候深更。

# 七言律一

梅花

殘臘春心世未知。忽傳芳信到南枝。單身立雪程門弟。素面朝天魏國姨。紙帳有香吟倦後。繡衣無影夢回時。清  
晨動我巡檐興。準備東風第一詩。

正是冰霜徹骨天。何當冷蕊別成妍。衆芳皆後真香祖。同調無多只水仙。踏凍來尋芒屨滑。忍寒相對繡帘攀。看  
花老樹嫣然處。箇是人間枯木禪。

江南江北枉相思。何處探春見一枝。古寺月明僧定夜。空林雪滿鶴歸時。竹松自結同心契。蜂蝶甯容半面窺。到  
得百花爭炫處。始知老輩不求知。

隴頭流水嶺頭雲。消息相關結想殷。一到歲寒誰伴我。每逢月落便思君。寫真不藉丹青筆。作賦何妨鐵石文。剩  
欲訂爲交耐久。江城笛好數相聞。古今咏梅詩多矣。工切渾脫。應以此爲第一。故。

贈性海上人

小茅菴底酌香醪。詞客詩僧兩老鬢。偏袒右肩獅獨吼。堅持左手蟹雙螯。參寥戒爲狂來破。蘇晉禪須醉後逃。灌  
頂醍醐原佛諦。未妨世眼笑醜醜。

新齋同杏川諸人散步

積雨江村綠漸稠。喜逢霽景豁吟眸。春留紅藥拖殘屋。雲放青山出一頭。聲在樹間禽姓杜。香尋花底蝶爲周。邨  
翁莫笑貧兒戲。我是人間馬少游。

陽湖晚歸

布帆輕颺晚風微。回首陽山正落暉。鷺點碧天飛白字。樹披紅葉賜緋衣。詩情澄水空無滓。心事閒雲澹不飛。最  
喜漁歌聲欸乃。扣舷一路送人歸。

黃天蕩懷古

打岸狂濤捲白銀。似聞桴鼓震江津。歸師獨遏當強寇。兵氣能揚到婦人。有火誰教戎箭射。無風何意海舟淪。建

炎第一功終屬太息西湖竟角巾。  
航海先傳警蹕趨。孤臣猶自矢捐軀。小朝氣象偏安局。半壁江山百戰圖。龍廟尙傳舟似馬。鸛河終恨幕啼烏。草安不作崖山覆。容易諸公赤手扶。

題明太祖陵四首之一

定鼎金陵控制遙。宅中方軌集輪鑣。千秋形勝從三國。一樣江山陋六朝。燕啄皇孫傳豈誤。謂靖難師。狗烹諸將亂終消。橋陵會借神僧穴。易代猶聞禁探樵。

淮陰釣臺

遺蹟長淮一釣臺。常令過客此低徊。蕭曹內本無君坐。雲夢間還謁帝來。與噲伍憐魚服困。假齊王伏狗烹災。千秋此獄難翻案。留作人間弔古哀。此詩便可作千秋定案。保泰。

泊頭鎮卽目

曲曲圍牆短短籬。黃塵和粉點胭脂。春來北路稀花事。人在東風學柳絲。枉自數錢工姹女。方將乞食到歌姬。河干小泊超神觀。欲笑阿難被咒時。

入都依外舅劉午巖先生館舍時先生客於空保尹公第。

倦羽飄飄得暫投。蕭齋燈火話羈愁。我來客路誰青眼。公在名場已白頭。五畝何時乘下澤。一壺還仗引中流。旁人識飢驅出。只道從師負笈游。

辛苦蟲魚手自箋。公車曾載牘三千。病猶作客因賢主。老不趨時讓少年。篋裏一經垂就業。畫中二頃未成田。憐公已是依人庶。我又依公似拇駢。

呈座主休甯汪公

六六天鄣氣鬱龐。挺生耆碩道經邦。文章一代推燕國。風度千秋繼曲江。司馬鑑開書局纂。帝鴻硯贊筆椽扛。身



當鼎鉉和羹久。早晚宣麻下鎖窗。

退食歸來雅興長。三閭新築職思堂。公賢名。杜門客少心如水。謀國年深髯有霜。運腕字開千石竇。等身書擁一爐香。履綦依舊儒生樣。誰識班聯日月旁。

### 土城懷古

德勝門外土阜。本元都健德門故址。然土人至今呼爲蕭太后土城。必有所自。按遼聖宗母蕭氏最賢。岐溝關之捷。益津關長城口及瀛洲之戰。澶淵之役。皆與聖宗同行。此或其駐師地也。

郊圻屹立土門崇。遼後曾經此詰戎。赤帝敢傷吾子白。雌風偏勝大王雄。封椿坐困南朝費。歲幣終來內府充。千載遺踪有雙阜。猶傳女隊簇妝紅。新警之極。保泰。

負屨圖成髯未華。手攜嗣主戰邊沙。不聞宮掖悲人薨。肯使兵塵喪帝躬。粉黛三千歌入塞。燕雲十六紀傳家。笑他瓊島妝臺女。空把才名後代誇。太液池瓊華島。舊有金章宗李宸妃妝臺。

### 壬申下第作

倦游情緒峭寒天。人海喧中黯自憐。漫擬穿楊憑一箭。又須刻楮費三年。達磨向壁空參佛。子晉吹笙已得仙。席帽巾箱商去住。欲歸誰辦買山錢。

身本高陽一酒徒。無端托業忝爲儒。舉場我歎魚緣木。敗卷人嗤鬼畫符。三字見元遺山詩。羞學空函書咄咄。共誰擊缶和鳴鳴。祇應白髮高堂夢。猶問泥金信到無。

閉門仍與一編親。肯便干時踏軟塵。鑄硯終看穿硯日。拆橋多是過橋人。關河倦羽三更鴈。風雪寒衣百結鶉。笑看襦衡名刺在。已經磨滅字都湮。

### 哭杭廷宣之訃三首之一

河梁送我峭帆輕。一別俄驚幾載更。久客不歸無異死。故人入夢尙如生。過車三步他年痛。許劍千金舊日情。身

計定知君不舍。忍辭殘局爲收枰。沉

集益齋卽事戲呈休甯座主

退直歸來雅興賒。閒商文史浩無涯。公於此已肱三折。我愧才非手八叉。幸有津梁先路導。何煩絲竹後堂譁。步趨宛憶童時景。書館從師侍絳紗。

時晴齋與王穀原舍人小飲

西窗剪燭月痕斜。旅邸相依感鬢華。倦後客懷叢桂樹。瘦來人似老梅花。才名競欲招東閣。先客梁薊林家宰第今客任松泉司第。狂態兼愁溺正衙。且莫臨觴悲晝晚。千秋著述已成家。

吳杭應龍先生墓

瀆酒那禁涕淚俱。死生會不待須臾。我歸但有徐君墓。公在曾憐趙氏孤。奔問已悲新宿草。酬恩空托一生劬。依然牀下梁松拜。無復溫言誨座隅。

垂楊

垂楊依舊覆窗紗。簾幕無聲但日斜。小杜去猶非綠樹。前劉來已失桃花。紅綃枉自思公子。碧玉仍憐嫁小家。彈指鴻泥成往跡。蕪菁香裏飯胡麻。

敝廬將圯稍事修葺詩以落成

隙地何曾拓數弓。編茅早課索綯功。客途久厭三間廡。儒行原尊一畝宮。陋稱簞瓢居巷內。貧真樓閣造空中。只愁斷手無多日。又向天涯作轉蓬。

戲題汶上旅壁

征途日日轉勞薪。偶見天桃始覺春。滿面黃塵投旅店。一羣紅粉看詩人。梁炊久醒游仙夢。花落難沾學佛身。爲語纏頭無長物。或將好句寫羅巾。

樓桑邨

桑蓋童童已古邱。英雄氣尚互千秋。敵強終造三分國。士少能臣第一流。長坂安行真大度。益州詭取亦陰謀。獨憐故里終拋棄。不及歌風沛上遊。

穆庵侍讀見余近作枉贈佳章依韻奉答

枉將辛苦學妃孫。閉戶窮經願每違。漫擬莊嚴千佛塔。尙慚補綴百家衣。鞭長難護揚雄說。綆短方思董子帷。旅邸喜仍鄰近在。可容鑿壁借餘輝。

丙子元日早朝即輪直內閣

千行鸚鵡集初寅。肅聽鳴鞭拜舞勻。玉燭星雲三殿曉。珠杓雨露九天春。笙璫響入和風度。旗繖光涵旭日新。朝罷獨趨輪直地。早欣發筆寫恩綸。有唐人早朝詩遺韻。德麟。

同邵耐亭郊行

草綠裙腰到襖長。相邀勝侶去尋春。波空有影凌羅韉。塵軟無聲碾畫輪。柳絮前身原蕩子。桃花對面有佳人。誰知袞袞長安陌。着此蕭閒兩角巾。

軍機夜直

鱗鱗鴛瓦露華生。夜直深嚴聽漏聲。地接星河雙闕迥。職供文字一官清。蠻箋書劄三更燭。神索風傳萬里兵。時用兵西睡。所愧才非船下水。班聯虛忝侍承明。

清切方知聖主勞。手批軍報夜濡毫。錦囊有策兵機密。金匱無書廟算高。樂府佇聽朱鷺鼓。尙方早賜紫貂袍。書生眊筆慚何補。不抵沙場斫賊刀。

下直同漱田秋帆諸人郊行卽事

油碧車輕度軟紅。看花喜有素心同。一春晴雨常參半。三月寒暄最適中。芹沼泥融銜燕子。柳塘水漫浴鳧翁。清

遊不在彈章例。莫便驚他御史驄。路遇巡城御史。故云。

兩過青圻淨麴塵。出郊人馬共欣欣。班輪隻日餘雙日。春已三分過二分。蝶趁衣香芳草路。鴉銜祭肉夕陽墳。郊行景色真堪畫。只少擔瓶一老軍。

遊檀柘寺

蓮漏聲中轉六時。山房春靜日遲遲。龍妝老叟時聽講。鶴被仙人每借騎。礙石竹多翳出筍。交柯樹似寄生枝。何當結夏來趺坐。清簟無塵一局棋。新絕。

題美人春睡圖

海棠春暖正微醺。午睡聊收繡線紋。香篆碧縈魂一縷。枕痕紅透肉三分。畫師何處窺曾見。侍女私相語弗聞。且莫真真喚名字。夢中或已去行雲。

擬秋獮應制

大獮行邊輦路清。塞垣風緊峭寒生。九天秋肅驅劉信。萬帳宵嚴虎衛兵。上駟別羣棚烙字。頭鵝驗獲箭書名。太平肆武軍容盛。雙燾黃龍蠶幔城。氣格逼唐。枚。

路入周隄水木華。茸茸軟草不飛沙。地包邊塞逾千里。人集華戎共一家。衛士割鮮燒楸枰。名王行炙奏琵琶。盛朝校獵成年例。石鼓岐陽豈足誇。

次韻酬袁子才見寄之作

早脫朝衫作野樵。雲煙滿塢養心苗。才名未肯將官換。好句還應仗福消。技有鼻傷非郢斲。音無肉味是虞韶。何當一訪隨園去。鴻爪雙雙跡互標。

西廠觀烟火

晚直郊園月未斜。昇平樂事覽繁華。九邊塵靜平安火。上苑春催頃刻花。跋浪魚龍烟是海。劈空雷電礮爲車。歸

逸尙有餘光照。一路林巒映紫霞。好句天成。難得如此雄傑。枚。

歲暮劉蘭陵刑曹竹軒中翰招同章習之吏部暨北墅漱田玉亭諸同人讌集梨園小部縱飲追歡卽席有作

休沐相招歲晚天。斜街宵集騎聯翩。早煩掃雪三三徑。來趁消寒九九筵。劇孟賓朋遊俠慣。岑參兄弟好奇傳。沉沉漏鼓留髡處。風景真令裂老顛。

急管繁絃總樂方。梨園小隊簇新妝。憑他檀末都盧戲。演出人間傀儡場。曼睪波橫燈影炫。纖腰風蕩舞衣香。冰霜帘外寒如許。誰識春先此地藏。

### 移寓椿樹衙衛

頻年書劍客平津。宣武坊今僦屋新。喜有園林教作主。敢誇門戶不依人。賃春尙未借荆婦。賤婦將到。祭竈仍先請

比鄰。莫笑腐儒家具少。牙籤也自壓雙輪。對門有歌者。來聽北里新翻曲。到及東風滿院花。詩社分題馳檄促。酒杯留十笏林巒樹影斜。芳鄰更妙按紅牙。胡郎寓。同人皆有。

客隔牆賒。書齋別有新妝點。粉壁名箋爛似霞。詩賈選。時晴扁額墨光浮。猶是尙書手筆留。人物百年思老輩。主賓十載感前遊。名歸青史無瑕指。地過黃壚有淚流。門館重來陳迹在。豈勝華屋愴西州。寓卽汪文端飾時晴齋書室。三。詩情文編。百讀不厭。枚。

### 木蘭較獵恭紀

祭纒令肅正新涼。路指周陸較獵場。夜火千屯山氣紫。秋風萬騎塞塵黃。清時邊備無傳警。絕徼軍威正撤防。自爲昇平勤肄武。豈徒薜蘿倭長楊。

行闕嵯峨倚翠屏。名王俱入宴彤廷。嘗新螯蟹勝淮白。魚名。見楊誠齋集。奏捷頭鷺有海青。酒醉瓊漿清暑殿。香鞞金粟廣寒庭。欲知湛露恩深處。琬管鈞天十日聽。行宮大宴十日。過中秋卽入木蘭。

啓蹕旌麾肅隊齊。舌人添譯玉關西。轡調八駿皆宛馬。刀帶千牛有鬪奚。哈薩克建八駿馬。降夷多備宿衛。霜信堪猶留嫩草。潦痕退已少輕泥。木蘭好片清秋景。黃葉青山百鳥啼。

千三百騎布圍成。番部簽來歲踐更。拂鞚鞭追飛兔影。鳴騶箭作餓鷄聲。烽烟前代防邊地。裘褐中朝保塞兵。最是獲禽殞賞處。滿營膜拜頌恩榮。

哨鹿三更帳殿開。隨行數騎盡銜枚。地當深入多熊館。物有相招似雉媒。獲雉呼燈山外火。劉鮮行酒馬前杯。相如何用憂銜粟。天子曾經殺虎來。上哨鹿手殺一虎。有御製虎神槍歌紀事。

獵罷歸程馬首東。諸蕃曉送繡旗紅。路分塞外龍堆雪。秋入關南雁陣風。黍熟市低沽酒價。碧聞人課索綯功。宸遊別有欣然處。繡甸年年慶屢豐。

哭杭白峯之訃五首之一

傳家節孝澤宜償。研削燈窗志激昂。元凱生平書有癖。次公意氣醒而狂。筆堪塚塚知多少。墨與人磨互短長。一第未邀知不瞑。重泉應尙吐光芒。

悼亡

扁舟纔到暮春中。淒絕秋闈罷女紅。千里赴京如送死。十年爲婦正奇窮。瓦燈猶照空牀篔。總帳誰扶削杖桐。生子。已正是薊門搖落後。猴和殘葉灑西風。

百分絕少一分償。只道將來日正長。多病尙辭賒藥餌。新婚便典嫁衣裳。頻年癡想登高第。半載窮奢食太倉。信有人間論薄命。擬呼日者再推詳。

急景俄驚逼歲闌。殘冬隨例作去聲。消寒。老親拊擋迎年酒。弱女經營餞臘盤。爆竹聲中虛煖熱。燭枝淚下共沈瀾。劇憐蕭寺冰霜夜。冷骨孤眠七尺棺。沉痛入骨。舟。

新僦宅有小樓可憩而多狐巢詩以覆之

漫憑狡獪擾幽廬。禍福靈氛早告予。山鬼豈知經歲事。仙人浪說好樓居。開堂笑汝禪仍野。媚寵慚吾術已疎。曠易倘如王輔嗣。未妨來對一窗虛。

題蘄庵僧遺像

曾住花山最上層。披圖猶見骨峻嶒。立朝章疏批鱗手。易世衣冠削髮僧。故國遺墟傷北望。空門法席演南能。孤標自是經奇士。莫但相推續佛燈。

過文信國祠同舫荅作

鬚眉正氣凜千秋。丞相祠堂久尙留。南渡河山難復楚。北來俘虜豈朝周。出師未捷悲移鼎。視死如歸笑射鉤。何事黃冠櫛俎語。平添野史汚名流。

三百餘年養士恩。故應末造澤猶存。半生聲伎勤王散。一代科名死事尊。滿地白翎人換世。空山朱噶客招魂。笑他北去留承旨。也是南朝一狀元。

戰罷空坑力不支。拚將赤族殉時危。死堅獄吏因三載。生享門人祭一卮。血碧肯污新贈讖。汗青終照舊題詩。如何一本梅花發。分半南枝半北枝。三詩警切精鍊。德麟。

贈張吟薌

倚聲絕藝似珠圓。鏤月裁雲過百篇。花影得名張子野。井泉到處柳屯田。傳來曲部人爭寫。唱入旗亭妓最妍。笑我聾牙難入律。銅琶琴上撥皮絃。

大雨倒牆戲筆

鳴簷三日雨淋浪。摧倒苔垣一丈長。并使相如無立壁。或傳夷甫竟排牆。蝸涎作字難留迹。麈尾編籬且畫疆。除卻青氈本何有。不妨恃陋少隄防。

會笑冰山易作泥。不虞識在小庭西。故人來訪應排闥。鄰女如窺免上梯。亂石已妨行藥步。濕塵先掃落花蹊。最

憐十五蕭郎竹也復鈴璆被壓低。二詩逸態橫生。故。

南苑大閱恭紀

雪晴南苑曙光臨。翠輦親臨閱武來。千步廣開盤馬地。一旗高颭晾鷹臺。風雲捲陣戈揮日。烟燄騰霄礮震雷。特許遠夷觀壁上。威聲早過白龍堆。高文典策用相如。

己卯元日早朝

彤庭冠佩賀元辰。今歲朝儀分外新。雞鹿塞俱編屬國。麒麟閣已畫功臣。呼韓稽首班行肅。契苾駢肩宿衛親。紉纒五雲金闕朗。太平中外一家春。

入古北口

路從雲霧下崔嵬。響踏空山落葉堆。投棧馬嘶歸意急。入關雁帶峭寒來。新茅縛把增簷角。老樹刨根作炭材。又是一番風景換。好將月令譜邠邠。

春和相公四十壽詩

扶桑弧矢掛青旻。黃閣開筵正早春。賜券功兼官將相。秉鈞身是國勳親。萬間廣廈胸恢廓。千頃澄波量渾淪。平格何須多祝頌。天教霖雨潤斯民。

一德堂廉喜起歌。手調伊鼎奏羹和。虛舟相度猜疑少。連茹人材長養多。溫室樹前頻贊畫。小車花下亦經過。從知四海蒼生福。當國名臣鬢未皤。

文端師諭葬事畢。余囑其二子承霽承霽入京。奏謝舊時賓客皆目笑之。以爲何所望也。及霽得官。霽亦得舉人。或又謂余有畫策之能。抑知聖天子垂念舊臣久而弗替。豈臣下所能仰窺萬一乎。詩以誌愧。

葛帔西華傍路塵。昔時賓履更誰親。豈應成季勳無後。亦恐田橫客笑人。一代特開新卹典。廢官既歿。移賜其弟。此例從來未有。九重自念舊勞臣。衣冠優孟慚何與。劇喜師門免負薪。



和友人洛陽懷古四首

芳林園魏明帝因漢舊苑增築。後以魏齊王芳諱。改名華林園。

包絡川原禁籞恢。令嚴將作鼓聲催。也如銅雀臨漳起。遂使金人別漢來。繡轂千蹄官負土。縹綾半臂帝登臺。洛陽他日名園遍。風氣多應自此開。

金墉城晉受禪後。居陳留王於此。

另築名都處讓皇。洛陽城外又宮牆。近非別苑遊春地。閒似禪家退老堂。正朔尙留殷沫土。附庸略彷彿山陽。可憐猶是唐虞局。從此商孫少裸將。魏晉革易。故主皆以善終。劉宋後無此事矣。故云。

梓澤園石崇別業。即金谷園。

一代豪華擅此園。朝朝暮暮最銷魂。美人絕色原妖物。亂世多財是禍根。浮白觴前猶舞影。落紅枝上忽啼痕。樓頭一擲終佳話。能博蛾眉死報恩。

西陽門石勒擒劉曜處。

東西二帝此相攻。事往猶傳戰血紅。兩陣間分誰盜賊。六經外另有英雄。冰痕早泮靈昌渡。鈴語先占替戾風。千載共和胸磊落。故應狐媚笑曹公。七言傑句。古來以少陵五更三鼓一聯為絕唱。然猶第寫景也。此獨從議論中迸出光燄萬丈。是何等神力。故。

修史漫興

史局虛慚費月餐。古今歷歷作閒觀。千秋於我宜何置。寸管論人固不難。高燄輝檠紅燭炬。古香浮硯翠螺丸。只輸小宋風流處。少個濃粧伴夜闌。

秋闈分校卽事

澹墨纔分榜藥香。遠持玉尺許評量。敢誇眼似新磨鏡。尙有魂驚古戰場。珊瑚慮踈羅一目。經籙欲叩腹三倉。所期瑞集高梧鳳。藉手文章報廟堂。

黑白漫漫局未明。別裁忍負鳳心盟。九還可煉誰功到。一筆能勾奈哭聲。腕力袖穿風兩肘。眼花燈眩鼓三更。可憐利市襴衫客。豈識持衡爾許情。

連日西風落葉繁。人間渾未識秋痕。勞薪已作溝中斷。戰骨猶留夢裏魂。曉擲靈籤勤問兆。夜看雄劍擬酬恩。生平此味曾嘗遍。東筍堆邊手再翻。仁人之言。枚。

分校雜咏

宣名

觚稜淑景日初寅。御紙簽名下紫宸。同輩半爲揚驪客。宣旨無名者。皆散去。至親翻有向隅人。校官親族。例迴避。一時朝服班行肅。隔夜巾箱檢點頻。卻笑門前迴避字。主人出後貼偏新。

封門

關鎖中分棘院森。外簾信息總沉沉。官封恰似丸泥固。人望居然入海深。粧閣但聞簷馬響。圍城不遞紙鴛音。由來選佛場高甚。隔斷紅塵路莫尋。

號簿

不論工拙總須開。一例登收待別裁。先後就編魚入貫。妍媸未判鬼投胎。絕無名姓偏書冊。從此雲泥各判堆。恩怨多何必問。就中幾箇出羣來。

薦條

三寸冰銜鏤刻工。卷端鈐與薦書同。品題未便無雙士。遇合先成得半功。佛海漸登超渡筏。神山猶怕引回風。吹噓送上吾何德。已有人懷感激衷。

藍筆

中書不判五花工。凝碧池頭染翠融。欣賞情同青眼客。別裁權亞黑頭公。主司用。磨筆。瘡痕豈向眉添黛。濃抹何須帛

勒紅。卻笑出藍凡幾輩。異時若箇最葱蔥。

落卷

幾陣雲烟過眼輕。案頭堆疊太縱橫。落花退筆全無艷。食葉春蠶尙有聲。沉命法嚴難自訴。返魂香到或更生。聞投未必皆珠琲。無限人間歎不平。

副卷

去取真看雞肋如。棄之可惜味無餘。我憐桂木旁驂馬。人比登盤半面魚。文彩原輪全豹變。姓名休笑續貂書。側生荔子香雖減。猶勝西風落葉疎。

撥房

中額難均數迫懸。按房哀益主司權。未妨螺贏艱生子。笑比琵琶別過船。梁上燕飛移故壘。擔頭魚去剩空筵。臨分不用增惆悵。三宿浮屠也結緣。撥房後舉子於原薦官。仍修門生禮。較所撥之房師更親也。

填榜

堂吏聲高唱拆封。關防加密鎖闌重。掀髯劇喜名流出。防口深愁熟客逢。星斗光連千炬火。魚龍氣動五更鐘。榮觀最是填魁候。六幕文昌景倍濃。填榜畢。乃補填五魁。則萬燭齊輝。亦奇觀也。

房卷

校官各自有房元。試牘從排似弟兄。十數名分新雁塔。一家人聚小龍門。文如和韻詩連刻。交比同年誼倍敦。師說誰堪傳枕膝。十年詩法要相論。

友人以家難繫獄論罪悼之

一別休文七載更。傳來消息劇堪驚。兩邊夾食黥奴面。半夜呼囚獄吏聲。事異頓羹銜嫂怨。情同冒刃代兄行。側聞對簿銀鐺日。祖德頻號血淚橫。

年少清才脫穎如。翩翩健筆欲凌虛。何堪斷送園扉土。誰爲經營廣柳車。三木囊頭猶覓句。千金牘背豈成書。鄉邦英彥今摧折。痛絕幽蘭一本鋤。

姓名并不齒齊民。枉費騎驢踏軟塵。襪後儒冠人貯溺。春來城旦鬼催薪。茹刑不借螭蛇膽。推命空餘磨蝎身。觀過知仁公論在。共憐熱血鬱輪囷。

遂使斯人罪廢終。兼憐生計覆巢空。衣糧搜括書驢券。兒女流離拾馬通。逐食真陪卑院乞。代行難雇病坊充。刑餘著述終期汝。業在名山尙未窮。

散館恭紀

傳聞天語殿東頭。益愧才非第一流。已忝班行詞館綴。曾邀名字御屏留。去歲京察蒙恩記名。文章似惜揚無敵。骨相兼憐廣不侯。引見後上語大學士傳公。謂寒士從來感知己。沉蒙帝鑒更何求。

送蔣心餘編修南歸

敏捷詩如馬脫銜。才高翻致謗難緘。有問之於掌院者。故云。春歸織錦新花樣。老疊登場舊舞衫。過眼恩讎收短劍。隨身衣食有長鑱。歸途笑聽檣烏響。安穩春流一布帆。

經年不晤自情親。冷煖場中兩故人。世謂灌夫能罵座。我援龐吏勸書紳。離筵一別真如雨。浪跡重逢定幾春。更憶同時二張子。吟薊。廡船。皆近來也。復少音塵。因君交於余。

查初白集中有門神詩戲效其體

五彩桃符耀孟陬。司閭常賴職勤修。冠裳豈比關門吏。封爵還疑戶牖侯。棗戟餘威增肅穆。簪纓古制儼貽留。監奴第令休矜寵。別有尊嚴在上頭。

執銳垂紳將相權。會傳褒鄂壯凌烟。描來花樣輝三徑。報滿瓜期例一年。人欲登龍先仰望。門雖羅雀肯他遷。誰家健婦誇持戶。勞績殊難企及肩。

灑陵醉尉氣如雷。汝獨無言冷似灰。日傍獸鑲身不動。夜同魚鑰目常開。衣裳破執丹青補。顏面衰因雨雪摧。土偶若逢應一笑。依人門戶總堪哀。

夢亡內作

生前心事有餘悲。入夢依然淚暗垂。從我正當貧賤日。與君多半別離時。紙錢豈解營環珮。絮酒難償啖粥糜。一穗寒燈重悵憶。簾前新月似愁眉。

喜吟薌至京

離懷五載渺相思。空谷蹉然到履綦。坐定君先詢近作。別來吾未有新知。遊踪預恐桑三宿。君將往山右。昔面微添鬢幾絲。僮僕也知交誼厚。廚頭催取具盤匱。

九日陶然亭同人小集

孤亭看菊半詞曹。車馬無煩出郭勞。南浦綠餘人柳老。西山青出女牆高。騷壇盟敢操牛耳。拇陣轟如戰虎牢。地僻向來無古蹟。茲遊或可續題鮐。三四一聯。若作亭中楹帖一字不可易。德麟。

哭門人董東亭庶常之訃

一紙書催淚萬行。斯人才思擅齊梁。并無福可消貧宦。剩有身歸葬故鄉。春夢一場慳富貴。秋風何處哭文章。生平好嘔心成句。君素病咯血。絲盡枯蠶得不僵。

孤露身真落葉如。曾憐少賤帶經鋤。生無薄產常依婦。才可名山未著書。家在一方鴻爪裏。名沉千古貉邱餘。從知墮地須論命。何物憑君覽揆初。

同年方牧園謁選入都話舊

少日盟壇共酒樽。相思雲樹渺江村。離懷豈意聯牀晤。交誼原從戴笠敦。著述關心揚子宅。寒暄回首醉翁門。謂主任文瑞師。長安冠蓋知多少。情好終輪舊弟兄。

同年平姚海明府卓薦入都賦贈

滕王閣畔赴官程。七載賢勞起政聲。南浦雲爲才子麗。西江水似長官清。石壕夜靜追符少。燕寢香凝好句成。莫道循良無薦達。御屏高處已書名。三四天然好句。故應傳誦一時。德麟。

猶憶征車去國年。玉堂回首路迢然。庸知失馬非爲福。別有飛鳧去作仙。清帶頭冰官鮓卻。潤分掌露縣花妍。政成果應名都擢。鈴閣何須羨木天。時已擢郡丞。

從吳民部寓齋借觀商寶意太守詩集爲題長句

寫本纔看脫小胥。攜來光早映臆虛。便當燈下新翻曲。尙是人間未見書。才豈患多花釀蜜。熟真生巧水成渠。笑余欲乞鄰家火。卻似光偷擊壁餘。熟生巧。的是寶意詩。枚。

咏火判官京師人於上元節。以泥塑鬼判。虛其腹。燃火於中爲戲。

滿街燈燭正喧塵。變相俄驚地獄開。略似人形泥塑在。是何兒戲火攻來。漫疑古佛多毫相。翻恐冥官也劫灰。不是禁烟寒食候。莫教錯認介之推。

餞摩天豈汝班行。判簿聊矜點鬼忙。人以頭焦驚上客。世無竈養作中郎。幾時洗得心如水。何術修成頂放光。莫怪劉元搏活脫。熏烟滿面不施粧。三四運古入化。世間有此爐錘否。保泰。

稜籍端資校勘功。故當炙手勢憂雄。共驚氣燄能炎上。誰識神靈也熱中。隸以夜叉應面黑。配宜旱魃稱顏紅。只愁黃胖游春罷。碎作飛塵陌上空。韓平原事。見白。及談藪。

噓吸真疑有式憑。不同土偶坐懣騰。潑寒胡到趨應附。姑射仙來見或憎。似吐老僧三昧火。漫驕冷宦一條冰。平生性不因人熱。任爾乘權氣鬱蒸。

漫興

紙牘涼暹露華清。顧影蕭然感易生。漸老鬢毛攜黑白。積勞筋骨驗陰晴。將車送鬼窮難去。食字求仙候未成。手

剔寒燈情不寐。階前落葉報秋聲。

富貴何曾有盡期。胡爲行者競如馳。日雖夸父身能逐。山豈愚公力可移。絕頂樓臺人倦後。滿堂袍笏戲闌時。與君醒眼從旁看。漏盡鐘鳴最可思。君自言是年已動歸心。蓋非虛語也。故。

有以疎慢見責者書以誌愧

鮑老郎當久取嫌。枉勞寄語問郎潛。壺觴地迴多珠履。絲竹堂深隔畫簾。姹女數錢工索笑。乞兒向火競趨炎。望塵未慣車前拜。擲散孤踪敢不恬。

有人來自要津邊。苦勸逢時趣改絃。敢以敬容殘客待。深蒙范叔故人憐。芒鞋不稱朱門步。羸騎羞隨繡轡鞭。斑竹簾前窗草綠。已看木榻坐將穿。

尹望山相公還朝詩以奉賀四首之二

四十餘年擁節麾。黃扉從此藉論思。帝因鬢雪隆耆舊。人以膚雲待設施。鎮靜中流無險浪。晴明西日似初曦。昔賢到老彌加力。驗取黃花晚節詩。

五雲高處福星明。占是台階贊太平。朝有白頭增氣象。身將青史論勳名。皂囊封有嘉謀告。畫舫齋還好句成。待取調元仁壽傳。受恩豈獨老門生。

友人以鄴城懷古詩見示但侈陳魏瓦齊碑而於歷代割據建都之跡殊多掛漏爲補成八首

霸圖開國古漳濱。銅雀臺高迴入雲。自古英雄多好色。最難子弟總能文。史將正統移歸蜀。身托虛名服事殷。疑塚不教人識別。憑何歌舞望夫君。

別築華林廣鄴臺。破車快犢亦雄哉。鄴中有華林園。自石虎建都始。亂朝土木輕民命。劫運河山入賊才。燃燭萬枝宵作苦。行樓三級獵場開。長安鐘虜纔移洛。又費輪蹄自洛來。

紛紛石冉掃如烟。萬堞名都改屬燕。慕容暉滅冉閔。遷都於此。建號詭憑傳國璽。喪師終恨錮山泉。紫宮路遠雙飛去。白首

人歸再造年。故國不忘恢復計。燒亭斬吏又騷然。慕容垂復燕。亦於此起兵攻苻丕。

爾朱百萬下金戈。一戰功成乞活多。高歡據鄴。以六鎮流人。破爾朱天光。定霸遂開齊社稷。遷都猶續。山

河。英風馬上鮮卑語。老淚尊前救勒歌。死葬漳濱尙臣節。麒麟高竒鬱嵯峨。

飛來青雀可憐蟲。徒擁虛名在九重。孝靜帝都此。權已歸高氏。自古有亡何用活。此人又似不相容。三拳狗腳親遭侮。一乘

牛車出就封。最是六宮同泣別。願王玉體壽喬松。

早年沉晦避朝權。九錫俄膺勸進筵。睡手版圖移拓跋。裸身戎馬定柔然。荒煙開國遑身後。言語通靈每事前。乃

父如龍兄似虎。誰知殺豨竟登天。齊高洋僭位。亦都此。以下皆北齊事。

骨肉相循自剪屠。濟南死又樂陵誅。報警伯有能爲厲。好色觀音亦現姝。見徐之才傳。武衛扣刀娥永樂。童謠唱路阿

廢姑。涼風堂上如償博。千載傷心乞作奴。

無愁天子在深宮。高末敬先舉國同。紫閣謀臣盲宰相。黃羅保母女英雄。祖爽謂陸令萱有英雄。鬪雞賜爵雕籠上。聚蠹觀

人浴斛中。最是小憐西去後。青裙換卻翟禪紅。氣力沉雄聲情激越。雲崧咏。實是千古絕作。枚。

曉出西便門

出郊殘柝尙城闌。此路頻經十六春。事往難尋鴛爪跡。身閒常怯馬蹄塵。月斜西嶺如歸客。柳識東風似故人。勾

引鄉心入殘夢。懣騰欲到五湖濱。

慰菡園下第

眊睩春官又一回。誰從爨底識琴材。生花不律行將禿。棄甲于思忍復來。君多。官燭空修書滿架。略館。方纂修方子錢

欲避債無臺。多宿。負。祇應一卷名山業。消爾生平磊落才。

哭亡兒耆瑞

寔宗累世只單傳。甯易生兒似汝賢。不死定知新克荷。雖貧每慰室如懸。新松作勢空千尺。種樹成陰動十年。此



痛自關門戶計。豈徒砥憤愛難捐。  
早知不是我家兒。何事曇花現暫時。就塾不辭晨課早。候門常耐夜歸遲。幾曾膝上離文度。枉向人前譽袞師。那得臨風無老淚。聰明已愛講唐詩。  
骨相曾無慮折磨。豈知早歲即沉疴。漫期董奉甦威彥。空對倉舒想華陀。大藥有筒傳世少。庸醫無刃殺人多。可憐眉目清如畫。生把茯苓毒死他。  
明識彭殤可概論。那堪觸目儼生存。幾年捧雉相從跡。數紙塗鴉未沒痕。弱女影孤誰作伴。老親書到尙呼孫。此生縱會觀空法。瞥起前程也斷魂。  
淚滿西河痛索居。擬乘薄笨返鄉園。葬留羸博空題墓。歸到柴桑孰異輿。思子臺邊人渺渺。望鄉亭上夢蘧蘧。更憐生死長安裏。可認江南舊草廬。

竹君述庵敲園來殷耳山璞函小集寓齋卽事

老屋三間聚履綦。到來便擬夜歸遲。地非北郭聯吟處。人似西園雅集時。名飲豈須絲竹肉。清談無過畫書詩。只慚蔬韭誇高宴。未免人嗤措大爲。  
蕭寺看花僅幾旬。俄驚裘褐戒霜晨。年光真覺如彈指。著述猶難到等身。五鼎食中無我輩。千秋亭外幾癡人。祇應羸醉過殘臘。此便消寒第一巡。

七言律一一

奉命出守鎮安歲杪出都便道歸省途次紀恩感遇之作

官程忽赴粵江濱。除授榮叨御墨新。臣子敢因貧乞郡。聖明自重職親民。頭銜冰去寒猶在。膚寸雲攜澤要均。借馬杜陵今五馬。微軀何以答皇仁。

一出盧溝跡漸遙。當年從此上雲霄。重來恰是回頭路。欲去還同拗項橋。敢以身微忘戀闕。或憑政最更登朝。露寒鳩鵲曾遊地。回首巢痕故未消。蕩然忠愛。情見乎詞。

長安最樂是交知。文酒流連月有期。饌薄百錢堪作主。談深一字或爲師。離筵忍打花奴鼓。空谷將賡木客詩。別罷都門車幾兩。他時落月有相思。

平生無一事堪豪。每到垂成易所遭。半世爲文憐未就。一行作吏更何操。舊翻殘帙留兒讀。不朽名山讓客高。多少蒼生待康濟。始憐試手乏牛刀。

少日研磨翰墨場。得登詞館敢他望。伐毛去垢曾三洗。束髮從戎未一當。大考翰林。從未得與。見獵敢云心尙喜。善刀聊幸拙堪藏。簪毫莫更誇能事。未必蓬山定見長。

株守頻年想壯遊。從今景物豁吟眸。天教詩境開生面。人少題篇在上頭。風雪滿天鑿兩鬢。江山萬里入孤舟。平生會詡登高賦。可有驚人好句留。

獨傷驥子委京塵。小具黃腸載兩輪。未必有魂聊有魄。卻憐歸骨不歸人。靈光可讀增神瘁。羸博仍遷爲愛真。痛絕骷髏餘一副。舊曾夜貼老夫身。

路過淮南近故林。輕舟取次渡江潯。順風恰稱還鄉願。落日猶懸望闕心。劇郡劍牛覘吏績。傳家琴鶴本官箴。詞臣此擢非常格。忍逐時趨宦海沉。

歌風臺懷古

匹夫成帝十有功。萬乘還鄉宴此中。雲起真符天子氣。風來故是大王雄。兒童歌舞三侯徧。父老追攀一縣空。頗怪生平稱大度。如何宿怨獨銜豐。

置酒空興猛士嗟。韓彭被殺已如麻。負心事竟烹功狗。出手威原斬路蛇。百敗河山終造國。千秋魂魄尙思家。榮歸翻下英雄淚。此處勝他畫繡誇。

西湖咏古

不負風光勝地多。六橋來正景暄和。人間作畫難爲摹。是處銷金別有窩。綺閣簾櫳紅杏雨。綵船簫鼓綠蘋波。山靈笑我家相近。何事今纔載酒過。

割據深心笑井蛙。金書玉冊累朝加。千秋英氣潮頭奪。三月風情陌上花。民不懼兵都愛主。國無稱帝易傳家。霸廷不肯填湖築。此意今猶父老嗟。

鳳凰山下故宮基。重話南遷駐蹕時。宋嫂鱸魚空舊感。崔君泥馬已新祠。夢華碎錄孤嫠緯。沉陸神州一錯棋。不是行都集冠蓋。此湖也只習家池。

桂子荷花色色幽。偏安定後足清遊。直教宮亦移長樂。從此湖應號莫愁。三竺峯巒非良嶽。兩隄燈火似樊樓。空餘芳草孤山路。老將騎驢感白頭。

南園想見昔雕甍。黃胖遊春道路驚。去國狼胡非帝意。傲陶孫弔汝汝愚詩。狼胡無地居姬且。隔籬犬吠是人聲。生前珠翠千行繞。死後頭顱萬里行。獨惜平分半湖地。累人作記損高名。

選勝樓臺傍稚川。相公富貴又神仙。襄城礮已三年打。葛嶺燈猶五夜燃。蟋蟀戲收殘局罷。蝦蟆更促六宮遷。可憐幾代冬青樹。只換漳州一木棉。賈似道拉死木棉蕈下。西湖雜事詩多矣。有此雄麗沉鬱否。枚。

鄱陽湖懷古

濤聲如沸舞迴颺。想見當年水戰囂。天下英雄窺此舉。吳王事業定崇朝。楚歌四面烏江敗。吳火中流赤壁燒。俯仰湖光已陳迹。康郎山下一停橈。

袁州城外石橋最雄麗相傳爲嚴世蕃所作

長虹百丈倚巖城。傑構當年尙寶卿。豪富豈難功及物。權奸亦愛死留名。磨光石版輪蹄迹。流惡江濤日夜聲。卻笑世間康濟事。也須勢利始能成。

飛梁橫鎖急流奔。遺惠猶傳濟涸涸。黃閣階前跨竈子。青詞燈下捉刀人。選材幾費深巖石。得地依然要路津。終欠出都騎款段。一鞭來此踏霜晨。

浮湘

碧天無際水茫茫。泛檝遙臨楚塞長。不比逐臣須禱嶽。從來詞客例浮湘。路經九曲帆頻轉。地爲三閭草亦香。懷古高吟到分夜。一聲清瑟數峯蒼。

衡山

扁舟湘水獨沿迴。嶽色青蒼落酒杯。帆轉幾回途尙曲。鴈飛不到我還來。懶殘羊冷餘灰燼。岫嶼碑荒沒草萊。賸欲登臨支柳栗。嚴程無那榜人催。

耒陽杜工部墓

手擷溪毛薦拾遺。空山客過有餘悲。生無一飽人誰恤。死有千秋鬼豈知。瘦削儀容傳飯顆。飄零魂魄傍湘湄。功名不藉豐碑表。何必真阡認偃師。三四一聯。天問招魂無此沉痛。保泰。

歸德峽讀王文成平田州摩崖頌

銘功彷彿紀平淮。手撫蠻酋鳥入懷。江戢怒濤供洗甲。天留絕壁待摩崖。邊籌終倚通儒定。物論空勞異學排。只有名心應未盡。擘窠大字瘦如柴。

行邊卽事

邨邨父老杖爭扶。出謁星軺拜滿途。我到豈能春有腳。渠來自爲昔無襦。欲甦剗肉誰先務。果燎燃眉敢後圖。疾苦要教當面說。停騶頻與話交衢。

安南虞處共山場。判界曾無一堵牆。敢恃狂夫驚折柳。也愁鄰女要爭桑。綴旒國已先分土。畫斧河仍不設防。柔遠銷萌非細事。頭鬢從此白巖疆。

田州

傳家來自武襄營。土司岑氏。本狄武襄禪將。從征儂智高。分插於此。分土南陲一片平。千載尙能長保世。前朝曾此屢勤兵。時清久襲冠裳氣。風靜全消鼓角聲。懷古經過惟坐嘯。簷邊樓上月三更。

蓮花九鏡

九層石棧入青雲。名字遙從嶽藕分。赤立太窮山露骨。倒懸不死樹盤筋。天遲開鑿留淳氣。路入陰森鎖瘴氛。只擬此中非世界。誰知雞犬亦相聞。峭刻。是雲巖獨開之境。枚。

崑崙關咏古

釀酒軍門正滿壺。嚴關夜半已潛驅。千秋部曲皆番落。今各土司。皆公從征將校之後也。一片山川尙陣圖。何必梁公爲遠祖。不妨季布是黥奴。經過想見英雄氣。古木靈風叫鷓鴣。

前守章耿保緣事罷官羈留鎮郡者兩年茲得請還都詩以送別  
得歸已自勝懸車。官罷猶羈兩載餘。誰肯迴波駐轍鮒。幾因失火及池魚。余以詳請君回籍。幾被劫。離亭飲散孤帆杳。貧宦

裝輕落葉如。最是臨分前令尹。肯將利弊爲余書。  
酒闌重話舊彈蕉。信有威權大吏操。喜怒所爭纔一芋。愛憎相反豈多桃。民猶爭誦廉公袴。我敢相矜范叔袍。會

有詔書搜廢籍。新硯且莫善藏刀。

奉命赴滇從軍征緬甸

軍謄榮拜詔書新。萬里猶蒙記小臣。政績未能河渡虎。功名敢想閣圖麟。正愁年少辭生肉。尙有家傳膽滿身。事頻年紆廟略。微軀忍復嘆勞薪。

一紙爰書忤上游。風聲早晚勒歸休。難甘公府宣明面。已戴軍門秀實頭。劾疏幸因軍事免。朝衫終仗國恩留。男兒官不遭彈去。便合沙場灑血流。時方待劾。以奉旨從軍得免。

腐儒身未習橫戈。薄技惟餘盾鼻磨。爲政已應書下下。將兵敢說善多多。番頭魚貫長纓繫。蠻髻鴉盤細馬馱。傳語健兒休笑我。凱旋時節要饒歌。

特磨道中

不信心間有此途。特磨絕徼赴軍符。萬山圍住天如井。六月蒸來客在爐。到處黃茅啼格磔。偶逢綠樹結跏趺。黠奴頗解哦詩句。馬上微吟我僕痲。

滇城

千峯行盡見平疇。一片炊烟萬瓦浮。南紀河山推重鎮。前朝湯沐守通侯。彩雲晴捲黃茅瘴。宿霧寒消碧玉流。獨客經過相識少。驂驪連夕過星郵。

至合江鋪已就宿矣忽京兵來乃移避於山後

數間寓舍讓京營。移就山家破草棚。人共馬牛眠一屋。月隨風雨湧三更。也知入市應安堵。自笑從軍轉避兵。信是健兒驍可畏。先令膽落到書生。

題大覺寺

漾漾南來簷益深。萬松黑到最高岑。馬行危磴蹄包鐵。佛守荒菴面落金。怪石儂如奇鬼搏。古楓幻作老人吟。問途空說天威逕。何處遺蹤訪七擒。自大理龍尾關。至永平。三百餘里。傳是武侯過師地。郡誌謂之天威逕。

永昌弔徐武功楊升菴

迢迢金齒瘴江濱。辛苦前朝兩逐臣。妓粉尙傳名士氣。將星空負故侯身。奪門事險功真倖。伏闕聲高議未醇。欲採芳蓀酌杯酒。百年遺跡已沉淪。

寄家書

夜涼戎帳露華微。正憶江南木葉飛。一紙寄家言有盡。萬山圍路夢難歸。燈前酒氣催磨劍。月下砧聲感搗衣。遺

恐倚閭人悵望。擺邊不敢說兵威。

### 潞江

一鞭曉渡潞江涯。瘴霧濛濛似落沙。不老青餘秋後葉。無名紅煞日南花。經年馬背安居地。每夕鴛鴦托宿家。自笑書生作僮楚。異時歸去有雄誇。

### 黃陵岡

行盡滇西更向西。路經初闢未成蹊。掛枝下飲猿連臂。藉草潛眠麝養臍。樹古不知秋氣老。山高易覺夕陽低。殊方從古誰曾到。且拂蒼崖作首題。地在南甸土司外二百餘里。過此則非楚人所居。皆野人寨矣。

### 軍營夜坐

邊屯野宿萬貔貅。令肅無譁月似鉤。犀甲瑤空千帳曉。魚腸夜嘯百蠻秋。關門風靜無南競。戎索星低欲北流。草罷檄書清不寐。一燈危坐數更籌。

### 白雲菴遇故總兵華珠將赴軍效用

決陣曾傳賈勇登。罷官未去爲軍興。戰場尙夢無頭鬼。古寺聊充有髮僧。部曲偏裨多已貴。郵亭醉尉漫相凌。征蠻正選邊才急。會看鷹揚老將騰。求工必落纖巧。雲崧詩。愈工愈覺冗厚。所以獨步一代。枚。

### 鐵壁關

萬勿危巖似劈開。天留鎖鑰控崔嵬。鐵門有限人難越。銅柱無名我亦來。料敵好增籌筆驛。出關先當望鄉臺。祇應預辦摩崖字。留待征南奏凱回。

### 猛卯

猛卯江頭渡淺沙。出邊天更渺無涯。諱通楚戶仍輸賧。兵過畬田已種麻。秋入黃茅人避瘴。月寒白骨鬼思家。跼齋墮水尋常事。浪泊區區豈足誇。

虎踞關

虎踞關高駐旅雄，威聲早震百蠻中。陰雲匝地千山黑，夜火烘天萬竈紅。寶井地遙非斧畫，金沙水闊有航通。佇看鬼哭峯頭石，石爛江枯再勒功。寶井在猛密土司地。時聞緬賊以兵戍守。鬼哭山在金沙江外。王曠刻石處。所謂石爛江枯。爾乃得渡者也。路皆從虎踞關出。

註軍蓋達

騰衝關外土司城，好片川原似掌平。戰後江山無伏莽，熟來禾黍有炊秬。千燈夜閃星河影，萬馬秋騰鼓角聲。豈爲防邊勞勁旅，要令狐鼠懾威名。

平戛

茫施東去得平原，豁達天開箭筈門。一水灌田千百畝，半山結屋兩三邨。年豐市有扶頭醉，冬暖人多曝背暄。此是道書真福地，熙恬光景似桃源。

黑山門

都護征南此出關，何期復矢唱刀環。威行鬼哭無聲處，路過鴉飛不到山。皆嶺中山名。毅魄定歸雙鬪下，雄名猶震百蠻間。冥濛瘴霧千峯黑，想見靈旗日往還。

勦南坎

詔趣偏師出麓川，將軍傳箭肅中權。一軍皆甲晨聽令，萬馬無聲夜踏邊。白刃寒生霜滿野，雕弧彎應月初弦。歸來獻捷營門外，劍戟枝枝帶血鮮。

自戛鳩勦賊回萬勿關馬上作

小試軍鋒掃戛鳩，凱聲歡動入關秋。白迷瘴道雲仍合，紅在蠻天火未收。熱落河烹生鹿血，赫連刀挂死番頭。飛章連夜須馳奏，馬上催書筆不遑。

述菴璞函緣事罷官從軍來滇已至永昌璞函先有詩見寄次韻奉答



淨蹤共踏日南春。喜到聯牀聽兩人。廢籍搜才身再起。他鄉逢舊誼逾親。泥須函谷關前用。灰是昆明劫後身。儒者立功非異事。國恩深豈慮膏屯。

掃穴犁庭仗武臣。也須憤切夜眠新。圖麟勳業終當奏。畫虎英雄恐未真。兩陣難拘古兵法。六經只管幾文人。屬羸翻怪書生劍。時發光芒拂斗辰。

### 春和相公經略來滇余以故吏仍直幕府敬呈四律

宰臣親出擁旌麾。金齒關前運握奇。郭令身原兼將相。潞公名久動華夷。蠶叢開道會當日。麟閣圖形又一時。早帶洗兵天上雨。日南地總發華滋。通首高華。

分憂自請靖邊陲。萬里郵籤併日馳。拜策仍辭推轂禮。臨軒特賜出車詩。便宜事不從中制。忠益謀能集衆思。相度既來功自速。好磨樂石待韓碑。

屈指兵吳一路中。郵亭不斷戛刀弓。頻年聖主籌良將。多少蒼生望相公。關勢尙傳銅鐵固。銅壁。鐵壁。軍威兼二關名。列鶴鵝雄。腐儒篋有雞毛筆。要咏平蠻第一功。錢充齊觀察在經略幕下。讀至多少蒼生句。不覺痛哭。經略命幕僚皆屬和。從傳遍滇南。情文真摯。自沁人肌骨也。

天南豈意得從行。六載曾隨禁地清。故吏公猶殷待士。書生我本不知兵。汪童敢忘橫戈志。陵母能堅伏劍情。憑仗運籌平蕩早。幕僚也得倖功名。

### 奉命回粵途次口占

詔許征人馬首東。呼船曉渡潞江風。到來濫廁參軍職。歸去慚無殺賊功。鞭影仍尋裙草綠。劍光漫傍燭花紅。聖恩自是憐文吏。敢謂籌邊策尙雄。

歸程遙指粵西天。竹馬重煩夾道邊。昔到曾憐懸磬室。再來忍斂披釘錢。單車按部惟攜鶴。一撥催耕有叱犍。轄略生平原未讀。勉爲循吏報恩偏。

留別經略

稍踏邊塵識險夷。忍辭苦口語臨歧。一江沉鎖公無渡。千里持糧士有飢。上將在謀爭要着。南人不反豎降旗。惟應預擬平蠻頌。待取秋風露布馳。精切揮成。筆如鐵鑄。虞伯生謂老吏斷獄手也。舟。

土富州驛舍

六十滇程已徧經。荒涼最是此郵亭。空廚烟冷炊求火。破屋椽稀臥見星。燐自鬼來浮草碧。風疑虎過隔籬腥。卻聞騶卒歡相語。明日家山到眼青。出州境卽鎮安治。

回首軍麾正出邊。獨慚拄笏謝戈鋌。官辭踏白先登隊。功讓雕青惡少年。去日擬爲兵死鬼。歸來敢說地行仙。挑燈手錄征途稿。聊記吾曾入瘴烟。

回鎮安官舍

兩載身隨勁旅屯。得歸廨舍總君恩。愧無績可留銅柱。敢幸生猶入玉門。口不談兵聊守默。心仍見獵想追奔。篋中一卷滇行草。彷彿鴻泥指爪痕。

桂平道中

秋風吹上鬢毛斑。又數郵籤過急灘。遠嶺路高人似豆。空江水落岸如山。孤吟時應寒蟬噪。倦旅心隨暮鳥還。向晚扁舟泊何處。一燈漁火認前灣。

鎮安土俗

見日常須到巳牌。瘴深侵曉總陰霾。城中屋少惟官廨。牆上山多逼郡齋。俗有鬼神蠶放蠱。夜無盜賊虎巡街。可欣民意安吾拙。相愛渾如鳥入懷。

夜坐

判罷文書窻句工。結趺枯坐曲欄東。池荷十裂秋將老。堂鼓三嚴夜正中。警鶴避寒依樹密。明蟾愛浴映波空。小

胥見慣官齋燭。笑我孤燈一穗紅。

聞經略出師老官屯水陸攻圍緬人乞降班師奏凱詩以誌喜四首之二

遙識權聲湧似濤。入關戰士解征袍。放歸逐北嘶風馬。洗罷征南帶血刀。絕徼遠來務面誓。廣場大饗裏瘡勞。受降如此方威克。招致何曾一着高。前歲有以招降之說進者。上力斥其非。伏計用兵。

簪毫幕府忝從戎。別去方聞息戰攻。劇喜世堪長偃武。敢嫌身不與成功。鐵橋波靜蠻江白。銅鼓春喧社火紅。所惜摩崖吾未及。筆端空負氣如虹。

哭果毅阿公病歿於軍

會從絕域立功回。五百驍兵萬賊摧。回部之役。公以五百兵敗賊萬衆。使相旌旗開幕府。上公劍履畫雲臺。攻心徼外勦垂就。詎受降僅數日耳。曳足軍中志可哀。太息金沙江畔路。將星寒落浪花堆。

會忝軍諮畫策長。血痕親見裏金瘡。可憐病到三遺矢。猶自身衝百戰場。門望高還傳帶礪。國恩深爲紀旂常。獨悲丹旆還都日。故吏無由奠一觴。

貴縣途次奉旨調守廣州寄別鎮安士民四首之二

到任三年五出疆。在官曾未一年長。余抵鎮安。以事赴省。凡四次。又從軍嶺中兩閱歲。地偏恰似仇池穴。俗厚難忘畏壘鄉。本擬成圍看老柳。愧無遺蔭托甘棠。最憐途次聞新命。不及公堂飲餞觴。

鎮安雖僻自堪豪。最喜蕭閒似馬曹。片檄下時諸部肅。萬山深處一官高。草亭置酒留賓醉。花閣抄詩課吏勞。此福難消應準折。從今判牘夜焚膏。

花田即素馨花。南漢葬宮人處。多素馨花。今爲遊宴地。

十里芳林傍水涯。當年曾是玉鈞斜。笑人死後爲香草。醉守來時正好花。滿地種珠誇老圃。千筐帶露入豪家。鬢娘頭上微風過。勾盡遊人是鬢鴉。

登浴日亭

禮罷神祠肅炳蕭。振衣千仞躡岩堯。雞聲欲白三更日。漁火猶紅半夜潮。化羽何當仙島戲。採芝未覺祖洲遙。登臨又起滄波興。歸路虛舟轉浹寥。

崖山

日落蒼山海氣昏。會傳殘宋水師屯。六更漫續庚申帝。一旅難支甲子門。身入膠舟無返駕。膽焚鐵斗有忠魂。可憐不及章安鎮。猶保東南半壁存。章安鎮。在明州。宋高宗航海維舟處。見東巡紀。

慈元殿宋楊太后同帝曷居此。

中土無家寄海隅。數椽椒寢莽榛蕪。遺蹤漫擬陽人聚。秦遷周後於陽人聚。塊肉曾攜趙氏孤。臣妾僉名羞作表。公卿負展儼成圖。最憐涕泣臨危語。何減唐宮麥飯呼。

永福陵宋端宗葬處。

白楊衰草黯孤墳。猶號前朝舊寢園。窮海運移朱鳥囓。空山人拜杜鵑魂。會無翁仲環陵闕。幸免僧伽掘隧門。想見倉皇營渴葬。冬青也復少移根。

虎門望海

目力將窮境更賒。望洋今日得雄誇。信知地外皆爲水。應到天邊始是涯。蛟蜃噓還成幻市。神仙過或馭飛車。蒼茫何處蓬壺路。我欲揚帆採石華。

劉王郊墓

衰草寒蕪一片秋。猶傳粵漢舊郊邱。閩餘天豈分南顧。運去星皆向北流。燿火無靈光久滅。瘞圭何處氣全收。祇聞身作降王長。陪祀班高在汴州。

太保傅文忠公挽詞

柱石身尊鎮廟堂。驚傳紫府下迎將。問牛相業三台地。汗馬勳名兩戰場。公以平金人相。征緬甸歸告終。推轂任隆增白髮。飾巾思厚賜黃腸。應知此痛關朝野。不獨私情我暗傷。

廿年宰相黑頭公。一德堂廉帝眷隆。劍履雲臺身入畫。河山鐵券策論功。勳親人地關休戚。恩禮君臣見始終。從此日斜溫室樹。更無宣召到延中。公在時。每日晚朝。必召對。

身任戎行釋主憂。驂驛倍道赴星郵。縷縷零雨泥方滑。跼跼飛鳶瘴未收。葛相征蠻勤五月。豫州伐敵擊中流。憶會勸攻金江柁。腸斷炎風渡夏塘。

地望尊崇總百臺。敢期寒峻受栽培。我無私請偏投契。公不談文乃愛才。去定仙官班上列。生原佛地位中來。敬容今日餘殘客。樽散憑何倚不材。感恩知己。俯仰低徊。情味耐人百讀。德麟。

### 擢授貴西兵備道紀恩述懷

珠江典郡一年多。又指郵程大渡河。官職漸高唐觀察。山川新訪漢牂牁。長途但擬單車赴。遺愛慚無五袴歌。在遠尙蒙親簡擢。微軀何以答恩波。

擢官何事乞歸田。別有難懷黯自牽。天上除書恩主眷。風前殘燭老親年。白雲飛處憐孤影。黃紙宣來是特選。直恐君親成兩負。一燈危坐轉悠然。以壽終。老親不能偕行。乞制府李公代奏。公以余新擢官止之。

萬里黔陽信壯游。江山楚蜀縮襟喉。好從巴峽通巫峽。何用連州易播州。椽燭治書重幕夜。星符馳檄百蠻秋。書生此福慚非分。準折惟應惠續留。

### 述菴璞函從軍入川余至威寧得一握手別後卻寄

故人得見未嫌遲。萬里相違本不期。官罷杜陵猶作客。才高文舉直呼兒。來經鐵索滇橋路。去酌鄜筒蜀酒卮。玉帳衛中需贊畫。相看猶未鬢成絲。

膈膈爲雞午夜荒。燈前一握又他鄉。那堪好友頻歧路。不分書生老戰場。國險魚鳧稀日影。陣懸蛇鳥入秋光。期

君早上平戎策。旦晚還朝卸容裝。

送王協和總戎進勦金川

喬松落落見長身。髯也英雄果絕倫。拔戟自當軍一隊。橫矛能退敵千人。勦名到日成功速。文武同年別誼真。君榜與余同庚午。君至叩關相憶處。捷音好屢寄郵塵。

晤同年孫補山學使話舊

故人重見鬢添皤。追話兵塵感慨多。絕徼秋聲諸葛鼓。戰場夕照魯陽戈。衝車力盡猶攻壘。擊楫心雄竟渡河。同是征南戎幕客。那禁思舊淚滂沱。余與補山同在經略幕下。補山則隨渡夏鳩者也。

堂前初見捧盤匱。得就西階樂可知。君方娶兒婦。卻憶少年登第日。也成新婦作婆時。光陰過客雙丸速。婚嫁牽人五嶽遲。剪韭寒窗話疇昔。一尊同感鬢如絲。

聞故將軍阿公授四川提督卻寄

故侯威望肅霜寒。恩命重聞錫帶盤。至竟登壇須大將。莫嫌專閫尙粗官。馬蹄裏鐵盤危磴。牛革縫船渡急湍。計日掃犁馳露布。更看勳爵冠朝端。

征南幕府半凋零。經略傅公。將軍果毅阿公。皆下世。碩果天留一將星。百戰勦名身未老。五丁開鑿路重經。前次平金川時。公會在戎幕。功成飲馬仇池穴。事定磨崖劍閣銘。蜀徼黔疆鄰近在。捷音早晚得先聽。

都匀道中

灌木成邨棘作籬。兩三茅舍倚巖支。汲流但截修篁節。蓋屋全編老樹皮。架木橋欹驢不進。伐薪人出犬相隨。分明一幅山家畫。可惜荆關未得知。一幅。趙千里關山小景。光。

海龍國播州楊應龍自焚處。四面陡絕。上有平地。可屯數千人。兼有井。汲之不竭。真天險也。四圍蕪絕陡無門。上有寬平可駐軍。扼險欲過唐夾寨。攻堅幾費李摩雲。國餘暮氣兵猶勁。地欲華風賊自焚。播平

後即改筑。今五百年來淪異域。一朝摧廓亦奇勳。  
遺義府也。

咏史

會鞭學士段文操。刮目多承賞鑒高。抵鵲不聞輕用玉。割雞也要辨何刀。詞頭天上宜麻貴。盾鼻軍中草檄豪。今日江郎一枝筆。供他肉眼去吹毛。

卽景

慚愧車前尙入驂。略無可稱俸錢優。半間屋小聊名舫。六月山深早着裘。才思漸如強弩末。歸心已折大刀頭。閒來細數經年事。何一堪爲惠績留。

哈敬齋總戎自滇入蜀路過威寧話舊

回首滇雲絕塞長。建牙威望響遐荒。將門世佩三邊印。蠻徼身經百戰場。孟獲曾來申誓乞。吐番未敢劫盟強。老屯之役。編人乞和。公以單騎蒞其軍。天南歷歷成勞在。驗取秋風兩鬢蒼。

夜宿平山哨

行盡千峯路未窮。晚投墟館一燈紅。秋生風露寒諸嶺。人共星河在半空。夢可還家防易醒。時能送老苦難工。聽他童僕垂頭睡。獨對窻天月似弓。

碧雲觀

織塵曾不到仙壇。曲磴摩雲入九盤。客到自嫌烟火氣。山高常接斗星寒。井華曉碧僮澆藥。爐餒宵紅鬼瞰丹。勝地緣慳纔一宿。征虬明日又漫漫。幽澗中出警句。大奇。

壬辰冬仲以廣州獻獄舊事吏議左遷特蒙溫旨送部引見聖恩高厚蓋猶不忍廢棄而衰親年已七十有五書來望予甚殷諭令早歸一慰倚閭望因呈乞開府圖公給假旋里擬卽爲終養計途中無事感恩述

懷得詩十首選六

一重公案律條訛。鑄秩非關吏識苛。迂拙自慚更事少。聖明猶慮棄才多。恰從順水乘歸櫂。擬乞閒身著釣簑。不是敢辜恩命重。高堂衰髯已全皤。

多謝諸公苦挽行。

國公堅欲奏留。生民請公。亦多敦勸。

補山約軒實無才可濟蒼生。勤將政補猶形拙。清愛人知已近名。坎坎伐檀

歸客思。依依折柳故人情。翻教不忍輕言別。審酒更番爲治航。衙齋無事可消磨。一載閒情付咏歌。老去賀公吳語慣。病來莊舄越吟多。滄江秋晚衣裁荔。空谷天寒屋補蘿。不覺詩成真作讖。篇篇都是憶巖阿。

官罷君恩忍遂忘。尙餘秃管寫枯腸。好編頌上歸田錄。敢效忠州集古方。舊學還期傳黨塾。新詩閒與咏羲皇。生平報國堪憑處。終覺文章技稍長。

數日纔經畢節城。退閒何用急裝行。入驕已少車前列。五馬猶煩道左迎。按部聲名歸物論。去官風味見人情。山

楓知我無旌旆。也染新紅綴驛程。

安順守戴君。護義守干君。俱在畢節送別。

頻歲思歸計尙懸。及歸敢便傲林泉。板輿潘岳閒居賦。茶竈天隨甫里船。爲母寫經祈上壽。隨人賽社報豐年。譜成華黍南陔什。或入熙朝二雅篇。

張三丰禮斗亭

在平越奇真觀後。有古柱一株。大數抱。

高真古觀鬱葱龍。猶說仙翁斗檢封。遺跡已無華表鶴。借名曾訪鼎湖龍。胡澂訪張遺蹟。實訪建文君也。山深時或飄丹粟。人老惟思伴赤松。我已退閒期學道。前途倘許一相逢。

施秉縣

即舊橋。舊橋偏航。巡撫所駐地。

數家邑小雉樓崇。舊設中丞幕府雄。衝要尙供郵騎飯。承平久靖戍旗風。石多山骨出皮外。洞矮水頭鑽膝中。上諸水。至此由諸葛洞出鎮遠江。劇喜陸程今日盡。扁舟行泛碧波空。奇絕。絕。舟。

辰州平諸桐嶼



腸斷辰陽放棹行。故人曾此擁專城。我來東道誰爲主。君在西清最有聲。傲骨竟成招謗具。高才未就必傳名。沅江水駛流如箭。何限人間歎逝情。

朗州除夕和馬沅亭秀才韻

除夕連更六異鄉。今朝遊跡又瀟湘。一官恰似殘年盡。舉世猶爭此日忙。老去敢辭杯最後。春來漸喜線添長。素心閒與江干步。早有寒梅破臘芳。

題岳陽樓

水落湖光似鏡平。倦遊人過岳陽城。愧無憂樂關斯世。擬學神仙了此生。壯氣漫吞雲夢澤。微才敢附杜陵名。湘靈鼓瑟何心聽。或許相逢老樹精。

晚泊

洞庭波淼落帆輕。小泊亭臯候月明。遠火晚迴龍伯駕。荒蘆寒打鴈奴更。閒依燈影吟情永。未息濤聲旅夢驚。已字山形之字水。擁衾先自算歸程。

赤壁

依然形勝扼荆襄。赤壁山前故壘長。烏鵲南飛無魏地。大江東去有周郎。千秋人物三分國。一片山河百戰場。今日經過已陳迹。月明漁父唱滄浪。此題絕唱。故。

遣興

雲濕江天鴈影孤。春風爲我送歸途。四宜休致稱高士。七不堪難起懶夫。積歲刻成新楮葉。過時身比舊桃符。慚招得甬人笑。顛倒天吳紫鳳圖。

皖口謁余忠宣公墓

表裏山河地必爭。儒冠曾此守孤城。嶺雲尙吐登陴氣。江浪如聞戰鼓聲。世亂揭竿成巨寇。時危橫草出書生。可

憐囊橐降臣履。千載應慚守廟情。

江行

帆影依依帶落暉。江平如鏡浪痕微。舟憑野鷺為前導。人與春鴻共北歸。才薄敢期宣室召。心閒早息漢陰機。居然已似漁翁長。只未身披獨速衣。

采石太白樓和韻

沉香亭下脫韉行。此地曾傳泛月明。白浪一江銷醉骨。青山萬古屹詩名。錦袍當日人爭看。金粟何年世再生。百尺高樓俯空闊。為君長寫氣崢嶸。

金川門懷古

前史曾傳靖難兵。磨戈從此破神京。削藩禍起書生計。負展圖慚叔父名。一領袈裟宵出竄。九江紈綺曉翻城。興師若不論成敗。高煦宸濠豈異情。

千屯火照雉樓紅。想見當年勢內訌。折矢不臣黃鵠子。昌黎詩。魯運黃鵠子。打鐘竟帝白堯翁。北齊武成事。見北史。從亡芒屨千山險。駢髮歐刀十族空。養士甫經三十載。何因義烈滿寰中。使事精切。難得如此工整。保泰。

江干晚步

長隄曲曲繞平沙。徐步聊當下濕車。枯樹萬鴉棲似葉。荒蘆羣雁宿為家。寒連殘臘遲春色。晴卜明朝為暮霞。小憩偶然清興愜。江邊風浪正無涯。

七言律二

歸田即事

柴扉近俯綠楊灣。回首風塵此倦還。老境逼來將白髮。宦途盡處是青山。署門客散無投刺。退院僧高自掩關。只

有夢魂難翹處。君恩猶未削朝班。宦途七字。千古名句。舟。

豚柵雞棲一畝宮。呼來兒女脫青紅。憐他未慣葺茅宅。笑我原來田舍翁。靈尾可揮非祖物。菜根須咬趁童蒙。短

檠燈火長鑱柄。閒與諸雛話舊風。

少日曾貪面百城。而今萬卷送浮生。一身去職如花落。兩眼觀書尙月明。鴻爪春泥思往跡。馬蹄秋水得閒情。天

留老筆非無用。要與熙朝寫太平。

新葺茅廬在水南。擬栽修竹翠毵毵。持齋怕入遠公社。習靜便同彌勒龕。詩就多兼唐小說。客來與作晉清談。所

慚懶廢無才思。輸與山陰老學庵。

### 天平山范文正公祠

森森萬笏石參天。丙舍千秋傍祖阡。遺像何嫌窮塞主。崇祠猶祭義莊田。柏如葛相堂葱鬱。路與蕪王墓接連。不

獨子孫來下拜。遊人誰不瓣香燃。

端笏垂紳河岳姿。名賢氣象儼留貽。甲兵胸捍三秦警。蠶粥腸思四海飢。植黨浮言當日論。活人素志至今知。多

慚我已忘憂樂。敢漫高談濟世期。

### 韓蕪王墓

麒麟高塚占雲墟。異姓真王百戰餘。勳業未來先臥虎。英雄老去亦騎驢。葬應秘器蒙分賜。績尙豐碑表特書。宋

待功臣原不薄。棲霞何事獨誅鉏。謂岳忠武。

### 館娃宮

湖光山色一憑欄。想見朝朝暮暮歡。此地春常留屣響。有人夜正臥薪寒。唾成珠玉香猶濕。舞破山河鬢未殘。思

愛吳宮功在越。可憐啼笑兩俱難。

### 過史翼宸明經故居

少年此地一經橫。賓主流連最有情。老再來時惟後輩。舊曾遊處似前生。山邱華屋徒增感。書畫青門尚繼聲。也。比西州門外路。經過不覺淚如傾。

哭璞函之卦

幕府曾推借箸長。驚傳復失蜀山蒼。纔欣薄宦遷華省。復官後以積勞。恩擢部曹。何意書生死戰場。劍閣更誰文勒石。玉門祇有夢還鄉。可憐前夜相思處。猶擬他年話對牀。

磨盾滇南墨未乾。岷峨西上又千盤。空懸望眼長安近。欲返遺骸蜀道難。灑血隻身衝矢石。招魂萬里葬衣冠。傷心馬革都無分。留與烏鴛啄肉殘。

烏撒城邊惜別晨。鄰疆頻喜接音塵。偶翻書札猶前日。忽憶鬚眉已古人。迢遞何年尋宿草。馳驅到死作勞薪。遊魂血污空山裏。知化猿身化鶴身。痛絕。德麟。

寄顧北墅

射雉城東別業偏。一編晏坐正超然。門高處士談經座。家有先人負郭田。載酒生徒揚子宅。焚香書畫米家船。從知水繪園荒後。又續名流韻事傳。

哭座右觀總憲補亭先生三首之一

總持風雅量兼收。河海由來納衆流。道廣幾爲陳寔累。名高爭御李膺游。情於說士甘如肉。身爲推賢讓出頭。此後孤寒更誰恃。秋風多少客無裘。

東黃月山文章

里社交知半在亡。巋然獨見魯靈光。詩文確有先民法。游射能言大父行。老眼燈昏猶作字。飢腸廚冷欲休糧。晨星吾敢輕前輩。莫惜頻煩過草堂。

莊似撰枉詩投贈依韻奉答

浪跡真如未泊舟。那能高臥北窗幽。嫁衣待字知何日。團扇承恩及未秋。空負翱翔千仞志。漸收汗漫九垓游。衙官屈宋終非據。君或空言我已愁。

彭芸楣閣學留飲澄江使院卽席奉呈

使院重來揖講堂。依然古桂鬱蒼蒼。少曾選佛初禪地。老覺驚心舊戰場。余於乙丑試此。補諸生。至今歲二十年矣。退筆無花開藝苑。緯蕭有屋傍漁莊。夔龍事業諸公在。剩許江湖放我狂。

和友人落花詩

綺窗一枕小游仙。腸斷穠華過去緣。薄命生招風雨妬。多情枉受蝶蜂憐。更無一語歸何處。再欲相逢動隔年。綠已成陰芳早歇。鬢絲愁絕杜樊川。

開太艱難落太輕。一番來去不分明。經年空累僮澆甕。昨夜纔邀客治觥。柳線難將離跡縮。榆錢似爲辨裝成。最憐解脫塵緣後。尙作拖泥帶水行。

羯鼓催開日未西。黃陵廟已鷓鴣啼。尙餘舊蒂成雞肋。剩有殘香襯馬蹄。逐客天涯憐白也。美人帳下泣盧兮。縱教數瓣流還見。欲問桃源路總迷。

芳園蕭索似經秋。滿地殘紅爛不收。過客也驚停屐齒。小鬟猶誤覓枝頭。描來粉絹空神似。解到金鈴只淚流。飄落不知何處去。又因籬圃替他愁。新絕。

爭妍解語帳難分。目斷長天日暮雲。啼到子規剛別我。夢爲胡蝶也尋君。元都桃憶前回看。玉笛梅傷五月聞。爲有去時痕迹在。呼童且莫掃苔紋。

漫興

俯仰曾無俗累牽。始知身是一頑仙。村如老杜東西壤。書有蒙莊內外篇。門任婦持便我懶。詩無人解向兒傳。三杯醺後渾何事。閒逐鄰翁掠社錢。

淳朴鄉風少禮文。瓦盆春酒有餘芬。雞豚聲亂籬仍別。榆柳陰連界不分。看戲人歸談古事。負暄叟坐述前聞。眼前便是華胥境。何處還堪着俗氛。

塵心管起一漚如。繡佛燈前自懺除。詩不與人爭險韻。字常倚老作行書。蟲廣永叔秋聲冷。蝶去莊生曉夢殘。回數生平勞碌處。楞嚴讀罷但軒渠。

豪宕猶存少日心。不知老態已相侵。觀書眼漸訛三豕。導氣身將學五禽。缸養文魚圓似卵。盆栽小竹瘦於針。當時笑是衰遲事。誰識親從此境尋。

爲人作墓誌後戲題

屏跡渾如避債臺。尙嫌酬應拒還來。碑無裴相酬繚數。畫豈文同要韉材。老去恥供諛墓作。賤時多愧嫁衣裁。祇應結習耽文字。官罷仍爲老秀才。

卽事

發帑頻聞至再三。歲功雖款國恩覃。賑多錢可青黃接。俗厚丸無赤白探。幾見宵人驚吠犬。早聞春女喚分蠶。飢羸終免流亡去。始信朝家德澤涵。

門人費芸浦舊爲吾郡守余自黔歸君已丁外艱將去僅一握手而別今赴京補官枉道過訪留連信宿詩以贈行

出處殊途酒一尊。直廬重感舊巢痕。余與君先後入直軍機。久衰親髻宜歸里。未報君恩望及門。五袴已聞歌父老。一莊敢便托兒孫。京華故友如相問。歌咏昇平補素餐。

五十初度

里居荏苒四經春。忽作平頭五十人。去日已多行歎老。罷官未久敢言貧。味餘書卷消磨慣。恩在朝衫檢點頻。卻愧半生辛苦力。祇供成就一閒身。

朋酒茅簷話兩晴。朝衫脫後一蒼生。漫勞海內誇高尚。要向田間咏太平。犬足有驚忘夜吠。牛胡無喘健春耕。老農見慣渾閒事。誰識都從帝力成。

束髮攻書志決科。奔馳榮利爲華珂。不曾白髮歸雖早。無補蒼生愧已多。唱第五雲籠藥榜。從軍千騎擁瑠戈。而今總作浮漚看。付與人間春夢婆。

聞翻青史覽窮塵。歷歷前聞觸緒頻。一代文章誰作者。古來出處幾完人。雕蟲祇與蟬供飽。畫虎多爲狗寫真。不覺又增身世感。摩挲髀肉暗傷神。

除卻親闈侍藥醫。更餘何事足縈思。輸官租稅完常早。祭社牲牢宰不私。妻妾無爭兒互乳。弟兄垂老爨同炊。家風豈敢誇顏柳。或可垂爲子姓規。

學佛求仙枉費功。年來漸覺總成空。歐陽但有詩三上。徐邈時於酒一中。材不材間身可老。味無味處句難工。海山兜率俱安在。只合頭銜號長翁。

自郡城歸

一葉扁舟映曉霞。柴門將近落帆斜。人疑舊雨來尋友。我與春風共到家。篷背白餘殘雪片。船頭紅載小梅花。上元節物惟燈事。略與高堂賞歲華。

題袁子才小倉山房集

其人與筆兩風流。紅粉青山伴白頭。作宦不曾逾十載。及身早已定千秋。羣兒漫撼蚍蜉樹。此老能翻鸚鵡洲。相對不禁慚飯顆。杜陵詩句只牢愁。

舒卷閒雲在絳霄。平生出處亦超超。曾遊瀛苑空三島。愛住金陵爲六朝。富貴豈如名有味。聰明也要福能消。災梨禍棗知何限。此集人間獨不裒。

寄芷堂二首

纔傳閩嶠妙持衡。又轉蜺旌指渭城。視草久高唐內制。論文恰到漢西京。禁中才子微之句。年少仙人子晉笙。如此清華誰不羨。通門亦覺有餘榮。

一編清課出冰廳。

君以所刻館課見貽。

早擅千秋著作庭。絕艷不須施粉白。高才真覺出藍青。搜羅遺逸窮三篋。鼓吹休

明本六經。笑我已無詞館職。賞奇還剔短檠熒。

小倉山房集中有咏物詩戲用其韻九首之四

### 鏡

照膽圓光妙寫神。江心鑄就淨無塵。誰從對面偷描我。忽漫分身作化人。藏醜一毫難作假。效顰雙黛最傳真。只因老怕看華髮。不許移來棐几陳。

### 簾

掛起湘筠蕩日光。銀鈎不捲靜縈香。玲瓏霧縠三千縷。隱約金釵十二行。映沼斜梳波影皺。當窗橫織兩絲長。夏侯堂上尤增貴。省得歌姬錦繡柱。

### 燈

一穗銀缸小作聲。空堂無喜也相驚。爲人嘗盡寒窗味。有女曾分夜績明。舞字伶工千隊整。修書學士兩條清。老來忍便拋牆角。炳燭餘光尙有情。

### 杖

蹇劣平生愧逐羣。一枝籐助草鞋勤。青山獨往誰同伴。白首相依剩此君。住與畫叉閒倚壁。行隨蠟屐緩拖雲。居然勃窣翁稱健。踏葉歸來日未曛。諸作與原信可稱勁敵。保泰。

### 哭徐肇瑣

晚晚相依各二毛。何期遽隔酒糟遙。一腔熱肯逢人灑。兩耳聾常怕客嘲。野鶩書成名自負。河魚腹痛疾難消。以君



腹疾。那禁腸斷雲溪渡。步屐曾過話寂寥。  
臥病仍聞志未灰。料量門戶剪蒿萊。埋文預乞傳人筆。昔酒猶溫宴客杯。今春會瀾余作生誌。臨歿前四日猶饌客。白鶴化憐君不返。青蠅弔與我同來。從今舊雨存遺幾。老淚濡毫賦入哀。

戊戌春日

北堂夢杳痛難追。春露驚心又一悲。從此遂無爲子日。初心長負去官時。絳趺忍讀循陔句。墨食猶違負土期。苦塊餘生感中夜。淒風颯颯總帷披。

編校文端師集感賦

悵別音容二十年。今朝重幸讀遺編。感深難忘三條燭。才大會推萬斛泉。我欲往從瞠在後。人思得覩快爭先。寒燈攤卷閒相對。還似摳衣絳帳前。  
久推勳德冠班行。餘事仍看各擅場。真草淵源王內史。文章臺閣李東陽。獨扛健筆探孤詣。不立專門攬衆長。藝苑他年論古學。醉翁門是一津梁。  
忍辭校勘夜窗幽。神理須從象外求。與可畫先胸有竹。庖丁解在目無牛。名將後輩添描畫。味要門生議去留。他日九原相見處。此心或可證千秋。

肇璜歿後其子以君手植杜鵑一本見貽感賦

一枝躑躅贈留遺。老瓦盆經手濯滋。曾記賞花徵勝友。忽如開閣散歌姬。到應推愛同烏鳥。名易傷心比子規。贏得故人思舊淚。與他一色染胭脂。

寄使相欽齋李公三首之一

廿年嶺嶠浹恩膏。又見滇南駐節旄。將相官兼韓魏國。華夷地控蜀章臯。鐵橋有路蠻輪賁。銅鼓無聲盜賣刀。半壁西南資坐鎮。紀功應勒點蒼高。

舟泊京口王夢樓前輩邀遊北固山蒜山諸勝置酒江閣流連竟日卽席有作

握別京華十五年。故鄉重喜屢恭聯。人曾泛海隨星使。家住臨江作水仙。老境風流猶顧曲。儒門淡泊忽逃禪。故應海岳庵邊路。不可無人繼米顛。

滇嶠歸來鬢未秋。萬籤高擁一窗幽。詩名尙愛稱才子。官位幾忘是故侯。碧海鯨魚傳麗作。楊枝駱馬遣閒愁。羨君天與無花眼。燈下蠅頭寫更遒。

孤亭俯瞰大江濱。箕踞狂談岸幘巾。此樂動論千百載。素心豈易兩三人。筇輿度嶺遊終日。蒲酒移尊勸幾巡。又破先生杖頭物。蘆碕小閣荷留賓。

德定圃漕帥移節撫閩道過常州相見話舊賦呈

衙鼓趨塵憶往年。斯文臭味荷深憐。狂容傲吏頻揮壘。貧識儒官不受錢。青史勳名公作督。白頭著述我歸田。雲泥無分隨班祝。剩托心香到海天。

贈莊似撰

凌雲賦筆最翩翩。忽輟屠牛試小鮮。傀儡身閒催戲鼓。琵琶人老到商船。折腰宦味從今日。回首名場失少年。何物人間向平累。爲他婚嫁誤神仙。千古同嘆。舟。

秋帆中丞聞余銜恤之信遠致厚贖詩以誌感

匪莪誰唁聖廬幽。忽拜朱提過五流。孤子餘生桐削杖。故人高誼麥連舟。到逢涸轍真甦鮒。來自廉泉可飲牛。誰肯官高還念舊。此情須向古人求。

題幘難稱嶽嶙峋。華袞偏叨剪拂新。舊題公陟華園。嶽蒙獎許。

老尙雕蟲良可愧。窘方祭獮已嫌貧。一編若論千秋業。四

海無過十數人。笑我此中何處着。在同食蓼味含辛。

答友

一縷心香息衆鷺。已甘門徑掩蓬蒿。書難盡信常疑孟。詩偶無題且和陶。白日百年浮世短。名山一代幾人高。尙憐捉鼻清吟處。見笑人間湖海豪。名句。

刊刻汪文端師集既就。兒輩勸以拙集付梓。勉狗其請。書以誌愧。

師資幸托棗梨酬。愧以蕪詞續選樓。閒惜半生心力瘁。老思一卷姓名留。先生在日曾青眼。弟子如今也白頭。太息斷輪人已去。乞誰刊定夜窗幽。

早從詩句判升沉。鳳翽朝陽鶴和陰。公有文章兼事業。我無鐘鼎竟山林。敢追漢殿凌雲賦。聊附康衢擊壤吟。重句燈前展師集。始知盛世有元音。

纔識甘辛鬢早殘。竿頭欲進步蘭單。千秋如許談何易。一字求安已大難。未免惜他雞肋棄。知誰留此豹皮看。只餘結習難消處。或作微漚點海瀾。甘苦自喻。故。

服闋後親友多勸赴官作詩誌意

祥琴纔罷忍彈冠。多少鑼聲促上竿。垂老畫成名士餅。旁觀欲敗煉師丹。敢憑野笠驕文繡。恐食官倉又素餐。舐掌孤熊自知分。不關貪坐釣魚灘。

此身敢便托高雲。實以迂疎性組纒。苦筍味堪差致仕。甘蕉生怕受彈文。我需於世原無幾。客望斯人恐太殷。多少田間身再出。聲名往往損清芬。

浙遊口占

七年不出邑東門。忽買扁舟去故園。南浦一篙新漲水。東風三月落花村。懶常閉戶將終老。貧則求人稍貶尊。落魄江湖重載酒。倦游情緒總難論。

舟過無錫晤顧晴沙觀察。適同年陸朗甫方伯乞養歸。亦以是日至。遂同游惠山。

千里關心出處身。停雲遠望每勞神。十年但作相思字。一日欣逢兩故人。近狀共驚新白髮。舊遊重話軟紅塵。歸

田同此循陔願。歎我今偏不逮親。

素節相期玉不瑕。看他宦海競時華。幾人叔度曾歌袴。佳士君謨亦製茶。一部河渠胸有竹。

謂甫以所著蓮河考見貽。

百家

詩格眼無花。晴沙會論詩。品泉亭下相攜坐。此味何如早晚衙。

到杭州寓門人沈南雷儀部宅卻贈

浙水分攜十四春。重來相見倍情親。西湖要我爲遊客。東道因君有主人。掃榻爲安行李穩。典衣催沽酒肴珍。及門著錄知多少。誰似彭宣誼最真。

清風廉使舊留貽。謂尊人椒園按察。蘭綺家聲似昔時。投刺到門無俗客。讀書滿屋有佳兒。手栽桃李皆時彥。事畢松楸

近選期。君屢膺典試分校之役。今以服闋將赴補。議禮曲臺資掌故。鋒車莫漫出山遲。

西湖晤劉子才喜贈

不會識面早相知。良會真成意外奇。才可必傳能有幾。老猶得見未嫌遲。蘇隄二月春如水。杜牧三生鬢有絲。一個西湖一才子。此來端不枉遊資。

去歲莊似撰自陝回秋帆開府寄聲慰唁且約余作陝遊今似撰赴陝與余結伴行有日矣會時將伏暑遂不果寄詩述懷

形勝三秦控塞垣。儒臣開府鎮雄繁。帝將節鉞儲良相。世仰文章稱狀元。千騎上頭雙蠶肅。九州西面一關尊。立身豈但蓬山頂。要使勳高華嶽論。

一從初服返茅齋。屢接郁箋老眼揩。出處豈關天下望。寒暄偏累故人懷。春風渭樹人千里。秋露秦葭水一涯。不是雲霄能念舊。誰從林下問芒鞋。

驅車已擬赴臨潼。半爲尋詩半訪公。召伯化從分陝見。賈生文愛過秦工。身非熱客愁衝暑。時正炎官欲逞雄。我本苦吟驢背者。來須風雪灑橋中。

王述菴從軍滇蜀凱旋後超擢廷尉茲乞假歸葬事畢還朝道經毘陵停舟話舊賦贈

滇蜀蜀微佐軍鋒。秦凱歸來進秩優。蟻蝨久知生介冑。貂蟬真見出兜鍪。公蒙恩賜焚黃詔特榮先輩。飛白書應

起賜樓。新構第宅。卻憶吾家老元叔。與公會共赴星郵。傷璞函殉難也。三四一聯。精切

大學上雲巖阿公平。金川後洽河豫省事畢趨赴行在道經淮城相見話舊敬呈

信有熙朝柱石臣。文經武緯贊鴻鈞。蠶叢路闢千重嶽。麟閣形圖第一人。郭令勳名真蓋世。范公憂樂總關民。十

年重見頭環黑。此是蒼生福正新。

征南幕下記趨隨。親見籌邊策不遺。意氣人皆吞小醜。事權公是統偏師。晝灰回憶爐邊字。剪燭重論局後棋。今

日勳庸滿天下。苦心能得幾人知。甘苦共嘗。故不覺其事之親切。保泰。

### 渡江

塵沙千里颺征衫。今日金焦覽碧巉。潮定未分清長水。風橫兼使往來帆。過山不上僧含笑。擬登山。不果。到岸無

驚客解嚴。計日鄉園看梅雨。遙知濃綠滿松杉。潮定一聯。新絕。舟。

### 晚泊京口

浩浩江頭沸市聲。戢篙暫候晚潮生。大風白浪平吞岸。落日青山半入城。地險南徐曾作鎮。時清北府漫論兵。一

編丁卯詩人集。留伴孤舟對月明。通首雄解。枚。

### 喜晤嵇蘭谷話舊

記得班荆在點蒼。君官嶺時。辭軍部駐嶺山。余從軍過之。談竟夕。軍郵千仞正輸將。半空有路聞雞犬。六月如冬下雪霜。往事俄

成泥爪幻。均徭猶頌口碑長。可應醉肉潛生後。重話生平舊戰場。

蔡節婦詩。姓張氏。諸生蔡士琦妻。歲而寡。撫孤謹光成立。三

日泥書旌綽楔。清芬長附柏舟詩。

宮幃山晚眺

蓬萊弱水是耶非。萬頃烟波繞翠微。遠鳥似投天外去。神魚或出浪頭飛。日斜樵徑歸柴擔。風起眾船打水圍。如此湖山近鄉社。真慚不早占漁磯。

村舍卽事

結習深知癖未除。時供流輩笑軒渠。懶愁束帶見生客。老尙典衣求異書。肯聽足音空谷外。稍留目力短檠餘。山妻來告餐無肉。答道今朝正喜蔬。

解嘲敢引北山文。游惰仍慚穀不分。閒每勸人爲善樂。貧惟教子讀書勤。漢陰機息無爭俗。韋孟詩成總舊聞。報國已無康濟具。或於風教補微勳。

一編勤過舉場時。積漸家風暗轉移。柳氏婢能輕賣絹。白家嫗亦托知詩。牀無阿堵煩人舉。手有摩尼誦佛持。只恐風流遂成習。滿門俱作虎頭疑。

鄰翁邀我饌香杭。雜坐何嫌笑語儉。將酒勸人無惡意。借花獻佛也真情。杜陵泥飲遭田父。阮籍酣呼對老兵。短髮飄蕭晚歸去。路人喚作醉先生。結句風趣獨絕。舟。

與杏川念杞再渡太湖至馬蹟山

又指夫椒泛蔚藍。共嗤此老近游貪。氣吞雲夢尙八九。人在野航恰兩三。風月從來無盡藏。湖山寧厭有幽探。墓田丙舍如營就。便擬幽棲吸翠嵐。時爲先母營葬地。

哭外舅大學士程文恭公

黃扉方仰贊鴻鈞。何意齋箕遽返真。上殿每陳寬大語。舉朝共服老成人。故鄉屋僅堪容膝。退直書常擁等身。欲識蓋棺公論定。早聞歎息徧朝紳。

官班台輔壽耆年。寧復餘恫抱九泉。老去香山猶望子。病來疏曠未歸田。公以姪爲尉。晚年常有乞身之思。以恩重不敢請。孤寒有客傷垂淚。言行何人錄作編。慚愧向蒙元獻愛。難將薄劣繼薪傳。

上元夕毘陵驛前泊舟與容龕前叢看燈

聯舟小泊運河濱。正是元宵節物新。邀月恰邀邀月客。看燈兼看看燈人。官符不下城門鎖。使節猶遲驛騎塵。冠帶迎賓尙游戲。可知都是野鷗身。時陳玉亭制府將過。同出筵之。

和敬輿見題拙集之作

一編寧復賭時名。聊遣閒愁自課程。身到罷官如敗將。詩因遇敵想交兵。才無列宿胸羅富。味憶沉香鼻觀清。多愧故人虛獎借。尙嫌熟處未求生。

將入都留別容龕蓉溪秋園敬輿緘齋諸人

幽棲十載穩江鄉。忽被鑼聲催上場。有幾故人皆白髮。多年老婦再紅粧。連宵置酒煩驪唱。往日聯裾似雁行。別後定知真率會。也應爲我一停觴。

途次先寄京師諸故人

防墓粗完四尺墳。四月初間。營先母葬事畢。此身敢遂鹿麋羣。縱貪野豈非高士。未忘朝簪爲聖君。柔櫓輕搖南浦水。征衣猶帶北山雲。最憐手植成圍柳。臨別依依縮夕暉。

身托循陔十載閒。本期再出玷朝班。敢憑奉母三遷里。便作辭官六聘山。行笈封題新字濕。朝衫拂拭舊痕斑。只慚經濟無毫髮。絲恐虛糜廩粟殫。

一出春明廿載遙。衰遲敢復逐時髦。江文通已無殘錦。藍采和惟有舊袍。仕宦幾家收局好。聲名平日在山高。祇應晚節供描畫。共笑巢由下拜勞。

喫過鱒魚始出門。問渠何事戀江村。家貧婦或勞兼婢。身老兒還小似孫。惘惘可憐原俗態。悠悠相望也銷魂。始

知膽力非年少。愧以孱羸說報恩。身老句可移贈子才。故。

高郵弔毛惜惜。本趙女也。南宋末城破後。賦將呼之侑酒。大罵不屈死。

死忠事豈賁蛾眉。樂籍偏成此段奇。弄隱技空稱俠女。海青身尙是男兒。胭脂香慘花爲血。環珮魂歸月浸屍。多少鬚眉盡何處。並無凝碧暗吟詩。

將至臺莊忽雨臂頓患風痺客中無醫徹夜酸痛迴舟歸里感成三律情見乎辭

陸程正擬上征鞍。忽中風痺兩手攀。人笑暮年重出仕。天將衰疾教休官。曲肱已得林安臥。折臂翻如石自殘。灼艾連朝凡幾炷。可憐徹骨夜呼酸。

憶昔從軍絕徼秋。擬憑赤手縛蠻酋。曉泗漳水牽渾脫。夜枕腥皮虎鬪鞬。弓爲臂強翻覺軟。檄當腕脫尙能適。如何一副幽燕骨。今日衰殘作贅疣。警絕。

來往郵程一月期。歸航仍繫綠楊枝。里鄰笑客原輕出。猿鶴催文已久移。散遣僮奴佳處去。收藏袍帶祭時披。慚他斗酒山妻話。枉費臨行餞伏雌。

養疾未愈書感

經時衰疾臥江天。芒角空煩到酒邊。老我頭顱將壓雪。看人圖畫到凌煙。蒼生猶或期安石。聖主何曾棄浩然。自是書生貧薄命。晚途只許托林泉。

御屏會荷記微臣。何忽江湖作隱淪。如許百年空付我。徒將萬卷去驚人。看花紫陌懷前度。種藥青山過此身。歲晚滄江幾回首。卿雲五色麗高旻。蒼涼。

觀穫

依舊平疇方野痕。疎行一一見陳根。遭風今歲多禾芻。呂覽。禾先生者爲米。後生而爲稻。故耨者。長其兄而去其弟。過雨他時有稻孫。已穫。其根得雨復長曰稻孫。人似翅開飛蚨蝶。擔稻者。蝗如樹倒散網罟。稍欣計日堪催釀。黃葉秋風正打門。米芾取以名樓。見說苑。



哭杏川老友

殘牙能啖肉盈斤。方謂天教健補貧。誰料汝爲長夜客。始驚我亦暮年人。白楊蕭瑟魂安托。元草飄零字尙新。同學弟兄亡過半。此身雖在已傷神。

歲暮雜詩

頻中出處兩躊躇。病廢今真守敝廬。身退敢談天下事。心齋惟對古人書。蓋頭有屋新編草。食肉無錢慣茹蔬。預擬明春看花會。門生兒子昇籃輿。少日虛名冀北空。老來羞述舊豪雄。目中敢謂無餘子。海內漸忘有此翁。鎖院草麻雞唱月。郵亭揮檄馬嘶風。追思寸管矜才地。尙落禪家習氣中。

消閒何物度晨昏。一縷爐烟息衆喧。歌舞戲場無樂地。英雄歸路有儒門。勤抄先訓編家法。虔祝豐年報國恩。青史他年傳人物。少微星尙在江村。

億生乞假南歸京華故人程戴園孫補山張吟薌諸公俱寄聲存問感賦

屏居誰問讀書燈。只有生平幾舊朋。科老將如祀廟主。官休已似退堂僧。書來輦下人千里。夢對窗前月半棱。自是名流憐臭味。相思何日辦行蹤。

聞心餘京邸病風卻寄

江湖十載穩漁綫。重入詞垣鬢已皤。只擬老當嘗蔗笑。誰知上是積薪多。還官階淺思烏府。君歸養十餘年。及再入詞館。則資俸已在後輩之後。乃保送過客門稀感雀羅。天末相思那得見。翻君舊稿一吟哦。

跋扈詞場萬敵摧。如何乃築避風臺。少貪酒色終償債。老訂詩文幸滿堆。木有文章原是病。石能言語杲爲災。可憐我亦拘攣臂。千里相望兩廢材。

億生以其先高祖恭毅公中丞世德詩冊屬題敬書於後

百年門第映朝霞。遺澤真看累葉賒。父老尙因碑墮淚。子孫能保笏傳家。青楊巷古常排戟。紅藥階深又草麻。自至絳齋。皆臚仕。今一頌遂成操左券。豈徒集錦麗詞華。映川又官中書舍人。

雲巖相公奉使再過常州舟次趨謁敬賦

使節經臨許再攀。喜看丰采尙朱顏。千秋人在英雄傳。一等官高將相班。瓠子河新平濁浪。蓬壺軍久靖遙關。錄囚豈足煩公到。要飭官方立檢閑。公方赴浙江。治菴苴之獄。

第一孫生誌喜

中歲纔經嫁娶期。未遊五岳鬢先絲。家貧聊喜添丁富。孫早差償得子遲。賀客競稱循吏報。老妻自詡作婆時。笑他白髮程文海。七十平頭始抱兒。程葢園年近七旬。今歲始得子。

七言律四

仙掌路真州地名。相傳柳耆卿墓在焉。故王阮亭真州詩。有殘月曉風仙掌路。何人爲弔柳屯田之句。然會達臣獨醒志。耆卿死葬聚隱巖之花山。每歲清明詞人集其下。爲弔柳會。則柳墓不在真州也。或訛傳耳。

一邱兩地各爭高。只爲填詞絕世豪。漢上有墳人弔柳。漳南多塚客疑曹。金莖名竟稜沙渚。鐵板聲休唱浪淘。我趁曉風殘月到。縱無魂在亦蕭騷。

秧針

誰散鈿鋒似嫩蕪。纖柔不比劍裁蒲。引他梅雨絲絲縷。繡出幽風幅幅圖。翠剝出波真脫穎。綠芒承露亦穿珠。笑看野老如搥指。自詫拈針賽小姑。

雜感

酒樓依舊繡簾垂。會寄閒情杜牧之。紅粉已爲山下土。白頭增感鬢邊絲。銀缸明燭傳觴令。錦瑟哀絃卻扇詞。老

去風懷已銷歇也。因陳迹一含悲。

周長庚舊於坊刻詩選中見余名以爲古人也。今邂逅山塘具述傾注之意。答詩誌愧。

姓名忝附選樓文。四十年來句已陳。敢說魏三今隱士。竟疑陽五古賢人。錦囊幸免遭投廁。紅補知誰肯拂塵。所愧暮年何所就。猶將研削耗精神。

題元遺山集

身閱興亡浩劫空。兩朝文獻一衰翁。無官未害餐周粟。有史深愁失楚弓。行殿幽蘭悲夜火。故都喬木泣秋風。國家不幸詩家幸。賦到滄桑句便工。

題吳梅村集

才高綺歲早登科。俄及滄桑劫運過。仕隱半生樗散跡。興亡一代黍離歌。死遲空羨淮王犬。名盛難逃惠子騾。猶勝絳雲樓下老。老羞變怒罵人多。

國亡時早養親還。同是全生跡較閒。幸未名登降表內。已甘身老著書間。訪才林下程文海。作賦江南庾子山。剩有沉吟偷活句。令人想見淚痕斑。梅村得此。可以無憾矣。保泰。

和友人拂水山莊感賦原韻

飛瀑依然萬點多。當年養望此岩阿。空山竟不生薇蕨。破屋徒憐補薜蘿。人笑褚公猶齒冷。家還江令已頭皤。如何領袖山林席。名節翻輸一翠蛾。

著釐觀懷古

一朶奇香換國家。著釐觀裏出名葩。遂勞下水風帆錦。此亦南朝玉樹花。應笑閣梅空冷淡。曾偕隄柳映天斜。至今根已無遺種。化作傾城粉黛華。

史閣部祠

遺像清高故相祠。當年建閣已殘棋。紛紜國事千絲亂。辛苦軍籌一木支。箕尾歸天空有氣。衣冠作塚并無屍。聖朝褒卹恩何厚。碑版煌煌御製詩。

屢接秋帆開府手書兼寄珍裘賦謝

曳履雲霄已隔塵。郁箋偏荷寄書頻。尙餘范叔袍憐我。不作宣明面向人。廣廈更期分庇普。緇衣敢辱好賢真。五陵裘馬多同學。誰念江湖老病身。

同夢樓遊平山堂

切雲樓迥兩三層。勝侶偕來快一登。後輩舊隨前輩第。庚辰辛巳。廷試名次相同。在家今作出家僧。君持齋已十餘年。持齋不用燒豬待。是日子凡代治具。故以佛印爲喻。拾級還同跨鶴昇。也比蘭亭修禊會。可應作序寫吳綾。君書名擅一時。

題棕亭見和長篇後即贈

一枝徒筆領風騷。老去詞源尙湧濤。至死不僵蟲百足。橫行無敵蟹雙螯。青樓香徑尋花熟。紅燭華筵對酒豪。流寓恰當名土地。康山風月價增高。

叢殘舊稿偶成編。敢說人間快覩先。數十暑寒吾輩老。萬千著述幾人傳。豈無郢唱能飛雪。未到秦焚已化烟。只有同時賞心樂。三分釀到七分圓。

秋思

街鼓沉沉夜正中。清吟人坐畫欄東。涼生旅館孤燈雨。秋在高樓一笛風。地縱近游仍是客。身誇老健已成翁。稍欣殘暑驅除去。明日湖航泛碧空。

子才書來驚聞心餘之訃詩以哭之

斯人遂已隔重泉。腸斷袁安一幅箋。預乞碑銘如待死。久淹床第本長眠。君中風病臥已數年。去冬子才適江西。君預癩爲其墓誌。貧官身後惟千卷。名士人間值幾錢。磨鏡欲尋悲路阻。茫茫烟樹哭江天。

書生不過稻梁謀。磨竭身偏願莫酬。忽漫焚魚辭薊闕。也曾騎鶴到揚州。君去官時先買宅金陵。後掌教山陰揚州。皆攜家住。再出山來已白頭。何限世間陽翟賈。傲人足穀與多牛。

十年館閣每隨行。角逐名場兩弟兄。可畏隱然如敵國。所當何處有堅城。久將身入千秋看。如此才應幾代生。我痛自關人物謝。區區豈特故交情。

公讌三元錢湘舫於未堂司寇第。自司寇以下西巖松坪涵齋。既堂杜村及余皆詞館也。江鄉此會頗不易得。司寇出歌姬侑酒。以張之屬。余賦詩記勝。卽席一首。

綠酒紅燈紺袖花。江城此會最高華。科名一代尊沂國。絲竹千年屬謝家。拇陣頻催拳似雨。頭銜恰稱臉如霞。女願四娘。乞名於湘舫。無雙才子無雙女。併作人間盛事誇。郎湘舫贈以霞娘二字。

### 六十自述

流年俄屆杖鄉期。樽散生平概可知。傳世料無青史分。歸田曾及黑頭時。閒增手錄書頻校。瘦減腰圍帶屢移。老嫗縱然思再嫁。頗慚面已皺生皮。

十年屏跡臥江村。往事真堪目笑存。才子聲名徒嚇鼠。好官滋味略嘗鼈。篝燈一穗寒無燄。木榻雙趺隱有痕。子晉吹笙已仙去。此翁長守藥爐溫。

生平游跡遍天涯。塞北交南萬里賒。人羨見聞增宦轍。天如成就作詩家。翻來笳拍傳紅粉。繡入弓衣抵碧紗。一卷風烟紀行什。頗同海客泛星槎。

鬢絲禪榻影飄蕭。看盡人間覆鹿蕉。尙未成僧緣食肉。久辭作吏且伸腰。所愁原壤無稱述。若比黔婁已富饒。消遣殘年復何事。江天風物寫漁樵。

平山堂似繡屏開。好友相招月幾回。地有歐陽遺跡在。人疑杜牧後身來。樓臺兩岸名園接。燈火中流畫舫迴。他日紅橋誌修稷。老夫曾此屢銜杯。

頗思隨俗一稱觥。儉歲家家食罄甕。安得點金施小惠。自嫌畫餅剩虛名。身無半畝憂天下。眼有千秋愧此生。米貴恰宜師辟穀。好教年老漸成精。

寄述菴按察

蠻徼從戎鬣未幡。記曾聯騎挽雕戈。王尊又上邛徠坂。劉秩真當曳落河。往事眼前如未遠。故人海內已無多。秦雲遙望三千里。甚欲相尋奈老何。

米價日增旅食不免簡縮書此一笑

未試仙家辟穀方。且謀節食爲空囊。梅花瘦我疑孤鶴。菜把驕人食萬羊。門館漸稀留客飯。奴童竊誚減軍糧。卻慚書卷空填腹。不抵充饑一覈糠。

菜花

始信東風氣力深。盡將原野作芳林。莊嚴老圃三春菊。富貴田家滿地金。正色遙分曇佛面。濃香不止女郎簪。前劉縱失桃花約。差免空來紫陌尋。

哭陸朗夫開府

紫微紅藥老同年。開府纔登訃已傳。生有立身千仞壁。死無遺囊一文錢。曉衙鼓散心如水。夜館金來手指天。遙識湖湘清德在。有人墮淚峴碑前。

金山咏韓忠武事

滿江風捲怒濤聲。千載如聞戰鼓鳴。南渡君猶能將將。中權師竟出卿卿。時清兵燹無遺跡。事往英雄尙大名。愧我亦曾身執戟。至今仍作一書生。

康山席上遇歌者王炳文沈同標二十年前京師梨園中最擅名者也今皆老矣感賦

燕市追歡夢已賒。近游欣此度紅牙。豈期重聽何戡曲。恰是相逢劇孟家。歌舞夜闌看北斗。江湖身逐憶東華。當

年子弟俱頭白。忍不飛騰暮景斜。

再過淮上晴嵐留飲荻莊卽事

潦後重來訪荻莊。西風踏葉徧籬牆。行廚酒釀斟重碧。留壁詩猶掛硬黃。家幸未沉河伯婦。人傳已作水仙王。淮大水。多訛。衰年何意頻相見。把臂寧辭放老狂。

晴嵐以余六十枉詩稱祝次韻奉答

交誼真叨白首新。好詩矜寵到鱸尊。十年已長公稀古。君年七十一。一事無成我負春。來日固難多去日。後人將又視

今人。文章功業俱安托。虛忝儒冠七尺身。

冷淡生涯覓句新。久將閒跡寄湘尊。黃楊樹長偏逢閏。紅藥花開已送春。年命魯陽揮後日。功名鄧禹笑中人。祇應憑托昇平世。穩作林間冗長身。

一枕

一枕槐安夢已捐。此身何處不儻然。課程排帙晨稽古。心事焚香夜告天。庸福寧求木居士。高踪或比地行仙。偶翻除日尋交舊。半在三霄半九泉。

陳繩武司馬招同春農寓齋集女樂一部歌板當筵秉燭追歡卽事紀勝

風景真令裂老顛。衣香人影膩如烟。難降席上胭脂陣。甘受空中指爪鞭。曲調轉因邀顧誤。燈光似爲定情圓。何當禁斷蝦蟆柝。窟室長酣不曉天。

春情盍盍夜迢迢。占盡烟花廿四橋。少女風柔偏覺暖。書生魂小不禁銷。霜迴瓊戶簾衣隔。月避金缸蠟樹燒。細數生平斷腸處。此番也算可憐宵。

馬湘寇白舊平康。名字流傳齒尚香。一夕綠尊重作會。百年紅粉遞當場。濃粧氣壓冬烘客。艷曲聲翻夜度娘。惱煞司空詩見慣。累懷臨老發清狂。

李欽齋制府以兵事入閩邀余同行賦呈

忽隨使節別江村。爲掃閩南瘴霧昏。朝倚重臣威海國。我慚退士入軍門。筆無草檄新才思。刀有征蠻舊血痕。莫笑掛冠翻入幕。報師恩卽報君恩。

十載

十載江湖穩釣舟。忽參戎幕佐軍籌。人疑白首何輕出。我爲青山未遍遊。野店客魂鷄臙臙。殊方蠻語鳥鞞鞣。憑添一卷閩南草。翠壁題名處處留。

海上望臺灣

極目滄溟浪接天。中藏掌大一山川。當年曾比田橫島。舊爲海盜鄭成功所據。今日重煩楊僕船。颶力吼來風有母。妖氛掃去水無仙。用孫恩事。臨流遠想熊津督。會破周留定海埏。

弔湯緯堂殉難鳳山

一官海外正班春。伏莽無端起劫塵。絕徼巖疆城守責。名場詞客陣亡身。民皆相率登陴哭。賊亦羣驚按劍瞋。擬殺賊而定有他年樂社祭。傳芭曲裏送迎神。

訟堂閒處富吟箋。不以才傳以節傳。宦遠似飄羅刹國。魂歸好附賈胡船。生前詩有題襟集。君集近人句作詩話數卷。身後家無負郭田。漫讀孝經堪退賊。可憐兒死父屍邊。長君苟業從死。

海上

極目蒼茫水接空。兵氛遙指海天東。人油作炬燃宵黑。魚眼如星射浪紅。炎徼無材非瘴癘。戰場有鬼是英雄。紛紛伏莽何時定。翹望征星矍鑠翁。

擬老杜諸將五首

炎海冥冥瘴未收。井梧信到又經秋。閩人夢去飄羅刹。野鬼魂歸哭鬪艘。百道舳艫催轉粟。連營刁斗警傳籌。挑



燈閣看平臺記。七日功成想故侯。  
絕島桑麻久太平。僑居人總買田耕。但存清吏埋羹節。那有奸民歃血盟。諧價苞苴官判牘。曼聲絲肉妓傳觥。釀  
成一片塗膏地。太息憑誰問主名。  
提兵鷺島發峨舸。家世通侯鎮海波。韜略可施何太緩。萑苻初起本無多。懸軍翻慮爲猿鶴。列陣徒聞彷彿鵝。自  
是軍謀要持重。幾時聽奏凱旋歌。  
易將應看賊首函。到營又似勒枚銜。翻疑充國屯田守。豈有辛毗仗節監。臥甲征夫聽夜柝。搗砧思婦寄秋衫。祭  
風臺畔檣烏轉。枉費催開海舶帆。  
衆志成城百戰場。直同疏勒守危疆。登陴慷慨三通鼓。搏賊劖殘半段槍。甲鎧煮來聊作食。蠟丸書罷不成章。重  
圍百日猶堅拒。始信朝家德澤長。

我洲以陝中遊草見示和其六首

驪山塚

百萬刑徒斲石磴。橋陵規制創尊榮。人間真有南山柳。地下幾移北斗城。他日豈知開汲冢。千秋此亦一秦坑。祖  
龍原識長生假。正在求仙又築塋。

鴻門

風急牙旗颭將壇。殺機危處託交歡。一杯酒竟將疑釋。千載人猶代膽寒。目眦光浮屠狗楯。背疽病爲沐猴冠。重  
瞳終是君人量。成敗論人恐未安。

灞橋

咸秦東去指臨潼。舊有長橋似偃虹。詩思一天驢背雪。離情兩岸柳條風。臨流斷礎猶堪認。挽漕連檣已不通。曾  
是前人斷腸處。酒旗還映夕陽紅。

定軍山

將星夜落蜀山雲。丹旆歸來葬定軍。與賊勢終難兩立。斯人功竟限三分。豐碑曾隨居民淚。宰樹猶森故相墳。志決身殲遺恨在。至今忍誦出師文。

乾陵

一番時局牝朝新。安坐粧臺換紫宸。臣僕不妨居妾位。英雄何必在男身。林巒藉豈媧皇石。風雨陰疑妒婦津。同穴橋陵應話舊。曾經共輦洛陽春。

馬嵬坡

寵極強藩已不臣。枉教紅粉委荒塵。憐香不盡千詞客。召亂何關一笑人。燎火自明孤驛夜。野花猶泣故宮春。誰知幾點胭脂淚。別有生離江采蘋。

又和荊州咏古四首

威懾曹瞞欲避鋒。豈虞狙伺起鄰封。英雄事有千秋恨。形勝今猶四戰衝。青史綱成終失地。續日書失荊州事。白衣櫓到尚傳烽。如何一局無援著。疑案常應各臥龍。關壯繆。

獨眼何曾不霸王。七官文士豈能匡。怕聽項羽重瞳敗。慚對徐妃半面粧。赴難終邊焦釜沃。稱兵殊愧角弓傷。可憐才藻多焉用。一炬燒殘萬縹緲。梁元帝。

拋盡山河剩渚宮。選樓遺澤未應終。萋苴已附三王後。警蹕猶尊百里中。聊比蠻夷佗竊帝。羞勝安樂禪稱公。轉憐蕭銑生降日。不得偏隅國爾東。蕭督。

帳下奴遷節度班。故應無賴保疆厚。偏安王入朱三外。得計朝秦暮楚間。到處稱臣甘拜表。親身謁帝急逃關。始知草竊粗能立。也要三分智計。高無賴。

聞官兵屢捷志喜

絕徼兵戈望凱旋。將壇別築選親賢。龍驤飛渡無停晷。驃騎承恩正少年。過海地非頭痛國。魁關人有肉飛仙。先聲早落么騰膽。神策軍來一抵千。

西西北已武功皆。豈意東溟起瘴癘。戎索疆纔恢玉壘。職方地肯棄珠厓。兵收裨海蓬瀛島。星貫穹霄畢昴街。從此萬方清晏奏。豈徒韓筆紀平淮。

軍事將蕺余歸有日矣詩以誌喜

久作華陽陶隱居。豈期老出治軍書。塵煩已有三遺矢。馮婦何堪再下車。鄉夢迢迢千里外。塵蹤碌碌一年餘。稍欣奏凱期將近。計日歸尋舊草廬。

無端伏莽報與戎。一片蟲沙小劫中。作賊豈聞頭到白。驅民已過血流紅。時平吏醉笙歌月。事起兵寒草木風。至此始知曩渤海。賣刀買犢是奇功。

也是塵勞債未償。爲酬知己一番忙。卿曾經事韓文約。我決不爲陳自強。幕下使材論履屐。燈前握算調芻糧。尙憑門館恩私地。兼報當年食太倉。

本爲遊山附羽翰。久留軍府最無端。肯從殷鐵還干祿。翻似劉綿尙戀官。萬斛樓船兵渡海。兩甄桴鼓將登壇。天教倦客歸期速。一戰先聞定百蠻。

偶閱查初白集中有汴梁雜詩八首但稱梁宋遺墟殊未詳考按汴州自朱梁以宣武軍得天下始建爲東都然溫僭位猶在洛也末帝方卽汴爲京後唐仍遷於洛石晉至汴以其地便漕運乃定都焉漢周宋因

之劉豫受封亦嘗遷於此金陵謀南伐宣宗避北侵又皆來都此汴京沿革故事也爰補其缺八首之四少年花項刺飛翎。豈學班超燕領形。早有美人驚衣白。竟聞天子出雕青。憤兵救命歸無路。義子傳家討不庭。贏得榮封崇義節。歷年三百未曾停。

戎衣一夕換袍黃。返旆從容上御牀。得國也從孤寡手。傳家難料弟兄腸。基開忠厚流終遠。運啓文明勢不貽。遺

澤試看南渡日。魚羹老嫗亦從王。  
領得狼頭蠶一枝。仍容守沐建朝儀。竟從故國乘黃屋。可憶當年拜赤墀。南牧金戈奴叛主。北來玉冊帝稱兒。誰知他日臨橫徙。五國城中等淚垂。

一樣南遷兩不同。瓊車塵土繡旗風。勢強飲馬長江外。運去遊魚沸鼎中。喬木陰猶秋色碧。元遺山詩。兩都幽蘭軒已火光紅。可憐一片青城月。又照蛾眉出故宮。

至福寧江淑齋太守方孝亭總戎陳迪菴明府更番設燕兼同遊望海樓諸勝

踏盡千峯到福寧。奴欣飯白馬芻青。留行已剪招魂紙。出險應名至喜亭。歌板新聲催曲部。弓刀小隊叩禪扃。誰知經歲兵塵慣。有此歡場累日停。

一路舟車有司供設頗具以余從制府來也書以一笑

累他一路館餐儲。爲是平津舊主書。始悟洛官趨買謚。豈真邛令重相如。已無按部雙華轂。且當遊山一筇輿。堪笑不因人熱者。此行翻假虎威餘。

青田道中

上瀨船遲坐夕暉。畫眉聲老綠陰肥。地爲山佔幾無土。水到灘鳴不可磯。野鴨拗頭依石睡。水牛浮鼻渡江歸。羨他茅屋人家好。樵牧終年住翠微。

庚午同年平姚海孫星士葉古渠陳受粲招飲於吳山丁仙閣姚海有詩即用其韻

白首同年尙五人。那禁握手倍情親。步聯謝客登山屐。醉濕陶家漉酒巾。地盡羽流無奉佛。山皆道觀。無一佛寺。坐仍齒序不論賓。居民驚見鬚眉古。只道羣仙戲降真。

早登解額正難量。回首俄驚四十霜。已嘆飛蓬雙鬢短。猶餘食粟一身長。地傳丁令歸來鶴。石是初平叱後羊。合政山名稱五老。年年來此續歡場。

閩門晤王西莊話舊

握手論交紫塞塵。春明一出見無因。每逢後進思前輩，喜聽貧官作富人。君生事頗足。讀史共推糾繆細，著書爭秘論

衡新。形容別久猶堪認。知是閒居養益馴。書生老不肯千休。福不如人名要留。愧我沉冥空廿載。如公著述已千秋。江湖游釣餘青笠。人世推排到白頭。乞得士安佳序在。他年或可附名流。前歲會爲拙集序。

虎邱夜泊

夢斷山塘舊酒痕。扁舟重泊虎邱門。旗亭猶唱黃河曲。香塚誰招紫玉魂。半夜鐘催燈影地。一弦月度柳陰昏。風懷久付茶烟颺。明日團蕉禮世尊。

題閩遊草後

嘯咏江湖鬢已霜。忽添鏡吹入詩章。共知殷浩宜高閣。偏伴陳登臥下牀。醉後語言無忌諱。老來詩筆漸頹唐。只餘飽啖楓亭荔。口福天教滿願償。

兩行宮燭半牀茵。蠻府參軍亦苦辛。已見功收鼙矢日。何須名出捉刀人。春蠶食業行間草。野鶴歸山物外身。看到滿枰棋定後。爛柯樵已一年春。

最喜歸途傍海涯。浙東岩壑極幽遐。千年開道從康樂。一路看山到永嘉。花草無名開錦幄。犬雞俱盡餌丹砂。此中好景誰消得。只合詩家與畫家。

到處華筵競餞賓。梨園法曲遞翻新。自緣好事陳遵轄。豈慕高名郭泰巾。舞態酣搖花映肉。歌聲軟度酒生鱗。當場作戲人何限。我是場邊看戲人。

將軍凱旋地方官供張甚盛而將軍舟行迅速未嘗一寓目也

靖海功高縛兩酋。凱旋喜氣溢星郵。摧堅已用琵琶腿。賀勝應簽玳瑁頭。宋初選軍格。用琵琶腿。章宗紀。有優人瑯瑯頭。金綺繡葦

麩紛傳舍。魚龍曼衍繞行舟。頗聞軍令端歸肅。滿眼繁華不寫眸。

繁華

繁華局裏一年春。差喜歸來未染塵。公瑾有醇堪醉客。劉輿猶膩解污人。一經可教聊存素。入口無多易救貧。慚愧親朋說高尚。無官豈即許巢身。

再到揚州遊紅橋

兩年不見廣陵春。依舊紅橋景色新。並舫笙歌垂柳岸。隔簾金粉畫樓人。履綦有跡重移屐。詩壁無紗半沒塵。風物不殊人漸老。豈宜長作浪游身。

過淮哭晴嵐老友

攜手河梁僅隔年。荻莊亭館故依然。重來風雨聯牀地。悽斷江湖載酒船。白首交游同輩少。青門文采後人賢。定文敬禮猶遺命。忍惜挑燈仔細編。令嗣蔭堂。以君遺稿屬定。謂臨歿遺言也。

心餘第三子師退來謁少年雋才英英欲發心餘爲不死矣感賦

猶記荷衣出拜時。廿年重見有餘思。祥琴轉瞬初除服。宿草關心未刻詩。心餘詩稿尙未刻。死有佳兒應瞑目。去爲才鬼又掀髯。然字正字通。有平上二聲。虎賁會動中郎感。況對王家玉雪姿。

次韻酬錢璵沙方伯四首之一

江國相望兩草廬。履綦隨處澹容與。前途富貴雙蓬鬢。末路英雄一卷書。老樹著花逾旖旎。曉星如月漸稀疎。終當一櫂來修謁。花港同觀策策魚。

攜兒姪五人俱至安定書院讀書

客授仍攜子姪多。館人先爲掃庭莎。我慚穎士稱夫子。人笑承天似爛婆。一味分甘忘旅食。半窗拈韻有清哦。如何身自誇恬退。偏望兒曹早決科。

紅橋

紅橋重泛木蘭船。一片閒愁入管絃。薄命桃花春雨後。斷腸芳草夕陽邊。三生杜牧曾遊處。前度劉郎再到年。慚愧旗亭歌板好。美人猶唱白雲篇。

白秋齋總戎輓詞

擁旄江國幾經春。威在軍中愛在民。官好境常無吠犬。時平功豈必圖麟。老爲林下鋤瓜叟。歿有碑前墮淚人。太息衰年惟此友。更誰茗椀話蕭晨。

廉船老友不見者三十年矣茲來晤揚州流連旬日喜其來而又惜其將去也斐然有作情見乎詞

卅年前共踏京塵。別久形容認始真。風雨雞鳴逢故友。關山馬跡老才人。翻來近作還吟興。話到同遊一愴神。吟已分此生無見日。相看彌覺白頭新。

少小論交志激昂。便思翎步到天閭。誰知出匣千將氣。都倦登場傀儡裝。敬禮定文期後世。君爲編訂拙集。正平懷刺向何方。將作楚祇應互祝加餐飯。長聽平安有報章。

哭錢璵沙先生

不會識面荷推衰。此意真令感弗諼。碩果枉教生並世。東筇仍欠死登門。八旬人尙江淹筆。二品官無庾信園。不哭先生復誰哭。從今老輩更無存。

題子才續齋諧小說

一編點鬼簿荒唐。更爲香魂寫艷粧。神女夢爲雲引誘。素娥奔竟月窩藏。文人自戲禪三昧。陰府將持算九章。我爲懺除犁舌獄。佛前稽首一爐香。

晤錢竹汀宮詹話舊

握別京華廿五春。相逢彌覺白頭新。手成百卷專門學。身是千秋列傳人。海外購書來賈舶。門前著錄遍儒紳。故

交也得餘光。乞一序。三都價便珍。承惠拙集序言。

研摩結習自諸生。館閣歸來業益精。兩漢淵源劉貢父。歷朝金石趙明誠。胸懷人喜披朝爽。目力天留禁夜明。入夜。則咫尺不能見。樽酒論心同一笑。傳人未必盡公卿。畫視仍察秋毫也。

心餘詩已刻於京師謝蘊山觀察寬以寄示展閱累日爲題三律

邢尹同時要比妍。今朝得睹豹斑全。死疑靈運先成佛。生本青蓮是謫仙。才大已推香象渡。名高久壓野狐禪。凌雲意氣談天口。彷彿音容尙眼前。

談忠說孝氣峻峭。廿卷詩詞了此身。於世僅增倉一粒。斯人已穀弩千鈞。三年刻楮成何事。六博呼盧大有人。太息儒冠真自誤。可憐無補費精神。

蓋棺難更句雕搜。後死應堪勝一籌。歎我亦將成弩末。比君仍未進竿頭。生前遊跡餘鴻爪。老去名心付貉邱。詩草兩家俱在世。不知他日孰長留。

忽夢鎮安舊遊

廿載蕭閒林下身。何緣重夢日南春。山多盤古年間樹。俗是華胥國裏人。朱邑葬桐乘後約。歐陽思穎記前因。只慚我自難忘處。未必民猶念我頻。

遊隨園題壁

名園欲訪屢愆期。到及梅花正滿枝。惟恐長爲門外漢。特來親賦畫中詩。林亭曲折文人筆。墻壁淋漓幼婦詞。名滿九州身一壑。輞川莊遂屬王維。

結構憑何粉本摹。危欄絕磴路縈紆。峯迴巧作東西崦。水複流爲裏外湖。喬木十圍人共老。名山一席客爭趨。問渠何福能消受。四十年來住畫圖。

舟過無錫再晤晴沙



故人相見倍情殷。爲共心期托野雲。誇富黔婁應讓我。論高子伯豈如君。夜闌燈火愁雞唱。歲晚江湖感鴈羣。便  
合往來成二老。春山同踏落花紛。預訂明春恩山之遊。

贈王文園給諫

浪跡江鄉類隱淪。刀圭試手輒生春。始知白社投閒日。猶是蒼生托命身。康節行窩爭欲設。伯休入市共相親。笑  
他煉汞燒丹者。只自求仙不救人。君籍星後。以醫活人甚多。

皇上八旬聖壽恭紀

虹霓祥光耀大瀛。八旬聖壽際昇平。祥開地久天長節。歡溢山呼嶽拜聲。十奏文多看履錫。七籤笈滿又重更。史  
書翻遍無今比。普集繁禧助慶成。

神功聖德筆難陳。敬在高穹愛在民。壤賦幾回全詔免。郊禋每歲必躬親。縹緗四庫書三校。河海雙堤駕六巡。五  
十五年如一日。固應第祿自天申。

雄圖廣運靖戎蠻。暨訖真看過遍九寰。犁掃久過瀟湘海。冊封新到徽園山。安南山名。見梳榔夜甫連銅柱。楊柳  
春風度玉關。總是恩威協天處。羽干柔遠斧誅頑。

但從御極紀春秋。已過梁唐晉漢周。後五代僅五十四年。上御極年已過之。揮翰尙傳金翅劈。據鞍時馭玉驄游。芝苓不覺天台  
藥。蓬閣遙添海屋籌。信有至人凝命永。共天行健自無休。

二千年內只三朝。三代後。人君年八十者。惟還遜吾皇景運遭。重譯萬方胥象表。一堂五代袞龍袍。屢豐比  
梁武。宋高。元世祖三帝。戶倉箱滿。偃武多年弓矢彙。都是昇平極盛事。璇圖鳩福接天高。

行都先敕綺筵開。嶺北諸王進壽杯。膜拜共尊天可汗。唄音齊頌佛如來。仙韶樂奏班行肅。王會圖成版宇恢。添  
个朱喬新國主。日南花又上林栽。熱河行宮。先宴蒙古諸王。而安南國王阮光平亦適至。

鑾迴絳殿舉鴻儀。多少鸞鸞集玉墀。露醴衢尊千斛酒。香露月桂萬年枝。金銀宮闕仙人島。錦繡江山織女絲。此

景古來曾幾見。有生真幸及昌期。  
豈徒京國祝釐虔。巷舞衢歌遍海堦。  
燈火樓臺城不夜。琉璃世界月將圓。  
軒鑿曲裏長春景。紉縵雲中復旦天。  
見說靈椿八千紀。如今八秩尙初筵。

謁補山制府奉呈

三江行省駐蜺旌。帝爲南邦簡老成。  
令肅百城無墨吏。官高一品尙書生。  
迴瀾力大關風氣。霽月光澄見性情。  
騎竹兒童扶杖叟。何人不識玉壺清。

歎歷崇班廿載長。濟時偉略益恢張。  
路公精力逾年少。韓尉勳名重晚香。  
地步獨爭千仞壁。子孫自有百株桑。  
封疆入相尋常事。要看他年史冊光。

鬚髯纔蒼面渥丹。天人姿稟世驚看。  
望高已共尊三老。才大疑兼用五官。  
餘事作詩還倚馬。殊方著錄有驂鸞。  
范湖帥粵移蜀。著驂鸞錄。故借用之。始知佛說神通現。樓閣華嚴一指彈。

滇徼黔疆忝弟昆。雲泥猶荷念寒溫。  
書來問訊皆親筆。話到存亡有淚痕。  
謂經略傳文忠公。庾信自傷枯樹賦。鄭公還訪浣花村。  
趨承能不心傾盡。半爲勳高半誼敦。

美人風箏

誰家掌上—嬋娟。飛入高空艷影翩。  
風送幾疑天賜女。蘇陵川集。有天賜夫人詩。風吹華氏女。至寧家爲婦。雲遊不作地行仙。  
尙嫌綵索鞦韆短。漫比朱絲傀儡牽。  
月姊星娥應共語。新添好伴絳霄邊。

步虛仙子脫塵鞿。身駕春風上太微。  
一去如飛疑劍女。任吹不動笑環妃。  
月輪近恰爲粧鏡。霞綺鮮仍貼舞衣。  
當日臺城尙煩汝。有闕氏亦解重圍。

天路無梯一線通。冶遊最好趁春融。  
但愁神女來行雨。恰喜封姨肯借風。  
糊上薛箋身絢爛。製成湘竹骨玲瓏。  
雲霄曳履男兒事。偏覺弓鞋會躡空。

嬌姿只合繡幃藏。何事凌虛露靚粧。豈是飛瓊來下界。不煩窺玉上東牆。多情尙繫絲千尺。薄命休嗤紙半張。一片夕陽鴉鵲舞。也如蜂蝶逐衣香。

肉飛煉得幾年。白日昇天謝自然。直上似追奔月女。孤行肯逐馭風仙。方成唾漫驚飛燕。款側魂應化點齋。羅襪無塵香界迥。雲中君本楚騷傳。

五銖衣薄太風流。細骨輕軀稱遠遊。挽住尙煩紅線手。倦飛或墜綠珠樓。尙憐高處寒難忍。直恐仙乎逝不留。恁个風琴傳逸響。珊珊恰作珮聲幽。

### 吳門晤西莊竹汀

握手相看鬢各皤。那禁老子此婆娑。後來良晤知猶幾。海內名流漸不多。世以博聞推敬播。天留微疾養維摩。公一皆有目疾朋簪最羨居相近。同在吳門步履過。

### 澗水

澗河百丈水湯湯。千古南朝詫戰場。空國而來驕必敗。背城能戰弱爲強。枹頭宣武慚勳伐。江左夷吾尙廟堂。贏得淮山閉草木。也同旌旆氣飛揚。

偏安累代保江漳。豈意亡秦出異勳。兵少幾同三戶弱。功多并許八公分。時來稻屐皆英氣。事往兵戈但舊聞。何處遙天聽鶴唳。鶉鴉聲裏曉耕雲。

### 橋公墓

累朝耆舊未流中。想見羣倫仰下風。生有隻雞留戲笑。死猶兩女嫁英雄。識同許劭能評士。名比康成並號公。荒塚已無人腹痛。亂鴉古木夕陽紅。

### 東林寺

柴桑南去訪禪關。典午名藍尙此間。賞菊有杯容入社。刻蓮爲漏記開山。寺逾魯殿千年久。門對匡廬萬仞闌。偏

是耆僧諳故事。殷勤送客虎溪灣。

和錢竹初移新居

精舍頻年構始完。移居人比葛洪看。城無山水堪攜杖。家有林巒值挂冠。別墅王維經一卷。小園庾信竹三竿。知君自寫胸中稿。付與工師築考槃。君遺稿事。

十笏香嚴結淨緣。養閒難得是中年。草堂將寫神司諫。州宅堪誇白樂天。絲竹肉應隨處設。畫詩書總後來傳。家門本占蓬瀛籍。君捨天仙作地仙。令兄文敬公。乙丑殿撰。

上元後三日芷堂過訪草堂次日夢樓亦至皆未有夙約也喜而有作後二首專簡芷堂

鶻噪晴簷信有因。南轅北轍聚茲晨。芷堂自雲間來。夢樓自京口至。相思何止三秋月。不速欣來兩故人。垂白關心惟舊雨。軟紅回首已前塵。草堂纔過收燈後。連夜重開一甕春。

草聖詩魔歷苦甘。夢樓書。芷堂詩。皆必傳也。書生結習故多愁。拾遺有疏留雙鬪。芷堂以言事改宮。彌勒何年共一龕。夢樓長齋事佛已久。天下傳人儻輩幾。林間奇會翰林三。惹他僮僕驚相笑。都是迂疎不急諍。

宮似遊僧早打包。初衣今遂返江郊。胸中大庇千間廡。天上歸來一把茅。空谷蘿牽人補屋。畫梁泥落燕離窠。借他二陸雲間宅。權寄江湖不繫匏。君家蔭光居牡丹。有名浙中。今屋將圯。攜家住雲間書院。

學海茫茫未有涯。何來捷徑指褒斜。曾從館閣親前輩。及見詩文有作家。下筆誰分雌鷺聲。入字。買脂垂寫牡丹花。君歸好振扶輪手。報國文章事正賒。

是日招立菴緘齋同集皆王祝二君京師舊友也立菴有詩次韻

到此無端笑語粗。一堂裾屐總吾徒。人難舊雨聯床再。客與春風到座俱。酒氣白浮杯浪湧。燈光紅占月輪孤。擅場汝士詩先就。壓倒香山老筆枯。

回首春明餞別筵。何期重此泛觥船。連翩冠蓋猶前日。飄蕩江湖已暮年。驛路寄書千里遠。屋梁落月幾回圓。還

期笠屐頻來過。一曲賓雲再集仙。

借立菴艤舟亭看梅小飲次韻

巾屨相隨踏凍來。艤舟亭叩寺門開。出行有伴當攜杖。招飲無題借看梅。老榦過冬猶健骨。早花隔歲已懷胎。憑欄漸覺山池暖。淺綠波痕欲上苔。

壽全惕莊齡使六十

扶桑弧矢耀朝曦。錢閣歡聲頌介眉。共喜木公金母宴。正當浴佛飯僧時。公與夫人生辰。四月八九兩日。在玉杯香滷薔薇露。

金帶圍開芍藥枝。一片廣陵歌舞地。滿城誰不祝蕃禧。

信有人間富貴仙。最繁華處駐旌旃。百年士女春遊地。千里江淮月進錢。最續早同劉晏粟。清心仍酌隱之泉。欲知畫景舒長甚。正是恢台四月天。

有以明人詩文集二百餘種來售余所知者乃不及十之二三深自愧聞見之陋而文人仰屋著書不數百年終歸煙沒古今來如此者何限既悼昔人亦行自嘆也感成四律

擔來卷帙滿軒楹。欲與先生面百城。準擬驚人都有句。誰知點鬼也無名。論符幾費雕鐫苦。元草殊慚鑿賞情。後視今猶今視昔。豈勝俯仰感殘縈。

姓氏爭期著述留。百年難駐況千秋。馬空冀北誰朱汗。豕過遼東盡白頭。辛苦珍裘千集腋。混茫大海一浮漚。遺編不及能言鴨。自把名呼向客舟。

不知曾費幾敲推。無限精靈付劫灰。傳不傳真皆有命。想非想豈盡無才。騙人嘔血奚囊錦。爲爾收魂髻鬢堆。始歎前賢深閱歷。只教痛飲掌中杯。

手握雞毛筆一枝。妄思不朽計原癡。閣麟已欠圖生面。霧豹何曾剩死皮。過眼春華風一陣。到頭暮色雪千絲。卻慚夢醒恆沙劫。已是吟髭撚斷時。

壽松坪前輩七十

館閣清班廿載深。恬懷中歲早抽簪。二分月下清游地。十七科前老翰林。持節才會收鐵網。稱詩人共奉金針。耆英自有長年相。壽骨崢嶸貫頂心。

笠屐園中另一班。茶烟禪榻愛蕭閒。官餘藜火歸猶讀。妻有梅花老不鰥。小部笙歌紅豆曲。名園亭館綠楊灣。關西人占江南樂。千載風流繼對山。

秋帆畢制府遠寄文幣珍裘詩以誌謝

故人高誼足千秋。雙鯉書來道阻修。程芻久安驚續段。綈袍已感況珍裘。杜陵漫想千間廈。溫嶠原居第一流。愧我空傳倚樓號。不來黃鶴一登樓。

一自春明散履基。雲泥從此跡差池。丹黃自勘焚餘草。黑白閒看局外棋。官罷逢人多醉尉。老狂乞食到歌姬。如何寂寞滄江上。尙有郇箋念故知。

岳祠銅爵

桐鄉金德輿得一銅爵口內鑄精忠報國字旁鑄岳珂建造蓋宋阜陵賜卹岳忠武後珂所製祠中祭器也咏者甚多爲賦四律

鄂國祠堂禮器存。土花碧不蝕精魂。壯懷未飲黃龍酒。故物如傳白獸尊。金已鑄身當日痛。岳元聲精忠類編。宋孝宗隆興時。知鑄其像。以金字仍涅背舊時痕。金陀坊裏文孫製。始信忠勳有後昆。

款識摩挲重感傷。英雄豈愛一杯漿。豐功不畫凌烟閣。奇禍翻遭偃月堂。把此定應浮大白。至今空與注流黃。稍欣一樣爐錘力。鐵像摹成跪墓旁。

賜卹曾盛湛露波。知公遺恨尙難磨。獄冤雖已昭三字。家祭終非告兩河。聊抵鼎銘傳世古。何須圭瓚報功多。滄桑劫後金甌碎。剩此殘樽作象犧。

量容不及二升觚。偏有與亡繫故都。服匿兩宮終飲酪。背嵬千騎忍提壺。背嵬。本隨身酒器。公以名其親軍。珍逾武肅傳家券。氣壓宣和博古圖。完璧倘歸祠廟祭。椒馨應更滿西湖。

盧抱經學士以雍正王子補弟子員今歲壬子又見諸生遊庠作重逢入泮詩紀事敬賀四律

六十年前泮水塘。又逢擢秀蔚成行。佛家最重初禪地。老將重經舊戰場。好繼弁山編盛事。王弁洲。有皇已同魯殿歸靈光。阿婆歲晚看新嫁。未免風情憶靚粧。

宮牆重到鬢毛斑。又見新郎出綴班。尙有昔年題字柱。便當古蹟棄繻關。遙知見獵心還壯。可有追風足許攀。恰似六王前定數。周天花甲已循環。

局外人看局內棋。頭巾久作弁髦遺。誰知白首窮經日。還似青衿肄雅時。校字有訛階掃葉。借書無券酒盈瓶。諸生莫漫扳同歲。一一風規是汝師。

見恆河性故依然。迴憶初程發軔年。汲古遂探羣玉府。步虛直到大羅天。榮持籜節爲星使。老曳筇枝作地仙。定滿荀卿三祭酒。看公會到曲江筵。

金陵過前明故宮城

廣衢九軌接城闔。勝國遺規半未湮。流水不瀨金粉氣。故宮已見採樵人。百年史冊殘棋譜。一片江山浩劫塵。老去只貪娛景物。漸無閒淚爲沾巾。

留別子才

清游訪遍大朝基。又向隨園接履綦。卿亦流連中一物。我無文字外相知。延年早入長生籍。謂告存著錄新添本事詩。君方續編莫怪浮屠不三宿。已勝返棹剡溪時。

泊燕子磯遊永濟寺

名藍風景故依然。屋宇無多得勢偏。壁立山疑神斧削。岩栖僧作鳥窠禪。記遊無復前題字。攬勝欣留再到緣。一

樹杪樾舊相識。曾經見我黑頭年。

白頭

白頭何復傍人門。口舌徒爭覆水盆。豈忍伯仁由我死。可憐夢得有親存。綠幢身本危竿試。救劫棋難敗局翻。只有掩關澄水觀。任他塵事日囂喧。

### 七言律五

癸丑元日樹齋大司馬奉使過常舟次話舊賦贈

新歲纔開一葉萸。喜逢畫鶴過郵亭。故人天上班卿月。野老田間候使星。馳傳旌麾催治獄。對牀風雨憶橫經。感公不隔雲泥迹。頭白相看眼倍青。

唐荆川先生讀書處

前賢遺墅綠楊灣。水木清華遠市闌。並世文章無北地。當年聲望比東山。盛名難免求全毀。晚節終看歷試艱。剩有城南讀書處。畫圖一幅好荆關。

高名海內共知聞。卻向林間臥白雲。七子敢聯吟社侶。八編直接選樓文。談兵雄劍鳴鞘內。講易靈狸叩夜分。古語騙人三不朽。累公精力一生勤。

出郊便覺少塵縈。深柳書堂六枳籬。磐石想經垂釣處。清泉仍似在山時。人從黃葉村尋路。壁有紅丸墨寫碑。壁荆川讀書處石刻。係孫文介所書。文介乃爭紅丸案者。今日林皇雖易主。輞川名究屬王維。

白桃花和既堂

一種穠花玉作根。曼殊獨歷衆芳繁。武溪水映春無色。露井風開月有痕。莫是綺衣還入夢。直教紅粉不銷魂。夕陽倩影欣相對。翻愧酡顏醉酒尊。



錯認梨花帶雨嬌。一枝素艷倍天天。映來人面無紅暈。寫出春魂有白描。絕色東鄰顏太潔。淡粧西子粉都消。崔娘枉自誇能醜。不用兼將雪水調。

仙源花正絳天明。十里紅霞獨素英。縱使近朱窗變赤。忍因另色便更名。渡江船上人如玉。息國軍前淚泣瓊。笑比吳娃能白戰。胭脂陣總豎降旌。

曲譜休歌點絳脣。笑他俗艷惹遊塵。月明台洞無尋處。春過羅浮有替身。虢國蛾眉晨淡掃。小憐玉體夜橫陳。劉郎今亦頭如雪。別與流連結淨因。

與邵松阿別幾三十年今夏始至虞山奉訪承招同蘇園公吳竹橋鮑景略諸名流讌集撫今追昔卽席奉呈

車笠論交誼最親。別來常恐見無因。紫薇共直如前日。白首同年尙幾人。隙影難追駒過迹。巢痕空記燕棲塵。相逢未暇離懷訴。先把形容認個真。

七十耆年已舉觥。君今歲七十。胸中五嶽尙崢嶸。未甘身享容容福。或避名呼觸觸生。君名齊熊。故以熊安生事爲戲。風教每持前輩論。文章喜爲後生評。魯靈光殿孤撐在。也算人間一考成。

朋簪招集德星堂。都爲留髡遞勸觴。自是客因叩令重。非關人看子瞻忙。廿年別緒聯牀雨。四海虛名滿鬢霜。略似京華文酒讌。觚稜回首路茫茫。

杭州謁楊莊謹使時由兩淮調任兼理織造

扁舟訪舊浙江潮。又荷旌麾遠出郊。楊柳西湖三月暮。梅花東閣十年交。離懷常托相思草。宦跡原如不繫匏。雅量服公真灑落。不因杯水感堂坳。

白簡星馳挽不迴。風聲小警殿其雷。在揚州以勅奏虧密各留豬嘴關前說。身過狼牙嶺上來。補袞功應光鸞殿。事。亦有小誓。調羹才本擅鹽梅。移官恰占湖山勝。儘許清游把酒杯。豬嘴關。見西陽雜俎。狼牙嶺。見元龜山詩。

夜夢從軍爲賊所執不可不死又不能遽自引決瞿然而悟汗已滿身乃知生平此中未有定力也  
噩夢無端破膽寒。兵氛闖入大槐安。平時每作千秋想。臨事方知一死難。名義重應甘白刃。頭顱痛又覲黃冠。醒  
來始覺吾生幸。生長昇平免據鞍。

長洲蔣立崖明府最愛拙詩。曩曾托杜村中翰具道企慕之意。今遇吾鄉楊充之州牧。又囑代致殷勤。其于  
我可謂癖好矣。自惟齷劣。愧不敢當。而厚意殊可感也。貽之以詩。

有此神交蓋未傾。一人知己足平生。他時不用青蠅弔。此日應先白犬盟。多恐推袁非定論。得毋慕蘭誤虛名。奇  
年久擲吟毫禿。重爲桓譚剔短檠。  
頻煩芳訊致纏綿。想見殷懷愛我偏。賈島豈堪呼作佛。知章竟已許爲仙。近來風氣輕前輩。老去聲名仗後賢。甚  
欲與君傾肺腑。相期虎阜菊花天。

祥符寺樓夜宿

空山一榻借僧寮。秋氣澄空正泐窈。半夜月明鴉鵲警。九天風急斗星搖。詩成枕上催。起。夢滿欄前被佛消。聽  
到曉鐘聲斷處。半窗月影上芭蕉。

夜歸

暮鴉啼散滿林烟。廿里長河夜泛船。風剪非刀能刮水。月輪無轍自行天。溪橋犬吠鳴榔火。野店人喧賣酒錢。棲  
畝餘糧收未盡。歡聲滿路說豐年。

遣興

湖海人豪氣未除。可憐七尺落蓬廬。漸看名姓沉鄒湛。肯數英雄到本初。生也有涯憂不盡。古而無死樂何如。海  
山兜率俱安托。頭白惟餘一卷書。  
戢影菰蒲已廿年。流光冉冉到華顛。簪亭放鶴林和靖。出郭騎鱸孟浩然。死去知無求傳米。生來不乞買山錢。芒

鞋竹杖松枝塵。自作江湖一散仙。  
笠屐江村伴老農。莫嘆身計太疎慵。一生只見罌中粟。舉世爭趨飯後鐘。折坂未登車倒退。遊山正好日高春。始知馬磨卑棲處。少踏人間險幾重。  
夜行更漏已將殘。閱世年深得靜觀。不識字人真快活。但求錢處必艱難。一裘狐自雄衣桁。三韭鮭常富食單。楚相寢邱聊可久。兒童忍使試橈竿。

泊舟金山下宿

孤嶼中流絕四隣。浮空丹碧潔無塵。山憑江洗礪千尺。水與天分月兩輪。梵界真成清淨地。僧窗靜閱往來人。只嫌佛印燒豬事。似爲東坡玉帶珍。

感事

炎風朔雪兩相更。費盡人間幾送迎。鄉忌妻孥工媚語。翟公門巷見交情。尺波將涸魚先散。一骨纔投犬共爭。笑把陳編按時事。層層棋譜在楸枰。

前輩商賈意嚴海。珊袁簡齋諸公詩久已。刊布近年來。盧抱經王西莊錢竹汀考古之書及吳白華趙璞函。顧晴沙蔣心餘張瘦銅王穀原錢韓石王述菴吳穀人詩文亦先後刻成羅列案頭足資欣賞率題四律。插架新編燦列眉。一堂風雅總吾師。臨流欲唱公無渡。及席先愁某在斯。此事不關官大小。斯文真繫世興衰。許燕手筆高岑調。都是開元極盛時。

如此寔區十數人。可憐力已竭爭新。一時尙恐遭揚鱗。他日知誰更積薪。豪傑不歸文苑傳。聰明都用宰官身。故應河嶽英靈氣。不在區區大雅輪。  
論交竊幸及諸賢。酒海花天共擘箋。標榜恥爲前七子。精神各注後千年。鬚眉把卷如重對。風雨聯牀已獨眠。不覺又增存歿感。關河雲樹墓門烟。

汗馬無功且汗牛。又增滄海幾浮漚。縱教後輩能饒舌。敢禁斯人不出頭。已覺通都增紙貴。頗聞賈舶出金求。中華文字難通處。還有人間大九州。

到揚州未堂西。攔松坪既堂春。農慕青連日。邀作近局詩以誌好。

到虞賓筵款近游。又將口腹累揚州。二分明月本無賴。七十老翁何所求。竿木逢場聊戲劇。籃輿扶路亦風流。江鄉此會非容易。館閣晨星七白頭。

王少林舊爲陳玉亭制府屬吏。具述玉亭最愛拙詩。嘗誦余送其出守有市虛何客過廉頗。廷辨惟君是魏其之句。蓋昔與玉亭同值軍機。余爲人中傷被擯。輟直玉亭獨爲不平。故詩中及之。事隔三十餘年。此詩亦已刪卻。不復記憶。因少林轉誦。不覺前塵影事重觸於懷。而玉亭緣事見法老母幼子流落無歸。尤可傷痛。爰補綴舊句。哭之。想少林亦同此感也。

祖道東門句已刪。前塵極觸淚痕斑。豈堪鶴唳華亭後。重憶鷓行鎖闥間。垂死故人傷白髮。未歸新鬼哭青山。生平鮑叔能知我。曾護雞鳴夜度關。

賈豎爭言彼一時。秋風吹落燕巢危。市虛何客過平聲。廉頗廷辨惟君是魏其。今日翻輸三黜幸。何年得釋九原悲。傷心家破身亡後。客裏衰親塞外兒。

都亭當日餞行輶。從此車前擁入騶。才望共傳名父子。官階將繼富民侯。尊人文肅公。官大學士。誰知平步青雲腳。翻送焚香絳帕頭。我是故人君故吏。豈勝話舊涕橫流。

近局將遍計日言旋再疊留別

鄒廚享遍快清游。計日迴帆過潤州。老矣詩難擲甲戰。歸哉富豈執鞭求。柳殘隋苑寒猶折。水落邗江澹不流。預訂明年看花會。又煩春甕倒牀頭。

靜觀

茵溷花分總宿困。求仙學佛枉勞神。誰非死後無名鬼。我已生前有福人。安享昇平將到老。粗完婚嫁不憂貧。流傳他日應增羨。容易書生自在身。

到揚州追悼西巖前輩

蠟屐重經廿四橋。黃爐回首頓魂銷。前遊未久方期續。老輩無多忍便凋。歌袴有思民祭社。傳經無恨子登朝。半年邊作生芻弔。來補橋元酒一澆。

周北張南似比鄰。拈題賡和擘箋頻。江湖歡會幾忘老。風雨高歌覺有神。耿耿孤燈書館夜。萋萋宿草墓門春。十年來往揚州路。哭到先生第五人。金椽亭。白秋齋。吳瀟齋。唐再可。已先下世。

爭名

文士相輕古有之。詞場壁壘各堅持。集偷沈約嗤爲賊。經授遵明不奉師。村女插花偏自好。醜人詬鏡果何私。千秋自有無窮眼。豈用爭名在一時。

側聞

側聞蠻徼暫軍興。籌筆何當効薄能。曳足尙思觀鼓噪。綃頭已自怯車徵。掣鞚漫擬飢鷹起。伏櫪難爲老驥騰。顧影夜深私自嘆。征南刀久血痕凝。

七十自述

不覺駸駸歲月征。觀河童耄暗中更。生當盛代身何幸。老作詩人世已輕。學問就衰那復進。功名非福不能成。祇應飽吃殘年飯。扶杖田間咏太平。青髻歸來到鬢皤。塵緣幻妄漸消磨。世無拘束容聾叟。境有繁華付夢婆。識字讀書千載上。食租衣稅廿年多。較量自古書生命。晝粥燃糠不啻過。

童年回憶舊艱辛。天下無如我最貧。孤露更誰舟贈麥。飢寒長自甌生塵。噎瓜亭是傷心地。踏菜園悲薄命身。最

是饑驅北行日。離懷痛絕倚閭人。

長安索米悵何依。年少江南一布衣。入洛陸機詞賦滿。游秦張祿姓名非。京闈以顧姓應試。壯心有劍雞催舞。浪跡無枝鷓鴣飛。贏得虛聲供嚇鼠。廿三經義一時揮。以五經獲解。

京華初步軟塵紅。移直樞曹地望崇。五夜趨朝雞唱月。九秋出塞馬嘶風。沉沉鎖院聽鈴索。漠漠周陞挽角弓。六載微勞差自慰。西師及見告成功。補中書入直軍機。前後凡六年。時方用兵西陲。

歷歷巢痕記憶真。一時風氣一時人。曾因僂直深嚴地。及事當朝老大臣。門館無私心似水。衣冠有慶物皆春。只今回首平津閣。慚愧曾充座上賓。謂傳文忠。文端二公。汪

寸寸鮎魚上竹竿。生平一第最艱難。不周山下頭曾觸。無定河邊骨欲寒。辛苦醫家三折臂。渺茫仙路九還丹。誰知禿盡中書筆。方得詞人本分官。會試凡六度始中式。

一桂枝高手已攀。臚傳聲裏另排班。雖非五色蓬萊頂。猶占三茅句曲山。千步御街中道出。一條軟繡九衢還。人生此福難消受。老去追思轉汗顏。

頭銜已失冠山鼇。猶忝西清供奉勞。盛世文章臺閣貴。清班官職鳳麟高。奎堂校士春蠶葉。官燭修書秋兔毫。斗食敢嫌飢曼倩。書生榮遇是詞曹。三度分校京闈。一主武鄉。試。修書方略館。凡四年。

單車迢遞赴邊城。出守天南萬里程。正欲拊循為父母。豈知仇直忤公卿。水中見蟹猶生怒。杯底逢蛇得不驚。猶仗御屏題筆在。在京蒙恩記名凡三次。彈章未敢斥歸耕。出守鎮安。以文

滇徵從軍掃劫塵。奉命赴滇從軍征緬。千層瘴嶺踏嶙峋。山深應有藐姑射。路險且隨生女真。時與索倫兵同行。千檄淋漓常脫腕。一刀磨洗不離身。沙場戰死男兒事。多愧今猶作幸人。

歸途重入粵西天。父老紛迎拜馬前。共喜未為兵死鬼。自慚不作肉飛仙。山川劫外無虛警。雞犬村中有晏眠。笑語士民釘未拔。可應戶出拔釘錢。

萬山深處喜民和。不用刑威但撫摩。地遠中原游客少。天連南極老人多。雞豚晚社爭扶醉。士女春墟解唱歌。辜負此邦輿誦好。攀轅千里送關河。移守廣州數月。鎮安民陳洵等。量移東粵理繁艱。首郡叨塵領袖班。謬忝作兄諸弟上。頗難爲婦兩姑間。沉沉曉鼓應官去。落落春旗按部還。一事差償壯游志。羅浮頂看海迴瀾。廣州謝事。作羅浮之遊。

露朝星旌到夜郎。漏天涇雨暑天霜。人來青瑣原仙吏。地入烏蠻是鬼方。黔東爲羅施鬼國。黔西爲羅殿鬼國。臣子敢論官美惡。君王自重治循良。只因慈母當歸字。望斷吳雲萬里長。

三政歸裝一擔輕。白華養母仗躬耕。豈期空谷歸種放。猶荷深宮問賈生。歸田後。蒙恩垂詢者再。仕宦還鄉修孝弟。文章

報國頌昇平。只餘六載循陔處。稍慰烏私一片情。負土營成馬鬣堆。祥琴彈罷選期催。路旁有鬼看先笑。命裏無官病忽來。臂疾竟成將朽木。肘方難起不燃灰。中

流返棹何勝感。風到神山輒引迴。赴京補官。兩臂頓患風痺。自壘兒鞋回舟。

藥餌多年病漸消。回看同輩盡旌旄。胸中五嶽平猶起。頭上千薪積已高。老態豈堪還舞袖。交情難受是綈袍。濟時功業原須早。搔首徒深感二毛。

買得湖干築草堂。踈籬曲檻水中央。誇張有絹千頭擾。防備無衣百本桑。寒士蓋鹽原易足。少年糠覈已粗償。無端失計移城市。貪慕東坡住顧塘。坡公舊寓顧塘橋。遺址尙存。余居與之鄰近。

里居何物可消閒。依舊書生靜掩關。尙有眼光牛背上。不消髀肉馬蹄間。半篝殘火聽譙鼓。一縷名香鼻博山。訂罷史編翻自笑。干卿甚事苦增刪。方輯陳詩叢考。

忽入繁華夢一場。頻年踪跡落維揚。豈應垂老冬烘客。來聽清歌夜度娘。高館論文移座滿。疎燈看弈引杯長。後人倘葺平山誌。莫便疑爲杜牧狂。揚州主安定講席。

烽火遙傳海上洲。故人邀我作闌遊。也因國事來焦額。豈必邊功自出頭。人命死生三寸筆。軍儲贏縮五更籌。誰

知大戟長槍裏。薄有書生一得謀。

臺彎用兵。佐閩督李欽齋幕府一年。

重到揚州設絳幘。論文又作數年淹。蠅頭細字宵燃燭。麈尾清談晝下簾。小住本同吳市乞。久留恐被楚人鉗。故鄉自有佳風月。留待詩人甲乙籤。

流光難挽魯陽戈。漸欲經營安樂窩。異我偕行惟竹丈。非人不暖有湯婆。詩傳誰復將絲繡。身老何堪與墨磨。回首壯年豪俠處。曾衝鼻息拂星河。

已是禪堂退院師。曼卿意氣尙酣嬉。聞中調語談天口。老去雄心弔古詩。留客且爲無事飲。對花還作有情痴。箴之樂死從今定。濕哭乾啼總不知。

踏遍歧途識淨因。塵勞總誤百年身。無官豈必皆高士。有福何須作貴人。莊叟老爲齊物論。堯夫生是太平民。瓦盆小酌茅簷曝。領略羲皇一片淳。

昇平郊藪鳳麟游。無限英才要出頭。詞賦動誇今李杜。山林并少假巢由。衰殘敢自居耆宿。宏獎翻愁誤俊流。聊與擴開新眼界。梯枕更上一層樓。

少年意氣慕千秋。擬作人間第一流。豈意壯懷三不朽。終成老物四宜休。隙駒虛擲分陰過。皮豹徒憑一卷留。若果輪迴有來世。誓從髻鬢便勤修。

春農同年挽詞

秘省抽毫麗綺霞。遂初中歲別東華。江湖盟長諸名士。碑版文推一作家。噉啗壯懷燈下酒。嚮騰老眼霧中花。白頭同譜今餘幾。腸斷當年共草麻。

竹初用導引之術面有少容蓋已學道有得矣戲贈

英雄歲晚例修真。一寸丹田守谷神。古有長生今亦鬼。天如可上地無人。煉形未必逃蟬蛻。導氣聊堪作鳥伸。君是錢鏗老孫子。故應多閱幾紅塵。



近日刻詩集者又十數家翻閱之餘戲題一律

只爲名心銑肺肝，紛紛梨棗競雕刊。豈知同在恆沙數，誰獨能迴大海瀾。後代時逾前代久，今人傳比古人難。如何三寸雞毛筆，便作擎天柱地看。

聞湖南苗首就誅軍事告蕝詩以誌喜

露布遙傳定百蠻，五溪烽火報平安。生來盤瓠原殊族，初起車巴尙畏官。持重徒勞穿土室，成功終藉戰臯闌。始知用武承平世，儒將非難勇將難。

千里荆襄尙盜區，繡衣持斧未全誅。好移虎帳平蠻卒，來掃蟲沙伏莽徒。鬼道不靈蠲米賊，兒啼可怖避麻胡。待看蕩洗兵氛淨，依舊耕桑遍兩湖。時湖北叛匪尙未平。逆苗既誅。可移兵併力掃除也。

汪屏周宅喜晤畫士張玉川昔年同客文端師邸第者也二君今皆八十餘余亦七十一矣握手道故欣感交集兼寄時齋副憲

四十年前踏軟塵，春明邸舍記靈椿。邸在椿樹街。那知晚歲無同輩，猶剩貧交幾故人。白首朋簪聯近局，青燈賓館憶平津。稍欣東閣郎君貴，應亦相關念昔因。時齋弱冠時。常共談燕。

題齋生徐州勘災散賑詩卷

勘遍災黎灑淚枯，歸來詩卷帶泥塗。萬家感泣鮮干路，一幅流亡鄭俠圖。死已隨波作魚鼈，生猶栖水似鷗鷺。可憐饑溺相關處，一個儒官抱牘呼。

題曾賓谷運使邗上題襟集

稊飲紅橋事久無，使君重把雅輪扶。詩聯陳起江湖集，句入張爲主客圖。人本玉堂工授簡，官閒鈴閣愛投壺。劇憐我昔揚州住，旅館清吟與太孤。

闕明史有感於流賊事

萑苻何意蔓難圖。初起潢池本易俘。賊不殺官猶畏法。兵無戰將孰捐軀。師行共指軒中鶴。寇去方追幕上烏。歷歷前朝陳迹在。是誰專閫握軍符。

百年安堵享昇平。誰肯輕生整亂萌。死有餘辜貪吏害。鋌而走險小人情。彈丸黑子皆紛起。繩伎紅娘亦橫行。好片桑麻繁庶地。烽烟千里廢春耕。

懷塞外友人

五馬相隨似弟兄。別來喜聽建牙尊。豈期蜚語傳金穴。竟掛彈章出玉門。援廣難施修月斧。譴深長戴望天盆。可憐昨歲猶書到。念我江南黃葉村。

追悼補山使相

萑苻纔起將星亡。丹旆飄飄出蜀疆。嗣祖焉知非是福。李流今已漸爭強。九原氣作山河壯。五等勳封帶礪長。此贏得口碑遺翰在。公存不至賊披猖。

石稜眼焰戟鋒鬚。節鉞威名攝萬夫。帝謂魏徵偏嫵媚。人知呂相不糊塗。開邊倖亦書生膽。按部聲先墨吏誅。今日平心論人物。封疆籌略似公無。

書感

從戎曾問日南琛。中土何期起綠林。敢幸退閒身不與。自傷衰老力難任。江湖憂國迂何補。戰伐稽時禍恐深。只有天心終厭亂。會消妖孽豁重陰。

再哭偉兒

紙錢焚與作冥賓。知到閻羅第幾司。汝去決非爲賤鬼。我來翻幸有親兒。生前小膽多驚恐。死後孤魂孰護持。見子臺空聊假寐。夜深或有夢來時。

聞秦蜀兵夾勦流賊奏捷喜賦

軍報傳來野老家。喜聞秦捷出褒斜。固知賊尙非張角。從此軍應復呂嘉。腹背夾攻竊穴鼠。尾頭雙捲運常蛇。由來討逆須威克。持重徒延歲月賒。屈指軍興歲一巡。寇氛流毒遍村鄰。醉人味似糟豬肉。殤鬼魂爲野馬塵。復矢幾家招故壘。亂骸何處認前身。而今絕似償冤報。賊寨啾啾哭碧燐。

答子才見寄之作

仙有馳輪佛有航。書生失計落詞場。死生於世何輕重。詩卷憑人說短長。曾未上書青鎖闥。也無殺賊綠沉槍。如何結習猶癡甚。徒詫文章萬丈光。

顧晴沙輓詩

同向江天把釣竿。扁舟來往最交歡。會爲才子先登第。要作高人早去官。遺愛尙留秦蜀道。吟清欲闋杜韓壇。若

另成一那堪纜寄詩筒去。不及燈前一拆看。詩塚篇。纜付夜航船寄家。是日卽聞君訃。

省署簪毫出建牙。我歸君亦卽還家。君歸田。後居鄉月且持清議。奉母晨昏誦白華。藻思捷如驚蛟螭。草書工過壓蝦蟆。誰知手選梁溪集。自殷羣賢押後車。君選梁溪詩集。甫刻成。

秋帆制府挽詩

初聞未疾因災限。誰料騎箕碧落遊。牟祐惠猶留峴首。馬援功未竟壺頭。風淒列帳悲笳曲。月冷簞邊古驛樓。太息荆巫尙烽火。益無人可倚軍謀。

兩湖節制擁高牙。俄值兵氛亂似麻。劫火炎岡無玉石。殺機起陸有龍蛇。蠻箋夜草招降檄。里鼓晨催轉餉車。辛苦頻年戎馬地。故應鬚鬢總霜華。

封疆歎歷廿餘年。重是初階出木天。死定仍爲香案吏。生曾獨領玉堂仙。共推雅量休休大。不藉威名赫赫傳。此後孤寒更誰倚。龍門回首總悽然。

踪跡雖疎意自親。江湖每荷寄書頻。虛煩爲我高懸榻。不及從公醉吐茵。南國烽烟悲遠道。東山絲竹渺前塵。不堪重過靈巖館。剩有羊曇淚滿巾。去春遊公靈巖別墅。

再題懷杜閣

杜公遊跡久成塵。偶檢遺篇指昔因。聊欲峴碑吟過客。敢爲左傳作功臣。騷壇喜試凌虛步。幕府能扶大雅輪。從此虎邱增故事。山塘兼占浣花春。

公相阿文成公挽詩

黃髮番番映殿墀。秋風俄報飾巾期。望兼勲德裴中立。身繫安危郭子儀。百戰功名圖像早。九重恩禮乞骸遲。老成殂謝何勝感。不但全曇吳故知。

汗馬歸來錫命榮。簪頒圭組位鈞衡。周官已極三公貴。魯論猶餘半部精。行酒從容人避席。聽歌慷慨客彈箏。生平論相推姚宋。不敢輕言秉國成。

烽火無端楚蜀疆。共期元老奮鷹揚。年高不復臨軍旅。身在猶能重廟堂。華袞易名公論定。豐碑賜葬國恩長。祇應一事還留憾。未見荆巫靖陸梁。

曳履星辰地最尊。敢將疏賤說交親。曾經戎馬同甘苦。頻向江湖念隱淪。每見余族孫味辛中。必問余近狀。相業已歸青史傳。軍諮今亦白頭人。此生無復西州過。遙憶平津淚滿巾。

子才昔年預索輓詩竟無恙。今以腹疾就醫揚州。又索生輓戲再作以遲其行。

昔年索輓卻仍留。再爲先生賦遠遊。生有自來從萬里。君自言前身點蒼山老猿。死無遺恨占千秋。門前贊井收粧閣。晚并多女

弟子。海內詩皆入選。採詩人詩作詩話。只恐替人難覓得。驪駒歌罷又停騶。不早休官也列卿。超然湖海結鷗盟。烟花享盡人清福。詩卷遙收世大名。不古不今成一則。非仙非佛自孤行。未須便辨迎筇鶴。天向留君賦鹿鳴。明年戊午科鄉試。君重屈鹿鳴筵矣。

鈔關門放舟至高旻寺訪鑑公練塘

尋僧聞喚槩牙開。正值秋成稻滿堆。近路仍遙緣岸曲。順流忽逆爲潮來。疎林霜薄纔黃葉。淺渚沙明少綠苔。一笑到門剛過午。闍黎鐘已放齋回。

閩邸抄賊至利川邑令尹英圖約鄰邑周景福糾集鄉勇截殺數千大獲全勝喜賦

邸報傳來信已真。利川江上破黃巾。能糾義旅同殲賊。自是清官素得民。白挺不須矛戟銳。丹楓都變幟旗新。早聞聖主酬功速。選科。編租異命申。縣令皆擢郡守。邑民蠲租三年。

衝鋒破陣總鄉農。拋卻鋤犂學挽弓。皮蹴毬空稱練士。毛葫蘆轉遣隨戎。勒成部伍如軍令。戰死沙場亦鬼雄。都是國家培養出。同讐敵愾到兒童。

經年羽檄促征驂。只望雄師虎穴探。絕塞徵兵挑甲卒。深山轉餉揀丁男。朝家錢幣糜千萬。幕府金貂賜再三。今日戰功堪載筆。翻輸吏健土軍慙。

芸浦中丞移節閩疆不數月復奉命來撫江南吳民歡聲載道爰紀以詩卽贈

絳節移閩暫駐驂。吳儂翹首正依依。重來天果從人願。小別公如作客歸。民慶二鋪長有托。吏遵六計未全違。福星合在江南照。那許他邦久借暉。

來往郵籤兩月期。故園頻喜駐旌麾。似償少日題橋柱。惜未炎天啖荔支。仲秋到閩。冬卽調任。孟三節還鄉豪傑事。一年借寇吏民思。向隅獨有閩人嘆。不得留公見設施。

仙霞高嶺劍州灘。回首今辭行路難。人指江南爲福地。帝知吳下憶清官。兵氣路遠民安堵。犒事年豐戶飽餐。早識隨輪膏澤到。下車時正雪花團。自七月不雨。公到任日。乃大雪五寸。

素食招夢樓佩香小集寓齋

客中破寂賴吟朋。小治伊蒲餼尙能。雅集不妨粧閨女。枯禪俱已在家僧。座無何肉清如水。室有唐花暖未冰。便

抵吳門蔡經宅。麻姑親降寵難勝。

不是持齋學太常。劉輿賦恐汚清芳。得邀霞帔來仙界。敢溷天花散道場。春茗烹當重醞酒。臘梅開作辟寒香。留賓莫笑無葷血。此亦詩家白戰方。

揚州遇陸朗夫中丞子文嗣感賦

士龍子弟見無因。忽遇饑驅邗水濱。廉吏可為兒作客。故人已死鬼成神。湖南人傳公為全省城隍神。亦云。黃之謝薊泉侍御。西華冬服猶披葛。南國春祠共薦蘋。聞道靈旗移故土。貽麻倘救後人貧。蘇州人傳公調江南城隍。王夢樓云。

袁子才輓詩

索輓連番竟不行。此番真是送登程。死應仍去為猿嘯。生不留看賦鹿鳴。花月千場供老福。詩文一代享高名。只愁未免風流罪。欲為緝經度化城。

三家旗鼓各相當。十載何堪兩告亡。謂君與蔣心餘。今日倚樓唯我在。他時傳世究誰長。本非邢尹生相妬。縱到彭聃死亦殤。衰朽只悲同調盡。獨搔白首覽蒼茫。

王西莊光祿輓詩

歲在龍蛇識可驚。儒林果失鄭康成。宦情淡有千秋業。文望高於一甲名。公甲戌榜眼。白首叢編成又改。青燈老眼暨重明。雙瞽後從今學海誰津導。我哭先生為後生。

束髮攻書到老翁。未曾一日輟研窮。遍搜漢末遺文碎。公最精鄭學。不闕虞初小說工。後輩豈知真學問。幾時再有此淹通。存亡莫道無關係。直在蒼茫氣數中。

風趣長康半點癡。牙籌不諱手親持。出門誤認儀同宅。築室遙催錄事貲。皇甫三都求作序。李邕四裔乞書碑。即論致富惟文字。前輩高風亦可思。

至蘇州瘦銅子孝彥來見依然有作

葛坡相看淚滿衣。貧官門戶已全非。僅餘我作青蠅耳。猶憶君歡畫鷁飛。余此鎮安任。過蘇州。君命舟載遊石湖。身去空留詩句好。命窮直到子孫微。一驂脫贈終何補。慚愧論交共瘠肥。

杭州晤同年謝蘊山藩伯

汾晉移旌僅一年。重來浙土奏旬宣。帝期東海長無警。公與西湖夙有緣。杭越總歸千厦庇。白蘇僅以兩堤傳。早聞力挽頽風處。先凜冰霜素節堅。退衙無事擁牙籤。補史亭前畫下簾。不擇地知文思湧。無堅城爲筆鋒銛。名高應並湖山久。才大何妨嘯詠兼。勳業文章都佔盡。使君毋乃取傷廉。

晤同年馮星石鴻臚

瓊林同赴日初寅。彈指幾將四十春。福地湖山歸養日。戲場袍笏倦遊人。一編自訂眉山集。君手註蘇詩。七年告成。五散猶懸魏闕身。榜下未交林下見。相從那不白頭新。

蘊山招同星石湖舫遊讌

青雲同榜幾人存。三老相逢意倍敦。畫舫烟波人在鏡。行廚櫻筍客開樽。湖山謝傅圍棋墅。松檜馮家大樹村。慚愧遊春煩地主。旌麾遠出湧金門。

四月廿二日鎮江看都天會因雨阻改期訪王夢樓出家伎奏樂即席二首

神會傳聞麗羽旄。我來恰值雨蕭騷。不逢蠶市千層幻。翻聽霓裳一曲高。軟腳敢煩開近局。遨頭不枉泛輕舸。看他十六天魔舞。已賽靈風颭鷺翱。

會探若木泛東溟。君會隨冊使封琉球。五馬歸來謝絨簪。聞以聰明修淨業。老憑歌舞耗雄心。君奉佛已廿餘年。一堂璆管遊仙曲。四海苞苴賣字金。君以書名海內。臨汝亡來誰作達。謂袁簡讓君遊戲闌風岑。

佩香女史聞余至枉惠珍饌侑以佳章次韻奉謝

訪舊江干泊野航。美人珍贈意何長。揮毫好句明珠顆。出水鮮鱗白玉肪。毛女得仙原不老。髮僧出定倘能狂。何當改作清娛婢。常侍瑤臺禮佛香。

佩香疊韻來索和再次奉答

又勞題句送吳航。正值遊街軟繡長。廿五日出神會。綵仗迎神排鴈字。珍廚款客截鵝肪。是日茅款亭學士。何人閒劍亭秀次先後招飲。競作逢場戲。吾老聊隨舉國狂。只有清吟校書女。閉門獨對一爐香。

慶晴村爲尹文端師第五子舊與余同學自都門別後不相見者三十餘年矣今以將軍來鎮江甯握手道

故敬呈三律

昔日郎君今重臣。卅年相見倍情親。依然東郡趨庭處。來作南邦坐鎮人。文端師節制兩江時。君尙隨侍。叔子風流裘帶緩。臨

淮精采幟旗新。金陵父老欣相語。風貌猶傳故相真。何處江南非舊遊。清陰滿眼召棠留。卽看今日施行馬。猶爲先人閣喘牛。老輩尙稱佳子弟。世家已復舊公侯。遙知不繫舟邊過。慨想前微有淚流。不繫舟。文端節制署中園名。

聯吟可惜失隨園。袁子才嘗出入文端幕。與君最密。同學今惟兩弟兄。君喜有朋來自遠。我漸無佛易稱尊。六朝陳跡才人筆。一品崇班上將門。從此郵筒來往便。莫辭好句寄江村。

昔歲曾與偉兒同登山扁舟重過依然有作

會攜愛子捫烟蘿。今日重來感慨多。落日壯心千里目。秋風老淚百年歌。空留名姓題會到。只有江山互不磨。從此妙高臺上路。芒鞋何忍再經過。

揚州哭澂楚編修

纔是春筵筮治庖。忽傳噩耗到江郊。十年混跡繁華地。一個知心冷淡交。論事胸猶森五岳。著書夢久玩三爻。側聞去路分明甚。容罷更衣便打包。



藜火精勤校石渠。蓬山仙籍拜新除。君成進士後。以總校四庫書。特賜翰林。得償天上難成願。遍覽人間未見書。已徙新居三徑外。居。歲遷。漸凋先業二毛初。我來剩有披帷哭。誰更論文一起予。

### 哭祝正堂侍御

哀音來自海東偏。目斷吳淞黯暮烟。自古高才無厚福。況能早達又長年。賈生去國爲遷客。李洞尊師奉浪仙。老我門牆更誰倚。非關荒卻一莊田。

綺歲登瀛氣吐虹。共占王掾黑頭公。五更祕閣青藜火。萬里征輶繡旆風。仗馬一鳴辭曉闕。塞鴻孤唳落寒空。書

生只合文章進。何事輕乘御史廳。君以封事罷官。

講席寥寥海一隅。聊同祠祿養閒儒。巢低尙恐遭鳩奪。轍涸憑誰救鮒枯。往日聲華輕令僕。老來衣食傍江湖。更憐旅殯華亭館。知復何時返故區。

同在江天履跡清。歲時一晤倍關情。中郎書擬歸王祭。永叔文先弔曼卿。賴有麥舟分贖厚。費中丞致厚贖。稍欣梨板刻詩成。所著悅親錄。今夏刻成。老來哭盡諸前輩。又向人間哭後生。

### 時齋副憲子紱林已得恩廕南歸省墓枉道過存話舊感賦

荷衣出拜記垂髫。頭角今看鳳有苞。歐棊十年南浦別。甲辰歲。余與時齋別於茲花浦。今已十五年。昌黎三世北平交。賞延任子欣

傳笏。債避無臺出打包。慚愧前人指困誼。芥舟水淺感堂坳。因君歷歷話京塵。重憶當年絳帳親。文端師。愛士殷懷廉孟子。論文正派趙周臣。諸秉文。字周臣。舊遊歲久看成古。夏晤緣稀見倍親。回首師門何限淚。生平思誼荷平津。

## 七言律六

己未元旦

飲罷餘酥最後觴。履端復此慶農祥。觀書眼暗情猶戀。思子臺空痛未忘。老閱年光如愈駛。閒無日課轉尋忙。青紅省記兒童事。七十年前上學堂。

大行太上皇帝升遐恭輓四章

幾年寒積雪嵯峨。去歲大雪。龍馭俄傳上絳河。壽到耄期千古少。功兼創守一身多。人悲送佛歸靈竺。天爲迎賓掃大羅。六十餘年恩澤溥。那禁薄海淚滂沱。

聖德神功邁百王。內綏區宇外開疆。直無一事留餘憾。惟有千秋頌不忘。治媿勳華金大定。金世宗紀。人政嚴綜核。漢元康。郵隆不侈云亭禪。彌見持盈有道長。稱小堯舜。

宮開德壽晚延暉。預簡元良授萬幾。付託得人堪脫屣。昇平繼體正垂衣。納從舜麓艱先試。見有堯羹色豈違。陟降在天應大慰。紹庭一樣切民依。

忝竊朝簪二十年。入供館閣出籌邊。每叨除授皆親筆。京察記名。出守兩粵。從軍廣南。權費西道。皆出特旨。歸免饑寒尙俸錢。搏頰有哀頻搶地。攀髯無路但號天。也知草莽悲何益。回首觚稜淚自漣。

感事

相星忽報坼中臺。恩寵由來是禍胎。共識都盧橦最險。不虞霹靂斧真來。姓名久屬千夫指。氣餒俄消一寸灰。老去香山感時事。龍門詩豈幸人災。

梁家朱异漢江充。都在英君罵馭中。只鬻可供驅使便。誰知已竊笑噸工。九天咳唾風雲變。四海苞苴杼軸空。好個家居幾撞壞。豈容還作黑頭公。

聞道鈴山簿錄時。世間無此種高貲。窖金已錮藏舟壑。井鈿兼裝激溜池。豈憶出身從委巷。依然空手赴冥司。可憐臨死猶疑甚。又想黃樓五丈旗。井鈿。見新唐書王錄傳。

秋風賓客孟嘗門。頃刻炎涼寫頓翻。往日肉糞趨螞蟻。祇今樹倒散糊蘇。尙憂瓜蔓抄將及。轉恐冰山倚有壞。太

惠沙堤高閣裏。一時多少未招魂。

邸抄

九霄默運斗杓旋。第一先收佞倖權。龍袞班高將極品。雞棲樹老已多年。灰釘敢效疊臣乞。帷蓋猶蒙聖主憐。從此百僚咸動色。要津誰復敢夤緣。

詔下人人感涕流。同民好惡見皇猷。芻蕘博採千官疏。花萼相輝百尺樹。黃髮召歸龍尾道。翠雲焚卻雉頭裘。由來乙夜觀今古。總作璇樞布政優。

連日大僚多暴亡。相傳爲失奧援懼株累也。口語無稽書以一笑。

鈴閣俄聞蒿里聲。馬肝共說食文成。一抔土縱堪逃禍。萬口碑終不徇情。豈比遊仙雲鳥去。剩攜使鬼紙錢行。只憐自古誰無死。偏與人傳破膽驚。

兩村書中謂督學廣東時。余子以拙刻贊謁厚。臆而去。僕初未有子入粵也。蓋他人假名干謁耳。書以一笑。一紙書來事大奇。老夫被販不會知。是誰甘謂他人父。願我從無外舍兒。表丈不妨聊暫借。見唐據言李播事。故人且免

去窮追。見葉石林雜書楊衡事。玉瀾只慚畫餅名何用。未足供渠干謁資。

擬老杜諸將之作

西南蛇豕尙縱橫。假擾遙傳遍列城。民被賊驅多作賊。將嫌兵少屢增兵。風腥滿路尸陀氣。月黑千山杜宇聲。率土清甯秦蜀擾。蒼茫天意迥難明。

萑苻未掃一年遲。特起蒼頭又幾支。奔迸人皆牛穀鯨。飛揚賊有虎狼脂。中名女賊。徵兵空歷重關險。駐旅曾無一矢遺。總爲修羅能障日。遷延釀禍至今貽。

盛世何因發殺機。追原禍始定誰歸。時平宦橐窮民力。亂起兵塵費國威。尙倖脫身逃鼎鑊。可應填腹飽珠璣。如何明詔教彈劾。不見封章到瑣闈。

露布頻聞奏捷書。揭竿隳突益焚如。城空官已同旂贅。賊過兵皆拾唾餘。風鶴警來惟早避。暮鳥啼處且安居。也知草竊成何事。只是何人去勦除。

兵聞拙速久難工。初起潢池易掃空。將略誰防滋蔓後。軍儲徒耗養灘中。頻年坐甲芒俱頓。今日需糧力漸窮。那不令人思賈鄧。專征出每早成功。

益州沃野錦成堆。今日川原半草萊。刮地搜殘深窖粟。連營炊散盡梁灰。焦頭救已愁災熾。生齒繁應有叔來。好片平疇荒不種。清泉瀉瀉漫蒼苔。

堅壘深溝各保家。村村團結拒車巴。匹夫倡義皆肝膽。衆志成城亦爪牙。獷鹵莫噴包胥道。驍雄或有郭蝦蟆。見史。皆鄉民起義者。勇於公戰非私鬪。獎勵還應式怒蛙。

早數解澤散妖氛。梟獍何知竟罔聞。祝網已開生路走。死灰偏熾燎原焚。紆遲充國屯田議。辛苦相如諭蜀文。不勦斷無招撫法。亟須一挫犬羊羣。

喜聞勁旅發三韓。新調黑龍江兵。從此軍應確草菅。萬騎無聲秋入塞。千盤有路曉搜山。烟騰列甕連天熱。風勁雕弓滿月彎。早晚綠林俱掃迹。歡聲茄鼓唱刀環。

三十餘年臥故林。何期戎馬動愁吟。無才徒作憂時語。未死終懸報國心。烽火何時停戰伐。江山依舊好登臨。老來光景無多日。要聽銷兵大凱音。

蔣時南中丞致政後特詔起總督漕運淮壘相晤敬賦奉呈末章兼寄費芸浦制府二公皆余門下士也。款歷巖疆宿望崇。引年人更仰高風。帝因轉粟煩劉晏。人比懸車起路公。威令早行升兪減。苦心仍濟舳艫窮。一

封愷切論漕政。共識儒臣體國忠。

致政歸田鬢已絲。何當重作出山時。老求身退偏難退。清畏人知已共知。薊闕陳情詞懇款。秦關回首路逶遲。祇應天假頁緣便。白首師生再見期。

桃李門牆樹蔭叨。三江節度八州漕。射堂演武森千騎。畫簿催綱押萬艘。愧比王通羅將相。敢誇裴皞識英豪。一莊兩督增光處。不在官高在品高。

### 新豐道中

過江風峭片帆輕。沽酒新豐又半程。高岸土留開鑿迹。獨輪車碾轉轆聲。餘糧棲畝鴉猶啄。疎雨膏田犢已耕。向晚市橋燈火滿。郵籤早到呂蒙城。

### 華墅

近遊百里覽郊原。柔櫓來過華墅村。山勢不高猶翠色。江流雖近少潮痕。朽株葉借籐牽蔓。崩岸泥懸樹絡根。東去相傳多古蹟。暨陽城控海爲門。

### 重過靈巖山館

靈巖山館好菟裘。老友重過淚暗流。嗣祖早亡猶是福。武安若在恐難留。春風亭榭花誰看。落日林巒鳥自投。終是生平風雅報。及身得免喚朱游。漢書蕭望之傳。

旌麾三楚鎮雄繁。預擬歸開北海樽。得地猶依採香徑。籍官幸免奉誠園。會心魚鳥應餘慨。過眼雲烟尙有痕。太息平泉空作記。不曾終老此邱樊。

### 葺屋

老屋多年滿壁塵。一番補葺稍從新。愧無北海樽盈座。幸有東坡宅作鄰。東坡舊寓孫氏宅。距余舍數十步。水閣自明無月夜。後有水閣。山茶獨占滿城春。山茶一株。大合。爲當城第一。三間馬磨誰還記。閒與兒孫說舊貧。臨白雲渡。

### 蔣瑩溪別駕館愛妾於揚州過江來寓戲贈

滿天風雨渡江來。軟腳筵從別館開。難得美人分鏡待。正當侍婢賣珠迴。冶遊喜有藏嬌屋。僑寓兼爲避債臺。亟與綢繆消別恨。莫教擁髻夜啼哀。

金子友來乞楹帖其家住太平寺旁門臨大池余爲書烏宿池邊樹僧敲月下門一聯適有尼庵亦來乞桃符僮奴不知卽以此付之一時見者傳爲笑資賦此懺解

一聯悞到散花居。掩口胡盧遍里閭。豈敢戲留題鳳字。或疑錯寫弄鸞書。翻經香盎重簾靜。繡佛燈搖四壁虛。亟與阿師勤懺悔。手抄梵筴鎮精廬。

洪稚存編修以言事遣戍伊犁蒙恩赦回誌喜

九死投荒得賜環。德音一道萬人歡。遄歸不待烏頭白。起廢行遷鶴頂丹。令甲二品以上。冠紅珊瑚頂。骨鍊冰霜逾勁節。詩

添沙漠有奇觀。直聲已震難回枉。成就先生作好官。

劉檀橋編修六十壽詩

官職聲名兩並全。少登館閣老歸田。風情鍾乳三千兩。聲伎銀箏十五絃。投轄陳遵無晝夜。吹笙子晉本神仙。行年六十稱觴樂。已勝他人百廿年。

稚存歸里賦贈

已分長流萬里程。豈期絕徼得歸耕。命逃柴市歐刀血。夢應天山老樹精。君幼時。屢夢至萬松林。今過天。山。千里皆松。恍如夢中所見。士例嘗遷客味。聖朝不忌直臣名。賜環應捧恩綸泣。不待三年召賈生。

生平豪氣隘寰區。事不驚人大丈夫。出塞始知天地大。題詩多勦古今無。單車風雪孤征路。絕徼山川百戰圖。不敢慰君兒女語。昔人晚節倍艱劬。

讀史

歷歷興衰史冊陳。古方今病轍相循。時當暇豫誰憂國。事到艱難已乏人。九仞山纔傾簣土。一杯水豈救車薪。書生把卷偏多感。剪燭徬徨到嚮晨。

水淺岷觴本易堙。涓涓不絕遂齋淪。孝經豈果驅狂賊。王法何能懼亂民。牛喫牡丹同百草。蟻擊粒米過千鈞。眼

前看是澗池弄。恐費他時爛額人。  
頗聞臺省尙委蛇。風議爭嗤恤緯。謝傳圍棋雖故事。曹參醇酒是何時。瘍醫誤已癰疽潰。肉食謀仍燕雀嬉。一笑江村杜陵老。三重茅底獨憂思。

閒居效放翁體

卻老空聞服玉方。暗中不覺漸頹唐。兼金安得買酣睡。上藥不能醫健忘。邀客尋花消日永。呼僮說鬼遣宵長。愛閒偏是閒難耐。始悟英雄種菜忙。

哭邵松阿

省垣好友一松阿。盡共清游夜共歌。如此忘形交有幾。翻悲歸老見無多。余兩人先後歸田。一晤君於杭州。一訪君於虞山。虛期深谷看紅葉。今年預約同看。尙憶荒園踏綠莎。君在京。寓錢天羽寄園。與余比鄰。剩我白頭無藉在。寢門那禁淚滂沱。

獨立

青韶又閱一年春。死盡交游剩此身。地下轉多相識友。世間暗換一班人。漫將衰鈍稱前輩。誰與從容話昔因。獨立縱然能不懼。蒼茫四顧亦傷神。

驛柳詩和蔣立庵

驛邊垂柳曩風輕。萬縷千絲罨路程。露輞暫停應繫馬。戍樓相傍好聽鶯。蕭疎幾閱人來往。飄颺如隨吏送迎。埃館青葱堪入畫。輪蹄喧處有餘清。

臨風披拂最長條。似掃塵沙待客輶。記里標爲樊圍界。贈行折當灞陵橋。桓公北去悲華髮。陶穀南來狎細腰。何處靈和誇得地。江程尤易動魂銷。

幾家新綠映鞦韆。獨向郵塘買野烟。館客快當千步幘。廐奴軟借一條鞭。三眠倦識征途苦。十里行逢密蔭圓。欲爲高柯徵故實。滁州古驛至今傳。滁州大柳驛。爲趙曾授徒處。

莫嗤弱質望秋零。垆野風塵已飽經。排列也同雙隻塚。清涼爭憩短長亭。寄梅人去青連隴。籥筆窗開綠滿庭。不比章臺惹攀折。春風愁煞小娉婷。

曾入詞人賦。擅場營名細柳館。長楊。豈知得姓從天上。翻使攀條感道旁。滾滾絮粘泥路雨。垂垂絲瘦板橋霜。可憐老剩空腔在。徒與騁人作馬枋。

館垣淺不蔽車輪。有苑能令景色新。鋪白氈如迎貴客。舒青眼豈慰勞人。肯隨鸞駝同行路。猶爲歌驪縮去塵。生性纏綿本情種。故應獨占渡江春。

檀橋席上賦紅牡丹

姚黃魏紫已稱妍。高格還應讓絳仙。著到緋袍原富貴。映來紅袖倍嬋娟。寫生尙覺胭脂淡。吐豔偏爭靨靨鮮。莫惜倚闌留玩久。餘光猶謝晚霞天。

雜存謂古來牡丹詩少有作正面文字者戲成四首索和

何處東風麗景繁。天三花朵歷名園。大家氣象無寒態。本色胭脂有醉痕。一捻嬌含晨露濕。千層豔燭午風溫。生來性格原驕貴。肯向風塵漫托根。

庭前羯鼓漫相催。要費陽和氣力培。采石仙人宮錦坐。太原公子褐裘來。圓供正看兼翫看。豔愛全開勝半開。最是香魂奇幻處。有時結撰出重臺。

輕寒輕暖幾番過。釀出花天散曼陀。國色更無同輩比。春華獨占十分多。光能浮動神如活。香帶甜肥氣最和。豔賞不須憑酒醉。但看映面已微酡。

膩粉濃丹發豔光。花頭端重不輕狂。自令芍藥甘爲婢。應與芝蘭並號王。曾記帶酥豪士送。未容插鬢笑人粧。腐儒愛惜中人產。也對深叢一舉觴。

水閣看夜船燈火



白雲渡口水明樓。看盡城中夜舫游。燈火頓成星海沸。亭臺都在月宮浮。三更歌管猶呼酒。兩岸簾櫳不下鈎。贏得老夫憑檻坐。聽人錯喚作遨頭。

### 莫愁湖

一片風漪望渺茫。湖名猶借美人香。始憐百尺胭脂井。不及雙棲玳瑁梁。異代別歸湯沐邑。游人猶愛水雲鄉。護持賴有風流守。兒女英雄兩不亡。前朝湖爲徐中山家所有。今其子孫尙收漁租。近年李松雲太守新葺湖上館宇。

### 隨園弔袁子才

小倉亭館記追攀。訪舊重來淚暗潛。勝會不常今宿草。名園無恙尙青山。詩文一代才人筆。花月平生散吏班。我亦暮年難再到。爲君多駐片時閒。

### 借孫淵如汪春田兩觀察游牛首山春田後余二十年作鎮安守述余舊事甚悉故末章及之

石城南望兩峯寒。勝侶相招躡翠鬟。海內幾人同逸興。江南無處不名山。地傳朱雀橋相直。路比黃牛峽易攀。袁老自憐難濟勝。層椒臨眺亦忘還。

拱衛金陵鎮上游。六朝遺跡至今留。天開都會蒼龍闕。地控郊原白鷺洲。松老都從千歲上。塔高更出萬峯頭。支筇自暢登臨興。肯爲山名感爽鳩。

宦跡南交已久忘。因君重憶舊巖疆。揭來兜率崖千級。山中懸名。追話華胥夢一場。豈有袴襦留叔度。空傳尸祝到庚桑。祇應先後同官遇。便似停鞭說故鄉。

### 喜廉船老友過訪兼以誌別

邗江悵別久離羣。白首重逢誼倍殷。斯世愍遺猶有我。頻年索處正思君。挑燈仍續聯吟興。聞笛還傷歎逝文。餘

悼

四十年前同輩幾。喜心翻到淚紛紛。

內姪劉懷英自綿州歸述川中已無賊賊皆聚鄖陽山中其勢漸衰官兵亦四面堵截數月內可掃平矣詩

以誌喜

勦除喜信自川中。擄掠無資賊亦窮。狡窟雖遲深入計。周防漸有合圍功。耕炊鄭嶺枯骸白。刀洗巴江熱血紅。不枉衰翁吟望苦。及身得見賦囊弓。

閱邸報同年馮魯巖總憲病歿詩以哭之

同年同直最情真。邸報驚傳遽飾巾。道遠不通音問久。官高常自簿書親。公常勤於吏牘。掌綸樞府馳軍檄。直軍機處最久。

建節巖疆靖塞塵。巡撫黔中。至竟蓋棺勞績著。祭壇恩命自天申。特賜祭一壇。

征南重憶共軍門。公先隨明將軍征緬。年。余亦奉旨從軍。極目炎天瘴霧昏。公幸得還蒿尚跼。小猛育之變。我來無用蝨空捫。指夏鳩渡

紅。前塵杳杳都成夢。舊雨茫茫易憶魂。今日更增聞笛感。同時幕府幾人存。經略傅公。將軍兩河公。幕僚劉竹軒。孫補山。錢充齋。趙

璞函及公。皆下世。存者惟王述庵。惠中丞及余耳。

稚存見題拙著甌北詩話次韻奉答

論古雖如廷尉平。詩文事已一毫輕。但消白首無聊日。豈附青雲不朽名。老始識塗輸早見。貧堪鑿壁借餘明。只

慚結習癡堪笑。猶是燈窗未了情。

何限紛紛著作林。揀來只剩幾銖金。論人且復先觀我。愛古仍須不薄今。耳食爭誇談娓娓。鼻參誰候息深深。錦

機恐負遺山老。枉度鴛鴦舊繡針。

晚知甘苦擇言馴。一代風騷自有真。老學我悲垂盡歲。大名君已必傳人。幸同禪窟參三昧。不笑元關隔一塵。從

此國門懸呂覽。聽他辯舌騁儂秦。

閱邸報殘賊勦除將盡蕩平有日矣誌喜

捷音終繹報星郵。劫數將終局易收。賊勢已同強弩末。軍聲行唱大刀頭。人烟斷處還甌脫。鬼火啼來半觸髅。待

得流移元氣復。尙煩宵旰幾年籌。

但看比戶感恩波。早卜鐃簫有凱歌。人去空邨從賊少。家移邊寨避兵多。費糧木杪分猿果。隄壁山巔俯鳥窠。今日漸堪歸里社。重攜鋤耒理田禾。

送稚存游寧國

步履過從一載餘。忽教行色動征裾。里中漸少看花會。海內猶傳諫獵書。秋浦晴波移櫂穩。宛陵遙翠映窓虛。定增謝朓驚人句。寄我郵筒慰索居。

全惕莊織造七十壽詩

揚州花甲記開筵。江介宣勞又十年。南國威名英籙節。尚方經費水衡錢。老能健飯鬚眉壯。功贊垂衣黼黻鮮。我是平津舊賓客。喜隨公作地行仙。

春游

春風何處到江臯。毫齒清游興尚豪。福德在吳連歲稔。靈光占魯歷年高。新芽黃淺纔舒柳。嫩蕊紅輕欲試桃。著个老翁堪入畫。陌頭扶杖鬢蕭騷。

自楊舍檢校質庫回

豐陽城下小舟開。正值村村放早梅。潮落沙痕攬水出。日斜山影渡河來。有田二頃寧求益。每字三緘亦論財。卻愧滄江漁父好。夜深只載月明回。

城外閒步

春暄猶未脫吳綾。流覽風光力尙勝。簾閣燕尋曾宿壘。池塘鴨浴已融冰。野花地僻無人賞。廟樹年深有物憑。最是鄉鄰淳樸意。相邀村酒醉懽騰。

同年王惺園相公見余廿二史劄記有感於前朝荆楚流氛事手書遠訊敬賦奉酬

千里郁箋到草堂。離懷時事兩蒼茫。公真與國同休戚。我已無人問在亡。身退敢思投筆奮。官高共仰運籌長。狀

元宰相榮華處。知爲憂勞已澹忘。

王夢樓輓詩

哀音來自鎮江濱。竟喪維摩示寂身。蔬筍持齋將送老。碑銘賣字未全貧。一科先我爲前輩。百里因君有近鄰。從此故人都哭盡。他年哭我更何人。

早膺華組早投簪。別借疎狂耗壯心。生有笙歌矜馬帳。家有梨園。小部。死猶詩句在雞林。君少時。隨冊使封琉球王。黠癡各半無真癡。謗譽相兼有賞音。要是人間名士氣。祇今又作廣陵琴。

登陽山絕頂

登高想見昔鴻濛。一片川原緯繡中。目力窮如天地合。心神超到古今空。羲軒有號先嘉典。混沌初開豈禹功。至此直思元會始。欲將菱紐問高穹。

疑團

一物何能恥不知。荒唐呵壁祇生疑。思窮盤古胚胎日。想到尼山衽席時。鼎鼎百年幾兩屐。茫茫千古滿盤棋。笑他如豆書生眼。徒詡生花筆一枝。

午節攜家人水閣小酌看夜船燈火之盛

蒲觴佳節晚開筵。正是雲濛雨後天。小閣杯盤冬釀酒。滿河燈火夜遊船。紅塵不到清涼界。白首猶留嬰鑠年。地是恬熙人老健。更何賒望乞天憐。

感興和放翁韻

少年鼻息薄星河。只覺將來歲月多。壽命誰看天倚杵。身謀俄想日揮戈。過來富貴邯鄲夢。老去英雄敕勒歌。至此始悲無立足。求名學道兩蹉跎。

出郭

纓脫吳棉尚淺涼。恢台夏景倍舒長。學飛燕尾雙開剪。對語鶯吭並鼓簧。候屆耕鋤農滿野。香生餅餌麥登場。自慚游惰無營業。高柳陰中話雨暘。

散步

一蝸廬內有清娛。散步芒屨踏綠蕪。蝶不乞糧花作飯。蟲能識字葉銜符。豪除北里笙歌部。閒仿東坡笠屐圖。太息生平高位置。何當如此老潛夫。

李雨村觀察自蜀中續寄詩話比舊增多戲題於後

牛腰長卷履搜羅。都是名流句琢磨。一代幾家傳世久。千秋兩字騙人多。編如釀蜜黃蜂採。來比函經白馬馱。贏得老夫消晝永。披吟不惜一丸螺。

何來爵里刺爭埒。履歷偏勞記憶周。采諸詩人名號科第。官位。無不詳核。人各造車期合轍。君能集腋便成裘。採兼鹿苑高僧

座。購到雞林賈客舟。兼探高麗人李德懋所著清脾錄。真个將軍不好武。盡將風雅入旁搜。君舊有小李將軍之號。故戲及。

蕪詞謬辱故人知。遣與名流並轡馳。世不乏才常接踵。士皆爭勝孰低眉。事關公論情難徇。人以詩傳品已卑。敢比湖州楊伯子。自攜畫像出生祠。

旅宿暨陽

近游百里暨陽偏。又是江城一宿緣。柝盡荒雞催客起。燈殘餓鼠瞰人眠。亢倉畏壘非逃祝。子厚愚溪擬卜廛。那不逢場聊作戲。七旬以外總餘年。

暨陽望海

決皆真教目力窮。憑高一覽大瀛東。五更紅湧扶桑日。萬里青排舶越風。勢絕中休無過鳥。氣能橫跨只垂虹。正當海不揚波世。何物萑苻敢逞雄。

苦熱

火織當空氣益炎。避炎何處覓深巖。汗流似滴鮫珠濕。癩癢思搔鳥爪尖。螢可作燈兒剪紙。燕將歸舍婢鉤簾。茶瓜欲話無人共。細碎成詩韻一拈。

久晴

纔欣甘鬪插秧青。火織炎官又曬靈。大熱得風知不雨。晴空無月更多星。井懸汲綆疑焦釜。河捲翻車恐罄甍。縱不憂人亦憂己。夜深望歲立中庭。

泛小舟出郊看田禾

經旬謝病掩荆扉。偶泛輕橈趁夕暉。知我忘機鷗不避。爲人引道鷺先飛。桔槔翻水聲無歇。穰稔登場願恐違。見說江南真福地。可能連稔慰民依。

田家留飲

豆棚瓜架澗溪濱。老瓦盆留客飲醇。露綻葡萄肥馬乳。風搖薜荔活龍鱗。牛羊齧草無分地。鵝鴨歸闌不誤鄰。看到鄉村淳樸象。人間尙有葛天民。

艤舟亭小憩

艤舟亭下艤舟時。來訪東坡洗硯池。紅萑挺生剛有骨。紫薇怕癢嫩無皮。假山未裂玲瓏石。古木多垂鬱律枝。只爲毘陵少山水。一邱一壑也稱奇。

幽事

已謝塵緣罷送迎。祇將幽事遣幽情。瓶花浸水無根活。爐火烹泉有竅鳴。龜臥何須彌勒共。屐遊要比阮孚輕。天留老健娛遲暮。忍復分營到利名。

江樓野望

西風吹我上高樓。滿目蒼茫入感秋。天若有情應亦老。古而無死更何憂。也知身本非金石。已聽人呼作馬牛。枉

費狂奔夸父杖。大江自昔只東流。

### 魚釜

魚釜游魂未掃平。頗聞臺省重修行。四禪地縱堪逃劫。大乘經甯便解兵。王縉擬營銅瓦費。國澄倘識塔鈴聲。只愁呂相遊僧寺。多少禪鑽競送迎。

### 蔣心餘孫立中來謁感賦

握手相逢感昔因。依稀下蔡舊丰神。用蔣儕事。曾看乃父荷衣拜。又嘆孤兒葛屨貧。昔在京時。立中父僅十餘歲耳。車笠故交欣有後。坵壇同輩已無人。報劉更聽重闈老。存歿相關淚滿巾。心餘夫人尚在。

### 兩後坐月

一天好雨遍郊原。四野人情寂不喧。秋早金風涼有信。月明銀漢淡無痕。偶陳瓜果供清坐。聞聽兒童作謔言。又覺西成豐有象。老懷那不樂田園。

### 一院

一院苔痕綠正勻。藥欄聊喜踏芳茵。風來蕉藥搖紈扇。露壓荷盤瀉水銀。巢燕語梁將別主。野鳩呼雨似憂民。側聞米價朝來減。計日香杭又食新。

### 閩稚存百日賜環集再題

生平才氣最雄豪。惹得投荒萬里遙。足已烏孫途上齟。頭幾黃祖席前臬。到成後。有請加重辟者。轉徵恩旨赦歸。得歸故里寧非幸。善保高名在弗驕。百日賜環詩一卷。知君感泣徹深宵。

### 文端師長孫杏漁郡丞攜其子來常州就婚喜賦

彈指俄驚五十春。前遊歷歷記平津。曾依講座三重席。喜見師門四代人。王謝家多佳子弟。崔盧族稱宦婚姻。劉定公孫女。祖孫先後來親迎。畫鼓紅燈一樣新。郡丞尊人幼泉民部。昔亦來常州就婚吳壘伯家。余親見之。





是閻浮提一劫。翻因凱樂動悲情。

當陽破後戮羣凶。賊亦知兵但折衝。不佔城池防受困。先驅老弱代櫻鋒。運籌大帥思觀釁。坐甲征夫樂養癯。至竟成功須戰將。追悔不避萬山重。

一一渠魁已勒除。縱餘漏網亦窮魚。鄴都造冊筆成塚。京觀築邱尸滿輿。餽餉傳來無輓運。炊烟起處有耕鋤。鴈垣百堵看新葺。依舊桑麻景晏如。

寢兵從此息戈矛。善後還資計畫周。丁壯歸農猶佩犢。鄉田廬無主競巢鳩。賊甲生蟻蝨兵皆僇。征兵歸簿校尉糧吏正愁。軍需報蕩洗妖氛單愷澤。尙煩廟略幾番籌。

吳蘭雪過訪枉贈佳章卽次送別

峭帆風緊過江來。草草杯盤半日陪。我讓出頭非譚語。世無敵手始奇才。綠楊枝記西湖折。昔與君別於西湖紅杏花遲上苑開。下第南卻憶同遊半祖謝。那禁別淚滴蒼苔。西湖之遊。謝蘊山中丞。馮星石。鴻圖。同燕集。今二公皆下世。

接張廉船書寄答

江程千里接郵箋。根觸離懷悵各天。過我相留纔幾日。與君重見定何年。幔亭空約登山屐。前歲曾有武夷之約蘭渚猶遲下瀨船。欲作報章無別語。相期健飯到華顛。

前接兩村觀察續寄詩話有書報謝並附拙刻該餘叢考廿二史劄記奉呈茲又接來書並詩四章再次寄答

綿陽西望渺關河。甚欲相尋奈遠何。書過七旬猶矍鑠。眼空四海總么麼。寄書未卜人還在。得報翻欣句更多。深感扶輪賢刺史。郵筒雙遞兩翁皤。余內姪劉慕陔故綿州。兩人書札往來。皆慕陔轉遞。

京邸相隨步履塵。京中寓舍。與君同在椿樹街。祇今音問藉鴻賓。一封遠扎修將就。千結離腸轉已頻。蘭棹難浮三峽水。梅花聊寄一枝春。晨星敢謂非天幸。萬里猶存兩老人。

勝說叢殘孰表彰。多煩一一爲提綱。獎許拙刻甚至。要傳著述千秋久。須有光芒萬丈長。名士空多誰足數。故人漸少

愈難忘。披金倘有沙應汰。愛我還期拙代藏。來詩以白元劉。迂叟心期迫不侔。角立縱支三足鼎。高瞻須更一層樓。擣虛拔幟長趨壁。救

敗量沙夜唱籌。戰績中猶分等級。况憑寸管冀長留。

哭楊莊總管之訃

縞紵論交二十春。訃來那禁賭傷神。貧惟飽叔心知我。貴不宜明面向人。方喜清班依殿陛。尙聞遺愛在關津。考終正及還朝後。天意分明報蓋臣。

卿月班聯近紫宸。方憂道阻見無因。豈期一別真千古。如此相知有幾人。高冢松楸丹旆遠。公已預營葬地。舊壇車笠白頭新。生平不澗無情淚。今日羊曇濕滿巾。

新春招劉檀橋中允莊迂甫贊善洪稚存編修蔣佩荃檢討謙集草堂適會賓谷運使枉過遂并邀入會皆

詞館也江鄉此會頗不易得爰作詩以張之并邀諸公屬和

五人詞館共家居。合有春醪折簡呼。廿榜輩行吾獨老。一堂風雅世應無。占星或擬賢人聚。入畫堪追學士圖。科目最先杯最後。主人笑比飲屠酥。

百年人物出柯亭。故事猶傳舊典型。兩鬢霜甘居退院。一條冰恰稱寒廳。是日極寒。誰當牛耳操劖澤。我敢龍頭占管寧。林下漸多朝右少。諸公應早赴彤廷。

辛盤正擬具壺觴。忽有干旌過草堂。未便帶符韓尉座。已如里改鄭公鄉。儒餐野味無官鮓。翰苑虛名漸餽羊。扶起雅輪須大力。期公北斗領文昌。

閩邸報秦楚蜀三省同時奏捷軍事告蕝喜作凱歌

露布星馳到玉京。錦簫大凱溢歡聲。雨來盡洗川原血。風掃都成草木兵。豈有盛朝容伏莽。從看率土淨銷萌。莫

輕一片紅旗影。多少軍儲始告成。  
久享恬熙習故常。時艱始見國恩長。七年征繕無加賦。幾處流移有發倉。驅犢歸犁荒地草。課蠶重理故園桑。  
黎灑泣私相語。都賴朝家續命湯。  
蕭蕭班馬過歸師。西土依然好繡圻。天下江山奇絕處。積年盜賊掃平時。烏烏聲樂征人幕。鼓角風清大將旗。烽  
燧盡消天日朗。彩霞五色絢晴曦。  
林杜詩成喜氣重。深宮五夜第勳庸。裏屍馬革三壇祭。錫命龍章五等封。遠戍兵歸身脫劍。大酺人醉手扶筇。橫  
池何代無征勦。駿烈今堪勒鼎鐘。

新春卽日

東風冉冉到天涯。老向人間閱歲華。死盡故人成魯殿。占先春色有唐花。魚龍雜戲紛千隊。簫鼓歡聲溢萬家。自  
是太平真景象。今年應又慶簞車。

野步

同此光陰逝水流。與其枯坐不如遊。野花晝暖香迷蝶。古樹年深大蔽牛。不著胭脂春自麗。但聞鷄犬境逾幽。只  
慚賣酒人家笑。此老無錢掛杖頭。

前歲作牡丹詩頗不愜意今日對花再作四首

夏無花可鬪芳菲。飽受陽和始吐輝。詞客文章惟宋豔。美人姿態有環肥。人因貴重皆矜寵。蝶亦溫存作軟飛。編  
得遊春忙十日。滿城裁盡綺羅衣。  
紛紛桃李盡開過。晚出從容燦曼陀。十戶貲猶嫌價少。廿番風獨占春多。光浮花外三分暈。味在香中一片和。只  
恐女郎嫌太重。不教插上髻盤螺。

園林無此不能豪。旁護朱欄上碧紗。畫以胭脂猶欠活。生來富貴自多嬌。花頭端重風迴陣。粉靨醺酣酒上潮。最

是精神全發越。線睛驗取午時貓。  
穠華恰趁豔陽天。黼栗開成徑尺圓。紅藥自甘充婢賤。青蓮曾以喻妃妍。豪宜黨尉銷金帳。陋笑蘇家藥玉船。佔得繁華仍不俗。由來姿韻本花仙。

京口左蘭成留飲

柔檣輕帆兩日程。近遊重過潤州城。欲談舊事無同輩。喜結新知有後生。酒陣酣搖甘露剝。詩濤雄鬪大江聲。坡公會醉藏春塢。刁景純園。見蘇集。此地常多地主情。

水嬉看夜船燈火

水嬉舉擲龍城。雲渡游船徹夜聲。燈火熒煌星萬點。笙歌擘緩月三更。繁華知費金錢幾。風景真看玉燭明。恰是村農插秧候。中宵便起叱犍耕。  
今年添製夜龍船。十丈龍身萬燭燃。映水頓成星宿海。騰雲應上燄摩天。一般犀照光尤徹。過體驪珠誓不眠。惹得老顛清興發。孤燈揮翰鬪蜿蜒。

或以余紀遊詩於佩香悟情多諧語賦此解嘲

遊仙偶遇李騰空。莫漫相嘲白髮翁。但看晚霞多麗景。何曾老樹不春風。風流得罪猶堪恕。道學爲詩究未工。君見梅花一篇賦。如何不議廣平公。

哭絨齋姪

京華鄉國鎮相隨。何意今成永訣時。君過八旬甯有憾。我無一件乃真悲。阿咸年轉如兄長。君長余四歲。王濟談能辨叔疑。問疾只嫌闌拒客。不教觀縷訴心期。

尙書家法儼條科。恭毅公。紉佩書紳服習多。座有金人絨口戒。君謹於言。自號絨齋。庭無車子轉喉歌。恭毅遺韻。門內不許演戲。至今遵守。  
蹢躅見客憐盤辟。晚年不良。飲啖兼人笑活羅。二字見金史世紀。君善飲啖。今日追思總陳迹。黃公爐畔渺山河。

漫興

十笏香嚴遠市躑。不農不仕不漁樵。尙耽書味忘漂麥。未長詩功想握苗。著述身將盈八秩。昇平世已歷三朝。聞中卻數平生友。幾個聲名在絳霄。

到揚州值松坪千次生新抱。西河之痛至淮安。聞晴嵐子蔭堂久下世矣。感賦

題襟好友已松楸。那更風摧玉樹秋。哭到故人三兩世。感深倦客一孤舟。當年曾羨駒千里。今日俱歸貉一邱。早識此行多引淚。悔攜襪被出門遊。

清江浦送費制府入爲大司馬賀選惜別情見乎詞

聽履崇班躡禁廷。本兵身繫九邊甯。帝資海內安磐石。民惜江南去福星。數歷官更中外職。追攀人滿短長亭。還朝笑憶郎曹舊。三十年前鬢尙青。

平日人忘廈庇中。臨分始識久旃幃。祈年常滿千倉粟。自公到江南。連年大 稔。戊午歲禱雨尤驗。率屬俱寒兩袖風。竹箭河流循軌

穩。頰歲治河。漫 荏苒。苒苒兵掃伏隍空。指去歲宿州 而今一一勳庸見。都作甘棠憶召公。

腐儒縱不乞餘光。自有餘光到草堂。執醴敢當三老席。指囷終恃陸家莊。孔融檄政康成里。思黯車臨履道坊。牛

羶舉制科。白樂天爲考官。後白俱居 東都履道里。牛爲留守。時相過從。十載分榮誰不羨。真看桃李蔭門牆。

送別那禁淚暗垂。雲山從此兩睽離。建牙或有重來日。菴齒應無再見期。帷幄謀參溫室樹。江湖身老釣竿絲。惟當皓首猶交勉。各咏黃花晚節詩。

途中偶見兩樂事感賦

倦則知還戀舊窠。物情相去不爭多。卸鞍跑馬歸鋤棧。脫軛耕牛放草坡。少日漫思雲出岫。老來惟愛水迴波。天寒翠袖幽居屋。且喚蓬頭婢補蘿。

竹初齋中益蘭多名種今年爲春寒所敗其次者作花尙茂賦詩索和卽次原韻

九晚姿從短取長。好嬌次第替夷光。精神雖覺三分減。臭味仍同一瓣香。萎豈當門遭刈楚。榮留紉佩慰懷湘。謝庭不斷清芬茁。韻事終勝馬糞王。

磁斗嬌芽冷不禁。護花方法更披尋。縱非首選猶青眼。難得肩隨亦素心。開晚忍嫌抽箭少。耐寒應為植根深。只愁藉口停嘉宴。辜我年前望到今。去表有盆蘭之宴。故戲及之。

長孫公桂舉一子老夫遂見曾孫因名之曰曾慶而記以詩

中年得子已嫌遲。余年三十八始舉廷英。豈意孫今又舉兒。天幸已多真忝竊。祖功久積有留貽。老妻檢篋裁文祿。賀客填

門索酒卮。笑語鑷丁休鑷白。輩行恰稱鬢如絲。

遂向人間作太翁。添丁應策長孫功。三班銓尚遲需次。孫方候選縣丞。一索占欣早得雄。為父也須身作鶴。抱男漫詡

夢符熊。百年世業青箱在。要續書香振祖風。

題江陰單寧齋明府小照

披圖想見十年前。績學餘閒結靜緣。年少仙人王子晉。風流詞客杜樊川。杏花紅潤含宵露。柳葉青舒抹曉烟。身未出山春意滿。早儲康濟待敷宣。

我見先生已有髭。琴堂單父正調絲。早栽滿縣花千樹。但飲澄江水一卮。薦牘共推三異最。御屏應覺九遷遲。此圖留作東山景。聊記潛居舊履基。

彭芸楣尙書輓詩

同試鑿坡賦獨工。癸未散館。公第。清班駁歷到司空。帝將李嶠稱才子。公以文學受知先帝。有才子之譽。人忌元稹。作相公。服藥地黃頭早白。年未五十。髮全白。枝書天祿燭常紅。各館修書。皆為總裁。京華文戰江城隲。猶憶光芒夜吐虹。散館前。與公會謀

數十次。公視學江南。余里居。過從尤密。

稚存說述菴侍郎近狀尙無恙喜賦

落落江天大蘆身，駢壇猶欲獨扶輪。詩文探到誰先輩，刻湖海詩傳。湖海文傳。二書將告成。韓晉幾成活死人。耳目已覺婦支

鐘工煮粥。每日但食粥。門生當杖代迎賓。門人陶君。長安交舊今餘幾，數到殷兄澤倍珍。

西干故里示姪亮采寶土姪孫公蘭等  
十年不到綠楊村，白首重來叩里門。驚吠烏鴉疑是客，舊留黃犢已生孫。一經幸尙傳家學，百畝猶當念國恩。是我昔時初奮跡，瓣香能不望蘭蓀。

牡丹

春風滿面好容光，十五盈盈出畫堂。天下有花皆避席，豪家無處不飛觴。寫生只合煩周昉，入真曾傳自洛陽。笑我素嫌脂粉氣，也教軟盡鐵心腸。

答友

日暮逾愁道路遙，老來何敢氣凌霄。誤人子弟由輕獎，欺世聲名恐易消。許靖終爲先主薄，歐陽猶畏後生描。祇應蟻蛭防山躓，觀井錢鏗帛繫腰。

和凡仙詩

靈氣應召判前因，運筆如飛果降真。我是未成丹道士，世無不識字仙人。步虛杳杳來何處，叩寂惺惺信有神。人是古時詩近體，知君學亦逐時新。

客有談故相事者漫記

具瞻當日秉樞鈞，誰敢登車醉吐茵。隻手難遮天下目，回頭已是百年身。見錢福詩。蓋棺論定無翻案，當軸權移有轉輪。官位聲名原兩事，漫憑威力制窮塵。

## 七言律七

接同年陳蘭江書知其官金華教授喜而有寄

淮館聯牀兩月同。會同客淮關權。使寅公幕。而今二十四春風。書來別雨離雲後。官在青山綠水中。歌袴尙傳秦百二。君昔宰費

雞。改就詩筒好遞浙西東。開緘先喜音塵接。已抵論心剪燭紅。

劉石菴相公因繼母太夫人就養在冢孫少宰公江南試院壽屆九十奏蒙恩命南來慶祝公年亦八十五

矣稱觴盛事從古未有余以門下士敬隨叩賀歡忭難名恭紀三律

南國秋風穠稻香。相公請假壽護堂。絳鸞不遠三千里。皓首親擎九十觴。龍袞朝衣供綵服。鸞回綸誥責奎章。江

城況是會臨駐。公前視學江南。四代今增樂未央。少宰已有子。特冠。

壽筵盛事艷朝紳。首輔承恩許省親。接武兩朝賢宰相。疏封一品太夫人。新芻正熟南蘭酒。文錦兼頒內府珍。縱

是家風慣清儉。也應琰管慶長春。

再世調元佐鄧隆。更餘書翰壓羣雄。公書法為天下第一。天章平有傳難專美。絳灌無文敢媿功。久別豈期迎畫鶴。舊情猶

荷問雕蟲。剩誇年少依劉日。伴食曾陪兩相公。余昔客公家。文正師方官總憲。公亦為孝廉。每日皆三人共飯。不另設餐也。

石菴還朝口占送別

白頭猶著老萊衣。假滿還朝四牡駢。來為稱觴增燕喜。去歌遵渚羨鴻飛。送公千里終須別。剩我孤舟獨自歸。誼

是故交年大耋。臨分那不倍依依。

壽刻可行舅兄八十

巋然昔宿魯靈光。宦績文名少輩行。夜月琴聲單父宰。春風帶草鄭公鄉。一門子弟親陶鑄。三世文詞力表彰。刻

氏一家文。要識老儒榮暮景。添丁樂事助稱觴。新添一孫。

仕宦歸同理舊編。黑頭昆弟兩皤然。每欣求仲來荒徑。還仗殷兄街少年。張丈殷兄。見香山詩。君長余二歲。剪燭深談三鼓後。

扶筇緩步百花前。往來二老風流在。剩與人閒說散仙。



聞汪時齋總憲蒙恩以二品歸老感賦

籍威烏府肅行臨。直木風多易感秋。朝議自嚴賢者責。帝心終眷世臣優。七旬老恰初衣遂。二品歸仍畫錦遊。白嶽黃山相待久。籃輿探勝亦風流。

巢衷回首綠楊灣。燈火書堂課晏閒。公從余受業。常在澄懷園。廿載寒暄雖久別。兩家痛癢最相關。寢邱田豈供千指。奉禮廳猶借萬山。公家在休寧萬山中。平日愛臨顏氏帖。也書乞米落人間。

錢竹汀宮詹輓詩

蓬瀛仙馭杳難攀。官本清華館閣班。生死不離文字裏。聲名早在斗山間。縹緗麗製傳中禁。碑版雄詞到百蠻。略似春蠶絲吐盡。化飛蛾去脫塵寰。

歷朝記載萬牛毛。同異紛如費別搔。十七史從何處說。一家言已等身高。君著廿二史考異。最精核。有疑好就靈犀照。不朽何須汗馬勞。直自深寧王叟後。又添困學析秋毫。

庚年同譜幾人留。百里相望兩白頭。君去更無人可語。我來應有伴同遊。後身定識仍金粟。前路先看赴玉樓。一笑吾曹論壽命。短長不在幾春秋。

敬作

九尺曹交自覺長。盡傾一座氣飛揚。蟪蛄安見青松老。魑魅終消白日光。麟閣畫圖功不朽。雞林詩句價爭償。曠觀自有無窮在。汲汲何須蟻撼牀。李白詩。蟪蛄啼青松。安見此樹老。

李兩村觀察輓詩

久不接兩村書。心竊憂疑蔣于野。自京回會晤。其弟編修君鼎元。知已下世驚悼之餘。以詩當哭。

綿陽音斷渺烟雲。得信俄驚宿草墳。斯世幾人真愛我。老年同輩又亡君。和凝板散千家集。文節樓傷萬卷焚。君刻說部數百種。名曰函海。又選近人詩作詩話十卷。家有萬卷樓。貯書畫鐘鼎。忽燬於火。奇士人間留不住。故應召掌紫臺文。見樸武外傳。

每逢書到悵睽離。今并音書不可期。萬里難爲徐穉弔。一編重檢蜀州詩。少陵。有檢得。高蜀州遺詩。魂來夢裏人猶舊。名在陽間鬼豈知。八表停雲空目極。更從何處寄相思。

戲簡稚存

青鞵布襪過從頻。一道橫街作近鄰。我已年來都散漢。君真天上謫仙人。詩纔起草先邀和。諺到交鋒不避嗔。如此清歡供暮景。也應俗煞軟紅塵。

示兒孫

風貌居然玉樹枝。未遑講道且修詞。要無一字無來處。但有三人有我師。祖父聲光安可恃。衣冠門戶倍難支。巽猶餘粟囊餘帛。不惜分陰待幾時。

教場壩懷故將白秋齋同年

君庚午武鄉試與余同年。官至副將。有賢聲。會爲常州游擊。教場壩其漢武地也。

長身玉立好鬚眉。威令羣推節制師。可惜將兵程不識。誰爲薦士魏無知。老猶射虎千鈞力。生未圖麟兩鬢絲。今日經過教場壩。春風楊柳想旌旗。

石菴相公輓詩

纔送還朝數月前。俄驚仙馭大羅天。向愁久別難重見。豈意相逢遽永捐。黃閣調元榮再世。青燈談藝記當年。翻思昨歲南來日。天予吾曹一面緣。貞白汾陽陸放翁。壽俱八十五纔終。高名已屬三君子。大耋今添一相公。勲業不妨文敵武。神仙皆到老還童。卽論落紙烟雲妙。也抵山陰萬首工。

我與公交跡最陳。秀才時已客平津。

余初入京。文正師卽延入邸第。分岐雖隔青雲路。閱世同爲白髮人。楹帖一聯成絕筆。書

錢十冊枉隨輪。

公疏行爲余書楹帖。始知老健原難恃。只在斯須臂屈伸。楹帖十八字。務觀萬篇。牛皆歸

蓋絕筆也。

吳劉可行舅兄

松筠方喜景長春。何意康強遽飾巾。名行已歸耆舊傳。親知共惜老成人。生無嗜好惟耽學。家本清寒尚卹貧。欲識蓋棺公論定。淳風共說葛天民。

生平執友本無多。况復相隨到鬢皤。尙擬泛舟偕襲笑。已辭折簡召閻羅。君自言三年前。夢閻羅有請帖。到。以編刻家集未成。辭不赴。文心積習原成癖。嚙語通靈轉似魔。從此故人都哭盡。爲君拚竭淚滂沱。

王惺園相公輓詩

黿頂科名位秉鈞。何期政政遽歸真。素風到老如寒士。公論同聲說正人。解綬臣辭前席寵。懸弧帝錫尙方珍。歸田仍歿長安道。遙識心猶戀紫宸。公已致仕歸里。八十壽辰上寵錫優厚。交京謝恩。遂歿于京。

曲江賜宴共恩榮。中外分岐遂判程。我慕千秋勤著述。公登一品佐昇平。特邀主眷原奇遇。難得官高尚令名。一甲三人兩徂謝。此身雖在也堪驚。榜眼胡蒙堂。官至總憲。已先下世。

常州東門外天寧寺最崇敞殿宇百畝僧徒常數千指江南一大叢林也願未有詠之者僧了月修造工竣

詩以落之

砥柱樓閣映霞丹。江北江南一刹竿。千載不遭兵火厄。半空直接斗星寒。鳴鐘聲集齋堂飯。汲綆痕深石井欄。代有名僧爲起廢。緣知福也占蒲團。

味辛自松江歸述菴侍郎珮珊女史俱寄聲存問并知珮珊能背誦拙詩如瓶瀉水各寄謝一首

十載邊疆踏戰塵。歸勤著述柳湖村。五官俱廢名心在。二品非榮老學尊。湖海論交無輩行。文章傳世卽兒孫。衰年我亦頽唐甚。能否扁舟一款門。寄述菴。

騷雅中誰識苦辛。正難物色向風塵。豈期白首新知己。翻在紅顏絕代人。繡出弓衣傳唱遠。拂來羅袖愛才真。拙詩背誦如流水。多恐汚君點終唇。寄珮珊。

白遺

熊魚兼取本天慳，老去塵緣已盡刪。名或可傳聽日後，詩留不盡與人間。身隨甌窰上聲。豚蹄祝。夢斷周陔豹尾班。獨惜退休三十載，不曾絲髮濟時艱。

生事

出身草澤躡蓬萊，官有腰魚壽背鮐。老樹尙期千尺長，名花已到十分開。半收芋栗當全熟，薄病蓑苓壓小災。翁詩。留病。但使高明憂鬼瞰，他年或免食嗟來。

余年十九補弟子員今七十有九又屆乙丑院試之期作重遊泮宮詩記事

佳話爭傳泮水塘，一周花甲又芹香。阿婆迴憶新婚夕，老將重經舊戰場。殘墨尙留題字柱，銛鋒早脫處維絳。綴行同出人爭看，白髮翁攜白面郎。

鬢門裙屐記前遊，又見詵詵出俊流。便合膝行觀壁上，漫勞足曳跂壺頭。舊痕久掃離巢燕，陳迹難追踏磨牛。惟有秀才餘習在，一編仍守夜窗幽。

一彈指頃盛衰殊，曾記初程便棄繻。憤是新生寧畏虎，馬今漸老反爲駒。房公入寺疑前世，波匿觀河認故吾。爲語少年諸譽髦，故須及早奮修途。

先後同年例可循，一般蘭譜誼相親。舉場應喚新先輩，鄉飲慚叨舊大賓。坡老纔如一場夢，劉郎真是再來人。也虧頑健能堅耐，初地重遊六十春。

登太平寺塔

凌虛窳堵覽蒼茫，始覺書生眼寸光。無弊不成天地大，有愁方度古今長。長安賢佞三期口，漢書王廣武英雄百戲場。待得塵緣看到破，老夫亦已熟黃梁。

出郊



求仙學佛兩無成。嘔強猶餘傲骨撐。自吃庾郎三韭飯。不嘗樓護五侯鯖。買山錢肯從人乞。諛墓金仍贈客行。也是天公曲全意。免教涓滴領人情。

年將四十纔生子。豈意孫今又抱孩。在我原爲非分福。知他誰是不羈才。金防躍冶爐常守。樹望成陰土屢培。卻被達觀人暗笑。何如且醉眼前杯。

七十相傳自古稀。況今又過十年期。想蒙疎網吞舟漏。得緩征輪下坂馳。倘不早歸應貴顯。偶思再出已衰遲。緣知百竊黃蘗在。未到生平飯滿時。

束髮耽書誦夜闌。得登館閣附鵬鸞。當時擬藉文章進。臨事方知幹濟難。官去僅餘風兩袖。老來聊臥日三竿。遍翻史傳無尋處。或有人從藝苑看。

秦望山秦士誠在兵處。戰敗後。明步月等遂拔江陰城。

秦望山高好駐兵。淮張曾此瞰江城。亂離未定瞻烏止。盜賊皆思逐鹿爭。赤伏符終歸漢主。白駒場枉闢周京。士層巖大。祇餘不肯生降處。猶似田橫氣未平。

逃荒

淮揚漸欲作洪流。眼見饑荒起衆咻。被髮纓冠非我事。舐糠及米亦吾憂。無依競托沿門鉢。有力將移負壑舟。安得尾閭籌減水。盡收歸海出平嘯。

咏物四首

開過荷花現幻軀。亂頭粗服出泥塗。中虛好伴竹君子。挺立也師松大夫。掩袖苦心如有憶。古詩。蓮子凌波徐步不須扶。六郎枉擅芙蓉面。何似蓬仙骨相臞。蓮蓬人。

出自滄波作羽仙。身兼飛躍幻魚鳶。想仍水陸三千里。豈羨腰纏十萬錢。掉尾已辭漁父餌。梳翎肯舞貴人筵。莫嫌到溉猶餘臭。臭腐能奇是化權。鱖魚

簾外陰霖賦滿空。美人擁篲有神功。捷驅巫女三更雨。巧借封姨一陣風。香捲胭脂花落後。魂歸瓊珮月明中。莫疑窈婦能招旱。得號乾娘勝得雄。掃晴娘。

飽偏偏供戲酒筵。但憑手撥不絲牽。白題胡舞斜防跌。黃胖春遊醉欲顛。宛轉隨人終自立。周旋伴客不安眠。紙糊國老休相擬。個強身還傲氣仙。不倒翁。黃胖遊春覓對不得。明日得胡舞白題辭。不禁狂喜。趁湊成一聯。

蝦鬚簾四十韻

海上奇聞過瑞鯨。蝦鬚數尺可爲簾。鞠躬曾仿漁翁釣。借日常爲水母規。躍躍蟲身無兩翅。屈伸螳臂有雙鉗。槎枒芒刺森頭角。戈戟鋒凌在鼻尖。王德名從樽俎錫。水精肉耐酒醃醃。味鮮已擅調羹獨。軀壯還堪製器兼。燃作燿籠輝砥室。鑲成杯盞入香匳。斯皆取用憑空殼。未及搜材到笑髯。蝟磔英姿爲世出。砥根勇力肯身潛。長髻宛似揚旌旆。剛鬚寧徒佐釜鬮。高出一頭標蝨蝨。茁從雙頰奮鬚鬚。鬚眉豈慕奇男表。頤領曾聞鬢鬢嫌。粗未成竿時浪曝。細堪作線綺窗粘。送煩恤緯成懸箔。不用斑筠掛畫檐。持處本無纏以帛。拔來豈惜痛如砭。縱橫入扣規棋罫。疎密成行結綵綬。織豈蠶娘機軋軋。編應螺女手摻摻。卷舒軟恰隨犀軸。條縷分如界象籤。方幅絞綃雲霧薄。圓空蛛網蝶蜂粘。障他下界飛塵泥。捲去西山過雨鬣。晝靜香常籠寶鴨。夜明光欲奪銀蟾。細逾晶髮能延照。潔比冰絲好辟炎。最喜通明觀若火。只難藏醜隱無鹽。草痕映入風仍隔。花影移來露不霑。何必蚌珠穿作幌。漫勞魚錦繡成帘。題詩聊當紗籠碧。養目微輸皂幃黔。雨濺似涵腥氣濕。風搖仍漾水紋恬。貢從龍國途何遠。購自雞林價不廉。玳瑁梁歸妨舞燕。琉璃壁逗誤飛蟣。多髭女面勞千錄。有縫天衣貴萬緜。紅玉筋同工製作。紫絲幃且遜觀瞻。押來銀蒜禁風剪。掛起金鈎對月鐮。掩映芙蓉宜綺閣。低垂楊柳笑窮閭。玲瓏含護妝臺李。寂寞寧依卜肆嚴。蔽席門憐編翠篠。織簾人愧緝蒼兼。五紋繡枉誇雲幔。四望車空炫錦幃。迴憶奮鯁遊浩蕩。何如作箇出沉淹。取材翹肖真成巧。得氣于思不用謙。功賽麟毫精組織。珍逾蚊睫線修纖。瓊樓玉宇高懸處。朗映瞳矐曉日暹。

懷清橋

夫婦同堅殉國心。不曾聞訃已淵沉。輓詩難用香奩體。冤魄猶留血影砧。江上有魂應遠慰。人間無路可哀吟。可憐一片秦淮水。嗚咽寒流直至今。

吳門范洽園編修來京為余作八十壽詩君今歲亦稱七十之觴謹賦三律酬賀

白首相望兩日程。今年同舉壽筵觥。古稀對我猶稱弟。老學如君孰敢兄。鎖闥攜毫慳接武。君館選。余銀鉶索。已出京。

酒未通名。前歲公等燕王述菴於樓杜。余為不速之客。江天落落占星象。一似長庚一啓明。

會過天平萬笏山。范文正公墓。故知代有濟時艱。義田已自增千畝。公增義莊千畝。廣廈猶思庇萬間。壇坫名高輕仕宦。江湖身遠念痼癩。江北水災。君詩屢及之。九重方啓天章閣。會見蒲輪促召還。

同此懸弧遞舉觴。瑤函先枉祝釐章。千秋豈論科前後。兩敵終分力弱強。暮景飛騰君尚壯。阿婆塗抹我徒傷。香山倘許聯吟社。徑欲相從履道坊。

錢竹初輓詩

西河哭子甫經年。豈意衰翁又造川。食不老饜偏暴下。功深禪坐竟長眠。君常清齋坐禪。忽以腹疾終。一區邱壑憑誰賞。廿

靜觀

卷詩文尙未鐫。差幸桂花香正滿。送君一路去昇天。

看看出任君還。薄有田園可養閒。身後名猶他日待。生前業已近年艱。腰圍月減頻量帶。目疾宵昏只掩關。如

此清修亦何咎。不教年到耄期班。

人事紛紛百戰場。閒中淨眼覽蒼茫。狂風難起澄潭浪。暗日終勝皎月光。時際昌期公道在。運當劫數詐謀強。瀟

菊飲同人小集

泥多少與衰迹。留與人間話海棠。

人事紛紛百戰場。閒中淨眼覽蒼茫。狂風難起澄潭浪。暗日終勝皎月光。時際昌期公道在。運當劫數詐謀強。瀟

泥多少與衰迹。留與人間話海棠。

菊飲同人小集



籬葩紅紫正敷榮。近局相招小合并。不暖不寒天九月。有花有酒夜三更。清談弗禁藏闈戲。白戰猶能擊鉢成。此是暮年消受處。可知無意獵時名。

### 耳聾

與其聾也不如聾。聾亦難堪竅不通。函谷封泥填衙窾。空坑投石響徑鐘。移牀近客惟催茗。落葉呼童屢問風。作阿家翁將廿載。何須社酒更祈聰。

### 夢張瘦銅

故人入夢不分明。重感聯牀聽雨聲。塵尾擲來毛落飯。預頭擣處糝添羹。翻離日久何無語。貧賤交深尚有情。今夕重逢仍愴況。醒來翻使淚交橫。

### 題鶴歸來戲本

前明大學士瞿式耜。留守桂林。城破殉難。族孫頌作此以傳。

化鶴歸從瘴海濱。興亡如夢愴前塵。河山戰敗無餘地。文武逃空剩隻身。青史一編留押卷。明史以公爲列傳終卷。朱衣雙

引去成神。公死後爲蘇州城隍。見彭靈王詩註。覆巢之下猶完卵。想見與朝祝網仁。公在桂林拒戰時。江南久入我朝。其家在常熟。眷屬俱無恙。足見是時法

網之疎闊。

江陵孫子亦英風。來共殘棋一局終。不死則降無兩法。倡予和汝有雙忠。青山何處呼臯復。白首同歸作鬼雄。楊

震自能招大鳥。豈須鍛羽比遼東。張居正曾孫同儼。與公同被執。幽之民舍。兩人日賦詩倡和。四十餘日。同就戮。

風洞山前土尚香。二公就戮處。從容就義耿剛腸。久拚白刃爲歸路。肯乞黃冠返故鄉。宗澤心期河速渡。福興身殉國

垂亡。宗汝霖守汴。完顏福與守載。皆留守事。易名真荷如天度。偏爲殷頑特表彰。高宗純皇帝。表彰明末忠臣。特賜公諡忠宣。

### 夜醒作

寒戀重衾夜漏長。半醒半寐境悠揚。燈光照夢犀燃燭。爐沸驚魂蟻撼牀。事滿五更真蠟集。書追三篋已羊亡。隴

丁卯元日

朝衣北望拜天闈。剛卯真符景運長。幸忝增年開九秩。曾初赴舉試三場。乾隆丁卯。余初赴江寧鄉試。綠痕上柳猶無色。紅意催梅漸有香。預卜秋成仍大稔。立春纔屆正農祥。隔年小除前一日立春。

春興

葛仙橋畔出迎禧。兒女青紅又一時。賭酒難勝長夜酒。看詩漸愛老人詩。湖山興發無同伴。花柳春來有定期。自笑童心除未盡。披河拋擲尙能嬉。

朱石君相公輓詩

調元正仰贊休明。接席俄驚喪老成。生爲甘盤尊舊學。死同君寶易嘉名。公昔爲今上師傅。歿後賜諡文正。昇平相業無奇績。典雅文風有主盟。餘事何妨證仙佛。旁通原不損賢聲。

筠浦協揆策拜禮仁閣大學士喜賦

中外宣猷宿望深。欣聞策拜冠朝簪。九天默運爲霖手。四海皆知似水心。泰宇澄清調玉燭。薰風解阜和瑤琴。早聞絳闕宣麻日。朝野同聲慰滿襟。

臺省何人不駿雄。獨邀帝鑒亮天工。最高班位天常近。未老精神日正中。旋馬并無廳治事。公尙儼屋作邸舍。圖麟應有閣銘功。江鄉野老分榮甚。座下門生作相公。

喜同年崔曼亭觀察歸賦贈

蘭譜交遊悵各天。白頭喜見老同年。去官未免思祠祿。健飯猶堪作地仙。炊日夢雖柱閣冷。君方悼亡。過庭人早御屏遷。公子景儀。翰林出守。由何期一榜都凋謝。獨剩吾曹耐久緣。

憂旱

夏至年年插蒔齋。今交小暑未翻犁。換標日日糴加紉。築壩層層水上梯。但見過河枯鮒位。不聞呼雨野鳩颺。老

夫敢爲蒼生哭。自起看雲獨杖藜。

飲腸焦灼到蒿萊。千里憂惶歎旱災。打魃直思開野塚。曝巫寧惜築高臺。涼風爽捲雲頭散。乾電晴驅雨腳回。降

割自闢千萬命。可憐賢守獨祈哀。

郡守蔣霽臺。求雨甚虔。

齋被零壇禱。千方吁嗟聲更逼江鄉。幾疑天聽全無耳。其奈人飢各有腸。起伏龍仍潭底睡。斷屠豬已柵邊藏。生

機須待明年麥。若個能支一歲長。

不知江國果何愆。深到漕渠也斷泉。思曼船真牽岸住。祖生楫敢渡河鞭。思雖出位緣憂國。力不從心欲挽天。憶

我還鄉三遇旱。不會太甚似今年。乾隆四十年乙未。五十年乙巳。今嘉慶十二年丁卯。皆遇旱。

贈朱虛舟藩伯

起家丞簿立奇功。廿載官遷二品崇。結寨盡擒張莽蕩。見宋史趙密傳。登壇直饗李橫衝。九霄俯視風皆下。五十勤宣

日正中。開濟豈徒騰節鉞。會看冊拜黑頭公。

小北門城下看荷花

柳陰深覆北城隈。正值芙蓉百本開。難得有風無日處。相攜臨水看花來。老懷豈尙貪紅豔。逸興兼思泛綠洄。帶

得餘香晚歸去。月明更醉碧筒杯。

虛舟藩伯以余宵不能寐。蓋心血枯也。贈我烏斯藏紅花。謂可療此疾。半月以來服之。果有效。賦謝。

佛土曾傳篤耨香。靈葩來亦自西羌。恰如攜贈邯鄲枕。竟得安眠瑋瑋牀。未熄篝燈先夢到。不聞街鼓任宵長。尙

嫌未茁心花燦。只抵希夷一睡方。

余以乾隆丁卯初赴江寧鄉試。今嘉慶丁卯又屆鄉試之期。六十年間有如昨日。而余已老而憊矣。感賦。

當年赴舉秣陵關。歷歷前遊指一彈。乍見江山胸頓豁。未經場屋目無難。川原如舊人將老。文字求名興已闌。一笑昔時辛苦地。而今袖手作旁觀。

哭沈既堂前輩

哭盡知交剩此人。那堪今又萎窮塵。廿年回首過從跡。兩地關心老病身。擘紙分題曾對敵。典衣沽具記留賓。綠楊城外紅橋路。一度追思一愴神。

一江之隔水盈盈。書問雖疎意自傾。先我三科應論輩。詞林論前後輩。公長公六歲敢稱兄。磨牛蹤跡人皆老。折輩行與余交契。芻狗文章世已輕。哭寢蒼茫何限感。到頭誰駐蓋棺名。

荒景

天將降割此方民。災沴連番過十旬。夏至後無用。白露中又毒霧連日。無米可炊徒巧婦。有墻能乞卽良人。煮來菜甲連黃葉。

剝盡榆皮剩赤身。待到明年新麥熟。不知幾個得嘗新。

張甥聖時宦新疆之奇台尉五年俸滿告歸喜賦

玉門關外渺音塵。宦遠難期笑語親。豈意八旬垂老日。猶看萬里遠歸人。三間馬磨欣新築。百結羈衣記舊貧。重話少年孤露處。喜心翻到淚沾巾。

絕徼郵程萬二千。路遙職更重安邊。身經戍尉屯田地。時正丁零款塞年。疏勒泉清禾滿野。祁連山迴雪彌天。因君話到殊方景。我又雄心欲着鞭。

歲暮荒景益甚偕諸紳士設局勸賑卽事感賦

勸分鄉誼爲災黎。哀益先將戶籍稽。事鉅不同援嫂溺。惠微只恃乞鄰醯。身憂天下原非分。貲出他人豈自齋。從井救人堪一笑。兒孫方抱飯糲嗁。

立春前一日朱虛舟藩伯招同劉檀橋中允洪稚存編修湯樸齋員外瞿秩山觀察崔雲客太守陳樾齋家

味辛兩司馬蔣瑩溪別駕管道明州牧崔禮卿明府讌集卽事

嘉籟迎春雪未殘。聯翩裾屐赴辛盤。座多舊識無虛讓。肴是新翻各飽餐。花信探杯人射覆。酒兵衝陣將登壇。只

嫌漸啓憂華習。可少迂儒一味酸。

應酬

杜門概謝應酬忙。設版焦瑕自畫疆。老避聲名三退舍。閒看今古一炊梁。讀書漫恃青藜火。傳世何關古錦囊。堪笑鄭莊勤置驛。徒從冠蓋借輝光。

悼亡

已分今生不服續。誰知暮景鼓盆悲。生甘荆布無交謫。歿剩齏鹽有去思。得死夫前原是福。相逢地下料非遲。只憐老伴相依久。忍對空幃不淚垂。

在官日少在家多。辛苦持門鬢漸皤。薄產不嫌州種橘。敝居常理屋牽蘿。內言出柩先申警。側室生兒倍撫摩。家政如今更誰倚。祇應獨問夜如何。

椒觴隨例拜新年。病不能興黯獨眠。兒女滿前那忍捨。參苓無效竟難延。向隅暗淚潛流枕。營奠遺言戒費錢。最是傷心鳩祝嘯。翻疑辟穀去登仙。君以腸噎症病歿。

偶闕小倉山房詩再題

不拘格律破空行。絕世奇才語必驚。愛宿花爲胡蝶夢。惹銷魂亦野狐精。玄絃欲奪霓裳曲。赤手能擢武庫兵。老我自知輸一着。只因不敢恃聰明。

葉保堂明經多購抄本異書。內有馮夢龍甲申紀聞。陳濟生再生紀略。王世德崇禎遺錄。程源孤臣紀。吳等書皆明末說部中所記時事。可與明史互相參訂者也。楊舍寓齋無事。借以遣日。偶有感觸。輒韻之。

劫運人才國祚終。滿朝門戶正交鋒。東林點將罌兼煞。東林點將錄內。有天罡地煞星。南渡浮江馬不龍。園土清流屍裹蓆。演池劇賊堦傳烽。始知生長昇平幸。出處儵然一短筇。

四鎮調停已劃疆。此首專咏史可法。運移那得救垂亡。生嫌棗莢枝偏暖。公弟可程會降賊。昔文天祥有弟壁降元。死

葬梅花土亦香。韓梅花盡瘁孤忠諸葛表。立君大義崇陽綱。見可法答攝政王書。終數御筆褒華袞。高宗純皇帝御製。題可法答書後。

贈保堂

百里江城權瀾洞。喜逢知己好懷開。舊書容我巾箱借。今雨何人步履來。便擬結盟詩伴侶。相攜望海蜃樓臺。寓齋稍待荷花放。可少臨流一舉杯。

題沈荀蔚蜀難敘略多記張獻忠。孫可望等事。

也是西陲一劫塵。天教劇賊殄川民。豈聞狼虎能開國。竟使魚羊恣食人。君后支糧須計口。金銀沉水不翻身。不知當日殘黎幾。何處逃生伏棘榛。

喫煙戲咏

淡芭味不入醜酸。偏惹相思欲斷難。古詩。相思若煙草。豈學仙能吸雲霧。幾令人變黑心肝。噴浮銀管香驅穢。暖入丹

田氣辟寒。贏得先生誇老健。鼻尖出火駭旁觀。

次韻寄答陳蘭江同年金華教授

千里書來自浙東。無窮別緒寸函中。為詩我恐如高叟。通德君應號鄭公。五斗早看辭折坂。一甌聊當隱高嵩。初平叱石仙蹤在。安得相尋醉碧筒。

次韻答徐芝堂孝廉見贈之作

西山朝爽颯英姿。正喜披襟滯暑時。城北徐公原有貌。渭南趙嘏肯無詩。就吟本是同功爾。衰老應憐獨足夔。不覺對君慚譴劣。又思補下董生帷。

自戲

莫嘆氣味秀才酸。三十餘年不服官。入世更無同輩語。聞名都作古人看。眼昏屢為塵揩鏡。頭禿惟憑帶繫冠。姑

妄言之供一笑。幾時謁選到長安。

靜觀

古而無死復何哀。悔不機杼早自摧。老樹尙誇霜後勁。名花可惜雨中開。耐閒還藉書消遣。謝病兼辭客往來。莫怪蓬蒿滿三徑。久無屐齒印蒼苔。靜中觀物見天真。小闌庭齋景色新。枯木有藤青借葉。流螢無火碧成燐。筇枝懶拄惟呼僕。紈扇將捐尙戀人。自笑生平置何等。老來剩作臥雲身。

書賈施朝英每年就我刷印拙刻甌北詩鈔餘叢考廿二史劄記十家詩話等各數百部書以一笑和凝板本早雕鏤。卻被屠沽索價酬。鼠璞料無三倍獲。雞林可有百金求。奇分宛委藏書穴。氣壓麻沙販客舟。我是爲名他爲利。大家不免達人羞。

哭蔣立崖之訃

噩耗傳來夢亦驚。寢門爲位淚泉傾。斯文謬荷推先達。知己方將託後生。詩有未招魂旅跡。感深不見面交情。君事遺成烏魯木齊。從奎林將軍處得拙詩歸。遂謁我定交。可憐繡谷齋前酒。猶記清談到五更。

閱竹葉菴遺集

三年京邸共挑燈。遺集差欣入剡藤。走觸醋瓶原是癖。覆來醬甌有誰搔。詩文須到重翻板。名姓焉能久繫縲。放眼藝林聊一笑。才人何限氣飛騰。

忽夢重守鎮安感賦

久無夢到日南春。忽過之官撫舊民。白首重來誰識我。青山無恙尙迎人。樂公社在香猶裊。馮婦倉開粟已陳。好似令威華表鶴。小遊仙去認前塵。

浮榮

明知聲譽亦浮榮，尙未甘爲腐草螢。當代更無毛子晉，他年誰輯趙明誠。送終自是兒曹事，作誅徒叨舊友情。只有詩文早流播，或堪塵坳駐微名。

觀噶都閩校獵

霜落秋高校獵時，平蕪草薶正堪馳。鼻尖出火鈴追犬，耳後生風箭叫鷄。壯士功名三尺劍，將軍號令一竿旗。多慚壁上閒觀處，不及周陞一健兒。

暨陽野望

客居恬適漸忘家，少憩郊原倚杖斜。江上無風三尺浪，山中有歷四時花。勤更單夾暄涼服，預識陰晴曉暮霞。又是秋成黃落候，相從野老話簞車。

吳門晤范洽園編修馮實菴侍御潘榕臯員外暨蔣于野兄弟

訪舊重來七里塘，經年不見倍情長。何當老態三遺矢，還附名流一瓣香。相戒不談朝市事，得閒已淡利名場。暮年正要飛騰景，同看紅霞綉夕陽。

俊兒以我年邁強進參劑其價四百八十換此豈吾輩所宜

鯉庭奉我養生方，一擲千金付藥囊。少日已甘三韭菜，晚年翻飲獨參湯。固知毛裏關心切，豈藉刀圭買命長。氣散則歸原順事，老夫心早契蒙莊。

靜觀

從來風月屬詩家，惜未潛參迹象賒。聚散不常雲出岫，早遲有信樹開花。鬼無靈爽憑何祟，物有菁英肯不華。尙愧觀梅少師授，難將易理洞幽遐。

煖足用温水貯錫孟入被中可達旦不冷昔黃山谷名之曰腳婆今俗呼爲湯婆戲咏

一斗溫泉貯錫孟，勝他黃燠夜相娛。書引睡。日黃燠。布衾絮薄堪伸腳，二見新唐書。周寶九傳。紙帳花寒不結跣。裹過牀邊安



虎子器。媛逾被底睡狸奴。放翁詩。夜長。老夫正得女妻樂。不許稱婆要改呼。

### 東籬

東籬半畝薔薇菜。散步消閒日幾迴。蔀屋何嫌非館閣。桃源豈必有樓臺。花無名字因心造。客有談諧笑口開。詩料平時久忘卻。誰知收召也還來。

### 過杭白峯之墓

少年同學最關情。重過荒郊宿草塋。死已無知何麥飯。生雖有食只藜羹。書窗共硯論文夕。蕭寺聯牀聽雨聲。他日九原相見處。可能還作舊嚶鳴。

### 歸途

半畝庭齋百卉菲。客懷欲別轉依依。幾同夢澤留居久。見李太白集。笑比和林避暑歸。乳燕經秋空墨去。鷓鴣向暖故山飛。候門遙識孫男女。先認衰容較瘠肥。

### 和保堂甘露寺咏李德裕之作

千步禪林列岫環。衛公會此躡屣顏。杖無方竹留蕭寺。公以方竹杖贈寺僧。僧圓而漆之。泉有中冷敵惠山。公在長安用水。想應羊食盡。清波雜志。公羈魂難附鳥飛還。在海外有詩。獨上高樓望。倘恢相度消朋黨。千載英名孰許攀。

### 觀化

註釋蟲魚愧大家。豈知天咫驗萌芽。鐵鞵踏破春難覓。葭管吹來物自華。水力不濡覺鴨毛。鳥鴨入水。毛亦不濕。能變鳳雛花。鳳仙雞冠。儼然。眼前何一非新意。猶只恆河裏一沙。

### 己巳元旦

東風吹送物華新。八十三翁拜紫宸。余歸田後。每歲元旦。富貴場曾甘退步。昇平時易作完人。添簪且喜增年歲。鼓缶惟當樂夕晨。回憶求名赴京國。一週花甲又逢春。

閱歐陽五代史多戰爭之事夜遂夢身履行間蓋神不守宅有此迷離恍惚之境尤屬衰至之徵也詩以記之

忽然夢入大槐安。竟似身登上將壇。帳下練兵皮蹴毬。筵前擁妓肉臺盤。幻成勢燄非真境。出自貪癡本笑端。聊喜小遊仙一霎。豪華快洗秀才酸。

人日大雪喜賦

人日欣逢瑞雪來。萬花飛舞把春催。雞聲誤認三更月。狗迹工摹五瓣梅。大地頓教成玉海。新年先喜賞銀杯。老夫髮亦盈頭白。敢詠梁園作賦才。

是日味辛治具肴饌極精座中衣袷綈絨者五人余裘最敝而余年亦最老或謂燕毛卽所以序齒也滿堂皆噴飯而余以主人族誼不敢當首座之尊詩以解嘲

餘酥送暖歲初更。鄉飲連朝遞治觥。數見不鮮人太熟。後來居上饌逾精。裘如劉帥隨年杖。酒闋王郎斫地聲。笑我已甘辭首座。漁樵席上不須爭。

正月十九日爲亡室程恭人忌辰脫纓輟泣老淚已枯孑然顧影轉覺神傷也

簾鏡輝沉歲一期。悼亡騎省有餘思。別來形影空相弔。夢裏悲歡只自知。漫有牀前阿堵物。也多膝下寧馨兒。一家依舊團圓具。脈脈鰥魚淚獨垂。

健閒放翁詩。造物予閒兼予健。

已交大壺滿頭霜。飯不能強步履強。我慕九旬胡壽愷。梁先輩胡羨。年幾壽堂。人稱四海魯靈光。僅留畫餅名何用。且喜炊梁夢尙長。大予健閒甯敢負。一筇一笠一輕航。

聞筠浦相公總裁會試喜賦

相巨主試明文華。鎖院深嚴靜不譁。四海久知心似水。九重兼倚眼無花。量才尺掄風騷古。大駭駘奔騷古。駭駘奔騷古。

十年前辛苦地。今看親示指南車。

吳洪稚存編修

里閭徵逐慣從遊。一病何期竟不瘳。生為狂言投萬里。君以上書一死猶遺稿待千秋。繁音不聽梨園調。聽戲

健步堪當剡曲舟。出必步胸次知君原灑落。古來何事不浮漚。

賜環歸後脫征衫。十笏新營老學菴。花事巧分殿七七。風情亦狎董三三。被贈李方叔詩。須煩李居士。重高說後三三。謂所昵營妓董九。

才失路宜無賴。妄語欺人固不慙。老我獨傷同調盡。共誰茗盃作清談。

廿年以長合先亡。豈意翻為作輓章。為我前驅開覺路。比君後死殿名場。作碑索謝非錢癖。斫地悲歌亦酒狂。終

有未消奇氣在。重泉應尙吐光芒。余長君二十年。嘗戲謂君他日當為吾作墓誌。君曰知此則先生當早逝。待吾下筆。余笑謂遲余死。正以延君壽。反相促耶。一時戲笑之言。

竟成語

本擬憑君作替人。豈知先我委窮塵。江淹誰與收殘錦。王翰空教卜近鄰。余與君共一條街。和韻詩常推勁敵。賈文錢尙

賑飢民。更從何處論陰德。救得蒼生反殞身。丁卯捐賑。君獨任其勞。

哭劉瀛坡總戎

如此相知忍棄捐。身騎箕尾竟登仙。精神老未三遭矢。仕宦歸惟二頃田。儒將風流鈴閣靜。郎君水藻笏牀聯。公

子皆榮仕。知公脫屣應無憾。獨我憑誰伴暮年。

自愧

求仙學佛兩難成。虛負書窗一短檠。年老慣為人送死。才疎敢與世爭名。與來未免回頭錯。數盡何妨撒手行。只

愧東山但高臥。曾無絲髮濟蒼生。

瑩溪閣拙詩獎借過甚愧不敢當敬酬奉答

書生結習只雕蟲。謬賞叨稱錦繡胸。不朽名須身自定。相知人每世難逢。居貧聊享千金帚。老倦惟支九節筇。儒

者當爲事何限。愧將寸管鬪詞宗。

戲調瑩溪

死盡交游絕足音。更無朋舊與披襟。欲聯後輩爲同輩。未必他心似我心。浮白百杯嫌費酒。呼盧五木怕輸金。不如還把殘書看。消得分陰又寸陰。

目暗

安得空青點眼眶。糊塗過日意難降。近看三尺不能四。遠望一人偏似雙。此一聯非親歷其境。不知也。暗避炎光籠皂幃。明貪齋景就疎簾。短檠終惜拋牆角。健筆猶思百斛扛。

余方有聽他有句自然來之句。明早枕上忽得人間無路海茫茫一句。初不知曹唐詩也。隨又得雲外有天星歷歷。湊成一聯。亦出於無意。蓋余修文赴召之讖矣。補成一律記之。

步虛詞豈學曹唐。忽漫詩來夢蝶牀。雲外有天星歷歷。人間無路海茫茫。嚙言本不論工拙。讖語何須取吉祥。贏得老誇詩境熟。偶然脫口便成章。

獨夜

麗譙榔鼓夜初長。節物經秋愛淺涼。殘雨濕留聲點滴。孤燈清照夢悠揚。時趨競尙新翻曲。舊學幾忘急就章。心事都來五更枕。又添一番應酬忙。

放言

幻緣妄念總蠲除。獨立蒼茫想古初。混沌之中生在卯。羲軒以上讀何書。五紋刺繡同毛褐。七寶樓臺亦草廬。身不百年心萬緒。何如一切付空虛。如此昇平不放狂。更於何日得相祥。官高崔烈榮仍臭。壽到錢鏐死亦殤。千古棋枰無定局。一時竿木且逢場。竊餘童耄觀河處。見性依然久不忘。

夜坐

秋來一雨一番涼。宴坐蕭齋夜未央。詩句鍊教生處熟。才名排到短中長。塵勞誰脫千絲網。世幻從看百戲場。只有及時行樂好。木樨過又菊花黃。

年初偕同鄉諸公。艤舟亭探春。半年間瀛坡雅存相繼下世。今日重遊不勝存歿之感。

曾聯步履探春光。今日重來泊野航。一畝園仍好林壑。半年事已小滄桑。人生最樂惟交契。老境愁逢是死喪。便抵黃公爐畔路。臨風回首獨蒼茫。

一蠶

豎頭橫目本無奇。萬蟻叢中一蠶微。徒守書歎身已誤。縱成詩聖世奚裨。綵花色好非真豔。畫餅名高不救飢。五岳胸中且收拾。不如隨分醉深卮。

恭遇皇上五十萬壽。翼偕在籍紳士艤舟亭度設經壇叩祝敬賦。

蕭齋頻問夜何其。起赴郊園叩祝釐。地是城東迎蹕處。人皆林下掛冠時。梅檀香灑春雲護。梵唄聲長畫景移。自笑朝衣箱久疊。今朝綵繡滿身披。

聖壽尊恩典隆。養耆翼以年逾八十得拜絹綿米肉之賜。恭紀三首。

遂初久不經朝班。帝賚猶蒙及退閒。養老愧無言可乞。錫釐早有詔先頒。優同清俸支宮觀。喜溢榮光耀市闌。莫怪放翁誇十錦。宋制。致仕後有祠祿者。所領賜物名十樣錦。見放翁集。歸田人再拜恩難。

普天慶會共呼嵩。想見天閭淑景融。運是太和春不老。數纒大衍日方中。滄溟無警妖氛熄。繡甸咸登歲事豐。如此鴻禧逢七度。吾生幸亦幾人同。自乾隆辛未至今。恭遇國慶凡七次。

賜葛猶誇杜拾遺。況逢慶典荷殊施。殘牙曾吃紅綾餅。妙句慚無黃絹辭。庠序榮推三老席。庭階暖護萬年枝。卻憐筋骨衰屏甚。不得親身叩玉墀。

消寒

冰霜如此出何之。排日尋歡遣歲遲。營室但期容我膝。時方葺暖室。說詩何必解人頤。收藏雪水金莖露。檢點梅花玉樹枝。轉眼消寒過九九。春光又到艷陽時。

閒不可耐或勸余雜撰戲本以遣時日者余老矣豈作此狡獪耶謝之

哀樂中年易感傷。故應絲竹遣流光。豈堪花月張三影。自譜琵琶趙五娘。羅貫中曾三世啞。郭門高後唐莊宗優名。竟及身亡。祇餘玉茗湯開遠。湯若士子。明末殉難。留得清芬在戰場。

日計

東坡日計百錢又。枕上先期飭吃齋。省費擁爐燒石炭。取酣篘酒壓茅柴。十千漫想何曾飯。廿七聊師庾杲鮭。留與熙朝歌擊壤。含哺鼓腹作無懷。

戲為伴體遺聞

莫須有者且勿論。何以文為寧更華。吾在久將公等歷。予求固不汝曹瑕。心常欲按無明火。事不求全也罷茶。閒遣無聊作伴語。麗譙更鼓已三槌。

關綏寇紀略蜀亂遺事

不信人間浩劫塵。一羣屠伯毒峩岷。後房奏樂身無首。白晝騎牆鬼瞰人。殺運自然生劇賊。與朝仍不列功臣。關

為本朝先驅之資。誰知今日蕃昌景。蜀錦邨筒萬象春。蜀江如沸血流紅。銅馬妖氛恣內訌。縱欲逃生先斬艾。漫言好殺是英雄。氣憑地險濤轟峽。力與天爭礮打空。論

報尙餘遺恨在。僅償一箭貫當中。

庚午元日

朝正絳闕集鳴珂。野老惟知擊壤歌。豐樂年成春酒滿。昇平時世壽人多。回思壯歲真彈指。曾向名場奮決科。重

赴鹿鳴如可待。輕橈準擬泛滄波。

百年難遇歲朝春。何幸親經此令辰。天厭雨回雖省事。公厭雨回。省是天科逢乙榜又與賓。余中式乾隆庚午科舉人。今又逢嘉慶庚午

消閒

消閒何處覓清娛。仍守殘編坐結趺。忽得新思矜弋獲。偶忘佳句費追遺。眼前惜少嚶鳴友。海上由他逐臭夫。他日有人如作畫。或疑伏勝授經圖。

重向陳編續舊盟。多生結習有餘情。居今敢便忘稽古。細行何能受大名。高枕北窗尋樂地。擁書南面作長城。衰殘敢謂無餘事。炳燭光猶到曉明。

自幸

何處偷來得此身。天教晚作葛懷民。少經貧賤庸知足。老剩衰孱更率真。風月從來無盡藏。英雄大抵是癡人。祇應獨領閒中味。跌坐蒲團結淨因。

詹尹何須問卜居。及時行樂步當車。渡江春到花爭發。過午人歸市自虛。宵怕不眠惟強酒。晝嫌無事又看書。偶然食肉仍愁脹。熬熟山查候飯餘。

楊雲珊自長垣歸出示近作嘆賞不足詩以誌愛

四海交游剩隻身。師資豈意出比鄰。向來枉自求知己。垂老今纔得替人。入木三分詩思銳。散霞五色物華新。從今鑿壁光堪借。請益何辭步履塵。君與余比鄰。

畫士顧生爲我寫照即題幀末

山澤之臞土木身。偶煩畫史爲傳真。功名不上凌烟閣。尸祝寧期畏壘民。窗下猶勤三寸管。鏡中暗換十年人。他年留作高會矩。或有書香尙可循。

志興

東風桃柳一番新。又是陽和大地春。代序屢遷身易老。物華方富我寧貧。要觀後世無窮事。想作長年不死人。只有學仙堪耐久。卻愁修煉太勞神。

夜夢忽得熏香侍女整朝衣。一句似係早朝詩。爰足成之。

羅幃頻問夜何其。爲有封章上玉扉。掌漏監奴添夕燎。薰香侍女整朝衣。九宵籟寂鐘初動。千樹陰濃露未晞。取次東華車馬集。五雲亂縵藹祥暉。

過前明故宮基

萬里山河百戰收。子孫容易失神州。龍驤竟渡無天墜。虎踞空傳有石頭。遺俗後庭歌玉樹。故基羅郭蓋金甌。峯陵靈爽如重過。應有滄桑涕淚流。

大功坊

中書行省大功坊。開國勳名絕輩行。草昧未開能擇主。旂常難報到封王。遷移故宅空遺像。事往威聲尙戰場。今日經過一憑弔。令人想見奮鷹揚。

白頭

老壽人皆羨。久留久留亦苦少朋儔。徧翻除目無相識。欲作遨頭孰共遊。歲月只知方未艾。身名悔不早爲謀。可憐多少同心友。一一看他土一抔。

重赴鹿鳴宴恭紀四詩

歲又逢庚赴舉忙。賓興筵許附榮光。老僧回證初禪地。退將重經舊戰場。見獵敢云心尙喜。收棋聊幸拙堪藏。綴行同出人爭笑。白髮翁隨白面郎。

歸田卅載臥江村。十笏書齋兩板門。豈有才猷供世用。祇將老壽倖朝恩。恭偶聖壽覃恩。已拜絹綿酒帛之賜。身謀已刻塲爲杖。



眼界從曠處禪。敢復誇張年少事。從戎曾役百乘軍。

重赴金陵四日程。滄江如舊布帆輕。曾經鹿沉船戰。再聽春蠶食葉聲。九折坂猶心畏蜀。三神山孰步登瀛。風簷弋獲原非易。多少文心耗短檠。

未得追蹤洛社英。喜從新榜結齊盟。敢期同輩尊前輩。未必先庚勝後庚。智可識途推老馬。才慚橫海掉長鯨。鹿鳴重宴已非望。遑想瓊林再舉觥。

### 赴江寧途次奉恩旨加三品職銜准入鹿鳴筵宴再紀五首

布帆安穩出橫塘。隄柳纔秋葉未黃。此去不須三寸筆。重來已是滿頭霜。也勞送別如征客。豈尙求名赴舉場。聊比看花踏陳迹。元都前度老劉郎。

遂初豈意忽遷鶯。爲歷鄉闈兩鹿鳴。曾是昔年辛苦地。重聽嘉宴管絃聲。席間多已先科第。監臨及監試提調。皆由科第。榜上何須有姓名。自是聖朝修盛舉。衰孱敢濫廁耆英。

曾叨先帝舊朝臣。久作還鄉賀季真。敢望紹庭收廢籍。再蒙進秩換華紳。青雲一榜新先輩。黃髮三朝古老人。回首生平歎歷處。翻教感切淚沾巾。

早朝曾趁露華晞。久疊巾衫黯不輝。佚老只宜居士服。希榮翻製侍臣衣。蔚藍頂上明更暗。道員青金石頂。三品用透明藍玻頂。繡補胸前走變飛。道員繡牙補服。三品用孔雀。更喜家居無職事。淮鷓得免曠官譏。

先後同年強作儔。不曾同試月燈球。周忱自願爲挨宿。欽若終嫌是贅疣。退院身惟隨粥飯。緯蕭人已狎鷗鷗。豈知六十年相隔。還向時髦結輩流。周忱館選時。已取二十八人。以應列宿。忱自願讀中祕書。遂入選。時謂之挨宿。

### 制府松公湘浦贈三品冠服謝

恩詔加銜寵腐儒。卽蒙購贈適相需。正思覬耀榮君賜。恰好莊嚴稱我軀。韓尉豈誇衣錦繡。管寧仍戀布裙襦。祇應大雅扶輪力。要俟文昌聚讖圖。

奉和監臨廣撫軍省堂見贈原韻

發解筵前鼓樂鳴。腐儒何幸得分榮。直將局外殘棋着。來佔人間畫餅名。疎懶久成都散漢。引援應作老門生。只慚悞玷山公啓。夾袋中人到列卿。

原作

廣厚

天尙留君賦鹿鳴。

用集中句。

仰邀賜爵羨恩榮。數編甌北詩人集。一代江南才子名。若論甲科真後輩。敢言推薦卽

門生。蚡看再拜瓊林宴。百歲官加三品卿。

隨園弔袁子才

隨園風景尙依然。今日重過剩故阡。花藥尙爲才子艷。亭臺能守後人賢。十年俯仰成陳迹。並世交遊亦宿緣。老我獨傷同調盡。臨行能不重留連。

稱詩

稱詩何必苦爭新。無意爲詩境乃真。水月鏡花言外意。雪來柳往景中人。江東杜甫雲垂暮。枕上歐陽夜嚮晨。食地肥烟火氣。仙人掌有露華新。

老友莊似撰

別字虛菴。

官關陝三十餘年。海陞牧守今年老。致仕貧不能歸。遠承書訊詩以寄答。兼望其早回。

朋簪氣誼最相親。一別俄驚三十春。顏狀久應青鬢改。情懷猶是白頭新。遊蹤王粲登樓賦。近局陶公滿酒巾。得及此生重見否。大家都是暮年人。君今年七十六。余八十四。

寄來書札尙專精。想見康強老眼明。躁進不爲偏躁退。高官已做又高明。晚中樂事惟良友。家計貽謀付後生。我已移居屢道里。速來相伴作耆英。

重赴鹿鳴詩海內名流屬和者三四千首。暇日編輯長卷。戲書於後。

桑榆景受國恩深。引得名流共苦吟。白雪一歌無下里。朱絃三歎有遺音。疑心尙想佺喬壽。佳話仍添翰墨林。老

健未須嗟大耋，聊將鼓缶當鳴琴。

再題諸名流屬和重赴鹿鳴詩長卷

工歌堂上奏華萼，重憶賓興典物昭。禮樂尙存三代古，衣冠肅拜九閩遙。宴前先望。調行禮。文昌風景描難就，司隸威儀靜不羈。我比新郎君更幸，榮遷不藉燭三條。

雜感

人謀常向巧中疎。陸放翁句。蘭偶當門本易鋤。枉自守株猶待兔，幾曾緣木可求魚。曲肱奧室閒無擾，曝背晴軒暖有餘。任是屣緣蝟毛集，吾身自有指南車。

歲晏

老猶頑健眼纔花，似覺年光尙未涯。館閣人皆成後輩，詩文集頗列名家。身無遺憾常安枕，室有餘閒自煮茶。預喜麥收炊餅大，陳釐中擬傲京華。

重赴鹿鳴詩和者既多或勸余刪潤勒成大卷書以見意

牛腰籠卷聚文心，都是名流大雅吟。聊喜拋磚能引玉，豈須點鐵始成金。人才輩出如連茹，同氣相求自盍簪。贏得老夫誇口說，苞苴滿屋總璆琳。

野夫

網漏吞舟一野夫，少年館閣晚江湖。詞林故事惟香茗，來宗道作相。笑倪元璣屢言事。謂集何必多言詞林故事。惟香茗耳。時稱爲清客宰相。見明史本傳。名士高年入畫圖。陸放翁詩。團扇家家畫放翁。寧復鐘聲催傀儡，已收槿末舞都盧。只慚詩不求工處，共笑吳歎膽太麤。

辛未元日

纔看重赴鹿鳴筵，況值江鄉大有年。天幸已多非敢望，飯緣未滿似猶延。惜無好友聯裾屐，剩有閒情付簡編。早喜春光引清賞，傍花隨柳過前川。

聞民

中歲歸田賀季真。四民之外一聞民。敢希孔廟廡間肉。猶是盧生夢裏身。光景常新惟好句。取攜不盡是芳春。只慚自命居何等。老作吟憊擁鼻人。

浮論

浮論無稽槩可刪。涇淵如膝相回環。適從何來蠅集此。聊以充數蝨其間。丈夫動足有萬里。寒士待庇逾千間。局促駘駒豈足道。出門一笑開心顏。

靈巖山館弔畢秋帆制府

靈巖山館好邱樊。吾友居停席未溫。過客尙尋清閣閣。籍官幸免奉誠園。錦帆涇駛無游舫。響屨廊空有斷垣。太息盛衰纔廿載。徒令憑弔一銷魂。

哭筠浦相公

晚景何期有此哀。通門高竟泰山頽。生多遺愛留三省。歷官江省最久。歿尙賢聲邁九垓。老健不須扶杖拜。恩深未敢乞身迴。公常有乞身之恩。獨憐衰朽將誰倚。無復餘光到草萊。

交誼苔岑五十秋。喜聽揆席懋勳猷。登龍門有人增價。旋馬廳無地宴游。別久尙期杯在手。年高應亦雪盈頭。平原閣卽西州路。那禁羊曇涕淚流。

內姪劉慕陵運副自潮州致政歸里喜贈

歎歷功高遽引年。生平宦轍總遐邊。南經陸賈降陀地。西鬪張騫擊空天。并會駢西藏三年。拾級正堪前齒展。收篷偏趁順風船。始知身處脂膏潤。原有文臣不愛錢。

遣興二首

三閩砥室淨無塵。老作人間一幸民。雞譚爲犧先斷尾。鵠雞中的反求身。白頭到處招人厭。青眼憑誰向我親。樂

地總歸名教內，奔馳多愧枉勞神。  
剔盡殘燈夜嚮晨。商量要保不訾身。儒門風味從來淡。老境詩篇不翻新。聊復收香如倒挂。久將嚼蠟看橫陳。只  
憐孤寂無交契。把卷惟應對古人。

每日飯後庭中行六百步。冀以流通血脈。遂成老年日課。

不可徒行舊大夫。聊當行藥步庭隅。磨牛踏處惟陳跡。垤蟻旋來總坦途。飽食不教攤飯臥。偃行時亦沒階趨。更  
添短拐相幫處。自笑無官尙給扶。

朝衣

久疊朝衫歲屨更。一年兩度街恩榮。聖壽及元旦。出游未共春衣典。起早翻如夜繡行。侍女熏香殊故事。書生服采記  
初程。曾經六十年收筭。冷暖相關倍有情。

九秩

九秩開籌鬢已皤。壯心尙擬奮提戈。嫖姚遠出祁連塞。劉秩親麾曳落河。雞豈惡聲天下曉。馬皆健足雪中過。歸  
來獻捷明光殿。傳與邊關唱凱歌。

勇退

生長江南鬢已皤。也曾績學戒蹉跎。書生敢與人論福。老境惟期樂有窩。撫任榮華辭最早。平平歲月享尤多。倘  
非勇退甘閑散。或恐亨衢有折磨。

浮論

毀有求全譽不虞。祇應自握定心符。絮衣頻喚縫人補。藜杖聊當倩女扶。蠅可遠飛緣附驥。馬經屢寫或成烏。識  
真自有蘭亭本。肯逐時流說苑枯。

謙鼓

譙鼓三揭夜響明。書生事已近殘更。壯夫不爲雕蟲技。下士大笑蒼蠅聲。冷蘂尙留殘菊艷。早香漸綻老梅清。小春已覺風光好。預擬尋芳帶酒鎗。

揚州

綠楊城外泛輕艫。放眼先開四望窻。柔櫓搖如魚掉尾。快帆掠似鴈橫江。馬頭冠蓋長亭路。牛背兒童短笛腔。回憶昔遊將廿載。依然風景似鄉邦。

老來

老來意興漸頹唐。踏鼓東華夢久忘。尙有真嗔癡未去。敢誇才學識兼長。筠簾早捲延朝爽。羽扇輕揮納晚涼。所愧客來須答拜。呼兒代我應酬忙。

江陰道中

一枝柔櫓泛輕橈。橘綠橙黃九月交。碎石砌牆無縫巧。老藤絡土有根牢。豐年野宿無心警。永夜清吟亦口號。倚檻莫愁風露冷。巾箱尙有舊綈袍。

獨立

獨立蒼茫度寂寥。結廬人境穩東臯。翠微經雨山新沐。黃茂收場地不毛。野斷過船搔背癢。矮牆取果等身高。只慚好景無佳句。空負詩中一世豪。

鄉居

畏巖鄉居似野僧。蕭然氣味冷如冰。割禾地頓低三尺。種麥田翻顯百腔。露積場皆推突兀。新篔人有醉澆騰。老夫倚杖柴門外。閒向斜陽數過禽。

題黃道婆祠

松江初來教人織布者。

一技專長濟萬邦。故應祠廟赫旌幢。高樓占地不占地。平水通海又通江。未有蠶桑人挾纊。共勤機杼女鳴窗。若

看鷺脰湖邊月。夜夜寒燈剔短缸。

過靈巖山故人葬地已易主矣感賦

買得青山作殯宮。書生願力故豪雄。主人藉此地。豈知身後牛眠地。又換生前馬鬣封。礮石纔鑄新勒碣。護墳即用舊栽松。靈巖一片佳山水。留作他年弔古恫。公自言吾墓此。使人長指某人之墓。足矣。

吳李喬生郡博

朋簪回數幾心交。腸斷揚州廿四橋。步履過從無半里。盤餐留話動連宵。喜聞質庫開闡。更買高閣俯麗誰。獨有故人餘老淚。更無灑處湧如潮。

相國尹文端公節制兩江四十餘年遺愛在人久而弗替今蘇州新建名宦祠奉神主入祀翼以老門生得襄盛舉欣忭難名敬賦以誌

傑構尊嚴五百弓。名臣入祀典儀隆。死如可作吾誰與。沒尙難忘世自公。嘉樹好栽丞相柏。孤標獨挺嶧陽桐。尙留白首門生在。親見勳庸勒鼎鐘。

爲人寫墓銘後戲題

老去羞留疥壁塵。書丹遺寫墓碑勻。百年白頭同歸日。五字蘭亭不損真。帶減腰圍幾一寸。筆磨腕力尙千鈞。他年藝苑傳佳話。竹垞貪多恐笨人。

鄉試屆期分遣彥兒科聯孫就試南闈和羹慶齡向京闈赴試詩以送之

賓與才俊競躋攀。分遣兒孫各上壇。兩路夾攻應有獲。衆擎易舉或無難。科場得失原靡定。文字妍媸要共觀。倘得泥金來報捷。老夫那不更加餐。

習靜

慾障邪魔絕外緣。祇將習靜養衰年。孫曾名字須披簿。賓友音書少答箋。獨宿慣嫌釵澤氣。中虛惟啖粥糜眠。只

慚杏酪清晨吃。未免呼童隔夜煎。

## 絕句一

題黃丈季游梅花小照

雪作寒交月作鄰。水邊疎影本前身。始知畫手傳神好。只寫梅花不寫人。

野菊

多少秋芳入貴家。獨餘籬落幾寒葩。對君莫訝相憐甚。同是無人賞鑒花。

澄懷園消暑絕句

名園長夏景清和。借與幽人領略多。絕似溫公洛陽墅。爲堯夫結一行窩。小雨如酥過曉風。幾枝豔發映簾櫳。女郎愛插花盈鬢。試手先探月月紅。一榻花陰對綠洄。茶烟香篆互縈回。蕭齋四面皆窗戶。何處風來何處開。一編閒讀首楞嚴。後夜雞鳴靜諦拈。香罷經聲歇禪榻。諸天細雨正廉纖。

題畫

碧梧漏疎陰。綠蕉濺餘濕。高齋寂無聲。獨鶴如人立。沿溪一茅齋。老樹出屋頂。采藥人未歸。野鷺踏孤艇。薄暮蕭齋下。高人相對閒。夕陽紅不盡。楓葉滿空山。

和沈倬其同年看花絕句

薊門霜冷見春遲。吹透東風了不知。忽漫一枝紅杏出。累人牆外立多時。

江上逢歸鴈



幾點春雲鴈北飛。首塗故與客相依。渡江一樣從南去。我是出門他是歸。  
曉起

茅店荒雞叫可憎。起來半醒半懺騰。分明一段勞人蠶。馬曠殘芻鼠瞰燈。  
東昌道中卽景

野田有砂有礫。邨屋半草半泥。雞如鳥能上樹。馬可當牛駕犁。  
單髮女騎驢背。其夫欣爲執鞭。拾通兒逐馬尾。其父快於積錢。

香山夜歸卽事

露柳清陰十里遙。阿誰乘月夜吹簫。馬頭相並無迴避。同踏香塵過板橋。  
鬢絲秋老杜樊川。那復風情似少年。慚愧驚鴻偏照影。誤人春夢小遊仙。  
夜永棲鳥寂不飛。露華涼欲透羅衣。玉驄亦解人長會。故踏花陰緩緩歸。  
纔下雕鞍又二更。臨歧含語未分明。從今破盡枯禪戒。不在鄰牆釵釧聲。

題王石谷畫

一雙雁依淺渚。幾葉葦折寒流。莫向夜深清唳。有人江上悲秋。

郊外散步

幽尋步林樾。淺草道旁斜。不爲無人看。臨風也作花。  
古樹圓如織。綠陰了不暑。無人領此清。黃鸝坐交語。

偶題

風雨寥寥畫掩廬。一編吟到夜窗虛。廚娘莫聒瓶無粟。我已修成乞米書。

戲題姮娥奔月圖

碧天清怨有誰知。奔月非關竊藥馳。如此容華嫁窈窕。教他那得不分離。  
穀率能摧九日精。何難射落月輪明。尙留桂館藏嬌地。此老當年也有情。

古北口

設險人增一堵牆。天公寒燠豈分疆。如何一樣垂楊樹。關內青青關外黃。

題蔣心餘歸舟安穩圖

軟紅塵土十餘年。一棹滄江意渺然。此老平生終歷落。不登卿相卽求仙。

桃花貼浪柳垂隄。一葉歸舟老幼齊。難得全家總高致。介之推母伯鸞妻。圖中太夫人。號夫  
人。及諸郎咸集。

年家娣姒往來親。內子披圖省識真。燈下側聞頻歎息。他家真作去聲鹿門人。

雞犬圖書一櫂輕。寒官也算宦囊成。扁舟莫笑歸裝薄。還與空江載月明。

十字簾鉤拂柳絲。大朝佳麗好填詞。挑燈自製秦淮曲。唱殺長干老伎師。

采石磯頭片月高。一千年後少詩豪。知君辭酒江天夕。尙有生平宮錦袍。

種樹

帶得豐臺土一杷。栽來高已拂簷牙。庭前突見濃陰合。欲賽仙人頃刻花。

胸中邱壑構何年。種樹爲園翠蔽天。看是豪奢卻寒儉。省他六月搭棚錢。

催喚僮奴抱甕過。防他生意漸婆娑。偃行樹下親澆壺。自笑身如郭橐駝。

翠痕深映讀書堂。不見花紅但葉蒼。說與愛花人聽取。花時那比葉時長。

納涼

暑坐到參橫。微涼猶未生。誰知秋有信。已在一蟲鳴。

題吟薌所譜蔡文姬歸漢傳奇

識曲工詩韻若蘭。忍隨塞馬到呼韓。人間何限傷心事。千載同悲李易安。  
也似蘇卿入塞秋。黃沙漠漠帶旄裘。諸君莫論紅顏污。他是男兒此女流。  
琵琶馬上忍重彈。家國俱催兩淚潸。經過羽妃青塚路。轉憐生入玉門關。  
逸典能抄四百篇。不煩十吏校丹鉛。誰知書籍壽王粲。翻賴流離一女傳。

暮夜醉歸入寢門似聞亡兒病中氣息知其魂尙爲我候門也

跬步相隨履跡存。牽衣每到月黃昏。豈知死後孤魂在。猶爲而翁夜候門。  
簾鉤風動月西斜。彷彿幽魂尙在家。呼到夜深仍不應。一燈如豆落寒花。

中秋夕感作

又看中秋片月圓。未乾老淚再潸然。一家依舊團圓夜。憐汝孤魂若箇邊。

題汶上旅壁

十二年前過汶河。曾徵紅粉唱迴波。不堪老去重來宿。遺聽韋娘一曲歌。

舟至瓜洲連日風阻不得渡詩以遣悶

吹浪江豚捲白波。歸心便擬亂流過。長年苦勸公無渡。畏險休貪趨路多。

下雷道中

密箬長留太古青。陰森蔽日晝如暝。樹名龍骨藤雞血。好補炎方草木經。

灤江舟行

元行連日上灘遲。稍喜揚帆疾若馳。纔得順風河又轉。世間那得稱心時。  
絕假盆地聚碧房。嵌空石笋滿江灣。化工也愛翻新樣。反把真山學假山。

碧雞關

苴蘭城外又青山。一道風烟入百蠻。勒馬雲端重回首。夕陽人在碧雞關。

瀾滄江

絕壁積鐵黑。路作之字折。下有百丈洪。怒噴雪花熱。

將軍果毅公。以額魯特兵分給余帳供役。

帳下浙添突騎多。曉隨鳴鏑夜橫戈。軍中莫笑書生弱。親領羌渾曳落河。

題春山仙弈圖

花落空山了不知。爲他勝敗未分時。神仙已遣名心斷。閒氣猶爭一着棋。  
局中算劫正勞神。早有閒觀局外身。袖手不來輕下子。爛柯人乃是仙人。

舟行左江道中

爲貧順水去乘舟。其奈連朝遇石尤。畫鷁翻成退飛鳥。可憐辜負此江流。  
水風雙順可兼程。卻教來船向日行。他趁順風吾順水。天心原自最公平。

賽船曲

畫舫凌波映曉梳。盈盈十五似芙蓉。儂家生長胭脂水。不要牽舟岸上居。  
漢宮遺種有名花。只在河內水一涯。今夜定情何處宿。輕橈蕩入素馨斜。  
照影晴波似鏡中。鬢邊茉莉引香風。曉粧別有施朱法。卯酒微醺兩頰紅。

席散偶作

小部梨園夜讌圖。千枝畫燭照氍毹。笙歌散後虛堂靜。危坐依然一老儒。

泮江道中

遷地敢三宿戀。泝流憑百丈牽。南來無落葉樹。西去皆上水船。

與人世居水上。不得結廬於岸也。

虎或當畫出山。牛能截江渡水。遠沙鷺似白人。重霧樹如黑鬼。密箐烟迷窈冥。陰崖風刮凄凜。深篁忽有人出。驚是獼猴下飲。入雲磴百盤計。人行如旋磨蟻。俯江樹千尺餘。猿掛似貫柳魚。山高見日常遲。日沒又偏覺早。可憐深谷人家。長是夜多晝少。

自貴陽赴威寧作

天許遊蹤徧八荒。一年輒易一殊方。滇雲尊嶠都行遍。又記郵籤到夜郎。出守鎮安未一年。赴羅籠軍。在滇在廣一年。今又入黔。每一年輒易一地也。

三兩茅棚嵌碧螺。坡邊蕎麥水邊禾。萬山深處都耕徧。始覺承平日已多。

洪爐煉汞出鉛華。斜土論錢帶雨耙。怪底山童無樹木。五金殺氣在泥沙。蓮華巖諸山。出鉛礦。無樹木。

由來高處最雲多。官舍層椒似鳥窠。貴西署在冰雪山頂。冰雪滿空居絕頂。教人呼作鐵頭陀。

干役古州途次雜咏

曉赴龍場驛路遙。試燈風裏雪微飄。蠻荒瘴旅當時事。二百年來瘴已消。石磴摩雲往復還。青山隨我馬蹄閒。一遺徑過山應笑。這個官人不愛山。

先輩查初白詩云亂山中有豺狼穴。曲突何人議水西。蓋其時雖已擒安坤。改郡縣而羅鬼猶懷反側也。余所轄大定黔西平遠威寧。即水西地。百年以來。皆成編戶矣。經臨途次雜紀以詩。

濟火會標蜀漢功。相傳羅鬼之始。有濟火者。從諸葛武侯征蠻立功。世有其地。千年兵號水西雄。斷頭掉尾諸羅鬼。今日都緝保甲中。

匹馬朝天跡已陳。開通九驛亦勞臣。遂延三百年宣慰。何物奢香一婦人。

華風濡染變狃襟。光氣將開色色新。四十八支頭目衆。近來漸有讀書人。

芳草茸茸路一條。綠痕斜似女裙腰。午風麝過餘香在。疑在蠻娘去未遙。

一線斜坡上碧穹。真看去地幾千弓。誰知到頂纔爲地。雞犬桑麻在半空。說與人間定笑休。黔西三伏冷如秋。使君不是談天衍。親著深山六月裘。夕陽晴映數峯間。樹石都成紫綠斑。疲馬漸遲鞭不進。錯疑他也愛看山。

奉賀福總戎姬人到畧之喜

將軍威令肅如秋。時向霜天試臂講。忽漫春生鈴閣滿。衣香人影太風流。雲母餐來意自雄。酒杯浮白燭搖紅。莫嫌老將風情少。尙有如臯射雉弓。

再遊葡萄泉道士玉宣乞詩書以付之

雜卉駢羅羽客家。一枝橫間一枝斜。畫師惜少滕昌祐。來寫欄前細碎花。

緇天修道衲參禪。等是三生結淨緣。到此又增身世感。海山兜率兩茫然。右爲僧寺。左爲道院。故云。

將發貴陽開府園公暨約軒笠民諸公張樂祖餞卽席留別

醒人將上洞庭舟。餞別深叨喚主謳。爲我紅塵留不住。開場先唱岳陽樓。原呂仙洞庭故事。

罷官敢復戀華珂。何事臨分淚轉沱。老子婆娑爲君等。生平此地故人多。

當筵忽漫意悲涼。依舊紅燈綠酒旁。一曲琵琶哀調急。虎賁重感蔡中郎。傷蔡松霞之歿也。是日又聞琵琶記。

解唱陽關勸別筵。吳趨樂府最堪憐。一班子弟俱頭白。流落天涯賣戲錢。貴陽城中廟院。只此一部。皆年老矣。

古來咏明妃楊妃者多失其平戲作二絕

遠嫁呼韓豈素期。請行似怨不逢時。出宮始覺君恩重。臨去猶爲斬畫師。

鼙鼓漁陽爲翠娥。美人苦在肯休戈。馬嵬一死追兵緩。妾爲君王拒賊多。

順風歌

連朝熾權洞庭邊。一日飄帆路半千。此理眼前誰悟得。順風船卽阻風船。

破浪雄心久淡忘。無端又起意飛揚。蔽江百道風帆下。想見龍驤指建康。  
廬山在望不及一遊詩以解嘲

鄉心連夕促歸舟。咫尺匡廬不一遊。千古香山暗相笑。此人枉自過江州。  
記得前身本遠公。何須履跡徧山中。不來五老峯邊坐。恐被人呼六老翁。  
信有坡仙是解人。教從象外見全神。先生不入廬山去。正爲看他面目真。

### 守風遣悶

琵琶亭畔雨如絲。津吏攔江一纜維。檣轉相烏關未啓。好風偏在空閒時。  
避風長日泊江邨。敢比鷓鴣寄爪痕。已有旁人知退鷁。不將鐘鼓祭東門。  
濤聲如沸撼長空。月黑天低夜守風。官燭滿堂消散盡。來分漁火一燈紅。  
閒步江岸有邨翁。築屋數間蒔花籠。烏頗有閒適之趣戲題二絕

溪流曲曲柳絲斜。中有幽棲處士家。好个丹青行看子。黃筌禽鳥趙昌花。  
門前無數阻風舟。相對荒灘歎石尤。不抵此翁開一笑。看他江水日東流。

### 金陵

不到金陵廿六年。白門煙柳故依然。多情丁字簾前水。還向秦淮引客船。  
剪燭風簷夜漏長。少年曾此賭身強。不堪老作歸山客。重過生平舊戰場。  
自丁卯以秋試至此。屈指廿六年矣。

### 舟至黃天蕩北風大作迴泊燕子磯

打鼓朝辭燕子磯。蹴江雪浪撲人衣。黃天蕩裏迴舟處。笑比蘄王戰敗歸。  
本是人間一退翁。故宜路鬼戲途窮。若非反走回頭路。那得輕帆挂順風。  
重向招提一拄簾。回廊曲磴轉層層。老僧不管人風浪。自向禪堂點佛燈。

虎邱絕句

山塘春早水微波。日日香風送綺羅。不是遊人看山到。此山最是閱人多。  
捨宅王珣築梵宮。千年變作綺羅叢。笑他佛也風流甚。身在煙花不斷中。  
花到寒梅第一流。絕無顏色自清幽。而今也帶胭脂氣。綠萼紅苞滿虎邱。  
暮鳥啼處客歸遲。畫舫前頭月似眉。殘醉倚舷簾半捲。家家水閣上燈時。

庭前雜咏

衰陋形容只自羞。老來宋玉豈風流。鄰家新竹過牆出。似爲窺人露一頭。鄰竹。  
草花低亞樹花高。各自相安氣不驕。偏是陵苕軟無力。附他喬木號凌霄。凌霄花。  
寒士栽花各賣成。菊堪釀酒桂調羹。芭蕉如掌閒無用。派管庭前報雨聲。芭蕉。

消夏絕句

兩板衙門暇日多。虛窗閒製小詩哦。唐音宋調俱無用。自有田家擊壤歌。  
蔬筍常慚踏菜牟。村居奉母少嘉嘗。擊鮮忽漫設家宴。釣得鯉魚尺半長。  
消磨長日仗丹鉛。常苦巾箱少逸篇。解事童奴傳好語。門前新到賣書船。  
浴罷東臯看月明。夜涼風露寂無聲。豆棚花下流螢滿。自笑歸田尙火城。

過故友村居

一櫂重來訪故交。依稀何處認門敲。村貧賣樹茅簷露。不見牆西老鷓巢。

題暉南田畫

秋水渚蓮落殘。夕陽沙鳥飛去。漁歌欸乃一聲。人在蘆花深處。

欲往鄧尉看梅向郡城。結伴莫有應者。適有賣花船到。遂以遊資買梅十餘本歸。而自賞焉。



風味空山縱寂寥。何妨澹泊一相遭。并無人訪南枝去。驕得梅花分外高。  
省卻遊資買樹栽。栽成又得每年開。此情應被梅花笑。酸在東君不在梅。  
分種南枝與北枝。向陽開早背陰遲。居然妙奪化工手。暗展看花半月期。  
曉謁高堂趁露華。一枝爲浸膽瓶斜。寒家奉母無佳物。便當南陔潔白花。

偶成

午窗一枕夢回時。藥酒微醺一兩卮。閒向綠陰凝立處。人言此老要吟詩。  
煙霧深林叫子規。輕陰幾點雨如絲。笑他牧子騎牛背。身在畫中不自知。

枕上

枕上得詩愁健忘。披衣起寫殘燈光。山妻竊笑老何苦。兒輩讀書無此忙。

漫興

泥絮風情久不狂。如何竿木又逢場。阿難自是無禪定。不爲摩登呪力強。  
誰把姻緣簿錯移。落花偏向溜邊吹。千金一笑猶難買。何福人間賣餅師。  
莫訝相看意倍親。徐娘也是過時人。白頭詞客青裙婦。同感琵琶老大身。  
燈光花影兩參差。有酒如淮酌滿卮。太息相逢吾已老。白家正擬放楊枝。

納涼

暝色赴庭陰。雲輕月微斂。東風觸牆迴。折作西風點。  
小兒強解事。奇語驚老叟。不知雲飛速。但道月退走。

戲題閒雲女郎小照

是誰月旦品風華。喚作人間女探花。試向十眉圖比較。黃崇嘏恐不如他。  
黃崇嘏。五代時。西蜀女狀元。

偏向眼光眼獨青。半裘也染麝蘭馨。他家足慣加人腹。夜半須防犯女星。謂君所善。叢生。

西湖雜詩

六橋曾泛畫船過。十四年來一剎那。今歲重遊春較晚。錢塘門外落花多。  
重過蓮池跡已陳。女尼那復記前因。當年綠鬢看纔剃。豎拂今爲首座人。余昔橋家遊湖。寓蓮池女菴。

葛嶺南園一代狂。欲尋遺跡已滄桑。賈堂蟋蟀韓莊犬。留與遊人話夕陽。

老去詩人兩鬢秋。祇憑才筆占風流。若非紅粉名心在。誰肯樽前伴白頭。

天水空明笛一枝。斷橋人靜月斜時。湖樓多少憑欄女。明日家家說項斯。吾鄉三項生善歌。來寓湖上。每夕在斷橋亭奏伎。傾一時。

花開緩緩到餘杭。正遇清齋學太常。今夜河魁須禁忌。可憐天壤此王郎。夢樓姑素奉佛。其夫人求夢湖。與談禪而別。

手翻樂府教梨園。可是填詞老稼軒。唱到曲中腸斷句。眼波偷看客銷魂。夢樓在杭。製新曲教梨園。

但一聞警記不訛。琵琶盲女賽橫波。老夫亦以耳爲目。認作西天阿律多。盲女一千三姊。知詩文。嘗與客啻至。一接談輒記其人。酬應不爽。

會記從軍入百蠻。每從馬上看煙巒。而今髀裏全生肉。重爲湖山一據鞍。是日借馬遊虎。讀理安諸勝。

寓齋老桂四株余到日正放花喜作

四株丹粟倚簷栽。百斛濃香滿屋來。最是今年時令正。中秋節候恰花開。

不信名香解作媒。惹他鄰女上牆隈。老夫也自忘衰醜。只道窺牆爲玉來。鄰女名梅。猶折花。故戲云爾。

幽芬似與伴衰遲。來是開時去謝時。天遣清緣托叢桂。小山不住更何之。

閩史戲作

聞翻青史坐涼宵。頃刻興衰閱幾朝。寸燭未殘千載過。先生笑比爛柯樵。

舟行絕句

一身充兩役。誰道吳娘癡。櫂兒背上臥。搖櫓兼搖兒。

吳航與楚艦。本不共鄉程。同泊偶交語。便有鄉鄰情。

閑居無事取子才。心餘述菴晴沙白。華玉函璞函諸君。詩手自評閱輒成四首。  
千里懷人白露時。一編冰雪慰相思。蕭齋日與諸君見。可惜諸君不得知。  
新知舊識總吟朋。老眼臨文肯世情。心賞不關交厚薄。此中我自最分明。  
姊妹新粧共倚欄。孰宜施粉孰宜丹。背人卻向菱花照。還把看人眼自看。  
流年輕擲等閒過。老去空悲兩鬢皤。貧恰燒丹病求艾。此生何事不蹉跎。

徵月內頻送南雷述菴淑齋諸人赴京補官戲作

柳條折盡送人行。都謁承明上玉京。老寡頻看鄰女嫁。白頭重憶舊風情。  
袍笏登場也等閒。惹他動色到柴關。妻兒翻不如猿鶴。啼怨山人不出山。  
同學都看入宦途。誰從林下譜康衢。野天歌咏昇平虎。或亦清時不可無。

觀劇卽事

逢場竿木逐兒嬉。願影郎當祇自知。博得黃金買歌舞。可憐已過少年時。  
明識悲歡是戲場。不堪唱到可憐傷。假啼翻爲流真淚。人笑癡翁太熱腸。

貞女芮泰姑詩當塗人。夫沒。而夫情之嘉。常塗人。夫沒。而夫情之嘉。

白頭猶是女兒身。辛苦持開幾十春。絕似子中通籍後。不曾食祿作忠臣。  
那得閒依繡佛燈。課嚴菽乳日三升。市兒買得都稱歎。片片懷清寡女冰。以磨豆腐。孫生。

送春

踏盡苔痕屐齒泥。銷魂今日畫欄西。落花何與黃鸝事。也爲春歸不住啼。

舟行

一枝柔艸泛波空。牽曳詩魂入夢中。笑比搖籃引兒睡。老夫奇訣得還童。仁村人臥小兒於竹籃。搖之使眠。謂之搖籃。

吳門雜詩

握手依然舊兩親。十年京國對林人。雲泥不但公忘分。我亦忘呼老大臣。畢秋誠開府。奉諱歸里。相見道故。

形容老盡舊交游。獨有先生鬢不秋。白髮誰言最公道。逡巡也避貴人頭。鬢無一莖白者。

幽棲風味愛清歡。頗笑胭脂畫牡丹。到得東山絲竹地。始知平日秀才寒。

金櫻郁李映清波。一疋紅綾一曲歌。誰念青裙張好好。冷如退院老頭陀。酒船中。有金郁二女郎。侍客船尾。張小妓者。舊亦以色藝稱。今老矣。

占得風流向客誇。賈胡留滯漫思家。前身原是莊周蝶。莫怪三生慣宿花。莊似蝶。連日有煙花之會。

納涼

矮杌無藤坐月陰。桔槔聲寂夜沉沉。西瓜大字芝麻鑑。閒聽邨翁說古今。  
坐久空濛露濕衣。風來暗帶稻香肥。流螢不自量微照。偏向星多處亂飛。  
夜深歸去就橫陳。一語應添笑柄新。我比齊人有妻妾。專房偏寵竹夫人。

中庭坐月

移得紗櫺小院旁。中安一榻臥乘涼。惹他四面蚊忙煞。眼看冰肌不得嘗。  
甕天窺處得雄談。仰看穹霄正蔚藍。十丈空庭圍不住。銀河流出粉牆南。

絕句二

所見

後船無數向前過。忽喚開帆也打鑼。連夜縱添雙槳趕。可憐他已渡黃河。  
漁翁

網得修鱗佐晚炊。小舟如葉夜歸遲。一天明月秋江上。可惜漁翁不作詩。  
寓齋聞歌

比鄰歌管出樓臺。此老蕭齋獨引杯。明月不嫌茅屋陋。夜深一樣上窗來。

小園

小園不設繚垣遮。麋眼籬編六枳斜。一樹桂花風過處。聽他香到別人家。

朔風

江天連日朔風高。催贖先生敝緼袍。一笑化機誰識得。樹方落葉鳥添毛。

蕭齋

蕭齋雨過淨無塵。睡起憑欄曉色新。分得綠陰牆外柳。一家樹作兩家春。

驢嘲

凌兢瘦影踏黃塵。日向長途受雇緙。憐汝往來風雪裏。不曾馱着一詩人。

送客歸戲書

卸卻漁簑一整冠。送人謁選上長安。惹他童僕私相笑。既愛山林又愛官。

授衣

九月霜清木葉飛。例修敝褐禦寒威。笑他兒女隨年長。遞換兄衣作弟衣。

莊樂聞崔曼亭兩同年皆工詩莊夫人董蘭谷崔夫人錢浣青亦皆工詩兩家又同居一宅閨閣譚事近代

罕有欽羨之餘奉贈

何處香闌鬪擊箋。迎春橋北地幽偏。依稀采藥天台路。劉阮雙樓一洞天。  
旗鼓詞場各策勳。郡城近日詩社最感。正愁應敵力難分。如何惡少雕青外。又遇一班娘子軍。

夜坐

人語夜深寂。霜威侵敝袍。梅花映明月。共我作三高。

讀史

一剎那間便一生。何須恩怨苦分明。老來自笑猶聞氣。動爲前人抱不平。

過城東小桃園

重過桃園跡已陳。花塍依舊錯如鱗。傷心紅雨亭邊路。只見桃花不見人。

真州歸途作

盡日無人古路斜。空濛細雨落如沙。一旗飄出青林外。知有前村賣酒家。

家約

老去惟耽懶味長。自頒家約戒廚娘。何能爲汝盡鹽事。費我吟詩錦繡腸。

齒痛

嚼鐵生平礪齒齟。無端對食輒含聲。遇剛必吐柔方茹。累我翻成勢利人。

山塘

老入歡場感易增。烟花猶記昔游曾。酒樓舊日紅粧女。已似禪家退院僧。  
半塘橋北好陰涼。殘醉扶來蕩畫航。臨水數家門半掩。更無人處有垂楊。  
一夕新歡曉已陳。黃金散後更誰親。定情羅帕還留看。多少人間抱柱人。  
普惠祠基築短牆。五人墓木獨蒼蒼。山塘滿路皆脂粉。可少秋風俠骨香。

論詩

滿眼生機轉化鈞。天工人巧日爭新。預支五百年新意。到了千年又覺陳。  
李杜詩篇萬口傳。至今已覺不新鮮。江山代有才人出。各領風騷數百年。  
隻眼須憑自主張。紛紛藝苑漫雌黃。矮人看戲何曾見。都是隨人說短長。  
少時學語苦難圓。只道工夫半未全。到老始知非力取。三分人事七分天。  
詩解窮人我未空。想因詩尙不曾工。熊魚自笑貪心甚。既要工詩又怕窮。

紅梅

品高初不逐繁華。何事新粧鬪絳霞。莫是也貪流俗賞。漸思改節學桃花。  
清明後一日松坪前輩招同西巖涵齋棕亭湖舫雅集

多煩折簡到潛夫。出郭尋春與不孤。千樹桃花萬楊柳。揚州城外小西湖。  
一樣風光二月春。林亭點染倍鮮新。畫家小李將軍派。金碧山川粉黛人。

香雪飄殘萼綠華。平山堂有梅千株。號小香雪。旁人笑我願空賒。風流詞客非高士。不看梅花看杏花。

紅橋修褉客題詩。二十年前。盧雅甫爲運使時事。傳是揚州極盛時。勝會不常今視昔。我曾應又有人思。  
花魂欲睡隱蒼烟。重結滄游異日緣。風露峭涼人半醉。滿湖燈火夜歸船。

湖上二首

山光澹沱水粼粼。幾日蕪痕綠滿途。隄上香車隄下舫。清明一幅上河圖。  
連日狂飈捲地來。孟婆作意把花摧。可憐桃李貪人看。不爲風多遂不開。

食香椿有感

新故相乘共喜新。自因生意在青春。可憐一樣庭前樹。嫩是香椿老臭椿。

鱖魚初出松坪前輩即購以見貽賦謝二首

銀鱗尺半壓荒廚。纔是江鮮入市初。一尾千錢作豪舉。先生今日宴頭魚。  
菜根久礪齒牙牢。珍珠無端誘老饕。不肯累人窺閔貢。爲君一旦破清高。

松坪於齋頭遍插芍藥。招同涵齋。棕亭再可雅集。卽事

相期不負景清和。又許看花發醉歌。前日鱖魚今芍藥。老來食色累公多。  
尋花我昨步當車。君乃移花插滿家。始識名流太驕貴。要花尋我不尋花。

夜醒得句

露氣涵虛庭。羅幃早涼到。三更月太明。滿園鵲盡噪。

觀舞燈

滿野流移似凍蠅。華堂猶列炬千層。臨觴敢謂非豪舉。如此荒年看舞燈。

米貴

米貴如珠豈易量。午炊往往到斜陽。老夫近得休糧法。咀嚼新詩誑餓腸。

兒戲

兒女青紅又一時。拔河拋壻儘嬉嬉。老夫不忍輕訶叱。教誦淵明賣子詩。

江邊鷗鷺

覓食終朝傍水湄。晚來戢羽靜無爲。始知鷗鷺閒眠處。也在謀生旣飽時。  
飲啄呼羣不亂行。空波容與太清狂。扁舟偶過忽飛起。我已忘機他未忘。

一蚊

六尺匡牀障皂羅。偶留微罅失譏訶。一蚊便攪人終夕。宵小原來不在多。



劉霞裳秀才筆姿容工詩嘗借子才爲名山之遊今又同舟來謁喜而有贈并調子才  
緒柳風流見後身。雅吟況復擅清新。世間真有無雙品。才子原來是美人。  
白頭人共泛清波。忽覺沿隄屬目多。此老不知看衛玠。自誇看殺一東坡。  
最羨師生共一航。曉窗聯句夜傳觴。禪門亦有旁參法。我欲勾他叛呂防。

買燈十二挂皆舊家物也書示兒輩

十二明燈爛似霞。買來光炫膽瓶花。豪家下等莊嚴物。移到貧家便太華。

秋燕

想見華堂照酒禱。無端來伴我黃昏。須知是物關興替。最後登門早出門。  
家居買燈。最爲不急之務。及稍貧。則此物先賣矣。

落木風高葉漸稀。人家刀尺促寒衣。生憎燕子炎涼甚。春便飛來秋便歸。

卜居

卜居未久白雲溪。坊曲平時過從稀。怪底鄰家肯賒酒。先生將有束脩歸。

閩游途中雜詩

隔歲無端動遠思。此行亦似有前期。可應天欠詩人債。遊武夷山喫荔枝。  
遙憶山茶曲檻前。此時繁蕊放紅嫣。正開花候身偏出。天爲先生省酒錢。  
百尺荒祠俯綠洄。客星遺跡尙崔嵬。出山恐被嚴陵笑。連夜催船過釣臺。

自泉州至漳州道中作

閩遊未訪武夷君。先踏泉南瘴海雲。添得生平蛇一足。白頭出作老參軍。

韓偓流寓南會讀冬郎豔體詩。飄零遺跡最堪思。夕陽荒草南安路。何處空山訪墓碑。安有墓。

不信澆田仗井泉。汲竿懸斗似秋千。一田一井禾都灌。此是閩南古井田。

高髻雙盤結東新。擬將百琲買橫陳。只愁枕上無重譯。夜半誰來作舌人。  
候館殘燈送馬蹄。一弦海月出猶低。十年高臥山中客。重聽荒郵半夜雞。  
廿里郵籤一歇鞍。綠瓜丹荔已盈盤。莫嫌喝道遊山俗。畢竟遊山也仗官。

詠古

繙遍瑤臺綠字函。五銖衣換茜羅衫。杜蘭香本仙家女。一點春心便讀凡。  
滌器空羈作賦才。凌雲一薦入蓬萊。遭逢莫怪臨卽幸。犬子原須狗監推。  
英聲軼里互千春。只解酬恩不擇人。何物韓嚴甘爲死。可憐輕擲不貲身。  
閒翻青史幾悲涼。功罪千秋少尺量。讀到曲端呼鐵象。恨他何不死沙場。

閒咏史事六首

運石飛磚造塔忙。馮熙計慮亦深長。塔成但見高千尺。誰見人牛死道旁。  
炙手權門百賄填。古人眼孔究堪憐。區區黃雀青魚鮓。屋棟雖充值幾錢。  
北府曾傳孝傑誇。官登台輔要豪華。庫無百萬黃金錠。那足稱爲宰相家。  
身在璇霄秉獨裁。何難金塢積成堆。江陵至竟稱賢相。只愛持權不愛財。  
拗項橋瞻最上層。力求宦達果飛騰。官高無奈身如舊。日食依然只半升。  
老禪淨眼看花紅。已付飄香一陣風。畢竟瀉師原失計。骨人那住肉山中。  
裙帶魚臭如醜。鮓我州百門乃酷嗜。詩以調之。

桃花

臭味輒棘不可親。嗜痴偏作席間珍。爲魚也要佳名字。裙帶纔呼便動人。  
清明雨過淨無塵。款段遊山始見春。多謝桃花開滿洞。劉郎已是白頭人。

閩言

滿耳啾啾不辨何。近來漸解說僊羅。始知公冶非神也。只爲聽他鳥語多。

北歸

屢改歸期始定期。郵亭露布正班師。千軍萬馬紛馳處。一個閒人訪武夷。

仙蛻巖

仙人遊戲大羅天。何事空餘一蛻蟬。若使成仙只如此。老夫也不慕喬佺。聞說登真不在形。可憐世眼自難醒。不知尸解遊何處。猶向枯骸跪乞靈。

煉丹臺

藥爐已廢冷無烟。傳是丹成此上天。煉汞燒鉛吾不耐。英雄撒手卽神仙。

至福州有一僕來見自道姓名乃余昔在京師未第時童奴張忠也蒼顏白髮幾不可識撫今追昔感嘆久之

三十年前青翰舟。相逢欲認屢凝眸。看他綠鬢今斑白。不唱何哉也淚流。穎士奴曾解愛才。相從正值困蒿萊。傷心夜伴孤燈讀。冷盡熏爐一寸灰。

題漱齋官署

粉署含香地望華。天教作吏亦清嘉。全家碧水丹山裏。好个神仙太守衙。奏凱師還滿驛亭。獨因僻左少來經。四禪地可迴兵劫。不枉山城號福寧。

江行

倚舷坐愛晚風披。正是科頭覓句時。兩岸空青一江綠。不妨潮阻去帆遲。

西湖雜詩

又向西湖泛綠漪。湖光如舊客衰遲。可應皺面波斯匿。重過恆河照影時。  
白蘇都向此留題。二老才名本自齊。不作爭墩互傾軋。兩人各占一條隄。  
一坏總爲斷腸留。芳草年年碧似油。蘇小墳連岳王墓。英雄兒女各千秋。  
名士常憑勝地傳。如何勝地轉攀緣。歐公宦跡何曾到。勺水偏標六一泉。  
冤獄風波已被誅。空餘鑄鐵跪泥塗。不知地下權奸骨。果識人間唾罵無。  
湖山原豈錦成堆。一味孤清也可哀。想見平章燈火出。道旁寒殺老逋梅。

重遇盲女王三姑賦贈

十年前聽撥琵琶。曾惜明眸翳月華。今夕紅燈再相對。老夫亦已霧看花。  
無目從何識字成。偏能演曲寫風情。可應手摸知書憤。此聾真當字伯明。  
徐娘雖老尙情長。慚愧蕭郎鬢已霜。對面欺他看不見。白頭聊作少年狂。  
人間用短轉能奇。水母會傳借目窺。爲汝作蝦吾亦肯。便隨流蕩不相離。

卽事

偶得詩一句。健忘忽失卻。翻去問傍人。增他一笑噱。

吳江道中卽景

荒村遠城市。不知羅綺鮮。村女簪紅花。顧影亦自妍。

夜坐

拋卻橫腰帶萬釘。歸來仍伴一燈青。夜深河漢星千萬。何處尋他處士星。

相逢

相逢猶作少年行。西抹東塗已不成。老去佳人思昔面。怕聽人喚阿婆聲。

映坐標姿王不如。烏衣裙屐氣軒渠。鄙人老不知時務。只道卽君總讀書。

野步

峭寒催換木棉裘。倚杖郊原作近遊。最是秋風管閒事。紅他楓葉白人頭。

桃花

正是桃花滿洞開。春遊偶誤入天台。仙家也自貪年少。笑我何爲老始來。

賈文

賈文錢稍入慳囊。欲破休糧祕密方。揚子江中水雖淺。啗他一勺亦何妨。

郊外見殘菊

黃葉江村木盡凋。尙餘冷豔耐商飈。有情都作春花去。誰與秋容綴寂寥。

子才到揚州預索輓詩戲和其韻意有未盡又增二首

薤露如何可預支。渡江來似別交知。得詩恐爾真歸去。不覺低徊下筆遲。  
年壽何人不祝延。怪君撒手獨超然。可應舊籍樵陽在。謫限完時又作仙。  
君果飄然去返真。讓儂無佛易稱尊。只愁老境誰同調。獨立蒼茫也斷魂。  
生平花月最相關。此去應將結習刪。若遇麻姑休背癢。恐教又罰到人間。  
修短終須聽太空。莫將殘錦散諸公。還防老學菴燈火。絆住山陰陸放翁。

廬山雜詩

二十年前過九江。未曾廬阜躡飛淙。那知未了清緣在。垂老來償屐一雙。  
小橋流水路橫斜。野草茸茸滿路花。盡日山行無斥堠。有田疇處有人家。  
榆柳陰森綠滿途。秧歌聲裏鶉鳩呼。牛宮豕柵俱污濁。一入山家總畫圖。

一重一掩隔紅塵。深入方知景色新。山外何由見真面。東坡調語究欺人。  
匡廬擅勝瀑流多。百丈飛泉注急坡。卻怪古人眼孔小。一衣帶水詫銀河。  
崖壁鑄詩費斧椎。欲憑真石姓名垂。誰知兩打風摧久。也作模糊沒字碑。  
流出山來便不還。何妨小住保清潺。可憐三峽橋邊水。日夜喧囂要出山。  
留帶山門結淨緣。樓賢寺有石刻。大中丞留帶處。宋佛家終仗布施錢。綿津去後無人管。三兩殘僧自種田。

子才舊遇相士胡炳文決其六十三生子七十六考終後果如期得子一驗宜無不驗矣去歲七十六遂飾巾待期者一年并預索同人挽詩及歲除竟不死乃又作除夕告存詩遍遺親友爰戲贈入絕句

料理行裝一載忙。飾巾仍不到樵陽。五更待漏天還早。再吃朝房厚朴湯。  
添了果驗洗兒綱。預索灰釘乃不行。術者莫非司馬懿。不能料平。死只料生。

眊筆閻羅未及勾。遂教天網漏吞舟。笑他袍笏風流宰。換作人間夜不收。  
割肉偷桃狡獪才。九閻都怕此人來。故應天亦難安頓。纔召巫陽又赦回。  
開口吳兒有是非。戴逵求死反招譏。此翁名士非高士。本不將身繫少微。  
年是新年人是陳。過年只算再來人。便將來世連今世。省得輪迴又換身。  
難星須滿一年期。未飲屠酥尚抱疑。想見呂嵒爐底伏。幾番恐殺打雷時。  
莫怪輕災解縛纏。前身原是點蒼仙。君自言。前身點蒼山老猿。仙人一劫能逃過。又可嬉遊五百年。

春農寓齋窗外忽生新竹一枝賦詩自誇戲贈

與可千尋已覺長。笑君書竹更無雙。揚州寓舍新葺茁。道自家園透過江。君詩。疑是故園亭子外。一枝冒雨灑春江。  
月明鸞尾影婆娑。掩映文憲隔皂羅。莫是惠州都監女。夜寒偷看老東坡。  
孤竹君曾傳二子。勸君添个鳳池毛。白頭笑倚欄杆說。潛下龍孫爾許何。君孫已選拔明經。

幽樓借得好林巒。天與蒼筠伴歲寒。便抵挂單童子寺。一枝日日報平安。

松坪七旬稱慶。余已有詩奉賀。嗣君次生。又索屏風詞。爰補前詩所未及。

已抒長句侑瓊卮。又索屏風介壽詞。恰似海籌多益善。祝公添歲我添詩。早登仕籍早歸田。不用持籌但使錢。詩酒笙歌娛到老。始知世有地行仙。烟花夢久斷塵根。禪榻旁無翠黛痕。早喜析薪能負荷。不須多子但多孫。館閣常疏步屨塵。轉於林下得相親。十年邗水過從久。我亦隨公作老人。

題岫雲女史雙清閣詩本

沈既堂先生女。

詞垣宿素沈東陽。家學流芬奕葉長。不獨敬倫能似父。掃眉嬌女亦文章。隔紗未試解圍兵。展卷偏教見性情。絕似李暮牆外聽。一枝玉笛最分明。憶瑋思親點筆遲。闌荃香入墨痕滋。始知閨閣真風雅。不在香奩艷體詩。略識之無便目存。生平未上學堂門。由來慧業關天授。待有人教已鈍根。吾鄉錄文敏公女。何當旗鼓對鳴甄。玉臺他日編新咏。江北江南兩女仙。

京口晤夢樓聽其雛姬度曲卽事

廿載清齋禮佛香。翻將禪悅寄紅粧。始知十六天魔舞。別是僧家一道場。手剔銀缸畫燭明。愛留客坐聽新聲。人間何限霓裳曲。出自家姬覺有情。嵌段新翻指點勞。要令姿致極妖嬈。自家忘卻便便腹。只管呼他學柳腰。恐將寒儉惹人嫌。特與新裁綺縠纖。蓮步出堂嬌顧影。傲他窳地夏侯簾。笑我家貧赤腳多。那能百琲買青娥。鄭康成婢香山嫗。只解吟詩不解歌。城鎗催人曲未終。令嚴帥府鼓鼙擊。出城笑道將軍俗。不及羊羔老党公。

遊金陵雜詩

十幅蒲帆兩草鞋。借名送考到秦淮。老夫別有西來意。半爲栖霞半簡齋。

蹇衛牽來狗不如。跨鞍難穩且呼車。生平跋馬千山遍。老去翻愁一秃驢。欲騎驢遊栖霞。老不能跨鞍。仍呼狗與。

人筆雙高不可攀。雲烟供養掩禪關。京華四十年前友。頭白相逢在攝山。老友張玉川。精繪事。久寓栖霞。是日同遊。

逆風船似挽強弓。篙纜爭途夾港中。忽漫開帆天解鬪。此船不占彼船風。遊栖霞之次日。順風出江。

興亡局似去來潮。南部烟花尙未消。丁字簾前一條水。河房燈水見前朝。

名紙填門奉坵壇。隨園豪舉欲留餐。靈山五百阿羅漢。一個觀音詩客難。子才招飲。余以其客多。故不赴。

燕子磯頭落日懸。支筇重到廿餘年。阻風中酒會遊地。垂老經過倍惘然。余昔自黔歸。守風揚帆百里不多時。諺語江湖可入詩。只有快船無快馬。舟人詩家無此句新奇。

絕句

真州蕭娘製糕餅最有名人呼爲蕭美人點心子才以餽奇中丞中丞寵之以詩一時傳爲佳話余亦作六

帶得脂香價便高。一奩粉餌入風騷。美人手段才人筆。補出劉郎九日糕。

織織素手擅拈針。改製饅饅味自深。這箇麻姑好指爪。不搔人背點人心。

已是徐娘半老時。年已五十餘。芳名猶重美人貽。不知年少當爐日。幾許游人妬餅師。

一技成家動貴游。遂憑食譜姓名留。蘇東坡肉眉公餅。此女公然另出頭。

饋節聊同獻曝情。竟邀椽筆賜褒榮。始知大雅羅材廣。錄到人間畫餅名。

麩車涎早溢殘牙。曲盡何當送我家。爲語故人應捧腹。老饕饞口嚼梅花。

編詩

舊稿叢殘手自編。千金敵帚護持堅。可憐賣到街頭去。盡日無人出一錢。



苦雨

竟月淋漓雨脚斜。麥苗萎盡泣農家。可憐兒女多情甚。一樣傷心只惜花。

所見

白玉盆中發寶光。洞天清供好排當。明珠妝出細梅瓣。無價奇花惜不香。

女史鮑尊古賜題拙集推許過當走筆奉謝

下語評量費綵毫。恰如烏爪癢邊搔。從教萬口流傳遍。那及茗華一字褒。

若遇墮園拾唾珠。定應誇作女高徒。秀才輯詩話。多採闈。秀詩。翻錄女弟子。老夫不敢衙官屈。稽首仙臺拜鮑姑。

安樂窩中有賞音。家門風雅宿緣深。遙知閣寢重闌罷。聞和堯夫擊壤吟。孫松阿。

莫怪香閨解擘箋。清才多聚一門偏。劉三娘子詩情麗。家學原從孝綽傳。令兄景略本才士。

不寐

老去無眠夜景清。聊營腹稿待天明。小鬟曉夢聞呼起。知有新詩枕上成。

再題焦山寺贈巨超練塘兩詩僧

滑笏江流去不局。海風吹出一螺青。十年來往空相望。今日纔尋瘞鶴銘。

修篁密樹綠陰連。不著樓臺得自然。對面金山太寒乞。傲人生活勝焦先。

對他淨玉覺寒蕭。狐貉旁偏立縵袍。齊己詩篇懷素字。兩僧共占一山高。巨超詩最工。練塘兼能書。

伊蒲留客飯香廚。蔬筍登盤味有餘。我本才非蘇玉局。敢嗔佛印不燒豬。寺中留飯。

參遍華嚴五十三。老思彌勒結同龕。一庵似怕人來借。先自名呼作借庵。巨超又字借庵。

山行

路尋樵徑躡槎枒。山色蒼深夕照斜。一樹紅楓全是葉。翻疑無葉滿身花。

論詩

着色原資妙選材。也須結構匠心裁。可憐絕豔芙蓉粉。塗在無鹽臉上來。

野歎

菜根風味出江村。恰稱田家老瓦盆。辣玉甜冰常饜足。不知世有乳蒸豚。揚誠齋以蘆葍爲蔬。玉。蔓菁爲甜冰。

圍爐

頭腦冬烘一腐儒。怕他冰雪冷侵膚。平生性不因人熱。老反趨炎附火爐。

揚州觀劇

又入揚州夢一場。紅燈綠酒奏霓裳。經年不聽游仙曲。重爲雲英一斷腸。回數歡場歲幾更。梨園今昔也關情。秋娘老去容顏減。猶仗聲名歷後生。故事何須出史編。無稽小說易喧闐。武松打虎崑崙犬。直與關張一樣傳。今古茫茫貉一邱。恩讐事已隔千秋。不知於我干何事。聽到傷心也淚流。

題竹初爲袁趙兩家息詞後

余戲述子才游蕩之跡。作呈詞。控於巴拙存太守。子才亦有訴詞。太守不能斷。竹初以息詞了此案。

一重公案起無因。太守筵前訟牒陳。不設青紗圍自解。累君來作謝夫人。各挾雌黃訴到官。閻羅包老也顛顛。竹蕉兩造皆情熟。欲判輸贏下筆難。讎語褒訕總白癡。客嘲賓戲戰交綏。兩家旗鼓今無用。同看營門射戟枝。

一燈

出身早脫子衿青。堪笑丹鉛尙不停。頭白一燈孤館裏。廿三部史十三經。四庫館新頒舊五代史。後成廿三史。

天河

誰把虛空界畫粗。生將別恨坐黃姑。青天爲紙山爲筆。倒寫長江萬里圖。

朔風甚急萬鴉集於枯木皆向風而立無一錯互者乃知其向風則羽毛轉順也向聞魚亦多逆水而游同是一理

寒鴉枯木景蕭騷觸目都增見地高鳥立向風魚逆水物生各自愛鱗毛

觀音閣碑

堪笑籌車致祝情望奢那計一蹄輕。百金捐造觀音閣便欲碑刊萬古名。

宦囊

解綬歸來卜築忙老夫曾此賀華堂看他營造看他賣何事人猶羨宦囊

松坪招同葉生柏秀才高詠樓看荷花五首

老去心情愛物華肯同新婦閉帷車。蹣跚行腳麻茶眼同向湖隄去看花。少日踈狂作冶遊那堪還占老風流。惹他十里珠簾捲多少紅妝笑白頭。延緣一掉過紅橋早有荷香陣陣飄解事扁郎不煩囑但花多處便停橈

山是堆成水挖開憑空幻出好樓臺老夫五十年前到曾見邗溝本色來。余已巳過揚州。惟平山堂及法海寺。餘皆斷崖古墓而已。今湖山樓閣。則皆庚午後開闢構造者也。

高詠樓前飲碧筩凭欄千朶絢晴空蓮花本是君家面還與先生發醉紅

答蔣蔣州秀才

歷數名場幾作家後生中有此才華白頭老嫗看新婦恨不親爲插髻花

贈當筵索詩者

盈盈十五出堂時妙轉歌喉勸客卮也是人間生活計老夫和淚寫胭脂

入冬日飲牛乳一升以代朝粥戲成絕句

會傳著粥養衰翁。服食還輸乳汁功。白髮人爲黃口哺。老夫奇訣已還童。  
清晨飫我乳花香。省得張蒼子婦忙。笑問嬾婆何姓氏。遙遙華胄出奇章。  
訛寢蕭閒顧影驕。愧無錦薦護寒宵。柵欄爲築新牢就。也算莊嚴貯阿嬌。  
服匿盛來日一甌。瓊漿滿引潤枯喉。卽看下咽如脂滑。不用周官更祝鳩。  
縱無燥濕効微勤。乳哺功深自策勳。合請戴高爲寫照。丹青貌出野王君。  
久食功堪素養和。煮羶氣亦染身多。老饕自愛醜醜味。任把臊胡喚達磨。  
昔人曾飽穀於菟。何似芻牢給所需。老健定堪牛鬪虎。看余矍鑠執爰驅。  
書生貧易德壺飡。飲酪先誇至味存。何限世間豪貴客。還將人乳去蒸豚。

自笑

一甌著粥涕沾鬚。背曝晴簷手擁爐。試問古來麟閣上。畫圖可有此形模。

芸浦中丞邀我鄧尉看梅。夢樓芷堂先在蘇相待。遂同游連日并偕蔣于野秀才。

廿年此願今纔果。爲有佳招發興新。行樂也憑賢地主。腐儒何事不因人。  
燈節前頭雪壓枝。梅花今歲較開遲。花神大似留相待。二月初來正及時。  
點役簽夫曉鼓催。幾同喝道看山來。惹他村嫗從旁笑。不是官梅是野梅。  
老幹空山格自高。難將勢位屈孤標。我來只帶諸名士。壓得梅花不敢驕。  
漫將孤寂結相知。豈識瑤林四照奇。笑煞老逋真見小。賞心只在兩三枝。  
想見名卿氣力雄。要留爪跡雪泥鴻。黃金買得春山闊。死葬梅花萬樹中。  
料理舟車縱客歡。官齋獨對一燈寒。中丞枉作梅花主。只讓人看不自看。  
忍爲清游攬景光。累人連日費供張。一帆歸向山塘過。自買名花種草堂。

山有徐健菴墓。

中丞以事不得同遊。

虎邱買牡丹四盆。海棠一株。

戲題靈巖山館畢秋帆制府別業。

靈巖千古屬西施。亭館何人鑿翠爲。要與美人爭勝蹟。秋帆此處是男兒。  
手種梅花已丈餘。相需殿每遇偏疏。園林閒煞公忙煞。曳足壺頭正羽書。湖南征苗。公方督辦軍需。

閩近人詩稿戲題

愛山我乏買山貲。公有青山只夢思。何不把山來贈我。省他猿鶴盼歸期。  
名士求名氣力殫。到頭不出百年間。那知世有神通大。臥作長河立作山。

題女史駱佩香聽秋軒詩集

冰雪新詩絕點塵。女中有此謫仙人。故應數遍樵陽籍。只替常饑作後身。  
集中女遊仙詩第一首云。不是姮娥拚獨處。何人領袖賡長天。蓋以自

解圍何必幃青紗。對客揮毫筆有花。如此才情如此韻。教他那得閉帷車。  
倘著冠巾試萬言。也應第一領詞垣。如何不學黃崇嘏。去作人間女狀元。  
禮佛香清手自拈。禪心已證首楞嚴。教人癡煞鮫紋背。不敢思他鳥爪尖。  
此豈宜居弟子行。詩翁漫詡在門牆。上元燈下千詞客。方待昭容玉尺量。  
簡齋。夢樓。皆誇爲女弟子。

高旻寺鑑公房夜看牡丹戲書

一枝濃艷倚禪房。銀燭高烧照滿廊。我欲嚇他禪定破。老僧深夜對紅粧。  
揚州買芍藥攜歸而齋前寶珠山茶已開過矣

子才以雙湖太守禁妓作詩解之戲題其後

已向山塘買牡丹。又攜紅藥到雕欄。惹他千瓣山茶妬。家有名花不愛看。  
登車紅袖滿啼痕。詩老爲招已斷魂。十四樓高功保障。平康護法好紗門。

八十衰翁已白紛。惜花心在老逾殷。哥舒半段槍無敵。專救人間娘子軍。  
南部烟花手護持。君房下筆妙言詞。女閭援到齊桓例。莫是貧他夜合資。  
巧爲蛾眉作主張。一言感煞衆紅粧。知君九十開筵日。定有湘蘭百妓觴。  
多少妖姬又冶容。家家虔炷瓣香濃。青樓占得長生位。也抵先儒祀警宗。  
雨不止

客窗聽雨夜如年。簷溜丁東斷復連。絕似小兒啼不住。終宵攪得老夫眠。  
方罨田塍漲白波。甘霖翻恐沒新禾。曾經乙巳年荒旱。不敢嫌他雨過多。

野泊

扁舟晚泊傍村家。露草浮光月未斜。螢作火城蛙鼓吹。野夫何處不榮華。

題沈旣堂前輩鼓書移居圖

買宅何須百萬資。爲貪隙地好栽花。移居大似村夫子。滿載圖書穀鯨車。  
檢校資儲一番忙。犬雞都點入行裝。押綱不用鐵羅漢。家具無多只縹緗。  
牙籤整整上行軌。卷帙真看欲汗牛。比似米家書畫舫。陸行水泛兩風流。  
奏賦蓬萊舊擅名。宦成那復作書生。祇應結習難忘處。老戀青燈倍有情。  
入詠樓新葺綺寮。又排書帙遣良宵。只愁撐滿便便腹。難作東陽瘦沈腰。

哭偉兒

二十年無一哭聲。此生應免起哀情。誰知時命無終泰。臨老西河欲喪明。  
未必興家且保家。少年早自戒豪華。烏衣門巷牛衣志。不鬪人間金犢車。  
猶記生時有吉徵。異香滿室兆榮名。兒生於歲安官舍。時異香滿室。誰知兆也無憑準。只得頭銜廩臚生。

拮据參苓恐不供。但愁病劇敢愁窮。一年心力枯何補。囊到空時命亦終。

身病堪醫心病難。生來心性慣憂煎。可憐半月前孤枕。將要長眠轉不眠。

就醫吳苑半年淹。勢急歸舟夏正炎。氣力自知支不得。時時問過幾郵籤。

時到彌留倍可傷。不呼妻子只爹娘。五更續息微將絕。忍死催移到我床。

痛定追思痛更深。自知不起病加沉。恐傷乃父心難割。淚欲流時輒掩衾。

兩孫卍角尙兒嬉。他未知悲我更離。七十衰翁頭白盡。豈能撫到長成時。

彷彿幽魂尙式憑。微風入戶閃孤燈。定知汝不離吾側。只是千迴喚不響。

入棺猶是舊容姿。從此真無再見期。一語九原聊寄慰。我來應亦不多時。

### 夢中

月影橫窗夜向闌。峭涼新入覺衾單。夢中新鬼逢多少。偏是亡兒一面難。

年來孫補山。畢秋帆。兩制府。阿雲巖。相公相繼下世。林下則顧晴沙。袁子才。王西莊。又物故。生平交舊一時

### 俱盡凄然感懷

老來不復作詩新。偶作詩惟哭故人。哭盡故人無可哭。孑然顧影自傷神。

武緯文經將相功。儒林文苑亦宗工。此皆數十年成就。何意淪亡一歲中。

### 至蘇州寓懷杜閣後樓卽事

偶指名賢故跡湮。祠成館我亦前因。敢援彌勒同籠例。縛帶聊爲灑掃人。

斟酌橋通畫舫游。都來塘北泛明流。冶坊浜裏將寥落。漸少人登舊酒樓。

垂老光陰夕照斜。風懷聊復逐鉛華。惹他年少竊相笑。如此白頭來看花。

名園樓閣表前賢。點綴溪山物色妍。自是承平好光景。頗聞秦蜀正烽烟。

去歲偉兒就醫寓舍在伍相國祠東今來過此依然有作

往事追思灑淚紅。半年醫藥竟無功。籃輿重過靈胥廟。忍聽人呼伍相公。兒行五。家人呼爲五相公。

題短簿祠

短簿祠高虎阜東。故居人指梵王宮。誰知捨宅歸僧寺。翻占名山地百弓。

三月十日寓齋前牡丹纔試一花次日半開者數朶十二日曉村太守讌東浦藩伯懋露廉使柳亭觀察於

此則百朶競放矣以後士女遊觀連日雜沓雜記以詩

聞道旌麾過使車。牡丹連夜發穠華。比他羯鼓催還捷。富貴花原勢利花。

那得才人不露才。名花亦愛向人開。一枝背面亭亭立。也對紅欄拗項來。花面皆側向人。

翠翹紅袖總髮春。稍爲移床避韞塵。滿架名花讓人看。老夫卻看看花人。

此行專結牡丹緣。鬪粟催開七日妍。看到落紅吾亦去。人言薄倖杜樊川。

西湖寓樓卽事

又向西湖泛畫船。青山綠水故依然。回思奉母蓮池日。往事俄驚三十年。余丁亥歲初遊西湖。奉太夫人寓蓮池尼菴。

虎邱遊罷虎林遊。人巧天工各擅優。黃篋酒樓青箔舫。西湖可惜不蘇州。

遊船無數檻前過。占得湖樓俯綠波。但我見人人不見。碧欄干外綠楊多。

人心趨處佛增靈。祈雨祈晴有必靈。相燭檀香三竺路。一觀音養百千僧。

年少吳郎絕妙詞。相逢真恨十年遲。瀟瀟暮雨催人別。腸斷西泠是路歧。吳隴壁年少奇才。同遊數日。

一度來遊一度奇。始知好景不勝追。衰年敢作重來想。臨去多留疥壁詩。

春雨

連日春陰似臘寒。正當哀詔到江干。故應天亦頻垂淚。細雨如絲灑不乾。



春寒

買得羊裘價十千。料應溫煖勝常年。誰知天又非常冷。依舊凌兢聳兩肩。  
雨中杏花

四海方深遇密哀。今年春色總如灰。杏花知道無人看。不待晴開趁雨開。  
山行看紅葉

十月清霜萎綠莎。翻看紅錦絢山阿。天公也有才人習。晚景詩尤綺麗多。  
嘲梅

正無花候拆寒苞。巧結騷人淡泊遭。若使開於紅紫內。更誰來賞格孤高。  
除夕喜雪

冬暖常憂得雪邊。得於除夕尙當時。製成鶴鷺無誇處。火急披肩去覓詩。  
暮雪

雪花如席壓炊烟。萬籟無聲薄暮天。我似東禽暗不語。忍寒危立老梅邊。  
所見

樂感瘴瘴曉侵肌。驚見驅牛飲凍池。搔手急呼莫莫。恐他冷飲或傷脾。  
乞活兒

手足俱無裹敗羈。蛇行蠕動路蜿蜒。憐他生已不如死。猶乞街頭活命錢。  
偶見

泥爐烟碧瓦燈紅。香火喧闐委巷中。三尺小祠七寸像。居然顧盼自英雄。  
酒間與味堂司寇追話都門舊事感賦

春明舊輩幾人存。重話鴻泥指爪痕。絕似上陽宮畔路。白頭老監說開元。

多雨

忽晴忽雨亂晨昏。纔苦陰寒又晏溫。一月九蒸還九曬。老夫身作地黃根。

花蝶

婪尾花穠深院藏。外邊那得遠聞香。不知蜂蝶從何覺。已自飛來過粉牆。

儒餐

土銜煤爐老瓦盆。莫因鼎食羨豪門。儒餐自有窮奢處。白虎青龍一口吞。  
俗以荳腐青菜爲青龍白虎湯。

秦蜀

秦蜀兵氛歲再期。蒼茫天意信難知。世無杜甫能吟咏。何苦教人賦亂離。太平生齒日增多。天亦難供可奈何。何不教他饑疫死。卻教狼藉死兵戈。

閒極

爲愛清閒早掛冠。秀才生活辦粗完。而今閒到無聊極。臨老翻思去做官。

山塘

清簾疎簾軟水舟。老人無事愛清遊。承平光景風流地。燈火山塘賣酒樓。

僮約

僮約雖頒十數條。守門奴已出遊遨。客來剝啄無人應。只道先生故作高。

舊篋中偶檢得在京時所畫鷗北耘菘小照戲題卷後

灌園閒與白鷗親。四十年前舊寫真。只有老妻還認得。兒孫俱不識何人。

初冬柳色

古語由來未可聽。爭傳弱柳望秋零。誰知霜露凋傷候。萬木丹黃此尙青。  
近游戲書

小舫清游不覺疲。每眠杉板當牀帷。也知就木期將近。先向船艙鍊背皮。  
書劍南集海棠詩後

陶菊林梅名各擅。海棠猶未有專家。放翁此意先窺破。急把狂吟占此花。  
健忘

眼前僮僕或忘名。何況經書記不清。怪底近詩多白戰。征南武庫已無兵。  
厭聞

三十年來把釣緇。厭聞消息說兵塵。私憂竊歎何人識。識亦徒嘆是杞人。  
巨超將歸托寄京口佩香女史

香閣論詩又兩年。遙知淨業已皈禪。不妨書托高僧寄。正是清齋繡佛虔。  
新築軒仍榜聽秋。我來準擬小停舟。可憐兩度過京口。只見紅欄俯碧流。  
詩筆年年耐苦辛。懺除不盡是前因。女中才子僧詞客。都是名心未斷人。  
枯木禪僧印寂光。空山兀坐太荒涼。作書爲介司花女。或有天花散道場。

牡丹將開作布幔護之戲題

政砌花臺作幕遮。玉樓春花名。色倍穠華。初非貴種偏珍惜。爲是前年手種花。  
老去風情尙易撩。護花心力費連朝。一棚布幔當金屋。慚愧書生貯阿嬌。

題蔣立崖天遠歸雲圖

膚寸膏流漢上田。又分愷澤潤窮邊。而今斂卻爲霖手。散作餘霞尙滿天。

連日競渡再賦

競渡傳從楚歲時。爲投角黍弔湘纍。誰知千載沉淵痛。翻與人間作水嬉。  
隕雪中流不鬣張。不徒旌旆盡飛揚。岸邊萬扇搖風處。也似金鱗閃日光。  
多少游船載豔粧。朦朧都掛繡簾藏。不教人見教人想。風過微聞茉莉香。

綵幔高張俯碧流。豪門坐召四龍舟。

東門離商孫氏。

蒲鞵船上常州鹽菜船。

茅柴酒。慚愧書生作冶游。是日歲同人舟泛。

五月十三日相傳鬪壯繆生辰常城側具雲車數十座作神會今歲屆期大雨竟日雲車遂不能出龍舟亦

停戲賦

龍舟猶鬪彩霞紅。又聳雲車絢半空。一兩磨刀都嚇退。殺風景究是英雄。俗以是日雨。謂壯繆磨刀雨。

江陰道中遇順風

逆風翁忽順風多。百里程途半日過。卻看來船牽纜苦。我雖自幸亦憐他。

放生河

放生河上放生碑。禁斷人間網罟施。可惜游儻不識字。不知來此避漁師。

游孫端如觀察園亭愛其松石古秀正欲題詩疥壁適觀察以萬卷歸裝圖索題遂牽綴成篇請正

詞館才人畫省郎。出膺使節暫還鄉。書生大有誇官處。豪擁歸裝萬縑緗。

果然水木湛清華。恰稱橫陳萬卷賒。笑我方將賣書籍。卜鄰來問爾東家。

看山

物色難窮意想間。始知閱歷老猶慳。千形萬狀無成格。天上浮雲地上山。

偉兒葬金壇之夏蕭邨哭以送之

不忍將兒遽掩藏。五年棺尚殯帷堂。愛深翻惑青烏說。遠送枯骸葬異鄉。

地近華陽古洞天。宿緣應許待茅仙。此阡或便當尸解。好認前身已蛻蟬。  
諸子中惟汝肯堂。儒家本色陋膏粱。祇今十具牛空在。付與何人作主張。  
葬同羸博見無期。魂氣由來無不之。他日乃翁游岱去。不知可有再逢時。

京口同佩香女史游招隱寺獅子窟八公洞綠蓋樓諸勝

擬爲彭宣問疾瘳。江臯不遇且回舟。誰知才女佳山水。另作秋來一勝游。  
費制府久病清江。聞將回江寧。故往京口候晤。而費公尙未至。遂作此。

支筇來問病維摩。早散梨園罷教歌。夢樓已散去歌伶。莫怪臨分頻執手。京華舊友已無多。

蜀甫曾留屐齒痕。我來惜未得同羣。風流各自堪圖畫。君挾縑衣我繡裙。  
雅存一月前。偕巨起練塘僧游此。

舟泊太湖

峭涼時節未丹楓。萬頃晴波映碧空。星月滿夫人半醉。扁舟夜宿太湖中。

山茶盛開邀去年諸同人小集

占得名花敢召賓。盤餐莫笑庾郎貧。珊瑚滿樹紅於火。我亦人間石季倫。

燕來巢

春燕飛來結壘工。笑同賃廡到梁鴻。容他夫婦雙雙住。我亦高人臯伯通。  
兒曹探卵恐難禁。竟不隄防意外侵。知我刑于施有政。一家童子總仁心。  
玳瑁無梁似野菴。慚他朝夕進風檐。聊申僮約行方便。教緩垂簾早捲簾。

蜂蝶

是誰送信洩春魂。惹得偷香賊滿園。一樣貪花輕薄性。叢蜂強暴蝶温存。  
春風齊入百花村。掠粉含香各飽飧。一樣採花分兩技。一收花魄一花魂。

螢入書室

炳燭焚膏念已灰。夜深暗坐眼慵開。流螢只道猶勤學。飛入書窗映字來。

題芳茂山僧寺

無山空買一株藤。競想逢山快一登。嵐翠滿庭門晝掩。有山不看是山僧。

看剃度者戲之

拈花一笑問沙門。何事圓顱髮不存。我見如來非老禿。青螺滿髻未曾髡。佛像俱作青螺髻。則如來未嘗髡髮也。

飯餘

飯餘一枕倚窗紗。睡起甌香小啜茶。攬得胡牀臨水坐。柳陰深處看荷花。

目力

兩目雖存力減前。臨文敢怨視茫然。自從六歲攻書起。我已勞他七十年。

簾雨

緣遍田禾不隔區。簾前又見雨沾濡。兩絲作經去聲。見放翁詩。。簾絲緯。織出幽風七月圖。

遊焦山至揚州途中雜詩

洞庭遊了又焦山。更指揚州寶塔灣。老去翻成游蕩子。蘭橈一月不會閒。

詩翁八十尚兒嬉。遊侶居然挾兩雌。鎖骨觀音散花女。天教狂煞老頭皮。佩香悟昔與吳激並。李齋生同遊焦山。宿巨起。今激並先歿矣。

鶴銘隄上贊公房。會與吳均共對牀。回首雪鴻成故迹。瀕行爲拂舊題牆。左蘭成留飲。看饌極精。屬余題其詩本。

左思賦已歷詞壇。一序何須乞士安。自是老饕多口福。累他珍饌上牙盤。至高旻寺。如鑑設齋。指院中牡丹數十本。皆別後添種。惜已開倒矣。

巨超行腳未曾迴。剩喜清師半日陪。笑指牡丹添貴種。花時日日望公來。

如公號清涼。

虎賁曾感孔融情。爲是中郎舊典型。今日故人餘筆塚。把君臨本哭蘭亭。練塘書。夢樓通肖。

軟腳華筵爲我開。典衣治具意堪哀。衰年未必還相見。何忍堅辭餞別杯。既堂。

當日看花兩白頭。碧筒杯飲最風流。十年重泛紅橋榭。忍過張家高詠樓。傷松坪之。破也。

幾載相思暗淚痕。何當握手轉無言。僮奴只怪過從數。三日僑居六款門。高生。

### 鼻涕

撲面風來酒力消。懶殘鼻涕掛成條。卻思年少粗豪處。一唾高於二丈橋。

### 歲會

歲會粗增什一錢。居然阿堵滿牀前。不知他日誰家物。煩我持籌數十年。

### 看燈

何處譟聲溢市閭。葛仙橋北露華初。廣場千步春燈滿。月走游人火走魚。

### 紅梅閣題壁

出郭尋春羽客家。紅梅一樹燦如霞。樵陽未卽遊仙去。先向瑤臺掃落花。

### 觀餵雞者戲作

簸春餘粒撒籬間。粥粥呼雞恣飽餐。只道主人恩意厚。誰知要汝肉登盤。

### 彭殤

彭殤相遇道塗邊。各述生前住世緣。旁有螻蛄聽暗笑。不妨童叟拜同年。

### 花木

誰言草木竟無知。消息能參造化奇。不待司天殞朔到。自然開落不愆期。

衰老

莫怪交遊厭腐儒。家居亦自歎羈孤。滿堂兒女聞聲避。衆叛親離一獨夫。

戲贈

氣豪略不問生涯。冷笑他人苦作家。富貴性情貧賤命。黃齏吃了去看花。

見爭地者戲作

佔人寸地未堪耕。訟牒紛然訴不平。別有元龍樓百尺。卻無人以佔天爭。

再到西干故里

釣游歷歷舊烟村。相識曾無一個存。莫怪老錢高自置。見人一概喚曾孫。

劉松嵐觀察

大舊嘗宰鎮安之天保縣在余守鎮安後二十餘年矣茲過常州偕稚存來晤且言鎮民已爲

余立生祠度奉弗替感賦

南徼歸來已白頭。鴻泥那復爪痕留。誰知三十餘年後。尙有遺民祝故侯。

自知無績可流傳。只有硜硜不愛錢。始識愚民原易感。不爲貧吏即稱賢。

在任原思死葬桐。余在鎮愛其民淳事簡。實擬老於是官。不願遷也。豈期民已社藥公。不愁身後無歸處。九朵蓮花一畝宮。赴鎮安。必由蓮花

入。

水車十百屏田水入河

修蛇蛻骨桔槔多。邪許聲悲似輓歌。可惜踏車如許力。翻將田水灌塘河。

年年河水灌田禾。田水今翻灌入河。絕似貧人還宿債。半羔利較本錢多。

小暑後忽得快晴低田水漸退而鄉民又恨東南風大不得速驅向蘇湖致插秧尙有待也詩以解之

積雨新晴氣已蘇。又嫌風不下流驅。果然驅到鄰爲壑。我得春炊獨飽無。



江邊

彌望郊原白浪滔。尾閭何處泄狂濤。百川都向滄江灌。壓得潮頭不敢高。

少日

少日伶仃僅一身。兒孫今遂列成羣。人間米貴何關我。百萬分中也一分。

溝壑

溝壑災黎待斃身。相逢不禁爲傷神。若教破我慳囊救。又覺他原是路人。

再過城東小桃園

少年曾此屢經過。腸斷韋娘一曲歌。今日重來頭已白。不知何事淚猶多。

米貴

曉市聲喧似湧濤。爭營口食罄錢刀。共言米價如梯級。一步升來一步高。

只爲人多覺地<sub>平</sub>。一人一畝尙難全。孟夫子若生今世。敢復高談古井田。承平日久。生齒日蕃。若人各百畝。安得有如許田也。

景德祥符脫亂離。小兒鼓腹老舍飴。始知斗米三錢價。纔在人稀地廣時。

海角山頭已遍耕。別無餘地可資生。祇應鈎盾田猶曠。見天官書。可惜高空種不成。

更從何處闢遺畝。只有中郎解發邱。或彷彿秦開阡陌例。盡犂墳墓作田疇。

勾踐當年急生聚。令民早嫁早成婚。如今直欲禁婚嫁。始減年年孕育蕃。

五風十雨惠民深。物產猶難給釜鬻。到此天心縱仁愛。也愁力薄不從心。

斗米需錢四百餘。真同珠價論鎔銖。老夫翻借誇豪富。一日廚炊一斛珠。

蔣立巷輓詩

少小交游到老成。十年以長忝爲兄。正期伴我桑榆晚。何意今翻哭後生。

半年不斷藥爐薰。轉側常資婢僕勤。看到呻吟牀第苦。翻祈君早赴修文。病榻惓惓念析薪。預愁身後藐孤貧。大家都有兒孫累。誰是人間了事人。空中笙鶴引遊仙。此事何須快着鞭。恐我他年無伴侶。預先相待大羅天。

楊桐山輓詩

老去枯腸不作詩。作詩多是輓歌詞。寢門哭友連三日。兩淚幾如不斷絲。

看花每歲荷開尊。精饌真過石季倫。自是老饕無口福。正思大嚼失屠門。

頃刻花開七七仙。歡場屢罵故依然。明年櫻筍廚誰設。灑淚東風泣杜鵑。

佳句

枉為耽佳句。勞心費剪裁。生平得意處。卻自自然來。

春蠶

薄箔春蠶食葉肥。腹絲抽盡作蛾飛。尙餘五色文章在。留與人間織錦機。

絕句

涉江踰嶺採芳蓀。多是題襟舊墨痕。辛苦雅輪扶隻手。故應一代仰龍門。

有唐何止萬詩人。篇什如今幾个存。太息茫茫烟霧裏。不知多少暗啼魂。

也是生平大願船。盡收交舊入新編。淮南賓友何多幸。得附劉安總上仙。

網盡珊瑚也足雄。唐詩選只說荆公。由來買馬招兵戰。萬骨枯成一蔣功。

往事傷心踏戰壘。選詩特為百篇增。不知朽骨空山裏。可識歐陽序定陵。

故存殿之感倍深。亦可見篤於風義矣。亦

選增瓊函詩獨盈一卷。蓋公與瓊函同從軍瀛。瓊函獨殉難木果木。

對鏡親描兩翠蛾。自矜絕豔渺橫波。一從粉黛叢中過。始覺人間佳麗多。  
長至日同人夜集

長至纔交薄雪飛。可無轟飲辟寒威。書生豪舉真堪笑。前面開樽後典衣。  
吳穀人祭酒枉過草堂邀稚存味辛同集

裾屐聯翩總勝流。沉沉泥飲盡更籌。江天望氣人應說。今夜文星聚趙樓。  
已屆消寒九九天。燈光月影泛舩船。殺雞爲黍儒家宴。俗煞汾陽軟腳筵。  
百年人物踴當場。館閣歸來鬢各蒼。公等已皆稱老輩。衰翁得不魯靈光。  
袁子。蔣心。王禮。錢竹。總作塵。慙遺漫比後來薪。名流各有千秋在。肯與前人作替人。

冬暖

繡線雖添暖未消。想天亦怕聽寒號。晏嬰尙有狐裘在。不得披來做繡袍。  
春令冬行暖不裘。漫憑洪範細推求。陰陽調燮何關汝。偏是書生易杞憂。  
不須深窖幻唐花。自是天心急物華。惹得柳桃俱躁進。纔看落葉已抽芽。

今年夏雨過多低田有被淹者高田則大熟余有田五六百畝散在各鄉高下不等及收冬租各佃俱稱被  
淹竟抗不輸納書此一笑

我田未必水中央。因潦俱稱被浸傷。同此一區豐歉異。佃家大熟我奇荒。  
少日無田嘆釜鬻。誰知田亦有升沉。我田便是滄桑幻。旱則山頭潦海心。旱則指我田爲高阜。潦則指我田爲  
俗皆然。

新年

一笑貪癡鶴髮翁。新年又喜款春風。閒尋古老人爲伴。數到棋圍衛武公。

春夜看孫男女舞燈戲作

碧天如水月如霜。五丈空庭作戲場。破費買燈錢一貫。魚龍兩隊小排當。行春五馬記南州。謝事歸來剩故侯。騶卒與丁無一在。自攜童稚作遨頭。兒女青紅樂事多。新年例得免譙訶。老夫恐踏唐休璟。不敢隨他戲拔河。

唐休璟借三品以上。戲拔河。隨處踏地。

都是孩曾手自持。舞燈供我作酣嬉。笑他白傅空尋樂。只仗樊蠻唱柳枝。

筆工胡生以半毫裏免穎名之曰綿裏針頗馴健可書戲爲二絕

考來那得更還童。自分中書老不中。忽得銀毫濡墨寫。白頭公變黑頭公。柔毛何意內含剛。恰與詞人寫錦囊。放出晶芒高萬丈。依然佛頂白毫光。

米貴

米貴真看逐日昂。民間一撮藉通腸。老夫家法難行處。要授全家辟穀方。

雞戲

峩冠壯趾奮雄鳴。可惜單栖到五更。爲聘一雌相配匹。老夫家法最通情。

錦囊

老已中乾尙外強。嬉遊還逐少年場。怕人笑我詩才盡。特遣奚童背錦囊。

小遊仙

瑤草琪花引洞天。誤人春夢小遊仙。麻姑爪豈曾搔着。枉被方平一頓鞭。

舟行

知有烟村綠水灣。寥寥一犬吠柴關。百株楊柳千竿竹。惜不移家住此間。

二麥將收連旬大雨感賦

米價經年節節高。茅檐待哺正嗷嗷。麥秋時候連旬雨。天要殺人不用刀。  
麥已歉收雨猶未止而龍舟之戲尙華豔如昔感賦

正苦柴荒米貴時。龍舟仍復鬪羣麗。滿堂燕雀羣嬉處。中有饑寒世未知。  
只恐饑荒在眼前。中流鼓浪喧天。老夫聊亦逸場戲。不敢思量到半年。

血氣日衰竹初勸食人乳戲作

昔年乳藉養牛見釐書。供人乳今更軟飽功。驕貴莫嗔人代畜。貧癡要老遺意。

醉盤孩稚已扶牀。又費餐錢雇奶娘。黃口曾孫黃髮叟。一齊都帶乳花香。  
不煩燥濕効勤多。新婦居然暫作婆。若使屈尊呼乳媪。我年三倍長于他。  
味到寒儒始覺珍。不教涓滴瀉陶巾。恐防悞作蒸豚用。莫近人間富貴人。

無聊

天以無聊困此翁。轉尋生活寂寞中。一聯未穩何關緊。竟費推敲半日功。

兒童敲背

兒童娛我度良宵。如蕨拳輕把背敲。一个西瓜分八片。阿翁大費爲酬勞。

年來市間飯館漸小蓋窳戶工料增貴暗爲收減也感賦

瓷盃新傳縮地方。午餐計數似勝常。不知腹尺還依舊。只誑咽喉不誑腸。  
泥胚默滅世誰知。食量殘年本暗虧。似爲廉頗誇健飯。對人只說似平時。  
秘方妙以縮爲盈。頓使加餐浪得名。始悟軍前增竈法。老夫又欲去談兵。  
自因筭土費增加。埏埴雖工器漸差。此事隱憂殊不細。五材長價到泥沙。

十月二十二日爲余八十縣弧之辰前一日兒輩爲余演劇煖壽是時正白菜上市老夫方謀旨蓄禦冬膏

奴婢醜菜書此一笑

鄉風煖壽本無稽。兒輩尋歡欲借題。珠翠滿堂簫鼓沸。先生正製菜根齋。

費筠浦相公遠寄海虎珍裘。值冬暖幾至閣東。戲題三絕。裘出塞北俄羅斯國。色黑而毛密。中土人名之曰海虎。彼國不知何名也。

故人念我冷探梅。遠贈烏茸妙剪裁。可惜溫溫無所試。寄裘不帶雪霜來。

鄉律曾回黍谷暄。區區軟毳豈同論。相公自有調元手。裘到江南候早溫。

擬誇鄉里小兒曹。銜耀州來秦復陶。天不許更寒乞相。不如還贈舊綿袍。

僧了凡衣狐裘大有銜耀寒儒之意詩以調之

狐白袈裟課梵音。漫驕儒者捉寒襟。孔夫子面無金劍。不比瞿曇滿面金。

七條衣上帶餘纒。鬚毳煌煌氣色鮮。口不茹葷身不素。佛門何處野狐禪。

俊兒供饌頗嘉余。以其脾泄病催令服藥

子舍能供酒饌精。乃翁卻勸藥爐烹。一甘一苦雖殊味。總是人間父子情。

久不著鞦元。且須整鬪行禮而鞦底露黑以粉塗之戲作

粉應傳面美容華。何事朝鞦底亦搽。塗抹鉛華到雙腳。先生毋乃太驕奢。正字通無搽字。然東坡云。有幾個搽粉的虞候。則此字可補入詩韻。

西干故里

門巷依然淥水濱。釣遊陳跡黯傷神。我來便是遼東鶴。盡日曾無舊識人。

論詩

結習耽吟老未忘。尙隨年少角詞場。只愁後世無新意。不敢多搜錦繡腸。

報施

報施有定理。靜驗殊不然。但見天養人。不聞人養天。

同鄉舉消暑會。余以齒序屢叨首座。戲簡諸公。

冰廚消暑彷彿南皮。首座班尊絕等夷。我欲讓人人不肯。爲嫌漸近百年期。

余不喜茹素。自六歲隨先君子書館。卽無日不肉。然每食不過二兩。今年八十餘。約計已三千三四百斤。自惟庸姿。薄植。毫無益於世。而享此口福。良可愧也。

勵志雖甘咬菜根。未嘗一日不簞葷。有何功德施人世。食肉三千四百斤。

夜起占星

月離于畢雨應來。翹首占星望眼開。天要殺人何與我。乃勞夜起兩三回。

冬暖

只救人寒不救饑。饑荒那可更寒威。想天刀下留情處。尙念民間未贖衣。

草花

十笏庭齋傍水涯。鳳仙藍菊燦如霞。老知光景奔輪速。不種名花種草花。細碎花紋密似編。開來不值半文錢。若教巧匠金絲製。價又高懸索百千。

換衣

逝者如斯見化機。老來寒暖要防微。新秋一樣清風發。人着單衣我夾衣。

草花略澆灌。輒欣欣向榮。乃知賤種尤易滋長也。

草花謹灑沆泉清。偶荷滋培倍發榮。始悟六朝中正品。用寒人轉奮功名。

東籬

陸放翁舍東有隙地。插棘爲藩。植花木其中。取陶令詩意。名之曰東籬。余寓齋在石橋之東。隙地半畝。亦樊爲圃。雜植野卉。因亦以名焉。書以解嘲。

陶令東籬久著稱。放翁插棘我牽籬。可憐俱附前賢迹。已是三層最下層。

秋葵

葵高二丈俯中庭。花面鵝黃一色深。誇富漫言金滿地。吾家更有滿天金。

寓舍有二犬。余飯時只一犬來詢。知乃母犬。讓其子得殘炙也。感賦一骨拋投母不爭。小虜因得餉餘烹。由來舐犢關天性。不但人情也。物情同。牢百犬兆家和。讓食何爲只犬婆。旁有黠奴心暗笑。主人餘惠本無多。

白荷未殘黃葵又綻戲咏

雪白池荷正映欄。葵花黃又捲簷端。豪華欲傲王元寶。上有金盤下玉盤。

卽事

五月扁舟到暨陽。茶瓜清坐但迎涼。蕭齋不覺居停久。見了秧青又稻黃。聞庭半畝水之涯。雜卉羣芳總麗華。來是將開去將謝。此行端似爲看花。

自嘲

衣食無憂只讀書。不知此福怎消除。祇應老罰飢腸吼。饒向陳編拾唾餘。

六言

孝先任嘲便腹。坡老爭讓出頭。光燄不能萬丈。聲名那得千秋。

金風

聞向東籬玩物華。化工消息在萌芽。金風吹滿黃金色。叢桂園葵野菊花。

枕上

何物消閒味。詩多枕上成。卻將詩索枕。枕又寂無聲。



柳色

暑退農功又築場。秋來一雨一番涼。隄邊暗換垂楊色。不是嬌黃是硬黃。

肩輿拜客憫輿夫。勞瘁適食盒中有炙糕。各賞三條書以一笑。

雇得籃輿拜客遙。炙糕慷慨賞三條。輿夫不敢嫌慳吝。自笑朝來腹太枵。

無詩

每日耽吟到日西。幾於搜及角中麤。只愁明日無詩句。卽此無詩又一題。

花留客

雇得歸舟泊水湄。庭花連夕發妍姿。憐他似欲留儂住。臨別匆匆爲改期。

歸舟

揚台城南一葉舟。滿途黃葉已深秋。西風自是無情物。催我過歸不少留。

少睡

十二時中神影形。三時瞌睡九時醒。如何卽此三時內。又被南柯攪不甯。

見贖衣者戲賦

一夜霜寒贖敝衣。贖來便在櫃前披。看他顧盼自雄處。回去居然衣錦歸。

放懷

放懷漫擬地行仙。屋漏微光上有天。試聽衆禽俱報曉。鴉鳴常在鵲鳴先。

昨歲除夕香速內弟得一子書以奉賀

充闈佳氣藹春和。唱到徐卿二子歌。同是生兒君倍喜。當年相國望孫多。  
外舅文恭公。望孫最切。長君培斯。亦有添丁之信。

餘酥方飲歲除杯。繡閣俄欣送子來。未到三朝先兩歲。懸知風憲易成材。  
紛紛羊酒賀親鄰。湯餅筵開喜氣新。八十四翁來發兆。上堂親撫石麒麟。

從飯館中買半雞佐餐戲書

常時嚼蠟腐儒餐。買得家禽後食單。公膳一雙吾半隻。雖奢亦露秀才酸。

院中有芍藥而無牡丹戲書

牡丹素擅夫人號。芍藥甘居侍婢卑。堪笑先生欠莊重。風情只敢謔將離。

有以木瓜見贈者折芍藥報之口占二句

山齋有清供。氣味總相若。投我以木瓜。贈之以芍藥。

敝裘

輕暖貂狐價百金。書生空作苦寒吟。一衾裘敝偏多用。日當衣衫夜當衾。本意

三月十八日檀橋門首同看小茅山香會經過

竿木逢場好冶遊。小茅山會此停驂。門前來往人千萬。偷眼爭看兩白頭。

熙熙人共樂春臺。二老相隨笑口開。不比帷車避新婦。聽他看煞子瞻來。

空雷

有名無實每成空。天亦隨人染此風。一夜怒雷轟霹靂。明朝依舊曉霞紅。

四月十一二等日大寒圍爐就煖偶書

五月披裘氣自雄。我今四月擁爐紅。天教寒士添佳話。不但冬烘夏亦烘。

寓山塘五日

虎邱山下聚烟花。畫舫歌樓逼水涯。老我亦成游蕩子。順風相送不還家。

賀蔣霽峯郡侯得孫之喜

孫耳堪償得子遲。使君頭白要含飴。輸他東閣郎君福。十八青年便抱兒。  
堯母門應得寧馨。不輕誕降乃祥徵。息陰健翮培風厚。一出方知是大鷗。

姪十二月方產。

我方重赴鹿鳴筵。爲是庚科折桂仙。八十四翁來賀喜。竟須先後絃同年。

余以乾隆庚午科舉於鄉。今又屆嘉慶庚午例。得與新舉人絃先後同年。適閱吳梅村集。知梅村亦庚午舉人也。

發科同歲本非親。聲氣相聯誼亦敦。攀附名流吾最幸。絃同年直到梅村。

隱仙菴看桂

隱仙菴桂百年柯。金粟乘秋燦曼陀。怪我出門蜂蝶繞。只緣坐久染香多。

前朝寺觀遍城坊。都出權閹勢力強。獨有此菴留隱迹。故應俗煞衆韶瑤。  
相傳前明守備大監所造。

燕子磯

燕子磯邊坐結跏。嵐氛雲氣兩模糊。平明放棹棲霞去。一幅烟江疊嶺圖。

外孫湯文卿中式舉人喜賦

我方重赴鹿鳴筵。又喜東牀有後賢。一代賓興傳異事。外孫外祖絃同年。

哭蔣瑩溪

死盡交遊只剩君。君今又去更誰親。想因我命應孤獨。先降災星到故人。  
山陽笛已渺難追。數盡寧論日早遲。君去不須愁寂寞。我來應亦不交時。  
飾巾待盡便登程。屬纊惟餘我送行。眼看垂危無術救。剩將雙淚寫銘旌。

題明末肇高雷廉瓊五府巡撫李武舟家傳後

掌大山川漳海濱。前朝殘局有勞臣。馬場十八先生外。又一孤忠殉國人。是何節度強支持。戰敗丹心死不移。并少一杯乾淨土。預題止水後園池。

五更

倚壁燈光小。炷留宵。眠醒必五更頭。吾身自有時辰表。不用雞人報曉籌。

題金素中太守西瀛小築圖

家傍黃山客晉陵。寓齋十笏占西瀛。雅人所至皆名迹。況有林巒結構精。曾驅五馬走驂驪。澤遍閩南又濟南。縮本摹來雖尺幅。胸中海岱已全涵。

里俗戲劇余多不知問之僮僕轉有熟悉者書以一笑

燄段流傳本不經。村伶演作繞梁音。老夫胸有書千卷。翻讓僮奴博古今。

佳句

詩從觸處生。新者輒成故。多少不傳人。豈盡無佳句。

夢偉兒

多年不見見逾親。相對惟餘淚滿巾。夢斷不知何處去。殘燈無燄碧如燐。

蟻陣

萬蟻紛紛各逞強。縱強能占幾封疆。可憐不自知微末。結陣居然作戰場。

曝背

曉怯霜威犯鬢蟠。擬營暖室怕錢多。牆根有日無風處。便是堯夫安樂窩。

虛名

虛名久已積年陳。猶聽無憑宿世因。難道虛空如此大。不能容得一傳人。

旬日無詩

天機雲錦朗昭回。刀尺徒勞費剪裁。怪底經旬無一句。等他有句自然來。

五更不寐

結習難消已作魔。夢回不覺續吟哦。雞初鳴到雞聲歇。枕上詩功兩刻多。  
星斗闌干月下絃。沉沉柳鼓夜如年。老人夢醒荒雞叫。窗外窗中兩不眠。  
遙知霜氣颯寒空。小炷留燈一穗紅。臥榻旁偏有鼾睡。鬚童頭已觸屏風。

臘月廿四日大雪

曉窗驚見雪成堆。預卜豐登遍九垓。堪笑此翁都不管。只誇步履可探梅。

嘲梅

南梅北杏各爭妍。地氣人工有轉旋。鄧尉山前香雪海。如今真欲變桑田。  
水邊籬落影橫斜。品格高寒另一家。何事不知先避俗。官方開印亦開花。  
種梅處。多改種桑。蓋實利厚也。

新歲

袖手相看畏朔風。人人都想擁爐烘。不知凍面皮皆赤。只道貪杯發醉紅。

紅梅閣探梅

滿街簫管競繁華。閨歲春遲柳未芽。趁得今朝風日好。紅梅閣上探梅花。

探春

何處探春作冶遊。教人指說老風流。影娥池上凌波步。初月梅花第一樓。

江陰別業頗有竹木之勝率題絕句

邵堯夫偶結行窩。虧得前人剩澗阿。屋宇要新園要舊。貪他老樹綠陰多。

常時只想避羣鹿。晞髮扶桑未有因。今日始看林整就。可憐已是白頭人。

閩邸報有粵西宜山縣民藍祥年一百四十二歲。聖恩賞給六品頂戴御製詩章匾額並建坊銀幣恭記盛

事

兩古稀年并一身。昇平人瑞有耆民。直從九老香山會。千有餘年見此人。香山九老會。惟李元爽一百二十六歲。僧如備九十五歲。餘皆未九十。人生誰不慕高年。百歲光陰已似仙。到得添籌添破格。教人不敢想隨肩。計年杖國兩輪回。省得浮提又換胎。卻笑癡頑駘背叟。君年六十我纔孩。

寒甚

寒戀重衾夢尚迷。臥聽榔鼓小樓西。家風熟我刑于化。懶到荒籬亦少嘔。

元墓看梅

元墓看梅破曉寒。遲來數日已開殘。替身幸不辜來意。開遍山山白玉蘭。

到家正值山茶盛開

尋春步履過蘇臺。帶得餘香轉櫂回。笑比秦宮花裏姪。到家又值海紅開。

昨歲檀橋門首與同看小茅山會今檀橋已故香會又屆期不勝感愴

昨歲歡場共冶遊。小茅山會此停驂。傷心重過烏衣巷。兩白頭今一白頭。

入耳賦

元禮門高萬仞岡。肯教代作嫁衣裳。四知金到雖磨去。已是人間入耳賦。有人乞謝實孫請。向地方官說情。請以厚賂。節斥去之。謂此詩實關於

食。即是入耳賦也。見錢南蘇里子筆談。

城北門外有長壕一道萬柳參天綠陰可愛偶因拜客過之率賦

晉陵城北古壕邊。千樹垂楊冠野烟。八十年來身未到。今朝始識蔚藍天。

午節前連日大雨誌喜

彌空解澤信知時。城外栽秧內水嬉。苦樂雖殊情則一。大家都快雨淋漓。

新晴民皆跨街晒衣。肩輿多從桶襜下過。

積雨初晴衣共晒。街懸窮袴襦襜多。老夫不受淮陰侮。也復低頭胯下過。

水閣看龍舟競渡

水嬉金翠活龍鱗。遊舫千艘沸水濱。舉國若狂吾亦頗。屢豐年歲老期身。

暑不可耐劈瓜大片分。縛於胸膈項背以敵炎。敲戲書

抱冰應笑越王癡。貼得瓜瓢冷沁脾。翻似漆身爲癩子。滿身紅得血淋漓。

自幸

兩板衙門二頃田。書生願已不虛懸。慚他踏鼓東華客。高臥江湖四十年。余自四十六歲歸田。今八十五歲。里居已四十年矣。

露坐

星斗闌干夜氣清。淺涼坐到月初更。忽聞孩穉爭喧噪。撲得流螢似捉生。

又

貪涼露坐曲欄東。專候雲開月滿空。誰識月光猶帶熱。最涼還在月陰中。

譙鼓

譙鼓聲殘接曉烏。牀邊側几一燈孤。不知偶得驚人句。可有前人說過無。

偶得

果入輪迴要換胎。得新軀殼亦何哀。只嫌老馬爲駒處。八十翁翻作小孩。長晝蕭齋手一編。非關積學爲消閒。不知銅臭胸無字。何術支他日似年。

七月三十日常州新造寶塔燈觀者全集

俗愛嬉遊是晉陵。市頭米價漸加增。可憐滿肚皆藜藿。出郭爭看寶塔燈。

比鄰楊雲珊家老桂大開香透余室喜賦

比舍得芳鄰。如行慧山路。但聞桂花香。不見桂花樹。

乍冷

正愁煩暑似洪爐。忽漫秋風冷切膚。乍冷欺人吾不怕。巾箱尙有管寧襦。

和衣

老去令人服侍難。涼思披被暖思單。和衣頻換防生虱。又恐更衣犯曉寒。

卽景

千株垂柳綠當門。罨畫溪山是此村。何必平泉金谷墅。有濃陰處卽名園。

孫會

孫會羅列要遨頭。披簿呼來作近遊。吃飯穿衣吾不管。燕胎各有乃翁謀。

冒雨尋菊

節過重陽菊遍開。也須晴爽好銜盃。有何急事東籬下。帶水拖泥笠屐來。

流光

流光坐擲寂寥中。天以無聊困此翁。老去作詩多七絕。又從廿八字求工。

幻夢

卅年屏跡隱蒿萊。夜夢無端見上台。我不憶他他訪我。得非富貴逼人來。

上塚



已是橙黃橘綠天。出郊滿路說豐年。柁樓斜挂金銀鏹。知往鄉間上塚船。

皓首

皓首猶勤手一編。叢殘舊稿卷盈千。虛名垂老將傳世。活一年多百十年。

秋風

十笏書齋坐寂寥。門無俗客把門敲。秋風吹落梧桐葉。露出梢頭老鶴巢。

涼枕

冰霜氣已失暄和。涼枕如何戀夢多。莫是壯心猶不已。暗中自煉鐵頭陀。

消閒

消閒還藉讀書功。已似殘燈燄不紅。年紀益增學益退。得非真个老還童。

坐守

經年坐守故書堆。一事無成信可哀。始覺孟嘗門下客。雞鳴狗盜亦奇才。

水轆頭

俗愛嬉遊是虎邱。翻新市語亦風流。冶坊濱裏船將泊。先放三回水轆頭。

王申元日

新年又益海籌長。八六耆齡力尙強。笑引古人相比較。居然已勝郭汾陽。

喜晴

窮陰匝月困愁霖。我道將來必有晴。今日果如吾所料。一輪紅日滿窗明。

早醒

荒雞臚臚一燈昏。風露寒侵夜嚮晨。譙鼓未終殘夢破。人間第一早醒人。

僮約

少日曾嗤蝨處禪。老來習懶漸成真。預頹僮約如軍令。除了看花不出門。

長畫

掩關長畫守蓬廬。何物消閒度索居。虧得健忘無記性。古書看過似新書。

論詩

詞客爭新角短長。迭開風氣遞登場。自身已有初中晚。安得千秋尙漢唐。

天河

候屆農忙正熟梅。夜瞻星斗朗昭回。虧他多少銀河水。忍住空中不下來。

五月廿三日大雨四五寸誌喜

正插秧時大雨來。綠禾高下一齊栽。吳儂相見無他語。萬口同聲大發財。

四野翻犁盡叱犍。懸知天亦卹民艱。向來錯厖屯膏慮。只道天公不破慳。

漸矮

口堂須要攝齊升。舊着衣衫覺暗增。兒輩漸長吾漸矮。聊欣跨竈有先徵。

經史翼宸故居

城東經過舊青門。天尺軒猶綠蔭繁。三步回車仍腹痛。最難忘是舊承恩。

香牛皮席

香牛皮席擬涼生。汗漬無眠直到明。笑我著書曾未寸。翻教忝竊汗牛名。

病起

風寒暑濕病相乘。此亦何妨撒手行。勞動滿城相問訊。雖非姻舊亦關情。

得雨

今年天總代農耕。欲雨而雨晴而晴。不知何福能消受。翻恐都驕作惰民。  
有語皆成嘆。非魂亦作魔。聊書宵寐句。扎闕去撝訶。昔人有書夜夢不祥。書門大吉。爲宵寐非禳。扎闕供麻者。故戲用之。

阿四

阿四頻年爲我忙。飢催羹飯渴茶湯。老來事事需人助。直把僮奴作奶娘。  
曉市家家要破錢。獨尋煤店解腰纏。買來炭壑盈三百。似尙留儂要過年。

頭緒

頭緒紛如不斷絲。一程來了一程追。直須炊到黃梁熟。始是盧生夢醒時。

趙 翼 著

# 甌北詩鈔

仿古字版排印

趙甌北天才踔厲。詩有奇氣。與蔣心餘袁子才並稱三大詩人。而甌北之詩。得江山戎馬之助。發抒爲奇。當夫乘輅問俗。停鞭覽古。興酣落筆。百怪奔集。故雄麗奇恣。不可逼視。全詩約二千篇。五古、七古、五律、七律、絕句等無一不備。全書以仿古字版排印。世之嗜好甌北詩者，不可不讀。

精裝一冊

(新裝掛號)  
一角三分

世界書局發行